





14-18.A.17



PHILOSOPHIÆ,
A C
MATHEMATICÆ
TOTIVS
INSTITVTIO,

Cum Assertionibus disputatis, &
vario genere Problematum.

Ad usum Studiose Iuventutis


Authore

P. PETRO GALTRVCHIO,
AVRELIANO, Societ. IESV.

M A T H E M A T I C A.



VIENNÆ AVSTRIÆ,
In Bibliopolio IOANNIS BLAEV,
M D C L X I.



S A N C T O
I O S E P H O,


Quem Dominus constituit
SVÆ CARNIS NVTRITIVM,
SVÆ MATRIS SOLATIVM,
Et Magni Consilii in terris Coadjuto-
rem Fidissimum.



Revit in Tuo sinu Sapiaentia
(IOSEPH SANCTIS-
SIME) & omnis scientiæ
thesaurum singulari jure
possides: Illum enim habes
Filium, qui rerum omnium
naturam, & formas Patri repræsentat; &
quanvis eum non genueris, paterna tamen
jura obtines, quorum id maximum, ut pa-
trem nihil celet. Est itaque Tuus liber, in
quo formatæ sunt universæ notiones, &
Tuus Doctor, qui Divina omnia & huma-
na explanat. Idoneum certè capacémque
Auditorem nactus, nullum est Doctrinæ
genus, quod non explicuerit. Et Tuam ve-
rò intelligentiam debuit implere scientiâ,
virtutibus voluntatem, cum summam vel-
let absolutissimi hominis ideam informa-
re. Te igitur præ aliis sibi Patronum pru-
denter admodum optavit Mathesis hæc
nostra, suis in tenebris nunquam illustrior,
quàm ubi luce splendet Tuâ. Atque hoc

A 2

illa



illa ad Te adit confidentiùs, quòd Tuam
se penè priùs fuisse meminit, quàm esset
sua. Tua certè fuit tum maximè, cum Or-
bis molitorem vel ipsum in fabrilibus po-
tuisti habere discipulum, artisque nostræ
supellectilem, Dei hominis sudoribus con-
secrasti; ut quæ humana priùs fuerat scien-
tia, ex tanto tyrone fieret omninò Divina.
Magnum illa secum clientum comitatum
adducit, ut sit sæpiùs Tua. Illæ omnes ni-
mirum latent tenebris involutæ, nisi lumen
infundis. Cæcam se esse profitetur Optica,
lucem ut à Te hauriat meliorem. Solis lo-
cum in Cœlo quærere negligit Gnomoni-
ca, quia domi Tuæ invenit. Labores om-
nes suos incusat Astronomia, dum quæ in
Cœlis tandiu quæsivit sydera, in I E S V,
M A R I A, & I O S E P H O, in tribus omnia
deprehendit. Magnitudinem Tuam meti-
ri gaudet Geometria, nec Te metiri feli-
ciùs potest, quàm cum omni mensurâ ma-
jorem profitetur. Augustas, quibus frueris,
dotes vellet numerare Arithmetica, sed
ecce numeros omnes suos impendit, &
vix numeravit. Omnes denique simul Te
vident, simul ad Tuæ radios gloriæ obstu-
pescunt, & quæ se priùs posse multùm ja-
ctabant, nihil se posse mirantur. Accedit
igitur ad Te Mathesis nostra, ut illi par-
tem infundas ejus sapientiæ, quæ totam se
Tibi tradidit; & quæ Tua semper fuit,
illam, dum in Te refunditur, peculiari hoc
munere facias iterum Tuam.

Ad Vniversam Mathematicam.

Mathematica, seu *Mathesis*, Græca vox est, quæ Disciplinam significat. Quod quidem nomen, etsi facultatibus aliis commune est, hæc tamen illud sibi veluti proprium vindicavit, ob specialem certitudinem ac evidentiam tum principiorum, tum conclusionum. Olim pueris, antequam ex Grammaticâ facerent gradum ad Philosophiam, solebat tradi: unde scientia puerorum ab Aristotele nuncupatur. Non enim habet solum in se amœnitatem ac delicias, sed præterea quoque ad Philosophiam percipiendam affert commoda quàm plurima; nec volebat Plato eam ob causam aditum suæ scholæ patere illi, qui Mathematicus non fuisset.

Dividitur vulgò quatuor in partes, quarum prima est *Arithmetica*, tum *Geometria*, ac deinde *Musica*, & *Astronomia*. Quanquam loco *Astronomia* alii commodius subiiciunt *Cosmographiam* seu *Spheram Mundi*, quæ complectitur tum ipsam *Astronomiam*, tum *Chronologiam*, seu *Temporum solarium ac lunarium doctrinam*; iisque affinem *Gnomonicam*; ac denique *Geographiam* seu *Spheram terrestrem*, adjunctâ *Staticâ*. Atque ita rectè ajunt, *Mathematicas Disciplinas* per se primò versari circa quantitatem, vel discretam, vel continuam; sive permanentem, qualis est quantitas corporum naturalium, prout est mensurabilis, variasque habet cum aliâ proportionem; sive successivam, qualis est motus cœlestis. Quo tamen loco advertendum est, quantitatem considerari tantum secundum se, abstrahendo ab omni materiâ, quamvis de facto & à parte rei non sit nisi conjuncta materie. Eoque sensu jactatur illud paradoxum: quan-

titas Geometrica ubique est, & nullibi, quia nullum est corpus nisi sub quantitate, sicque est quantitas ubique; cum tamen nullibi sit de facto, ea ratione, sub qua consideratur à Geometria.

Tractionem hanc ordior ab Arithmetica, quæ inter alias prima est ordine necessitatis, & ab iis præsupponitur; ut enim tam multa passim argumentis Geometricis demonstrari solent, sic usui est Geometria Arithmetica.

Notandum verò est Arithmetica & Geometriam dici puras Mathematicas; alias autem esse mixtas cum Physica. Item

Not. 2. Ab aliis postmodum authoribus inter Mathematicas Disciplinas numerari Opticam de variis generibus visionis ac radiorum visualium. Tum his accedunt primò, Hydraulica, de iis quæ sunt in aquâ; secundo Pneumatica, de iis quæ in aëre. Sed istarum omnium facultatum principia suis locis explicantur in Physica. Quæ autem attinent ad Architecturam; siue communem de construendis adibus; siue militarem de munitionibus: non sunt instituti philosophici, nec potiori jure ad Mathematicam revocantur, quàm alia opificiorum genera propè innumera. Qui tamen de muniendis castris & urbibus libelli tam sæpe jam editi sunt, illi absque ullo negotio comprehendendi poterunt ab eo, qui Arithmetica & prima Geometria rudimenta calluerit.

METHODVS

- E T

INSTITVTIO

MATHEMATICÆ.

ARITHMETICA.

PARS PRIMA

De Numeris integris.

CAP. I. *Natura & partes hujus Facultatis.*



Duplex est Arithmetica. Prima est Theoretica seu Speculativa scientia, de naturâ & proprietatibus numerorum; Altera autem, quam inodò prosequimur, est Practica, varias numerorum inter se committendorum rationes tradens, & vulgò dicitur, Ars numerandi.

Numerus est ordinata unitatum multitudo; unitas porro est, unde res quælibet dicitur una. At istæ sunt decem figuræ, seu characteres, quibus describuntur numeri omnes.

1. 2. 3. 4. 5. 6. 7. 8. 9. 0.

Notandumque est 1. figuram ultimam, quæ cyphra seu zero vocatur, nihil significare per se aut seorsim sumptam, sed tantum ubi ad aliquam ex aliis consequitur. Item

Not. 2. Hic maximè considerari ordinem, ut habeatur singularum valor. Incipit autem à

dextrâ sinistram versùs more Hebræorum & Phœnicum, à quibus inventa est Arithmetica, quique hanc rationem in scribendo servant. Quæ igitur primo loco posita est figura, seipsam tantùm repræsentat, est enim locus unitatum. At secundo loco sunt denarii, tertio centenarii, quarto millenarii numeri, & sic deinceps; ita ut quælibet sedes ab immediatè consequenti superetur semper in decupla proportionem. Gallicè hoc pacto numeramus: *Nombre, dixaine, centaine, mille, dixaine de mille, centaine de mille, millions, dixaine de millions, centaine de millions, &c.*

Notabis ultimè Additionem, Subtractionem, Multiplicationem, Divisionem, tum Regulam proportionum, esse potissimas species Arithmeticarum operationum, quibus alia id genus problemata & quæstiones Geometricæ resolvuntur.

C A P. II. De Additione.

Additio est duorum vel plurium numerorum in unam summam collectio. Hæc illius perficiendæ est methodus:

Primò quidem numeros simul addendos sic dispone, ut unus sub alio directè collocetur; nempe unitates sub unitatibus, denarii sub denariis, & sic de aliis. Atque ita si pari multitudine figurarum non constant, scribendæ sunt primæ sub primis: quamobrem vacuitas in sinistra solùm parte reperietur.

2. Ducenda est linea, infra quam summa totalis describatur.

3. Omnes numeri ejusdem gradus, & sub eadem serie directi, sigillatim sunt colligendi, & summa ex iis collecta subscribenda est. Hac tamen

men lege, ut in singulis collectionibus unum tantum scribas, eumque extremum characterem; alium autem serves, illumque conjungas cum iis, qui postea etiam colligendi sunt, dum tandem omnia adscribas, quando seriei ultimæ collectio fuerit perfecta. *En exemplum.* Sit summa totalis horum numerorum colligenda.

9	8	2	
8	0	3	
	6	1	
9	4	9	3
1	1	3	3

Summa totalis.

Examen

8
8
8

Sic dico primò. 3 & 1 sunt 4. deinde 4 & 3 sunt 7. tum 7 & 2 sunt 9. subscribo igitur 9 directè sub collecta serie. Postea pergo ad aliam seriem, & dico: 9 & 6 sunt 15. deinde prætermisso illo zero, quod occurrit, dico, 15 & 8 sunt 23. subscribo igitur 3. & servo, vel, ut vulgè loquuntur, retineo alium characterem, nempe 2, quem jungo cum serie consequente, & dico, 2 & 4 efficiunt 6. deinde 6 & 8 sunt 14. tum denique 14 & 9 reddunt 23. scribo igitur 3. & servo 2. Ac tandem dico, 2 & 9 efficiunt 11. scribo igitur 1 directè sub 9. & appono 1. patetque summa totalis.

Examen vulgè affertur istud, tutumque est, si nulla inducatur fallacia. Tolle ex numeris addendis 9. quoties fieri potest; tum residuum annota. Postea verò idem præsta in summa totali. Si residua illa consentiunt, res probè peracta est, ut patet in allato exemplo.

CAP. III. De Subtractione.

Subtractio est subductio numeri unius ex alio; ut sciatur, quid residuum fuerit. Hic autem

autem agitur solum de minori subtrahendo ex majori. Rem hac arte conficies :

1. Numerus subtrahendus collocandus est sub majori , primis utriusque notis sibi directe respondentibus in eadem serie.

2. Infra ducenda est linea , cui subscribatur residuum.

3. Sigillatim numeros inferiores subtrahe à superioribus : residuum autem scribe eadem in serie infra lineam. En exemplum :

$$\begin{array}{rcccc}
 7 & 9 & 3 & 9 & \text{major numerus.} \\
 4 & 0 & 3 & 5 & \text{numerus subtrahendus.} \\
 \hline
 3 & 9 & 0 & 4 & \text{residuum.}
 \end{array}$$

Sic age. Quando ex 9 tolluntur 5 , restant 4. scribo infra 4. tunc pergo in hunc modum. Si quis ex 3 tollit 3, nihil restat , subscribo igitur zero ; neque enim ullus ejusmodi locus debet relinqui vacuus.

Item si quis ex 9 tollat 0 , id est nihil , remanent 9. scribo igitur 9.

Item si ex 7 tolluntur 4, restant 3. & scribo 3. tuncque est perfecta operatio , habeturque summa residua.

Notandum verò est 1. si nota inferior majoris fuerit valoris , unde ex superiori subtrahi nequeat, debetis mutuari unitatem ex proximè sequenti. Sed hic observanda sunt duo : Primum est , notam eam , ex quâ desumpta est unitas , censeri postea debere minorem unitate. 2. Unitas illa desumpta sequenti adjungi debet instar numeri cujusdam denarii. Exemplum.

$$\begin{array}{rcccc}
 5 & 4 & 5 & 7 \\
 5 & 3 & 9 & 8 & \text{numerus subtrah.} \\
 \hline
 0 & 0 & 5 & 9 & \text{residuum.}
 \end{array}$$

Si quis ex 7 vult tollere 8, non potest. Debet ergo mutuari unitatem à nota propinquiore, nempe à 5; quæ quidem unitas per mentem si lubet iuncta cum 7, facit 17. à quo numero si subtrahis 8, restant 9. Deinde verò cùm figura 5 supponatur unitate minor, sic dices; si quis vult tollere 9 ex 4, non potest. Ergo pariter mutuari debet unitatem ex notâ propinquiore, nempe ex 4, nec consequenter erit valoris nisi 3. Iunctâ autem illâ unitate cum 5, fient 15, unde subtrahes 9. & restabunt 5. Ac tandem cùm nihil restet, si subtraxeris 3 ex 3, tum 5 ex 5, summa hujus residui est tantum 59.

Notabis 2. Quod si proximè sequens nota fuerit zero, imò si plura etiam sequantur zero, debebis ad magis propinquam notam numeralem semper confugere, illique detrahere unitatem; tum valorem illius distribuere in omnia illa zera, quæ consequuntur; quod fiet si singulis ejusmodi zerotis intermediis per imaginationem saltem apposueris 9. ultimæ autem notæ, ex quâ facienda est subtractio, apposueris unitatem, quæ illius valorem, ut jam monui, augebit 10 unitatibus. Rem considera in exemplo.

$$\begin{array}{r}
 6000402 \\
 5789246 \text{ subtrah.} \\
 \hline
 211156 \text{ resid.} \\
 \hline
 6000402 \text{ examen.}
 \end{array}$$

Quia enim ex 4 oportet mutuari unitatem, cujus valor comparativè ad 2 est 100, hunc valorem reddes, si supponas 9 loco illius zerotis, tum unitatem veluti præfigas ad 2. Quare consequenter sic dices; qui ex 12 tulerit 6, restant 6.

deinde qui ex 9 tulerit 4, restant 5. si tuleris 2 ex 3, (nam illi 4 detracta est unitas) restat 1. Iam verò quia ex 0. non potes auferre 9, mutuaris unitatem ab illo 6, quæ adjecta ad illud 0 efficiat 10, suppositis 9, pro singulis aliis zerotis; unde sic ages; si tollas 9 ex 10, restat 1. si 8 ex 9, restat 1. si 7. ex 9, restant 2. Cùm autem detracta fuerit unitas illi 6, si ex eo tollas æqualem numerum inferiorem, nihil restabit.

Examen hujus operationis fit per additionem residui cum numero subtrahendo, debetque summa producta esse æqualis cum numero superiori, ex quo facta est subtractio, ut patet in allato exemplo.

CAP. IV. De Multiplicatione.

Multiplicatio, est ductus unius numeri in alium. Fit autem illè ductus, ubi toties augetur alter numerus, quoties in altero unitas continetur. Vt si quæsieris, quem numerum reddant septies decem. Hac methodo perficitur istiusmodi operatio.

Primò, describatur numerus multiplicandus. Secundò, illi sub extremis characteribus ad dextram subjiciatur multiplicator. Tum tertio, ducatur linea, infra quam scribatur productum. Hoc modo:

3 0 4 6 3 *numerus multiplicandus.*

2 0 4 *multiplicator.*

1 2 1 8 5 2 *productū ex ductu primi numeri.*

6 0 9 2 6 0 *prod. ex ductu zerotis, tum postea & tertii numeri.*

6 2 1 4 4 5 2 *summa totalis.*

Numeris ergo illis ritè sic dispositis, ducuntur singulæ notæ multiplicatoris in singulas mul-

multiplicandi. Hoc pacto. quater 3 sunt 12. scribo 2, & servo 1. deinde sic pergo; quater 6 sunt 24. quibus unitatem servatam addo, & fiunt 25, scribo igitur 5, & retineo 2. atque ita deinceps pergatur.

Notandumque est 1. Primam notam producti numeri debere semper disponi sub eâ, quæ ducitur in numerum multiplicandum. Sic in allato exemplo, 2 directè ponitur sub 4. tum zero sub zerote multiplicatoris, ac denique 6 sub 2.

Notabis autem 2. In isto exemplo, pro secundâ figurâ multiplicatoris non describi seriem particularem aliquam; cum enim multiplicator ille sit zero, sufficit si subscribatur unicum zero. Deinde sequens nota multiplicatoris ducitur in multiplicandum, ut nova series producat.

Not. 3. Quod peractâ multiplicatione, ubi sunt plures notæ in multiplicatore, & consequenter plures productæ series, illarum summa totalis colligenda est per additionem; ductâ, ut fieri solet, lineâ.

Not. 4. Quemadmodum etiam hac arte colligatur, quot sint partes in aliquo toto, putâ quot sint asses in 10000 francis, si francos istiusmodi multiplicaveris per 20. Item quot sint v. g. horæ in anno dierum 365, qui singuli constant 24 horis. Nam si 365 multiplicaveris per 24, prodibit quæsitus numerus; & sic de aliis. Cùm autem istiusmodi operatio non perficiatur nisi in multiplicatione numerorum digitalium, eorum scilicet, qui numero digitorum respondent, & exprimuntur decem characteribus arithmetice sigillatim sumptis; huic negotio valde opportunus est usus tabulæ Pythagoricæ, quam tyroni subijcio.

1	2	3	4	5	6	7	8	9	10
2	4	6	8	10	12	14	16	18	20
3	6	9	12	15	18	21	24	27	30
4	8	12	16	20	24	28	32	36	40
5	10	15	20	25	30	35	40	45	50
6	12	18	24	30	36	42	48	54	60
7	14	21	28	35	42	49	56	63	70
8	16	24	32	40	48	56	64	72	80
9	18	27	36	45	54	63	72	81	90
10	20	30	40	50	60	70	80	90	100

Quæris videlicet exempli causâ , quid faciunt septies 9. vide 7 in limbo laterali; tum in limbo superiori 9 , & in duorum concursu habebis 63. atque ita de aliis.

Quod si in promptu non est hæc tabula , rem hac ratione conficies. Dispone illa duo in serie directa , nempe 9 supra 7. tum secundò utriusque distantiam usque ad decem è regione unius cu-

cujusque adscribe, puta 1 è regione 9 & 3 è regione 7. Deinde tertid, quod facile est, ducatur una distantia in aliam, & productum subscribe, servando, si quid servandum est. Quartò una distantia tollatur ex numero in crucem appposito, ac residuus numerus scribatur infra, illi addendo, si quid priùs servatum fuerit. Hinc resurget multiplicatio quæsita. Sic enim ter unum reddit 3. scribo ergo 3. tum detraho 1 ex 7; vel 3 ex 9, & restant 6. unde sequitur septies 9 esse 63.

$$\begin{array}{r} 9 \quad 1 \\ \times \\ 7 \quad 3 \\ \hline 6 \quad 3 \end{array}$$

C A P. V. De Divisione.

Divisio est partitio seu distributio dati numeri in partes ab altero dato numero determinatas. Vt si velis dividere 1272 nummos in 6 homines, quæritur, quota pars unicuique competat; Idemque est ac invenire numerum, qui significet quoties unus contineatur in alio, unde & appellatur quotientis. Quamobrem in divisione tres numeri considerandi sunt, certoque ordine disponendi; huncque esse maxime idoneum existimo. 1. Scribe numerum dividendum, qui semper esse major debet. 2. Interjectis duabus lineis parallelis dispone divisorem sub dividendo, ita ut si divisor plures habuerit notas, primam habeat directè positam sub prima dividendi, si tamen hæc major fuerit, aut saltem æqualis; alioqui constituenda foret tantum sub secunda nota. 3. Quotientem appones inter lineas directè supra ultimam divisoris notam, si plures habuerit; unde & apparebit statim, quot futuræ sint in eo quotientis figuræ.

Atque his suppositis, quinque omnino sunt præstandæ operationes ad singulas quotientis notas

notas determinandas , comprehendunturque hoc versiculo :

Quare quotum ; quo multiplices : dein subtrahere : dele :

Denique promoveas.

Promoveas inquam , ut simili modo novum quotientem investiges. Rem explico in exemplo jam citato.

$$\begin{array}{r}
 \text{†} \\
 \text{† } 2 \text{ } 7 \text{ } 2 \quad \text{numerus dividendus.} \\
 \hline
 2 \text{ } 1 \text{ } 2 \quad \text{quotiens.} \\
 \hline
 6 \text{ } 6 \text{ } 6 \quad \text{divisor.}
 \end{array}$$

Quia divisor 6 superat valorem primæ notæ numeri dividendi , constituitur sub secunda, ut quæratur quoties 6 in 12. reperitur autem bis. Quare pono 2 pro quotiente. Deinde multiplico divisorem per illum quotientem , fiuntque 12. Atque hunc numerum subtrahio ex superiori, nihilque restat. His itaque figuris deletis, quasi negotio in iis confecto ; promoveo divisorem 6 ad notam proximè sequentem , ut iterum idem præstem, & quæram, quoties reperiat in 7. Quia igitur semel tantum reperitur , pono 1 pro quotiente. Deinde dico semel 6 est 6. tum hujus numeri facta subtractione ex 7 deletur , & unitas residua inscribitur. Ac postea promovetur iterum divisor , eademque semper fiunt operationes, quandiu supersunt numeri, in quibus divisor reperiri potest. Alioquin si numeri supersunt , in quibus divisor repëriri non possit, illi lineolâ aliquâ intercipiendi sunt, tanquam residui ex toto , & tanquam fractiones ,
 seu

sen minutia. Vel si lubet, seorsim ponuntur, facta lineola, supra quam describatur ille numerus residuus, tanquam fractionis numerator; infra autem divisor tanquam denominator; quod sequenti parte explicamus. En exemplum, in quo dividuntur 942 per 7. quotiens, est numerus 134, restantque 4.

$$\begin{array}{r}
 23 \\
 942 \\
 \hline
 134 \\
 \hline
 777
 \end{array}
 \qquad
 \begin{array}{r}
 4 \\
 \hline
 7
 \end{array}$$

Notandum verò est 1. Quotientem non posse unquam sumi majorem, quam 9, quicquid contigerit.

Not. 2. Si contingat divisorem, dum adhuc promoveri potest, non posse reperiri in partibus numeri dividendi sibi respondentibus, ponendum est zero pro quotiente, & promoveri ultra debet divisor. Item

Not. 3. Cum plures sunt notæ in divisore, satis est si quærat de prima ipsius nota, quoties in partibus dividendi ipsi primæ notæ respondentibus reperiatur. Tum reperto quotiente, per illum totus divisor multiplicari debet, & productum ex numero dividendo subtrahi. At si contingat, partem illam numeri dividendi esse minorem, unde divisor multiplicatus subtrahi non possit, erit semper minuendus unitate, dum factâ ipsius multiplicatione, possit subtrahi ex numeri dividendi parte respondente. At

Notabis 4. Eos tantùm characteres , qui sunt versùs sinistram, & quibus directè respondet divisor, eos, inquam, tantùm reputari positos supra divisorem. Hæc autem sic in exemplo explico:

$$\begin{array}{r}
 1 \\
 4 8 2 \\
 9 6 2 \\
 \hline
 3 5 \\
 \hline
 2 7 7 \\
 2
 \end{array}$$

Volo dividere 962 per 27. quæro in 9. quoties 2. Potest quidem reperiri quater : sed quia numerus productus ex ductu 4 in 27 , major foret , quàm ut posset subtrahi ex numero superiori 96 ; ideo quotiens ille minuendus est unitate , ponendusque est numerus 3. qui multiplicans 27, producit 81. hujusque subtractio ex 96. relinquit 15.

Tum postea divisor promovetur ad notam proximè sequentem ; quo facto ; quæro in 15. quoties 2. & quidem in eo reperiri potest septies : sed quia ex septies 27 infertur numerus major , quàm ut subtrahi possit ex notis supra respondentibus , nempe ex 152 : ideo quotiens ille minuendus est unitate ; fitque 6. Verùm quia etiam, pari modo contingit numerum esse majorem ; illi quoque detrahenda est unitas ; videturque tandem convenire 5. pro quotiente , per quem multiplicatur divisor ; numerusque inde productus, ubi ex superiori 151 subtrahitur, relinquit 17. sicque perfecta est divisio.

Not.

Not. 5. Divisionem probari per multiplicationem. Si enim quotientem duxeris in divi-
forem, aut è contra; tum producto addideris
residuum ex divisione, si quod fuit; summa
totalis erit eadem cum diviso, si rectè perfe-
cta est divisio. Ita vicissim multiplicatio pro-
batur per divisionem. Si enim divides produ-
ctum ex multiplicatione per ipsius multiplica-
torem, quotiens debebit esse idem cum numero
multiplicando.

Porro quævis hæc quæcunque traduntur
in Mathematica, videantur satis per se clara;
moneo tamen, tyroni semper adhibendam esse
periti alicujus magistri operam, ut commodiùs
instituantur praxes istiusmodi, comprehendan-
turque.

P A R S S E C V N D A DE NUMERIS FRACTIS.

C A P. I. *Eorum natura & diversitas.*

Numerus fractus, seu fractio vel minutia,
ut alii vocant, est una pars, vel plures
partes numeri alicujus integri in partes
æquales divisi. Ita si nummum divides in quin-
que partes æquales, illæ dicentur quintæ partes.
Aut si unam tantùm sumpseris, illa dicetur una
quinta, quomodo & ex illis possunt sumi vel
duæ, vel tres, vel quatuor quintæ.

Notandumque est in fractione duos esse nu-
meros interjecta lineola divisos, ut $\frac{2}{5}$ atque
horum alter, qui infra est descriptus, vocatur de-
nominator, qui scilicet indicat partes eas esse
rales,

tales, putà vel quintas, vel tertias, vel quartas. Qui superior est dicitur numerator, quia significat in illa fractione contineri tot partes. Puta in exemplo modò adscripto sunt duæ quintæ, sic $\frac{20}{14}$ dicuntur viginti decimæ quartæ. Sic diximus residuum in divisione fieri numeratorem, cujus denominator est divisor.

Notabis autem secundum. Fractionem æquivalere uni integro, si numerator & denominator sint æquales, ut in istis exemplis

$$\frac{2}{2} \quad \frac{3}{3} \quad \frac{4}{4} \quad \frac{5}{5} \quad \frac{25}{25} \quad \&c.$$

Nam duæ mediæ aut tres tertiæ sunt idem, ac totum ipsum integrum. Alioquin si numerator minor est denominatore, tum fractio minor est, quàm totum, ut $\frac{2}{4}$. Contrà verò si numerator fuerit major, tunc fractio est major, quàm totum: puta $\frac{4}{3}$ nam tres quidem tertiæ totum constituunt, quibus superadditur & quarta in isto exemplo.

Item fractiones illæ sunt æquales, quarum numeratores eandem habent rationem ad suos denominatores. Ita medietati integri alicujus

$$\text{æquivalent } \frac{1}{2} \quad \frac{2}{4} \quad \frac{3}{6} \quad \&c.$$

CAP. II. Reductiones Fractionum variis problematis exponuntur.

PROBL. I. Reducere fractionem ad minores terminos. Divide tam numeratorem, quàm denominatorem, per numerum aliquem eundem communem; sic dabitur fractio æquivalens sub minoribus terminis. At si numerus dividi in duas

duas partes æquales nequit, dividendus est in 3.

Ita enim $\frac{1}{5}$ æquivalet $\frac{3}{15}$

Probl. 2. *Integros numeros reducere ad datam fractionem.* Putà quinque integra in suas partes sextas. Multiplica denominatorem istiusmodi fractionis, putà 6. per integra illa 5, fient 30 pro numeratore, quibus interjecta linea subscribo 6. & habebis intentum.

Probl. 3. *Reducere fractum numerum ad integros.* Suppono fractionem continere saltem numerum aliquem integrum, & consequenter numerator debet esse maior denominatore. Divide igitur numeratorem per denominatorem, Quotiens dabit numeros integros, si plures sint, residuum autem denotabit fractiones superantes.

Probl. 4. *Diversas fractiones reducere ad eandem denominationem.* Putà $\frac{4}{5}$ A; tum B $\frac{6}{8}$

Multiplica denominatores inter se, prodibitque communis denominator, nempe 40. Tum 2. ducas numeratorem fractionis A, nempe 4, in denominatorem fractionis B, nempe in 8, fientque 32 pro numeratore fractionis A. Quæ

consequenter erit $\frac{32}{40}$ Ac deinde ducas pariter numeratorem B, id est 6, in denominatorem

A, nempe 5, fient 30. eritque fractio $\frac{30}{40}$ ejusdem denominationis cum altera. Atque ita

fractiones $\frac{32}{40}$ & $\frac{30}{40}$ eadem erunt cum

$$\frac{4}{5} \text{ \& } \frac{6}{8}$$



CAP. III. *Additio fractionum.*

Reductis fractionibus ad eandem denominationem, adde omnes simul numeratores, eodem denominatore subscripto, & perfecta est operatio ita ; $\frac{4}{6} \frac{3}{6} \frac{2}{6}$ æquivalent $\frac{9}{6}$

CAP. IV. *Subtractio fractionum.*

Minorem numeratorem subtrahere à majori, facta reductione ad eundem denominatorem. Et factum bene.

CAP. V. *Multiplicatio fractionum.*

1. **M**ultiplica numeratores inter se, & productum erit numerator.
2. Similiter multiplica denominatores inter se, & productum erit denominator.

CAP. VI. *Divisio fractionum.*

Esto v. g. dividenda fractio $\frac{2}{3}$ per $\frac{3}{4}$ quæ postrema fractio erit divisor. Primò duc denominatorem divisoris in numeratorem dividendi, putà 4 in 2. & habebis 8, pro numeratore quotientis quæsitæ. Item duc numeratorem divisoris in denominatorem dividendi, & habebis 9 pro denominatore quotientis quæsitæ. Quare $\frac{2}{3}$ divisæ per $\frac{3}{4}$ reddunt $\frac{8}{9}$

P A R S T E R T I A

DE PROPRIETATIBVS N V M E R O R V M.

CAP. I. *De Ratione, proportionē, & progressionē numerorum.*

Ratio & proportio tum in quantitate mobilis, seu in continuo, tum in numeris reperitur; nec rarè confunduntur ratio & proportio. Nam in usu vulgari quæ est strictè ratio, dicitur & proportio. Ratio autem propriè est habitudo duarum inter se quantitarum generis ejusdem. Ita linea pedalis & bipedalis dicuntur inter se habere rationem duplam, quia 2 bis continentur in 4. At propriè proportio est similitudo rationum. Vt enim habitudo & comparatio duarum quantitarum inter se vocatur ratio; ita habitudo & comparatio illarum rationum est propriè proportio, proportionalitas & analogia. Cujusmodi est inter 2 & 4. tum inter 4 & 8. ut enim se habet 2 ad 4, ita 4 ad 8.

Notandum verò est in quantitate & numeris genera rationum seu proportionum esse diversa. Primò enim alia dicitur rationalis, alia irrationalis. Rationalis est illa, quæ potest numeris exhiberi, qualis reperitur inter lineam 10 pedum, & lineam 20. Irrationalis contrà, quæ non potest numeris exprimi, ut quæ reperitur inter quantitates incommensurabiles. Sed

Notabis 2. ea dici commensurabilia, quæ una & eadem mensura communi mensurari possunt.

possunt. Ita lineæ 4 pedum & 6 pedum, sunt commensurabiles, quia per quantitatem pedalem aut bipedalem mensurari possunt. Mensura enim quantitatis est aliqua ejus pars, quæ aliquoties repetita, suum totum metitur, ita ut neque illud excedat, neque ab eo deficiat; parsque ejusmodi propriè vocatur pars aliquota. Ita unitas quemlibet numerum metitur, binarius numerus metitur, 6, 8, & cæteros ejusmodi numeros pares. Alioquin si numerus multoties replicatus, totum ita non metiatur, ut vel excedat vel deficiat, vocatur pars aliquanta. Ita se habet 4 respectu 9. & respectu 7. &c.

Iam verò ea dicuntur incommensurabilia, quæ non habent communem aliquam rationem, per quam commensurentur; ut se habet latus quadrati ad diagonalem, quod vulgò jactant Geometræ. Nec reperitur ejusmodi incommensurabilitas nisi in continuo, non autem in numeris, qui saltem possunt omnes per unitatem mensurari.

Not. 3. Proportionem rationalem aliam esse æqualitatis, ut inter quantitates æquales: aliam autem esse inæqualitatis vel majoris, quando quantitas major comparatur cum minore, qualis est inter 4, & 2. vel minoris, cum è contrà minor comparatur cum majori. Item proportio majoris inæqualitatis plures habet sub se species, qualis est primò proportio multiplex; quando scilicet major minorem quantitatem multoties continet, atque hæc proportio vel est dupla, quando bis continet, vel tripla, quando ter, & sic in infinitum.

2. Est proportio superparticularis, quando major quantitas minorem continet, & insuper ejus partem aliquotam, qualis est proportio 6
ad

ad 4. nam numerus 6 continet 4, & insuper dimidiam ejus partem, quæ ideo vocatur proportio sesquialtera. Nam alioqui si contineret tantum insuper tertiam, quartam, aut quintam ejus partem, diceretur proportio vel sesquitertia, vel sesquiquarta, & sic in infinitum; quæ sunt diversæ species proportionis superparticularis.

3. Est proportio superpartiens, quando major minorem continet, & insuper aliquot partes non efficientes aliquotam, qualis est proportio 8 ad 5. Nam ternarius excedens non est pars aliquota octonarii, quia per ternarium mensurari non potest.

Notabis 4. Alia esse proportionis genera. Primum enim est Arithmetica, quando plures numeri per eandem sive æqualem differentiam progrediuntur; ut 2, 4, 6, 8, &c. diciturque etiam hæc progressio Arithmetica. Secundò alia est Geometrica proportio & progressio, dum sic procedunt numeri, ut consequens habeat eandem proportionem ad proximè antecedentem, quam iste ad priorem. Vt 3, 6, 12, 24, 48. Item 3, 9, 27, 81, &c. De proportionem harmonica aliàs erit suus dicendi locus. At

Notabis 5. Quando plures magnitudines continuè proportionales fuerint, prima ad tertiam dicitur habere duplicatam rationem illius, quam habet ad secundam; ad quartam verò habet triplicatam, &c. Putà si supponas 2, 4, 8, 16, dicam 2 ad 8 habere duplicatam; hoc est bis esse faciendam, ut ad 8 perveniatur, nempe cum sic ais, ut se habet 2, ad 4, ita 4 ad 8. at numerus 16 habebit triplicatam, &c.

C A P. II. *Alia proprietates numerorum, & problemata Arithmetica.*

Dico I. Ex numeris aliqui dicuntur perfecti, qui scilicet sunt æquales partibus suis aliquotis. Ita 6 est numerus perfectus. Nam 1. 2. 3. simul juncta faciunt 6. Ita 1. 2. 4. 7. 14. sunt partes aliquotæ numeri 28. quæ simul junctæ ipsum reddunt, reperiunturque tantum 7 numeri perfecti ab 1, usque ad 40000000.

Dico II. 5 & 6 vocantur numeri circulares, quia vel per se, vel per numerum à se productum multiplicati, terminantur semper vel in 5 vel in 6.

Dico III. Numerus 9 per quemcunque alium multiplicatus, seipsum exhibet semper. Si enim v. g. per 2 multiplicatur, prodeunt 18, at 8 & 1 simul addita, repræsentant 9. & sic de aliis.

Item per numerum 9 probatur bonitas additionis, ut supra ostendimus, quo etiam nonnulli utuntur in probandis aliis regulis.

Dico IV. Ex numeris alii sunt quadrati, alii autem cubici. Numerus quadratus est ille, qui producitur ex ductu numeri alicujus in seipsum. Atque ita quadrare aliquem numerum, est, numerum illum multiplicare per seipsum. Quomodo ex 4 prodiret numerus 16, ipsæque numerus 4 dicitur radix quadrata 16, numerus autem 16 vocatur quadratus, quia ejus unitates ritè dispositæ, figuram quadratam repræsentant, uti videre est in isto schemate.



Cubum appellant eum numerum, qui produ-
citur

citur prius quidem ex ductu alicujus numeri in seipsum, ac præterea qui productus est, per illum eundem numerum multiplicatur. Quare cubicè multiplicare, est datum numerum in seipsum, & rursus in productum ducere. Vt si dixerò: quater 4 efficiunt 16. tum quater 16 reddunt 64. qui est cubus numeri 4. numerus autem iste 4. dicitur radix cubica, seu latus cubicum numeri 64. Ideoque etiam tunc dicitur radix quadrata, aut cubica dati numeri investigati, ubi numerus ille inquitur, qui ritè multiplicatus, figuram hujusmodi procreet.

Atque illa quidem ut pluribus non prosequar; satis erit ad nostrum institutum, si modò adjiciam nonnulla problemata hujus loci propria, quæ cæteris utilitate præstant, & usum doctrinæ superioris non parùm illustrent.

Problema I. Datis tribus numeris, investigare quartum incognitum, qui habeat eam proportionem ad tertium, quam secundum habet ad primum. Putà si 4 nummis aureis emuntur libræ piperis 12, quot libras reddent 20? vel si lubet, si 15 dant 5, quot dabunt 6?

Praxis. Tres numeros datos dispone ordine in hunc modum:

Si	4	dant	12	
	nummi		libras	quot dabunt 20.
	aurei		piperis,	

Si 15 dant 5, quot dabunt 6?

Atque his positis, multiplica tertium numerum per secundum, aut è contra. Ac deinde productum ex ista multiplicatione divide per numerum primum, tum quotiens erit quartus ille numerus proportionalis. Sic enim in primo exemplo numerus 60, se habet ad 20. ut 12 ad 4. perinde enim ter ipsum continet, & sic de aliis.

Ac uno quidem isto versiculo, tota hæc methodus continetur :

Duc ternum in medium, & productum divide primo.

Notandumque est hanc regulam vocari auream, ob immensas, quas affert, utilitates. Item vocatur regula proportionis, seu proportionum; tum etiam regula trium; quia supponit tres numeros, ex quibus eliciatur quartus proportionalis incognitus.

Probl. II. *Quando plures .v. c. mercatores consortium ineunt, ita ut singuli certam, eamque diversam pecunie summam conferant; assignare, quam partem singuli, ex lucro totali debeant accipere.* En exemplum mercatorum quatuor; quorum primus impendit 60 aureos, secundus 100, tertius 120. & quartus 200. sit autem lucrum commune 6000 aur. Hæc instituenta est praxis. Primò collige summam ex omnium pecuniis, quæ est 480 aur. Deinde in ista hypothesi, quater perficienda est regula trium hoc pacto. Primò, si 480 aurei lucrati sunt 6000, quid lucrabuntur 60? inventus quotiens designabit, quid primo mercatori debeatur: & sic de aliis.

CAP. III. *Alia Problemata.*

Problema I. *Quot modis inter se complicari possint dati numeri? Praxis.* Primùm quidem quod attinet binarium numerum; certum est hunc combinari tantùm posse duobus modis, unde quæ unitas rei primo loco posita est, postmodum habeat sedem in altero; quia semel bis, est tantùm bis. At si numerum proximè consequentem duxeris in productum ex multiplicatione antecedentis, habebis intentum; Vt videre est

1	1
2	2
3	6
4	24
5	120
6	720

est in appposito schemate, si enim ducas; in 2; fient 6. pro complicatione possibili trium unitatum. Item si in productum huncce numerum duxeris 4, colliges quot modis 4 possint complicari. Atque ita reperiēs quot modis toni, & consonantiæ musicæ; quot modis literæ alphabeticæ complicari possint; quot voces ex illis, quot libri, quot genera cantuum ex complicatione tonorum musicorum; quot anagrammata ex dato no-

mine prodire possint.

Problema II. *Numerum quem alius cogitarit, seu animo designaverit, exponere. Praxis.*

Priund. Fac ut ille numerum animo designatum triplicet, seu multiplicet per 3.

Secundò. Numerus ex illa multiplicatione prodiens, duas in partes æquales dividatur, si fieri potest: alioquin si fuerit numerus impar, qui sic dividi nequeat, sumenda erit medietas illius major, unitate excedens; tum hæc debet triplicari. Ac tandem quærendum erit, quoties productum ex postrema ista multiplicatione contineat 9. nam hic quotiens duplicatus, numerum ignotum denotabit. *Exemplum.* Cogitatur numerus 8. triplicatus reddit 24. huius autem numeri media pars est 12. At ter 12 efficiunt 36. cum igitur in hoc producto, facta divisione per 9, reperiamus pro quotiente 4. (quod est, ipsum 9 quater contineri in 36) si dixeris bis 4. colliges numerum animo designatum esse 8.

Notabis verò, tunc isti numero addendam esse unitatem, quando numerus initio multi-

plicatus, non potuit dividi in duas partes æquales, unde consequenter medietas ipsius major sumpta fuerit. Item

Not. 2. Tunc animo designatam solùm fuisse unitatem, quando postrema triplicatione facta, nequidem semel in ea continetur 9.

Mitto quæ per regulas progressionum vulgò resolvi solent. Puta, quemadmodum ex unico sinapis grano, cæterisque ex eo prodeuntibus, grana alia nequidem universus mundus caperet: qui enim inde oriretur numerus, cyphris tantùm 61 posset exprimi; cùm tamen Archimedes ostenderit mundum universum arenularum numero, qui 49 cyphris describeretur implendum, ut dicam in Geometria.

Quo pacto etiam colligere est, quanta esset futura hominum multitudo intra certos annos. Et verò mirabile est illud, quod narratur in Sacris Literis de filiis Israël, qui cùm in Ægyptum ad numerum tantùm 70, olim venissent; exiere tamen post 120 annos ad sexies centena millia bellatorum hominum; quibus præterea foret addendus numerus mulierum, senum, ac puerorum. Ita Noëmus cùm ex *Genesi cap. 9.* vixit post Diluvium 350 annis, vidit nepotes suos immenso numero auctos per Orbem dispergi; vidit invalescente Idololatriâ penè omnes à vero Dei cultu discedere; vidit denique initia Monarchiæ Assyriorum, tum bella horrida, subinde in aciem eductis à Nino equitum ducentis millibus, ac peditum decies septies centenis millibus adversus Zoroastrem Bactrianorum Regem, qui multa etiam millia numerabat; cum tamen illa non esset nisi pars minima ejus multitudinis, quæ à tribus filiis Noë, per illud spatium temporis nasci potuerat. Vnde
ma-

manifestum est, quemadmodum ex providentiâ Numinis ea omnia, quæ per generationem naturalem oriuntur quotidie, subinde interire debeant, ne tandem vel ipso totius mundi ambitu contineri non possent, fieretque rerum omnium perturbatio.

Notabis porrò Arithmetica problemata universa posse ab eo explicari, qui certa methodo utatur primis quatuor regulis communibus, quas prima parte tradidi. Quanquam

Notabis præterea huc accedere & aliam regulam, quam ab inventore, Algebram nominant, quæ adhibito ratiocinio, numerum ignotum investigat, supposita aliqua radice, ut ajunt, cujus æquationem, seu æqualitatem cum alio numero invenire oporteat, ut quæstio tandem per divisionis methodum resolvatur. Atque ut istius rei leve aliquod specimen tibi præbeam, exemplum subjicio.

Quærat^r numerus qui multiplicatus per 14, eandem reddat summam, quam si multiplicetur per 9. additis postea 90, ad ejus productum.

Sic agunt. Numerus ille incognitus est 1 Rz. id est, supponitur esse una radix; quæ multiplicata per 9, ut postulat quæstio, reddit 9 Rz. quibus si addideris 90, efficientur 9 Rz. cum 90. vel ut scribunt p. 90. id est plus 90. Iam verò quia postulat etiam quæstio, ut idem numerus incognitus, pro quo supponitur 1 Rz, multiplicetur per 14; ideo pariter debet multiplicari 1 Rz. per 14. quo pacto fiunt 14 Rz. quæ consequenter habent æqualitatem cum 9 Rz. p. 90. Quinetiam si ex utroque illo numero abstuleris 9 Rz, remanebit æquatio inter 5 Rz & 19. quia si æqualibus demas æqualia, reliqua manent æqualia. Quare ubi facta fuerit

divisio 90 per 5, habebitur pro quotiente quæsitus numerus 18.

Resque hæc manifestè patet. Nam si multiplicaveris 18 per 9. fient 162. quibus si addas 90, prodibit numerus 252. At iste idem numerus producet pariter ex multiplicatione ipsius 18 per 14.

Nota rem eam, quæ pro ignoto numero supponitur vulgo appellari *radicem*, quod quidem Itali potius *cosam* dicunt; unde & isti vulgò nuncupantur numeri *coffici*, solentque certis characteribus designari, pro diversis, quas habent, denominationibus. Ac numerorum hujusmodi cofficorum progressionem ac denominationes, tum Algorithmum præmittunt Arithmetici, antequam usum Algebrae exponant; nec in ea, magna saltem ex parte, comprehendenda, tantopere laborabit, qui Arithmeticae communis peritus fuerit: quanquam aliis non videntur esse tanti momenti, quæ in ea solent explicari problemata.

ELEMENTALE GEOMETRIÆ.

PRÆFATIO.

Geometria quidem terra mensurationem significat; sed tamen ex communi loquendi usu, est Scientia de magnitudinibus corporeis, abstrahendo ab earum subjecto. Alia autem est speculativa, alia practica. Speculativa est de natura & proprietatibus illarum magnitudinum; Practica, quæ & Ars Geometrica, & aliquando Geodesia dicitur, est de modo illas magnitudines mensurandi & describendi. Vt autem Speculativa habet sua Theoremata; ita practica & sua Problemata. Nam Theorema propriè est propositio de subjecto aliquo proprietatem demonstrans. Problema autem apud Mathematicos, est propositio modum efficiendæ rei aperiens. Quinetiam ad demonstrationes theorematum & problematum explicandas, alia nonnunquam supponuntur prius demonstrata, quæ ab iis vocari solent Lemmata. Item perinde ac in aliis Scientiis, hic sua sunt prima principia per se nota, ex quibus deducatur conclusio, seu cognitio scientifica; solentque appellari axiomata, effata, & pronunciata. huc adde petitiones, postulata, &c.

Notandumque est, illa Theoremata & Problemata, quorum est in rebus Mathematicis usus frequentissimus; ideo vocari Elementa; cujusmodi appellantur Elementa Euclidis, quia sunt principia omnis cognitionis Geometrica; nec sine illis opus ullum Mathematicum potest perfici, aut explicari. Atque in isto quidem negotio methodum hanc sequar, ut primò exponam definitiones ac divisiones circa lineas, angulos, & figuras; cum istud sit primum Geometria subjectum; deinde vero de illarum naturâ, proprietatibus, ac descriptione tyronem edocebo.

Tabulas suis laterculis, ac figuris distinctas reperiès ad finem Geometriæ Practicæ.

METHODVS

ET

INSTITVTIO

MATHEMATICÆ.

Elementale Geometriæ.

CAP. I. De Lineis & Angulis.

Dico primò, linea est extensio in longum sine latitudine & profunditate: unde secundùm imaginationem Mathematicorum fingitur describi, quasi per fluxum puncti indivisibilis. At

Not. I. Ex lineis aliam esse rectam; aliam autem curvam. Linea recta est, quæ ducta à puncto ad punctum, ex æquo interiacet; id est, nullâ sui parte aut attollitur, aut deprimitur, *ut in tabula 1. laterculo 1. figura 1.* contrà verò est linea curva.

Not. 2. Ex lineis curvis aliam esse circularem, *ut fig. 4*; aliam spiralem. *f. 6.* quam etiam nominant volutam seu helicem. Item

Not. 3. Lineæ proprietates has esse præcipuas; primò parallelismum. Tum 2. perpendicularitatem: Quæ tamen non sunt proprietates 4. modo. Linea parallela est, quæ secundùm omnes sui partes ab alia æquidistat; quamobrem etsi in infinitum producat, nunquam cum illâ concurret. *ut in f. 2.* Linea perpendicularis est ea, quæ in lineam alteram cadit orthogonaliter, seu ad angulos rectos, *ut in f. 3. linea a. b.*

Dico

Dico I I. Superficies est extensio in longum, & latum, sine profunditate. Et hæc quidem superficies perinde per proportionem, ac linea, dividitur in rectam, seu in planam; & in curvam. Atque hujus curvitatæ pars superior vocatur convexa: inferior seu interior est concava. Item

Not. Perinde ac lineam posse alteri esse tum parallelam, tum perpendicularem.

Dico I I I. Ex linearum aut superficierum vario concursu, varia nascuntur genera angulorum; ex quibus ii dicuntur curvilinei, qui fiunt ex concursu linearum curvarum, ut in *f. 7.* alii dicuntur rectilinei, qui ex lineis rectis fiunt, ut *fig. 3, 8, 9, & 10.* Denique sunt alii mixti, qui fiunt partim ex rectâ & partim ex curvâ. ut in *f. 11.*

Dico autem I V. Ex rectilineis, primò alius est rectus, qui fit, cum duæ lineæ cadunt perpendiculariter, ut in *f. 3, & 8.* secundò alius est obtusus, qui recto est major, qualis in *f. 9* est *vel a, vel b.* tertio alius est acutus, qui recto est minor; cum scilicet duæ rectæ ad invicem magis accedunt, qualis est *vel c. vel d. in eadem fig.*

Dico V. Ex angulis mixtis ille imprimis est celebris, quem vocant angulum contingentiae, efficiturque à linea recta, vel plana superficie tangente circulum, vel globum. ut in *f. 11. 12.*

C A P. I I. De Figuris planis.

EX figuris aliæ sunt planæ, putà quando corpus consideratur tantum secundum superficiem; aliæ sunt solidæ, quando consideratur secundum omnem suam dimensionem. Item ex istis aliæ sunt rectilineæ, quæ rectis lineis describuntur; aliæ autem è contrà curvilineæ. Item ex rectilineis aliæ sunt triangulares ex tribus an-

gulis, & consequenter ex tribus lateribus constantes: aliæ sunt quadrangulæ seu quadrangulares: aliæ plurium angulorum, quas vocant polygonas. De quibus singulis ut agam;

Dico I. Ex triangulis alius est curvilineus, ex curvilineis constans, ut in secundo laterculo, fig. 1. Alius rectilineus, quales sunt reliqui omnes ibi descripti; mixtus alius, de quo agitur cap. 6. Rectilineus autem ratione angulorum dividitur tres varias in species. Primò enim est triangulus rectangulus, ut in 2 f. Sic dictus, quia habet unum angulum rectum, nimirum *b*; observandumque est latus *a. c.* obtensum recto angulo vulgò appellari hypotenusam. Secundò est triangulus oxygonius, qui habet tres angulos acutos, ut in f. 3. Tertiò est amblygonius, qui habet unum angulum obtusum, ut in f. 4. At

Not. Triangulum ratione laterum dividi etiam in tres species. Primò enim est æquilaterus, ut in f. 3, qui habet latera omnia æqualia, & consequenter angulos omnes inter se æquales. Secundò est triangulus Isosceles, ut in f. 5, qui habet æqualia latera supra eandem basim, quæ est *b. c.* Observandumque est obiter, in istiusmodi triangulo, angulos ad basim esse æquales. Tertiò denique est Scalenum, ut in f. 4, habens latera omnia inter se inæqualia.

Dico II. Quadrangulorum duplex est genus. Primò enim alia sunt parallelogramma; alia sunt trapezia. Parallelogrammum est figura, cujus latera opposita sunt parallela. Ex iis porrò parallelogrammis, duo sunt rectangula. Primum est quadratum, habens latera omnia inter se æqualia, ut in 1 f. tertii laterculi; secundum est, quod vulgo appellant oblongum, quia laterum

in-

inæqualitatem habet sub rectis angulis, & duo ex illis lateribus longiora sunt, *ut in 2. f.*

Duo autem sunt obliquis angulis, quorum alterum est æquilaterum, & vocatur Rhombus: *in 3. f.* habetque affinitatem cum quadrato; alterum est inæquilaterum, & dicitur Rhomboides, *in 4. f.* habetque affinitatem cum oblongo rectangulo.

Cætera verò quadrilaterorum genera sunt irregularia, & appellantur trapezia *ut in f. 5. ejusdem laterculi 3.*

Notabis tandem lineam ab angulo ad oppositum traductum, qualis est *a. b. in fig. 1.* vocari diagonalem; latera autem dici & costas.

Dico I I I. Polygonæ regulares sunt Pentagonum *ut f. 14.* Hexagonum, *ut f. 13.* Octogonum, *ut 12. &c.* Istiusmodi enim dicuntur figuræ regulares, quæ habent æqualia latera, & consequenter æquales angulos. Quod etiam pariter statuendum est de corporibus regularibus, quorum species enumerabo capite sequenti.

Dico I V. Ex curvilineis alia est elliptica, seu ovalis, *ut 5 primi laterculi*; alia est hyperbolica, alia parabolica, quæ ex diversis conic sectionibus exponuntur. At

Dico V. Omnium curvilinearum præstantissima est circularis, ut postea declarabimus: sicque illam definiunt: Est figura sub unâ simplici lineâ comprehensa, quam circumferentiam nuncupant, cujus medium est punctum, à quo omnes circumferentiæ partes æqualiter distant. Præterea verò hæc in circulo animadvertenda sunt. Primò lineæ, quæ à centro perducuntur ad circumferentiam, vocantur radii & semidiametri. Nam secundò diameter est linea quavis, ducta per centrum ab una parte cir-

cunferentiæ ad oppositam. Tertio quæ linea ejusmodi producit extra circumferentiam, vocatur axis. Quarto spatium intra circumferentiam contentum vocatur area, & capacitas circuli. Quinto per unam diametrum in duos semicirculos dividitur. Item sexto secari potest minor circuli portio, quæ dicitur arcus circuli, & segmentum; linea autem illi subtensa, nominatur chorda. Septimo quadrans circuli, est quarta pars ipsius, quam & arcum 90 graduum vulgè appellant; cum totus circulus in 360 gradus, seu partes æquales dividi soleat, *ut in f. 9. tertii laterc.* At præterea singuli gradus ejusmodi dividi solent in 60 minuta, quæ prima sunt. Nam singula ex istis minutis iterum dividuntur in alia 60, quæ vocantur secunda, notanturque appositis supra lineolis, & sic deinceps usque ad minutias decimas. Item cum plures circuli aliis continentur, habentque commune centrum, dicuntur concentrici; alioquin si diversa centra habuerint, sunt excentrici, *ut in 12. primi laterc.*

Notandum verò est perimetrum seu ambitum figuræ, esse lineam aut superficiem, quâ terminatur concluditurque ejus capacitas; illæque vocantur figuræ isoperimetræ, quæ ambitum æqualem habent, quanvis sint generis diversi.

C A P. III. De figuris, seu corporibus Solidis.

EX iis aliud est corpus angulare sub faciebus planis, quod dicitur polyedrum; quia in planis illis potest quasi sedere aut quiescere: aliud est sine angulis & Sphæroïdes; aliud ex utroque mixtum.

Dico I. Sphæroïdes multas habet species; aliud

aliud enim est ellipticum, seu ovale; aliud perfectè Sphæricum, quod propriè nominatur Sphæra, ut in tabula 2. laterc. 1. f. 1. Atque in Sphæra quidem observare est centrum, deinde superficiem, quæ secundum omnes sui partes æqualiter à centro distet. Huc adde & axem, tum convexitatem, & concavitatem.

Dico II. Ex polyedris, quæ regularia sunt, vulgò numerantur 5. primò enim est tetraëdruum, sub 4 triangulis contentum; ut in f. 3. Secundò est hexaëdruum, seu cubus, sub 6. quadratis, ut in f. 4. Tertiò est octaëdruum sub 8 triangulis, ut in f. 2. Quartò est dodecaëdruum sub 12 pentagonis, ut in f. 5. Quintò denique Icosaëdruum sub 20 triangulis, ut in f. 6. Quæ quidem corpora habent omnia æqualia sive triangula, sive quadrata, sive pentagona; cum dicantur regularia, ut jam inonui.

Notandumque est, Tetraëdruum idem esse, ac pyramidem regularem. Nam alia est pyramis irregularis, ut in f. 7. Soletque pyramis in hunc modum definiri: est figura solida, quæ sub aliquibus planis continetur, ab uno plano ad unum punctum, seu apicem concurrentibus, ut patet in annotata f. 7. planum autem illud in quo residet pyramis, nominatur ejus basis; linea *a. b.* perpendiculariter cadens ab apice in basim, vocatur propriè perpendicularis ipsius pyramidis.

Dico III. Ex irregularibus ejusmodi corporibus, alia præterea sunt generis diversi, puta, oblonga solida, planis terminata, quales sunt trabes; dicunturque oblonga parallelipeda, &c.

Dico IV. Ex corporibus mixtis, id est, partim angularibus, partim rotundis occurrunt Conus & Cylindrus.

Conus est figura solida, quæ à basi, id est à sub-

subjecta peripheria circulari, æqualiter fastigiatur ad verticem, instar pineæ nucis, *ut in f. 8.* fingiturque sic describi, quasi per conversionem trianguli, latere *a. b.* quod vocant axem Coni, manente immoto.

Cylindrus est figura solida, quæ à sua basi, id est à subjecta peripheria circulari, ad sublimem æqualem & æquidistantem peripheriam æqualiter erigitur, instar columnæ cujusdam teretis, *ut in f. 9*; sicque appellatur Cylindrus, à voce Græca, quæ significat volvere, quia volvi potest. Axis Cylindri, est linea, quæ medium ipsum penetrat, terminaturque perpendiculariter ad mediam basim utrimque oppositam, ut linea *a. b.*

C A P. I V. *Proprietates angulorum.*

EX angulis præcipuè hîc est considerandus, tum rectilineus, tum angulus contingentia. Suntque illi vel majores, vel minores, pro majori, vel minori divaricatione laterum, quibus constituuntur, vel potiùs pro majori, vel minori quantitate arcus angulo obtensi. Quare

Dico I. Angulus rectus vocatur angulus 90 graduum. Supponimus enim ex communi Mathematicorum usu, totum circulum dividi in 360 gradus, seu partes æquales; tum per duas diametros ad centrum sese orthogonaliter secantes, quadrifariam dividi, *ut in f. 9. laterc. 3. primæ tab.* Atque inde fiunt 4 arcus singuli 90 graduum. Cum autem cuilibet istiusmodi arcui 90 graduum respondeat angulus rectus; ideo vulgè dicimus, angulum rectum esse graduum 90; seu habere gradus 90: plures habere obtusum; pauciores acutum. Ut ergo judices de quantitate dati anguli; describe in ipso arcum
ex

ex puncto concursus linearum, quibus constituitur. Tum habe in promptu vel semicirculum, vel quadrantem in suos gradus 90 ritè divisum, ut in *tab. 4. f. 5.* Deinde in eo arcum illi, quem descripsisti, similem designa, sub eadem scilicet longitudine laterum, descriptum arcum constituentium; & habebis intentum, numerando gradus in tuo instrumento seu quadrante astronomico, illi arcui respondentes.

Dico I I. Angulus contingentiae, de quo jam supra, est quidem certæ ac determinatæ quantitatis; sed nihilominus est divisibilis in infinitum, saltem per majores & majores circulos traductos per idem punctum contactus; ut videre est in *f. 12. primi laterc. tabula 1.* Quamquam

Dico I I I. Talem esse naturam illius anguli, ut dividi per lineam rectam non possit; nec possit ad illum perducī linea recta, quæ circum non secet; unde consequenter, quod admirationem movere solet, in illo angulo contingentiae non potest designari ullus angulus rectilineus quantumvis acutus; & consequenter ille angulus contingentiae est quovis angulo rectilineo minor. Quod quidem ut probetur, adducta in medium figura 13 *primi laterc. tabula 1.* Supponamus duci posse rectam hujusmodi *b. a.* quæ angulum contingentiae dividat non secando circum: tum à centro *c.* ducatur linea perpendicularis *c. a.* cadens in punctum contactus; deinde linea *c. d.* cadens etiam perpendiculariter in lineam *a. b.* his positis; si verum est lineam *b. a.* efficere angulum rectilineum minorem angulo contingentiae, ipsum dividendo; sequetur in triangulo *a. c. d.* latus majus obtensum esse minori angulo;

angulo; & latus minus esse obtensum majori angulo. Atqui impossibile est illud consequens, ut postea dicam. Ergo & antec. Probatur major; quia ex hypothesi angulus *a*. ex linea *c. a*. & linea inclinata *a. b*. est acutus, cui obtenditur latus *c. d*. quod longius est in isto triangulo, nam tendit ultra circumferentiam ad lineam *a. b*. Item latus *c. a*. quod minus est, obtenditur angulo *d*. qui supponitur esse rectus ex linea *c. d*. perpendiculariter cadente in lineam *a. b*.

Objicies. Angulus ille contingentiae, est certae ac determinatae quantitatis. Concedo. Ergo ad eam reduci potest aliquis rectilineus. Nego consequ. cum enim illae quantitates sint diversi ordinis, comparari inter se non possunt.

Dico I V. Anguli omnes recti, sunt inter se aequales. Vt per se patet. Item anguli ad verticem oppositi, sunt aequales, ut in *fig. 10. later. 1*. Anguli *c* & *d*; aut anguli *a* & *b*. sunt enim à lineis eodem modo se interfecantibus, ut per se patet. Item aequales illi sunt anguli alternatim positi, quos efficit linea recta cadens in duas parallelas. ut in *f. 9*. Anguli *c* & *d*; aut anguli *a* & *b*. Nam ab iisdem & eodem modo positis lineis fiunt; ut per se manifestum est.

C A P. V. Proprietates Figuræ Triangularis

Dico I. In omni triangulo rectilineo, tres anguli simul sumpti, sunt aequales duobus rectis. Probatur demonstrativè ad sensum; posita *fig. 6. laterc. 2. tabula 1*. Si enim ex tribus angulis ejusdem trianguli, tres arcus ab eadem circini extensione descriptos sumpseris, & simul junxeris; illi reddent omnino perfectum semicirculum 180 graduum. Et verò si circulum eodem circini intervallo & extensione descripseris;

ris ; tum per diametrum bifariam divisus fuerit, illius semicirculo applicati arcus ejusmodi, ipsum adæquabunt. Ergo illi tres arcus simul sumpti obtenduntur duobus angulis rectis, qui in semicirculo bifariam in duos quadrantes 90 graduum diviso continentur : unde consequens est tres angulos illis arcubus oppositos æquivalere duobus rectis.

Atque hinc sequitur 1. In triangulo æquilatere, singulos angulos esse 60. graduum, cum sint inter se æquales.

Sequitur 2. Si in triangulo rectangulo cognoveris alterum ex acutis, tertium consequenter, qui est complementum 90 graduum, fore tibi notum. Nam aliunde habes angulum rectum 90 grad.

Sequitur 3 Si in Isoscele, unus ex tribus angulis tibi notus fuerit ; constare & de aliis. Nam qui duo sunt ad basim, sunt æquales ; ut jam monui *capite 2.* Ergo uno ex illis cognito, alter cognoscitur, tum complementum usque ad 180 pertinebit ad reliquum. Vel si reliquus iste fuerit primò de se notus, complementum usque ad 180, pertinebit ad angulos basis, quorum unusquisque obtinebit medietatem illius complementi. Meminerisque ex angulis æqualibus ad unam basim, æqualia esse latera ; ut eodem capite monui.

Notandumque est etiam, quâ proportionem crescunt anguli alicujus trianguli, eadem & crescere latera ipsis angulis obversa ; ut per se pater. Item è contra crescit angulus alicujus trianguli, crescente latere ipsi opposito. Nec tamen in isto laterum incremento servatur nisi proportio Geometrica, non autem Arithmetica, per quam unum uni, & duo duobus respondent ;

dent; alioquin sequeretur, duo latera constituenta rectum angulum, esse æqualia hypotenusæ; quod falsum est. Nam semper duo latera alicujus trianguli simul sumpta, majora sunt reliquo, ut per se patet consideranti. Item

Dico I I. Eam esse proportionem inter latera & capacitatem trianguli, ut ipsis cognitis de illa possis infallibiliter statuere, ut etiam de multilateris aliis tradam in Geometria practica. Item

Dico I I I. Eam esse proportionem inter latera ejusdem trianguli, tum inter latera & ipsos angulos, ut si unum cognoveris latus & aliquos angulos, aliorum laterum magnitudinem facile deprehendas. Nihil est difficultatis in æquilatero, cum enim in eo sint omnia æqualia, si habeas unum ipsius latus esse leucarum 50; idem erit statuendum de aliis. At in aliis rem ita perficies. Exempli causa; sume triangulum. in 2. f. *laterculi 2. tabule 1.* Suppono latus *a. c.* obtensum angulo illi recto esse leucarum vel pedum, ut lubuerit 50, aut 1000. Item suppono angulum *a* tibi esse notum, puta graduum 30, & consequenter angulum *c* esse graduum 60. Qua facta suppositione, sic ages per regulam proportionum. Si angulus *b* graduum 90, dat 1000 pedes pro latere illi obtenso *a. c.* quot dabit angulus *a* 30 gr. pro latere illi obtenso *b. c.*? Aut angulus *c.* 60 gr. pro latere illi obtenso *a b.*?

Notandum verd est, eam præterea esse triangulorum proprietatem, ut in uno cognita angulorum aut laterum quantitas; similis alterius trianguli quantitatem ostendat. Sed

Not. 2. Similes dici triangulos, non propter eorum æqualitatem, sed ex eo tantum, quod habeant

beant æquales angulos sub lateribus homologis. Illa autem dicuntur latera homologa, quæ sunt ejusdem rationis, seu quæ sunt æqualibus angulis obfensa. Sic in *f. 7 laterculi 2*, omnes illi tri-anguli, aut includentes, aut inclusi, dicuntur inter se fimiles. Sic trianguli 8, & 9, dicuntur fimiles, quia angulos omnes habent prorfus fimiles. Hæcque etiam in iis latera funt homolo-ga; primò quæ obtenduntur rectis angulis ut latus *a. c.* in 8, & latus *a. c.* in 9, item latus *a. b.* in 8, est homologum lateri *a. b.* in 9. ac denique latus *a. c.* in 8, est pariter homologum lateri *a. c.* in 9. quibus quidem pofitis,

Dico I V. Triangulorum ejusmodi fimilium seu æquiangulorum latera homologa funt inter se proportionalia. Hoc est. Vt fe habet *a. b.* ad *b. c.* in 8, ita fe habet *a. b.* ad *b. c.* in 9. Quam-obrem fi circino, vel aliqua menfura alia depre-henderis in minori triangulo latus *a. b.* vel ter, vel quater contineri in *b. c.* ejusdem trianguli; ita perinde etiam deprehendes latus *a. b.* majo-ris trianguli fimilis, toties contineri in ejus la-tere *b. c.* Illudque est principium, quo nititur tota linearum Geometria, seu Altimetria, de qua poftèa.

Dico V. Hanc efle trianguli rectanguli in-signem proprietatem, quodd quadratum lateris maximi, seu hypotenufæ, fit æquale quadratis fimul fumptis reliquorum laterum, ut in *tab. 2. laterc. 2. fig. 2.* Atque omiffa Pythagoræ de-monftratione apud Euclidem; illud fatis patet, vel ex præceptis Geometriæ, quibus fi fingulo-rum quantitatem affecturus fueris, de veritate hujus rei conftabit, fubjiciturque oculis in af-fignato fchemate.

CAP. VI. *Proprietates aliarum figurarum.*

AD illas demonstrandas vulgò supponuntur hæc principia per se nota. 1. Totum est majus sua parte. 2. Quæ sunt eidem æqualia, sunt etiam æqualia inter se. 3. Si æqualia addantur æqualibus; vel si ab æqualibus detrahantur æqualia, restabunt semper æqualia. 4. Æquales sunt illi circuli, quorum diametri sunt inter se æquales; & è contra, &c. Atque hujusmodi suppositis,

Dico I. Parallelogramma per suam diagonalem duas in partes æquales dividuntur, ut in *tab. 1. later. 3. f. 6.* Sic enim fiunt duo trianguli prorsus æquales. Nam æquales illi sunt trianguli, qui vel duo latera, & æquales angulos habuerint; inde enim necesse est ut reliqua sint æqualia. quamobrem etiam

Dico II. Triangula inter duas parallelas, sub eadem aut simili basi, sunt inter se æqualia. Sic in *f. 7. ejusdem laterc.* Triangula *a. c. b.* & *e. g. f.* sunt æqualia, indéque præterea est evidens, quod sint medietates æqualium parallelogrammorum.

Inde etiam fit, ut triangulus *c. d. e.* in *8. f.* sit æqualis cum triangulo *a. c. d.* Item consequenter, sit dimidium parallelogrammi *a. c. b. d.* Item sic parallelogrammum debet esse duplum trianguli positi supra eandem basim inter duas parallelas. Item

Dico III. Parallelogramma sub iisdem parallelis, & supra eadem basi constituta, sunt inter se æqualia; quamvis eorum alterum in infinitum protendatur. Ita in *2. tab. laterc. 2. f. 1.* Ita, inquam, se habent paral. *a. b. c. d.* & *c. d. e. f.* Ut probetur, suppono triangulos *a. c. e.* & *b. d. f.*
esse

esse æquales, cum habeant æqualia latera & angulos. Nam latus $a. c.$ est æquale cum latere $b. d.$ Item ex hypothesi latera $c. e.$ & $d. f.$ sunt æqualia, &c. Iam igitur sublato communi triangulo $b. i. e.$: tum $c. i. d.$ superest, ut duo trapezia $a. b. c. i.$ & $i. d. e. f.$ sint inter se æqualia, quia ubi ab æqualibus tolluntur æqualia, reliqua remanent æqualia.

Deinde verò, si duobus illis trapeziis æqualibus addideris communem triangulum $c. i. d.$ inde fient æqualia duo illa parallelogramma $a. b. c. d.$ & $c. d. e. f.$ Atque ita

Sequitur 1. Nullum esse parallelogrammum adeo parvum, quod à terra in cœlum protendi in infinitum non possit, absque eo tamen quodd majus fiat, id est majoris capacitatis.

Sequitur 2. Quodd si Angelus haberet vim reducendi sese ad punctum, & consequenter etiam ad lineam (siquidem non foret potior ratio unius, quàm alterius) datam quamcunque longitudinem occupare posset; simulque adesse præsens tum cœlo, tum terris.

Sequitur 3. Duos agros, aut urbes æqualis inter se superficiei, sic posse fossis circumdari æqualiter latis, & profundis; ita tamen, ut fossæ unius, plus millies & millies containerent aquæ, quàm fossæ alterius.

Dico I V. Ex planis tres istæ figuræ, nempe triangulus, quadratum, & hexagonum, replent locum; hoc sensu, quodd nihil spatii relinquunt circa angulos sese contingentes; ut patet *in tab. 2. laterc. 2. figuris 6. 7. & 8.* Quamobrem istæ figuræ pavimentis sunt idoneæ.

CAP. VII. *Proprietates figura Circularis,
& Sphærica.*

Dico I. Inter figuras omnes præstantissima est Circularis, & Sphærica. Prob. Quia Circularis, & per proportionem Sphærica, mirabiles prorsus habet proprietates. Primum enim circularis, est omnium simplicissima; siquidem unica & simplici linea perficitur; cum tamen contineat potentiâ angulos in infinitum; tum omnis ferè generis figuras, quæ in ea describi possunt. 2. Est figura omnium pulcherrima; nam in ea apparet maxima partium omnium conformitas, proportio, similitudo; & verò omnes uniformiter difformiter à centro recedunt, servata omnimoda proportionē. 3. Ut notavit Arist. Circulus habet multa simul contraria, ex quibus constat. Ita enim constat ex diametro & circumferentia mobili, simul ac centro immobili; constat ex convexo & concavo: simul habet motum celerem ac tardum; quia partes diametri ea proportionē celerius moventur, quò sunt remotiores à centro: Item simul habet motum deorsum, ac sursum; quia dum volvitur, una pars diametri deprimitur, ascendente altera: habet infinitas bilances, ut ita loquar, perinde ac diametros: continet omnes possibiles inclinationes secundum varias sui diametros: In eo neque est principium, neque finis; potestque in eo ubique esse principium, & finis: movetur circa centrum, eundem semper locum retinendo: aptissima est figura ad circumvolutiones, sicque rotarum beneficio trahuntur currus, &c.

Dico II. Isoperimetrarum figurarum capacissima est circularis. Esto enim circulus, quadratum,

dratum, & oblongum rectangulum; ut in tab. 2. laterc. 2. fig. 3, 4, & 5. etsi æqualem ambitum seu perimetrum habeant; maximam tamen omnium capacitatem habet circulus. Vnde si corporis Sphærici, aut si pilei, v. c. partes comprimās, varioque modo configures; quo magis recedet à Sphæricitate, minùs habebit capacitatis. Item eò capaciore erit figura, quò magis ad circularem accedet. Ita si compares illud quadratum, & oblongum rectangulum ad invicem; etsi habeant parem ambitum, ut vides; continentur tamen 25 parva quadrata in quadrato; cùm oblongum non habeat nisi 20. Ita pauciora haberet figura triangularis. Plura haberet figura hexagona, quàm quadrata, aut pentagona. Vnde & digna est prorsus admiratione apum industria in ædificandis cellulis, quòd ex iis figuris quæ locum replent, hexagonam, tanquam omnium capacissimam eligant.

Dico I I I. In circulo ea est proportio diametri, & circumferentiæ; ut alterutra cognita, omnes illius dimensiones, tum & dimensiones Sphærae assequaris; ut patebit in sequenti tractatu.

Notabis autem ex Archimede, rationem circumferentiæ ad diametrum, non admodum superare triplam, eamque esse circiter ut 22. ad 7. Quare ut ostenditur in tab. 4. fig. 4. si diametrum Circuli in 7 partes æquales divideris, tum illius circumferentiam in longumeductam, in similes partes partitus fueris; illud quod docet Archimedes, satis planum fiet. Item

Not. 2. Circulos esse in duplicata ratione suarum diametrorum; Sphæras autem esse in triplicata. Memineris verò ex Arithmetica, *tertia parte, cap. 1.* sub finem; quid sit duplicata;

triplicata, aut quadruplicata proportio. Cum igitur sic ajo, sensus est, Circulum aut Sphæram minorem, toties contineri in majori, quoties primus ex illis proportionalibus numeris continetur, vel in tertio, si agitur de Circulis; vel in quarto, si de Sphæris. Ita enim si dentur duæ Sphære, quarum altera sit diametri pedalis, altera bipedalis; bipedalis continebit octies pedalem. Item si sint ejusdem materiæ; & altera sit tantum unius libræ, altera erit 8 librarum; & sic de aliis.

CAP. VIII. Descriptiones linearum.

1. **P**ropositio. *Lineam in duas partes aequales dividere.*

Praxis. Esto fig. 3. primi later. tab. 1. Ex punctis extremis lineæ illius, aperto ad libitum circino, describe arcus se se intersecantes, tum supra lineam, tum infra; ac deinde per illorum arcuum sectiones, designa lineam; hæc datam secabit in medio. Pari methodo angulum aliquem in duas partes æqualiter divides; supposita figura 13, tertii later. in tab. 2. ex *a* quolibet circini intervallo, designa puncta *c.* & *b.* ex iis punctis describe arcus *e* se se intersecantes; Ex ea sectione ducas lineam *e. a.* secabit medium angulum.

2. Prop. *Dato in linea puncto aliquo medio, ex eo perpendiculararem excitare.*

Praxis. Si normam, seu squadræ in promptu non habes; ex illo puncto, quolibet circini intervallo idoneo, designa hinc inde puncta in illa linea; tum ex illis punctis, quolibet etiam circini intervallo, describe arcus se se intersecantes: ex illorum sectione ducenda est linea ad datum punctum.

3. Prop.

3. Prop. In extrema aliqua linea excitare perpendiculararem.

Praxis. Esto fig. 12. tertii later. in 2 tab. ex a quod est extremum datum, describe arcum c quolibet circini intervallo: tum ex puncto e eodem circini intervallo, designa punctum in isto arcu: deinde ex illo puncto describe alium arcum $e. d.$ ac denique supra istum arcum, ter replicato illo circini intervallo, tertium punctum designabis, ex quo fiet quaesita perpendicularis. Potestque etiam hac methodo examinare, num aliqua linea sit verè perpendicularis.

4. Prop. Ad datum punctum, seu datam distantiam scribere parallelam.

Praxis. Esto fig. 11. ejusdem laterculi. Datur linea $a. b.$: tum assignetur distantia in puncto $c.$ ex illo $c.$ duco ad libitum rectam $c. b.$: deinde ex puncto c describo arcum $b. d.$ ad libitum: item similiter eodem circini intervallo ex b describo arcum $c. a.$ Hujus magnitudinem assumo, illamque transfero ad arcum $b. d.$ & designat punctum $d.$ per quod ducatur linea parallela $c. d.$

5. Prop. Datam lineam in partes centesimas, millesimas, aliasque id genus dividere.

Praxis. Habes hujus divisionis typum in fig. 1. tabula 4. possetque ad libitum fieri divisio in partes minores, productis illis parallelis.

6. Prop. Datam lineam dividere in datas partes.

Praxis. Attendendum est ad fig. 2. ejusdem tabulae. Sume ad libitum lineam $q. e.$ quæ sit major quàm quæ data est. Istam, aperto ad libitum circino, divide in 5 partes æquales, si 5. postulantur. Tum ex utraque extremitate 5 partium, designa arcus se interfecantes in v ;

unde fiat triangulus æquilaterus *v. q. l.* deinde ex puncto *v* duc lineas ad sectiones designatas in linea inferiori. Atque his positis; si linea *a. o.* detur dividenda in quinque partes; illius longitudinem designa in utroque latere hujus trianguli, figendo crus circini alterum in puncto *v.* tum istam lineam *a. o.* dispones inter puncta hujusmodi annotata; fietque divisa secundum intentum. Idem pari modo perficietur de quâcunque aliâ lineâ sic dividendâ.

7. Prop. *Datis duabus lineis rectis mediam proportionalem invenire.*

Praxis. Vt in 12. f. *laterc. 2. tabule 1.* Sint datæ duæ lineæ, quæ in directum collocentur; nempe *l. v.* & *v. r.* quæ unam quasi totalem constituent, ex cujus medio *m.* fiat semicirculus *l. t. r.* tum erigatur perpendicularis, *v. t.* in puncto conjunctionis lineæ *l. v.* & *v. r.* hæc ipsa perpendicularis attingens circulum, dicitur esse media proportionalis quæsitâ. Vt enim se habet linea *l. v.* ad *v. t.* ita *v. t.* ad *v. r.* quemadmodum demonstratur apud Euclidem.

In numeris reperies medium, & tertium proportionalem, qui scilicet habeat proportionem ad secundum, quam iste ad primum: reperies, inquam, si secundum hunc multiplicaveris per seipsum; productum autem divides per primum; nam quotiens erit tertius proportionalis. Ita se habent 36. 54. & 81. ut enim numerus 54 continet numerum 36 & insuper mediam ejus partem, ita numerus 54 continetur in 81. De quarto numero proportionali inveniendocommunis est regula aurea proportionis, seu Trium. Inventionem linearum proportionalium aliarum habes ex 6. Euclidis: illasque prætermitto, quia nobis usui non sunt futuræ.

C A P. I X. *Aliæ praxes circa figuras.*

Prop. I. *Datis tribus punctis, modo in directum non disponantur, per illa circulum describere.*

Praxis. Hoc faciliè intelliges, etsi desideretur figura. Esto puncta *a. b. c.* describe ad libitum, servato circini eodem intervallo, arcus, ex puncto *a* & ex puncto *b.* se mutud secantes duplici in parte opposita. Tum inutato ad libitum circini intervallo, prout opus erit, describe pariter sese duplici in parte opposita intersecantes arcus ex puncto *b.* & ex puncto *c.* Deinde per illorum arcuum sectiones duc lineas rectas; punctum concursus erit centrum quæsitæ circuli.

Prop. II. *Dato circulo, invenire centrum illius.*

Praxis. Vt in *tab. 2. laterc. 3. fig. 5.* Duc ex una parte circuli ad oppositam pro libito lineam *a. b.* hanc divide in duas partes æquales juxta primam propos. superioris capituli, linea hæc dividens transit per centrum circuli. At si media ista bifariam quoque dividitur per lineam *c. d.* sese intersecabunt in centro. Tum etiam hoc pacto circulus quatuor in partes æquales dividitur, si ducta per centrum linea, hanc per medium divides: poteritque hac ratione quadratum inscribi in circulo, si per illarum linearum extremitates lineas duxeris; ut in *fig. 11. later. 3. tab. 1.* Item, circulum divides in 6 partes æquales, & in eo describes hexagonum, sexies replicando intervallum circini, quo circulus ipse describitur. Item, bis tantum replicando, habebis latus trianguli æquilateri. Item, circulo quatuor in quadrantes diviso, iterum dividi potest 8 alias in partes, quæ adjunctis istis 4, efficiant latera omnia dodecagoni; si nem-

pe intervallum circini quo describitur circulus, posito crure altero ad singula quadrantium puncta, hinc inde ad circumferentiam converteris.

Prop. III. *Ellipsim, seu figuram ovatam describere.*

Praxis. Vt in tab. 1. later. 1. f. 5. describe duos circulos occultos eodem circini intervallo; alterum quidem per centrum alterius figendo crus circini immotum in illius circumferentia. Deinde ex *a* communi sectione, duc lineam per centrum circuli usque ad circumferentiam in *b*. hæc linea est extensio circini qua perficietur ellipsis, posito hinc inde crure immoto circini in illorum circulorum sectionibus.

Prop. IV. *Data linea recta, in ea describere triangulum æquilaterum.*

Praxis. Vt in tab. 2. laterc. 3. fig. 7. facto circini intervallo ad longitudinem datæ lineæ *a. b.* ex punctis illius extremis *a.* & *b.* describe arcus sese interfecantes in *c*: deinde ex puncto sectionis illius duc latera *c. a.* & *c. b.* tuncque habebis intentum.

Prop. V. *Quadratum describere in data linea.*

Praxis. Vt in tab. 2. laterc. 3. f. 8. Esto igitur linea data *a. b.* In illius extremitate *a*, beneficio normæ, vel alia methodo jam tradita, excita perpendicularem *a. c.* ad longitudinem lineæ *a. b.* Tum ex punctis *b.* & *c.* describe arcus se interfecantes in *d*: si duas alias rectas duxeris ad punctum illius sectionis; erit perfectum opus. Duplicare autem poteris quadratum, si in illius diagonali quadratum aliud excitaris. Nam juxta assertionem 5. capitis 5. quadratum lateris hujusmodi, æquale est simul sumptis duobus quadratis laterum constituentium angulum, cui latus istud opponitur.

Prop.

Prop. V I. *Pentagonum describere, seu latus ipsius reperire in dato circulo.*

Praxis juxta fig. 1. tertii later. tab. 2. Posito circulo, & quatuor æquales in partes diviso; semidiametrum *a. b.* divide bifariam in *f.* tūm ex puncto *f.* extende circinum in punctum *c.* & in illa extensione *f. c.* describe arcum *c. h.* deinde iterum extende circinum ex *c.* ad punctum *h.* tunc illa postrema extensio dabit latus pentagoni *c. g.*

Prop. V I I. *Dato circulo, heptagoni latus reperire.*

Praxis. Vt in 2. *f. ejusdem later.* Esto circulus quadrifariam divisus per duas diametros orthogonaliter sese ad centrum intersecantes. Tum ex puncto *c.* ad intervallum semidiametri designentur hinc, atque inde in circumferentia puncta *e* & *f.* ex quibus ducatur recta *e. f.* secans lineam *c. d.* in puncto *g.* media hujus pars nempe *e. g.* est latus heptagoni; cujusmodi vulgò ad sensum saltem assumi solet.

Prop. V I I I. *Transformare figuram in alias speciei diversæ.*

Praxis. Quia ex doctrina superiori capitis 6. Triangula omnia inter easdem parallelas, & sub iisdem basibus, sunt æqualia; possunt hoc pacto effici triangula diversæ speciei, nempe tum rectangula, tum alia, quæ tamen eandem capacitatem servant. Item etiam ex dictis, ubi parallelogramma, & triangula, sub eadem basi, & sub iisdem parallelis sunt constituta; tunc parallelogramma sunt dupla illorum triangulorum; consequens est, ut si bifariam in partes æquales dividuntur illa parallelogramma, reddantur æqualia cum ejusmodi triangulis. Item, ut in *fig. 10.* potes tali triangulo attri-

buere basim duplo majorem, quàm parallelogrammo integro; in qua hypothefi, illa obtinebunt perfectam æqualitatem.

Prop. I X. *Dato rectangulo oblongo, illi æquale quadratum constituere.*

Praxis. Rectè id fiet, si duabus lineis quæ sunt circa angulum eundem in directum positis, repereris mediam proportionalem; juxta ultimam propos. capitis superioris. Nam illa media proportionalis erit latus quæfiti quadrati.

Prop. X. *Dato quadrato æquale rectilineum aliquod oblongum reperire.*

Praxis. Ad f. 9. tertii later. tab. 2. Latus $a. c.$, ac postea latus $d. c.$ divide in tres partes æquales. Deinde per tertiam partem ad $a.$ tum similiter & per tertiam ad f ex puncto $b.$ duc ad libitum lineas $b. e.$ & $b. f.$ ac denique producantur latera $a. c. f.$ & $d. c. e.$ sic vulgè ajunt determinari quantitatem quæfiti rectanguli, per intersectiones factas in punctis $e.$ & $f.$

Prop. XI. *Dato circulo, æquale triangulum constituere.*

Praxis. Vide fig. 6. tabulæ 4. Erigatur perpendicularis $a. c.$ in extrema semidiametro $b. a.$ illa autem perpendicularis $a. c.$ sit æqualis cum perimetro dati circuli. Deinde ex centro b ducatur linea $b. c.$ tunc ex communi praxi habetur triangulum æquale circulo; probatur istud, metiendo utrumque, juxta præcepta Geometriæ, quæ est etiam communis ratio probandi ejusmodi problemata, ne impediuntur nimis tyrones.

Prop. XII. *Dato circulo æquale quadratum invenire; seu circulum quadrare.*

Praxis. Varii sunt modi solvendi hujus problematis. Eam esse idoneam rationem vulgè ajunt;

ajunt ; si inventi, per superiorem praxim, trianguli latus $a. c.$ cum semidiametro circuli in directum posueris; unde mediam proportionalem investigates, quæ sit latus quæsitæ quadrati.

Sed hæc alia est quadrandi circuli ratio magis trita. Circulum divide in 4 partes æquales ut in *f. 3. later. 3. tab. 2.* Deinde semidiametrum divide etiam in 4 partes æquales, simileinque partem æqualem adde ad singulas semidiametros, tunc ad earum extrema descriptis 4 lateribus, habebis quadraturam dati circuli.

Hanc denique juxta alios habeas circuli quadraturam, ex figura 4 ejusdem laterculi. Ac primò quidem suppono illius circuli diametrum $a. c.$ divisisse me in 14. partes æquales. Suppono etiam 2. ex undecima parte erigi perpendicularem $d. f.$ usque ad circuli circumferentiam. Item ductam esse lineam $f. c.$ quæ compleat triangulum rectangulum $f. d. c.$ qua facta præparatione; Dico hypotenusam $f. c.$ esse latus quadrati æqualis dato circulo. Quod quidem ut probem

Suppono 3. capacitatem illius circuli mihi notam esse ex præceptis Geometriæ, eamque esse v. g. 154. Atqui linea $f. c.$ est latus quadrati, cujus capacitas perinde est 154; quamobrem illam æqualitatem infero.

Vt autem probetur minor; suppono ex assertionem 5. capitis 5. quadratum lineæ $f. c.$ esse æquale duobus quadratis simul sumptis lateris $f. d.$ & lateris $d. c.$ atqui quadrata illa duo simul sumpta, sunt 154 ergo, &c.

Probatur minor: quia primò latus $d. c.$ cum ex hypothæsi sit undecim partium æqualium, habet consequenter quadratum 121: aliunde verò secundò quadratum lateris $f. d.$ est 33. qui numerus junctus cum numero 121 efficit 154.

ergo duo illa quadrata simul sumpta sunt 154. Superest autem ut probem quadratum lateris *f. d.* esse 33. Atque ut id præstem, duco ex centro *e* lineam *ef* ad punctum extremum lineæ *d. f.* hæc autem linea debet esse 7 partium, quia est semidiameter, & media pars illius diametri, quam posuimus divisam esse in partes æquales 14: & consequenter quadratum illius lineæ est 49. Item ex hypothesi latus *d. e.* est tantum 4 partium, ac proinde pro quadrato habet 16. Item suppono *f. e.* esse hypotenusam trianguli *f. d. e.* cujus quadratum 49, est consequenter æquale quadratis simul sumptis tum lateris *d. e.* tum lateris *f. d.* Atque his positis, sic argumentor; si subtrahatur quadratum lateris *d. e.* puta 16. ex quadrato lateris *f. e.* 49. residuum erit valor quadrati lateris *f. d.* Atqui residuum illud est numerus 33. Ergo valor quadrati illius est 33. qui numerus, ut ajebam, junctus cum 121, efficit 154. unde sequitur quadratum lateris *f. e.* esse 154. Ergo est æquale cum dato circulo, cujus area supponebatur esse 154.

Atque hæc quidem quadratura circuli, saltem mechanicè certa est, & ad usum sufficit; quamvis omni ex parte non probetur Geometricè.

METHODVS ET INSTITVTIO MATHEMATICÆ.

Geometria Practica.

P R Æ F A T I O.

HÆc facultas, quam alii Geodesiam appellant, est ars mensuranda cuiuslibet magnitudinis. Mensurare autem, est querere quoties determinata aliqua, & communis magnitudo, reperiatur in alia, cui applicatur. Atque ita cum tres omnino sint species magnitudinis, seu quantitatis; nempe linea, superficies, & corpus; metiri lineam, est querere quoties certa aliqua, & determinata linea, puta pedalis, cubitalis, aut alia id genus, in ea contineatur. Metiri superficiem, est querere quoties in ea reperiatur minor aliqua superficies quadrata; nempe vel pollex, aut pes quadratus, vel iugerum, aut ut alii apud nos vocant arpennum, vel leuca quadrata, &c. Ac denique metiri corpus, est investigare quoties in eo contineatur minus aliquod corpus; puta vel pollex cubicus, vel pes, aut cubitus, vel una leuca cubica, &c.

Notandumque est hac vulgò à Geometris enumerari mensurarum genera. 1. Est pollex, 12 partibus, quas lineas vocant, distinctus. Quanquam propria mensura, & ad quam reliqua omnes revo-centur, statuunt granum, hordei sumptum secundum latitudinem. Item statuunt 4 ex granis ejus-

modi, componi digitum, quæ alia est ex minoribus mensuris. Huc accedit tum palmus, tum pes Geometricus, & quem Regium appellant ex pollicibus 12. Item est & cubitus; nempe longitudo petita à flexu brachii medi, usque ad manum extremam, quæ apud Geometras, palmis sex definitur. Item est ulna communis, 4 pedibus. Vlna autem agrestis, sex orgia, sex habet: Pertica verò decem, unde & vocatur decempeda. Huc denique accedit, tum miliare, ex mille passibus Geometricis; tum leuca: quanquam diversæ rationis sunt leuca. Nam Italice sunt tantum ex mille passibus; ideoque propriè dicuntur milliaria. Leuca autem Gallica, & Hispanica milliaria duo continent; Germanice autem constant ex duabus leucis Gallis. Persæ & Græci olim habuere suas parasangas, & stadia; Ægyptii Schoenos. Atque ita varii varias instituere distantiarum & longitudinum mensuras. Quæ communiores sunt apud Geometras, his versibus comprehenduntur solent:

Quatuor ex granis, digitus formabitur unus.
Est quater in palmo digitus: quater in pede pal-
mus:

Quinque pedes passum faciunt: passus quoque
centum

Viginti quinque, stadium dant: sed miliare,
Octo dabunt stadia: ac duplicatum dat tibi
leucam.

Iam verò ut tractatum istum ordiar; suppono communem ejus divisionem in Altimetrium, seu Longimetrium, de lineis rectis: tum in Planimetrium, de planis: ac denique in Stereometrium, de solidis corporibus mensurandis: quas partes variis capitibus comprehendo.

METHODVS

ET

INSTITVTIO

MATHEMATICÆ.

GEOMETRIA

PRACTICA.

CAP. I. *Altimetria, seu Longimetria, & ejus principia.*



Ars hæc versatur in dimensione rectarum linearum. Quo nomine complectimur distantias, seu intervalla & longitudes locorum; tum rerum etiam earum quæ sub aspectum cadunt altitudines, latitudines, ac profunditates.

*Sciendumque est, distantias illas à Geometris non deprehendi, nisi beneficio triangulorum, quæ repræsentantur certis in instrumentis ad eos usus comparatis. Quæ triangula in instrumentis repræsentata, similitudinem habent cum triangulis imaginariis, quorum latera etiam imaginaria supponuntur pro rerum distantia, aut altitudine. Ita in 1 fig. laterc. 1. tabulæ 3. per lineam visualem *c. d.* simul cum instrumenti partibus *c. e.* & *d. e.* constituitur triangulus rectangulus *c. e. d.* qui similis est cum triangulo imaginario *c. a. b.* cujus latus imaginarium *a. b.* supponitur pro distantia turris *b.* à puncto *a.* Quare ex doctrina superioris*

rioris tractatus *cap. 5.* ad finem; cùm similium, seu æquiangulorum triangulorum latera homologa, sint proportionalia; cognito triangulo, quod beneficio radii visualis perficitur in instrumento; cognoscetur quoque quantitas laterum, quæ in imaginario investigatur, per proportionem quam inter se habent duo illa triangula. Vt enim se habet latus, *c, e*, ad latus *c, d*, ita se habet latus *c, a*, quæ est altitudo mensuris cognita, ad latus *a, b*, quæ est distantia quæsitæ.

Sciendum est 2. Hunc in usum inventa esse varii generis instrumenta pro cuiusque libito. Aliis enim magis placet Quadratum Geometricum, ut in *tab. 3, laterc. 1, fig. 2*, & in aliis laterculis, tum Scala altimetra, in dorso Astrolabii seu Planisphærii descripta: aliis Radius astronomicus, seu Baculus Iacob; qualis jam est assignatus in *tab. 3, laterc. 1, fig. 1*. Aliis Quadrans astronomicus, in 90, gr. ritè divisus; ut in *later. 2, f. 1*, aliis Holometrum aut Trigonometrum, ut in 3, *laterc. f. 1, & 2*.

Notandum verò est in Quadrato Geometrico; Radio astronomico; aliisque id genus instrumentis, debere observari latera partibus inter se æqualibus, & æquali utrinque numero distincta; qui numerus partium in singulis lateribus, est, vel 60: vel 1000: vel plurium, aut pauciorum ad libitum.

Not. 2. Ex istis lateribus alterum vulgò appellatur umbra recta, alterum autem umbra versa; linea autem diagonalis à centro prodiens, dicitur umbra media. Nos appellabimus *Transversum* latus illud quod est oppositum lateri pinnularum, soletque esse parallelum horizonti, tunc maximè quando instrumentum est immo-

immobile. Alterum autem appellabimus *latus Rectum*, quod est parallelum mensori, & perpendiculare horizonti.

Not. 3. Alia duo latera partium divisionem hujusmodi in se descriptam non habent, quia supponuntur tot esse partium; frustra autem describerentur, quia non attinguntur unquam ab Alhidada quam & Mediclinium vocant. At

Not. 4. Alhidadam esse dioptram versatilem, ab instrumenti centro veluti exentem, suis pinnulis, seu pinnacidiis instructam, per quæ à centro instrumenti, fingitur transire visualis radius: illique in dioptra ipsa respondet linea, quam vocant, *fiducia*: Quia hujus tantum habetur ratio, in designandis partibus lateris, aut recti, aut transversi.

Not. 5. Fulcrum, seu virgam mensoriam certæ longitudinis esse comparandam; illique instrumentum debere ita aptari, ut *latus mensori* parallelum dirigatur ad libellam, neutramque in partem declinet: Quo facto Alhidada in Quadrato Geometrico; vel Transversarium in Radio astronomico, illi per geminam fistulam ad angulos rectos commissum, disponi sic debet, ut per utramque pinnulam objectum videri possit. Item

Not. 6. Si linea *fiduciæ* præcisè attigerit lineam umbræ mediæ, dum investigas longitudinem; inde consequens est ut longitudo plani, sit æqualis cum virga, aut altitudine mensoris: alioquin tunc foret minor, si tantum attingeret partes aliquas lateris transversi infra positi. Quanquam illud vix contingit; quia nunquam ferè investigamus nisi distantias in plano longiores, quo in casu semper attinguntur partes lateris recti, seu quod est mensori parallelum. Item

Not.

Not. 7. Si distantia in plano longior fuerit, debet peti altior locus, unde res distans commodè possit percipi; sed altitudo ab oculo inensoris ad planum illud scienda est, cum sit mensura quæsitæ distantiae. Atque his prænotatis pergitur ad praxim.

C A P. II. *Altimetria, seu Longimetria praxes.*

Variae sunt species Altimetriae: alia enim est distantiarum in plano: alia altitudinum, quæ dicitur potissima species, & à qua nomen trahit Altimetria: alia autem est latitudinum: alia denique profunditatum. Hæc autem variis problematis jam exponimus; posita ante oculos tabula tertia.

Problema I. *Rei distantiam in plano, seu longitudinem metiri.*

Praxis. Paratis instrumentis, ut decet, nempe si Radius astronomicus; aut Quadrati Geometrici latus mensori parallelum perpendiculariter constiterit. Tum quod spectat Radius astronomicum; si transversarium æquales habuerit partes cum recto: aut si in Quadrato dioptra in objectum destinata, mediam umbram attigerit; jam diximus, in eo casu fore æqualem distantiam cum altitudine virgæ mensoriæ. Alioquin ea proportionem minor futura est distantia, quâ pauciores partes designabuntur in latere infimo transverso. Nam si pars abscissa fuerit triplo minor alio latere, tunc etiam triplo minor futura est distantia.

At in Radio astronomico, *fig. 1. later. 1.* cum transversarium longius est, ut se habet rectum latus *c. e.* exempli gratia 10 partium, ad segmentum *e. d.* partium 30. Ita mensoris altitudo *c. a.* 12 pedum, ad distantiam *a. b.* eritque pedum 36.

In

In Quadrato Geometrico ut in *fig. 1*, later. 4, ut se habet lateris abscissi pars *e, d*, 40. partium, ad latus integrum, *c, d*, 100. Ita altitudo *c, b*, pedum 10, ad distantiam *b, a*, & toties in ea continetur, quoties pars *e, d*, continetur in latere *c, d*, eritque distantia pedum 25.

Atque hujus quidem problematis, aliorumque id genus ratio petenda est ex Elementalī Geometriæ superiori, *cap. 5*, assertione 3, & 4.

Problema I I. *Altitudinem rei proposita invenire, ope Quadrati Geometrici.*

Praxis. Sic præparatur instrumentum, ut centrum illius ponatur infra, & consequenter transversum latus, partibus distinctum, superiorem locum obtineat, ut in *fig. 2*, later. 1, & 4. Item hîc supponitur nota distantia, juxta præcedens problema.

Notandumque est 1. Si dioptra cadit in umbram mediam, seu diagonalem instrumenti, tunc esse distantiam æqualem cum altitudine. Atque etiam ut altitudinem hujusmodi, absque ope Arithmeticæ consequaris; dispone dioptram ad diagonalem instrumenti; tum accede, aut recede tandin, dum per pinnulas altitudinem investigandam percipias; tunc enim certò statues æqualem esse illam, cum distantia; quam distantiam pro tuo libito, & quo volueris modo metieris, ut judices de illa altitudine.

Not. 2. Si dioptra cadit in latus rectum, ut in citatis figuris, tunc certum est altitudinem esse minorem distantia: eritque comparanda pars abscissa cum toto latere, per regulam 3, in hunc modum: ut se habet totum latus *v, c*, 100 partium ad partem abscissam, puta 50. Ita distantia cognita, puta 30 pedum; ad quæsitam altitudinem. Hæcque erit 15 pedum. At è contrà,

Not.

Not. 3. Tunc fore altitudinem majorem distantia, si dioptra cadat in latus transversum, quod supra est positum, & parallelum horizonti. Atque in eo quidem casu, ut se habet pars abscissa puta 50, ad totum latus quadrati 100. Ita distantia cognita, puta 60 pedum, ad quæsitam altitudinem. Quo pacto pars abscissa in regula trium obtinebit primum locum; eritque divisor; & dabit 120 pro quæsitâ altitudine, in nostra hypothesi. Et verò ut totum latus bis continet partem hanc abscissam, ita altitudo quæsitâ, in hac nostra hypothesi, debet bis continere distantiam, quam supponimus esse 60 pedum.

Not. 4. Ut habeatur tota rei propositæ altitudo, ab ipso plano cui inexistit; invento quotienti addendam semper esse altitudinem virgæ mensoriæ, seu mensoris.

Notabis denique ex his etiam satis colligi usum Radii astronomici, ad solvenda eadem problemata.

Problema III. Metiri distantiam in plano, quando in ejus extremo erecta est altitudo aliqua perpendicularis, cujus tamen basis, seu extremum infimum non cernatur. Tum deinde statuere de illa.

Praxis. Hic sunt opus stationes duæ, in eodem plano, & secundum lineam rectam, ut in *fig. 2. laterculi 4.*

Observandumque est primò spatium, seu differentiam inter illas stationes duas, tot esse passuum; puta 6.

Observandum est secundò, quas partes in eodem Quadrati latere abscindat dioptra in singulis stationibus, dum in eandem semper altitudinem destinatur visualis radius.

Item

Item observanda est differentia partium in utraque illa statione abscissarum. Hæc autem differentia, est numerus partium ille minor qui subtrahitur ex parte majori lateris abscissi in altera statione. Vnde sic Clavius instituit terminos Regulæ trium, ad solvendam quæstionem. Ut se habet differentia partium abscissarum, ad differentiam stationum; sic tota pars major complectens etiam differentiam partium utriusque stationis; ad quæsitam distantiam. *Exempli causa.* Ad fig. 2, laterc. 4. Sint abscissæ partes 20 in statione *c, d*, tum inter stationes facta differentia, seu spatio perticarum 8; in statione *g, f*, abscindantur 30; differentia partium inter 20, & 30, erit 10. Sic ergo age. ut 10 ad 8; ita 30 ad quæsitam distantiam. Ita Clavius.

Notandumque est; inventâ distantîâ hujusmodi, posse consequenter statui de altitudine; juxta methodum superiori problemate explicatam.

Problema I V. *Metiri altitudinem turris, per umbram, aut Solis, aut Lune.*

Praxis. Sit turris *a, b*, cujus umbra projiciatur *v, c*, ad 50 pedes. Figatur autem in terra baculus, cujus altitudo ex terra prominens sit pedum 6. projiciens umbram ad 16 pedes. Sic age; ut se habet umbra 16 pedum ad altitudinem baculi, pedum 6. Ita umbra turris 50 pedum, ad altitudinem ipsius turris.

Problema V. *Data latitudinis quantitatem indagare.*

Praxis ad figuram 2, laterc. 2, supponitur primò Quadratum, vel duplex conjunctim, ut in assignata figura; vel idem replicandum. Item, supponitur Quadratum constitui in aliquo fulcro parallelum horizonti, secundum suam planitudinem. Item

Notan.

Notandum est, hîc supponi cognitionem distantiae, tum objecti *a*, tum objecti *b*, juxta superiores praxes. His autem præsuppositis, sic age:

Primò designa tibi certum aliquod punctum in spatio interjecto *a, b*, puta *c*, in illud destinando radium visualem *o, k, c*, per pinnulas lateri illi affixas. Tum dioptram dirige in punctum *b*, ut habeas latitudinem *c, b*, hoc modo. Vt se habet totum latus Quadrati, ad partes abscissas in *g*, sic distantia cognita *o, c*, ad latus *c, b*, numerum autem inde collectum serva.

Secundò, idem præsta circa alteram partem latitudinis, observando partes abscissas in *f*, summamque ex numero utriusque partis collectam, statues esse totam latitudinem *a, b*.

Problema VI. *Putei, aut fosse profunditatem invenire.*

Praxis. Adverte ad *fig. 3, laterculi 2*, & observa latitudinem putei *b, d*, in ea Quadratum ritè disponendo; ejusque dioptram cum radio visuali dirigendo in *e*, unde fiant similes trianguli *a, b, c*, & *e, d, c*. Deinde sic age. Vt se habet segmentum *b, c*, ad totum latus *a, b*. Ita latitudo *b, d*, ad profunditatem *d, e*.

CAP. III. De usu Trigonometri.

Suppono Trigonometrum, ut videre est in *Tabula 3, later. 3, fig. 1, & 2*, constare ex tribus regulis, quarum una est basis instar; ex aliis autem altera, ipsi ad extremam partem infigitur circa centrum quoddam commune per modum circini. Altera tandem per fistulam illi basi committitur, modò adducenda, modò reducenda, prout res postulat. Omnes illæ regulæ in æquales partes distinguuntur; habentque sibi adjuncta

adjuncta pinnacidia, suoque fulcro basis firmari & sustentari debet.

Potest quidem istud instrumentum aptari in morem Radii astronomici, seu Baculi Jacob; sed proprium hunc usum habet, ut citra Arithmeticam serviat Altimetriæ. Quod exempli causa, uno vel altero in problemate aperio.

Problema I. Distantiam in plano metiri.

Praxis. Advertendum est ad primam figuram; suntque hic opus duæ stationes per lineam rectam in latum: quam lineam rectam observabis designando hinc inde certa aliqua signa transmissio per pinnulas basis, visuali radio.

In prima ergo statione latus basi affixum destina in objectum distans; & serva angulum quem efficit, per pinnulas intuenso.

Tum pergendo ad alteram stationem, numera vel passus, vel perticas: deinde latus mobile sic alteri admove, ut inter utrumque, tot tantum partes æquales intercipientur, quot numerasti passus, vel perticas. Quo facto, ubi instrumenti basim ritè disposuisti intra lineam rectam, de qua dixi; sic inflecte latus istud ad alterum, dum idem punctum objecti per foramina pinnularum inspicias. Tunc numerando partes æquales hujus lateris, à basi, ad angulum quem efficit cum alio latere; statues ex statione hac postrema ad objectum distans, tot esse vel passus, vel perticas. Alterum autem latus, denotabit distantiam primæ stationis.

Problema II. Altitudinem metiri ut in 2. fig.

Praxis. In unica statione istud perficitur. Supposita igitur distantia tot passuum; sic admove latus mobile ad alterum, ut in basi tot tantum partes intercipientur. Tum latus istud erige perpendiculariter. Ac deinde alterum
basi

basi infixum tandiu inclina, dum altitudinem quæsitam inspexeris. Quo facto; numera partes in latere perpendiculari interceptas, & definiens tot esse passus in data altitudine.

Problema III. *Profunditatem fossæ metiri.*

Praxis. Vbi nota fuerit latitudo illius fossæ; eadem uteris methodo, ac in altitudine investiganda; si modò inverteris instrumentum.

CAP. IV. De usu Quadrantis astronomici, & Sinuum.

Altimetria, uti quidem hætenus vidimus, est Trigonometria quædam, in qua investigatur quantitas laterum incognitorum, per proportionem ad ea quæ perspecta sunt nobis in aliis triangulis. Huic autem negotio perficiendo imprimis utilis est doctrina Sinuum; quam ita paucis trado, positâ ante oculos figurâ 2, laterculi 5, tabulæ 3.

Et in ea quidem primùm observanda est linea *i, n.* quæ dicitur chorda arcus *i, d, n.* illumque subtendens. Linea *a, d,* est semidiameter istius circuli, arcum 90 graduum constituens cum alia semidiametro *a, e.* Linea porrò *i, b,* ab extremo arcu *i, d,* perpendiculariter cadens in semidiametrum *a, d,* ejusmodi est de qua maximè jam instituitur sermo; est enim Sinus qui dicitur *Sinus rectus*; qui & ducta linea *a, i,* dicitur Sinus anguli *i, a, b,* semidiameter verò totalem arcum constituens, vocatur Sinus totus, seu totalis; hujusque pars *d, b,* chordâ *i, n,* & arcu *i, d, n,* intercepta, vocatur Sinus versus, aut sagitta: linea *i, e,* ab extremo arcus *d, i,* perpendiculariter cadens in semidiametrum *a, e,* & subtendens arcum *i, e,* dicitur Sinus rectus secundus, & Sinus complementi; quia est Sinus rectus

rectus arcus i, e , qui dicitur complementum, seu arcus complementi; quia additus arcui i, d , complet totum quadrantem d, e . Item, linea eadem i, e , vocatur præterea Sinus complementi, quia est Sinus anguli i, a, e , qui additus angulo i, a, b , complet totum angulum rectum b, a, e .

Notandumque est intelligi semper Sinum rectum, quoties absolutè fit mentio alicujus Sinus. Atque ita, ut diversi anguli dicuntur tantæ, vel tantæ magnitudinis, prout tot, vel tot graduum arcubus respondent; ita singuli suos Sinus proprios habent, tantæ vel tantæ magnitudinis, seu tot partium; unde consequenter cognitis angulis, eorumque Sinibus, possis judicare de quantitate laterum ipsis oppositorum in triangulo: siquidem, ut postea dicam, eam inter se latera trianguli proportionem habent, quæ reperitur inter Sinus angulorum ipsis oppositorum. Iam verò,

Notabis 2. In Quadrante astronomico Sinum omnium maximum, quia recto angulo, omnium utique illorum maximo obtenditur, esse ipsam semidiametrum; nam v, c , Sinus 89 gr. pauciores habet partes, & sic deinceps decrescunt, quæ proportionem sunt Sinus minorum, & minorum angulorum; & consequenter subtenduntur minoribus arcubus, inciduntque in semidiametri partes remotiores, & remotiores à centro. Item

Not. 3. Semidiametrum ipsam, ut jam monui, dici totum seu totalem Sinum. Supponitur autem pro libito Sinus ille totalis divisus in tot, vel in tot partes; quæ facta suppositione, singulis Sinibus aliis suis attribuitur numerus partium; colligiturque vel per regulam pro-

portionum ; vel quacunque tandem alia metho-
do; ut apud Clavius, aut alios legere est. Com-
munior verò hypothesis totali Sinui tribuit par-
tes 100000; nam quò inajor est ille numerus, eò
redditur calculus & supputatio accuratior. At-
que in illa hypothesis ; Sinuum aliorum hic Ca-
non instituitur, qui relictis minutiis, complecti-
tur solùm integros Sinus; sicque digestos vides,
ut quilibet gradus , habeat sibi è regione oppo-
situm proprium suum complementum.

<i>Sinus</i>	<i>Gradus</i>	<i>Gradus</i>	<i>Sinus</i>
1749	1	89	99985
3490	2	88	99939
5233	3	87	99863
6976	4	86	99756
8716	5	85	99619
10452	6	84	99452
21186	7	83	99255
13917	8	82	99027
15643	9	81	98769
17365	10	80	98481
19081	11	79	98163
20791	12	78	97815
22495	13	77	97437
24192	14	76	97030
25882	15	75	96593
27564	16	74	96126
29237	17	73	95630
30902	18	72	95106
32557	19	71	94552
34202	20	70	93969

<i>Sinus</i>	<i>Gradus</i>	<i>Gradus</i>	<i>Sinus</i>
36887	21	69	93359
37461	22	68	92718
39073	23	67	92050
40674	24	66	91355
42262	25	65	90631
43837	26	64	89879
45399	27	63	89101
46547	28	62	88255
48481	29	61	87462
50000	30	60	86603
51504	31	59	85717
52992	32	58	84805
54464	33	57	83867
55919	34	56	82904
57358	35	55	81915
58779	36	54	80902
60181	37	53	79864
61566	38	52	78801
62932	39	51	77715
64279	40	50	76604
65606	41	49	75471
66913	42	48	74314
68200	43	47	73135
69466	44	46	71934
70711	45	45	70711

Atque istâ quidem doctrinâ Sinuum ita explicatâ ; ut intelligas tandem, quem maximè in finem comparata sit, aperio paucis hisce problematis, de triangulorum rectilineorum geodæsia, seu mensuratione.

Problema I. *Datis angulis alicujus trianguli proportionem laterum invenire.*

Praxis. Consule tabulam primam, laterculo 2. in quo multæ sunt descriptæ figuræ triangulares; & quam lubuerit elige; puta 2. in ea pono exemplum. Quia latera triangulorum eam inter se habent proportionem, quæ reperitur inter Sinus angulorum ipsis oppositorum: ex hypothesi autem quod angulus c , sit 40 gr. angulus verò a , 50. angulus b , qui rectus est 90. Quære in tabula superiori numerum partium Sinus illius proprium, qui tali, & tali angulo respondet. Tunc dices: ut se habet Sinus anguli c , tot partium, ad latus a, b , tot partium: Ita Sinus anguli a , tot partium; ad latus b, c , & sic de aliis.

Problema II. *Cognito uno latere, & uno angulo acuto trianguli rectanguli; reliqua latera illius trianguli aperire.*

Praxis. Exemplo in eadem modo allata figura posito. Res manifesta est ex superiori problema-
te. Si enim noveris angulum c , esse 40 gr. latus verò a, b , ipsi oppositum esse pedum 30. Sic age; ut Sinus anguli c , tot partium est ad latus a, b , 30 pedum: ita Sinus anguli a , ad latus b, c , aut Sinus rectus anguli b , 100000 partium, ad latus a, c .

Problema III. *Distantiam in plano metiri per Quadrantem astronomicum.*

Praxis. Posita ante oculos tabula 3. laterc. 2. fig. 1. In qua suppono esse notum in instrumento angulum d, a, b , quem designat Alidada; & consequenter notum esse angulum e , quia est complementum illius anguli d, a, b , quem efficit Alidada in instrumento. Quare sic ages. Ut Sinus anguli e , ad virgam mensurariam, a, f . Ita Sinus anguli e, a, b , ad latus f, e , quæ est quæsitæ distantia.

Sic-

Sicque à pari per proportionem ages investi-
gando altitudines ; sive per unicam stationem ;
sive per duplicem , attendendo ad differentias
angulorum utriusque stationis, tum ad differen-
tias ipsarum stationum ; ut tradit Clavius Pro-
blemate primo libri 2. Geometriæ practicæ.

Notabis tandem ad finem hujus capituli, iterum
posita ante oculos *tabula 3. laterc. 5. fig. 2.* inter-
dum quoque esse in usu apud Geometras , tum
lineam tangentem , ut vocant , tum secantem.
Tangens est recta linea Sinui recto parallela, al-
tero sui extremo tangens punctum arcus, in quo
angulum rectum cum semidiametro illius con-
stituit ; ut linea *c, d* , linea autem secans, ut *a, c* ,
ea est quæ ducta à centro , & circulum secans,
tangenti occurrit ; cum tangente ipsa , & Sinu
totali triangulum constituens *a, c, d*.

C A P. V. Planimetria.

Planimetria ; quæ & Geodæsia planorum di-
citur : est ars mensurandi superficies planas,
quales sunt triangulæ , quadrangulæ ; aliæque
polygonæ, & rotundæ. Quod hisce problema-
tis complectimur.

Problema I. *Aream, seu capacitatem trianguli
rectanguli dimetiri.*

Praxis. Eorum laterum quæ sunt circa angu-
lum rectum ducas unum in dimidium alterius ;
& prodibit quæsitus numerus , vel pedum ; vel
passuum quadratorum ; seu mensuræ illius quam
determinaveris, & rei mensurandæ idoneam ju-
dicaveris.

Probl. II. *Quadranguli rectanguli aream de-
finire.*

Praxis. Eorum laterum quæ sunt ad eundem
angulum, unum multiplica per aliud, & habebis

quæsitam aream. Ut ostenditur ad sensum in tab. 2. laterc. 2. figura 2. ad tria illa quadrata. Item fig. 4. 5. & 7.

Probl. III. *Pentagoni regularis aream investigare.*

Praxis. Finge perpendicularem ab illius centro ad latus. Tum illam perpendicularem ducas in semissem ambitus; & fiet illud quod intendis.

Probl. IV. *Aream trianguli non rectanguli, & polygoni cujuscunque irregularis capacitatem invenire.*

Praxis. Ex variis angulis describe perpendiculares ad latera opposita, unde fiant diversa triangula rectangula. Singula autem seorsim mensurabis juxta methodum traditam primo problemate. Tum tandem summam totalem omnium triangulorum ejusmodi per additionem colliges.

Probl. V. *Aream circuli definire.*

Praxis. Diversa est, pro diversis casibus. Ac primò quidem, si nota est diameter, & circumferentia; duc semidiametrum, in semissem circumferentiæ; & habebis intentum.

Si sola diameter nota sit; fac per regulam Trium, ut 7, ad 22: ita partes diametri tibi notæ, ad circumferentiam; quâ cognitâ, totam circuli aream investigabis, eo quem jam attuli modo.

Si nota solùm est circumferentia; Fac ut 22 ad 7. ita partes circumferentiæ tibi notæ, ad diametrum.

Item; cùm ex Archimede, ut superiori tractatu exposui, area circuli æqualis sit cum triangulo rectangulo, cujus unum latus circa angulum rectum sit æquale semidiametro circuli; alterum

rum verò pariter æquale fuerit circumferentiæ circuli ; notâ hujus trianguli areâ , ex 1. probl. poteris ex ea capacitatem circuli inferre.

C A P. V I. Stereometria.

HÆc est ars mensurandi capacitatem corporum, seu figurarum solidarum.

Probl. I. *Corporis cubici capacitatem definire.*

Praxis. Vnum ex ipsius lateribus ducatur in seipsum ; idemque latus iterum ducatur in productum : & prodibit quæsitus numerus.

Probl. II. *Aream parallelepædi, cujusmodi est trabs, invenire.*

Praxis. Aream basis investiga; ducendo latus unum in aliud ex iis quæ sunt circa eundem angulum : ac deinde basim hanc ducas in totam parallelepædi longitudinem. Et factum bene.

Probl. III. *Cylindri capacitatem exponere.*

Praxis. Duc lineam ejus perpendicularem in aream basis, & habebis intentum.

Probl. IV. *Pyramidum & Conorum aream invenire.*

Praxis. Duc eorum basim in tertiam partem perpendicularis ; & habebis intentum.

Probl. V. *Sphæræ superficiem & soliditatem investigare.*

Praxis. Habemus ex superioribus problematis, quemadmodum circumferentia ex diametro, vel è contra diameter ex circumferentia cognoscatur ; tum quomodo his cognitis, habeatur & area plana, seu capacitas circuli. Iam dico, superficiem convexam haberi, si aream planam circuli maximi datæ Sphæræ quadruplicaveris. Tum præterea soliditatem assequeris, ducendo semidiametrum in tertiam partem inventæ superficiæ.

Problema VI. *Aream, seu capacitatem quinque corporum regularium invenire.*

Praxis. Iam diximus Hexaëdri, seu Cubi aream gigni ex multiplicatione lateris in se, & in productum.

Item Tetraëdrum, seu Pyramidem fieri quoque ex ejus altitudine ducta in tertiam basis partem: vel ex ejus base, ducta in tertiam partem altitudinis.

Supereft ergo ut agam de Octaëdro, Dodecaëdro, & Icosaëdro.

Quia verò Octaëdrum dividitur in duas pyramides similes, & æquales, quarum basis communis, est quadratum à latere descriptum; si utriusque Pyramidis investigetur area, habebitur consequenter & area Octaëdri, ex areis illarum pyramidum conflata.

Deinde quia ductis ex centro Dodecaëdri ad omnes ejus angulos rectis lineis, in 12 pyramides æquales dividitur; si area unius pyramidis multiplicetur per 12, habebitur area totius Dodecaëdri.

Ita, quia perinde Icosaëdrum in pyramides triangulares similes, & æquales dividitur; habebitur quoque area totius Icosaëdri, si pyramidis unius inventæ aream, per 20 multiplicaveris.

Si autem laboraveris in obtinenda altitudine Pyramidis, hanc sequere methodum. Statuas in vertice planum basi æquidistans, & ab eo ad planum, in quo basis, demittas perpendicularem; hujus habita magnitudine, quod facile est; obtinebis altitudinem Pyramidis: Idemque est agendum pro Coni altitudine indaganda.

A P P E N D I X.

De Circino proportionis.

F*Rustra* subjicerem illius formam, cum ob-
vius sit cuilibet; nec istæ, perinde ac praxes
aliæ Mathematicæ, satis unquam perfectè com-
prehendi possint, nisi præterea adhibeatur opera
periti magistri, qui singula quæ leguntur digito
cominonstret.

Notabis igitur instrumentum hoc constare
duabus regulis ad centrum, circini cujusdam in-
star, conjunctis. Ac in uno quidem earum late-
re utrinque à centro ducuntur lineæ rectæ, quas
vocant lineas partium æqualium, quia dividun-
tur in partes inter se æquales. Altero autem in
latere, ex centro pariter ducuntur utrinque aliæ
duæ, quas vocant chordarum; quia in iis gradus
omnes semicirculi, & chordæ iis subtensæ, ser-
vata proportionem designantur. Quid porro, &
quales sint chordæ arcuum, faciliè potes intelli-
gere ex inspectione *figura 3. tab. 4.* Huc non-
nulli addunt pinnulas ad praxes Altimetriæ. Sed
quia jam satis egimus de Altimetria; alios hujus
instrumenti usus nonnullos, breviter aperiam.

*Problema I. Lineam datam secare in partes
assignatas.*

Praxis. Adi ad partes æquales; & lineam
ejusmodi, communi circino comprehensam, illi
numero applica, in quo faciliè possis designare
partes quæsitæ. *Exempli gratia.* Vis lineam ali-
quam dividere in 4. illam transferas ad partem,
vel 20, ut sub ea instrumenti apertura, accipias
aperturam numeri 5; vel ad partem 40, ut ac-
cipias aperturam numeri 10.

• *Probl. I I. Dato Circulo, in eo designare latus polygoni alicujus regularis.*

Praxis. Adi ad lineam chordarum. Ac primò quidem dati Circuli semidiametrum transfer ad aperturam 60 graduum. Notabis enim numerum hunc in circino proportionis, esse distantiam semidiametri, sub qua in istiusmodi operationibus aperiri semper debet. Vt igitur ad quæstionem redeam; ubi sic reliqueris apertum circinum; quære numerum graduum anguli illius cui subtenditur latus quæsitum polygoni: tum sume intervallum, seu aperturam circini sub eo numero; & deinde illud intervallum transfer ad datum Circulum; & factum bene.

Notabis autem hac arte habiturum te numerum graduum dicti lateris, si 360 divides per numerum laterum quæsitum polygoni: puta si polygonum illud fuerit triangulum, divide per 3. si pentagonum, divide per 5; & sic de aliis. Quare invenies angulum trianguli esse 120 grad. Quadrati esse 90: pentagoni, esse 72, &c. Si ergo volo inscribere dato Circulo triangulum æqualiterum; sumam in instrumento ritè disposito, id est jam aperto juxta grad. 60: sumam, inquam, distantiam ad intervallum numeri 120; atque ita per proportionem de aliis.

• *Probl. I I I. Aperire Circinum proportionis ad datum angulum.*

Praxis. Vis aperire sub angulo v. g. 50. Accipe à centro instrumenti, distantiam numeri, seu gradus 50, juxta longitudinem lineæ chordarum; tum distantiam transfer ad aperturam 60 gr. & dabit tibi quæsitum angulum.

Item si vis intelligere sub quo angulo sit apertum instrumentum; sume aperturam ad gradum illum 50, & illam transfer ad longitudinem

dinem lineæ chordarum, crus alterum Circini communis statuendo in centro instrumenti; crure alio designabitur tibi quæsitus numerus.

Probl. I V. *Datum angulum metiri.*

Praxis. Illi angulo inscribe arcum: tum juxta illius arcus semidiametrum, aperi instrumentum, ex more, illud Circini intervallum applicando utrinque ad grad. 60: Quo in statu manente instrumento, sume arcus magnitudinem, & illam defer juxta longitudinem utriusque lineæ chordarum, dum æqualis utrinque gradus attingatur. Et sic de aliis id genus problematis.

Quo pacto agrum, arcem, vel castra quis dimetiri, & in charta delineare ex sola inspectione possit.

EN rei totius figuram in tab. 3. laterculo 5. potesque hunc in usum adhibere vel Graphometrum; qualem descripsi in tab. 4. fig. 7. vel solum Quadrantem, ut in tabul. 3. laterc. 5. ad figuram 1. Hæc praxis tres habet partes.

Ac primò quidem, aptandum est instrumenti latus, ad latus loci describendi: ipsius etiam longitudinem observando.

Deinde supposita linea, seu latere a, f , per dioptram intende ad angulos alios e, d, c , notando quantitatem angulorum qui in instrumento fiunt.


Item delato instrumento ad partem extremam hujus lateris, dirige similiter dioptram ad eosdem loci delineandi angulos, per lineas b, c : b, d : b, e : b, f ; observando semper quinam designentur gradus in instrumento. Hac autem circa locum visum peractâ praxi.

Postea verò instituenda est scala passuum, aut ejusmodi alterius mensuræ, juxta quam describas in charta latus istud primum a, b , cujus deprehensa est longitudo. Tum in extremis lineæ descriptæ partibus ritè apposito instrumento, alias lineas sub iisdem angulis, qui in prima praxi modò notati fuerant, ducere oportet, nempe lineas $a, f: a, e: a, d: a, c$. Deinde lineas $b, c: b, d: b, e: b, f$. Ac denique ut opus absolvatur, latera quæ formam quæsitam constituent, circuminscribenda sunt per concursus istiusmodi linearum.


Supereſt tertia pars hujus praxeos, quæ posita est in mensuratione agri, vel arcis, aut oppidi, beneficio hujus schematis. Istud ut præstes; debes primò colligere longitudinem singulorum laterum, ex scala mensurarum antea descripta. Tum cognitis hisce lateribus, statues facilè de area, seu capacitate figuræ totius, sequendo methodum quam tradidi in Planimetria.

Hic apponenda sunt tabula quatuor Geometrica.


I




II



III








TABULA

II.

I



II




III



TABULA III.

I



II




III




III








V





TABULA III.





METHODVS
ET
INSTITVTIO
MATHEMATICÆ.
SPHÆRA MVNDI.
PRÆFATIO.

De Astronomia, & de Principiis cognitionum
Cœlestium.

Sphæram Mundi universam contemplaturus, ordior à Cœlo, quæ pars est Mundi nobilissima; si prius aliqua præmiserò de Phanomenis, id est, de iis quæ in Cœlo apparent; & ex quibus tanquam ex fontibus hauritur rerum omnium cœlestium cognitio. Atque inter ista quidem Phenomena præcipua sunt; Motus; Illuminatio; Eclipses; Stella de novo apparentes; Cometa: huc adde parallaxes, &c. Sic enim

Dico I. Ex diversitate motuum, quibus cidentur astra, evidenter colligimus illa non esse eidem infixa Cœlo; cum unum & idem corpus, eodem tempore moveri motibus per se contrariis ejusmodi non possit. Item ex motu syderum cognoscitur Cœli rotunditas, aliâque id genus, quæ suis locis prosequemur.

Dico II. Ex illuminatione, seu luminis profusione, aut emanatione à corpore cœlesti, judicamus de illius loco in Cœlo. Nam lumen à corpore lucido

profunditur de se in sphaeram activitatis per lineas rectas; quamobrem excepto luminis radio per duas instrumenti astronomici pinnulas, locum ipsius designamus. Item ex eo quod videamus Stellam, puta Lunam, modò illuminatam, modò luce destitutam, concludimus illam aliunde suum lumen mutuari.

Notandumque est etiam ad varias phases astronomicas explicandas, opacum à lucido equali secundum mediam sui tantum partem collustrari posse; & in eo casu umbram ab ipso corpore opaco veluti projectam, fore in infinitum cylindroides, ut videre est in tabula 5. numero 7. ad figuram 2. Ratio est, quia lumen illud propagatur solum per lineas rectas. Item si lucidum fuerit minus quam opacum, projicietur etiam umbra in infinitum, sed calathoides, id est in formam calathi; nec similiter radii lucidi unquam concurrent; ut in fig. b. At è contra si lucidum fuerit majus opaco; illuminabit plusquam mediam illius partem, radiique illius tandem coibunt; nec profundetur umbra, nisi conoides, id est, in modum coni; ut in fig. c. quo ex principio judicamus Solem esse majorem Terrâ; ut postea videbimus. Item

Notabis 2. Lucidum ceteris paribus majores profundere umbras, quò fuerit vicinius; contra autem, minores umbras existere à remotiori. Ita videre est in tab. 3. fig. 7. lucente Luna, majores projici umbras à gnomone a, b, quam fiat Sole existente in eadem elevatione supra horizontem: sicque ex umbris possumus judicare de altitudine corporum cœlestium. Item

Not. 3. Quæ astra nobis occultantur ab aliis, ea tenere locum superiorem; neque enim occultari nobis possunt, nisi ex interpositione corporis inferioris, quomodo judicamus Lunam esse omnium Stellarum infimam, cum à nulla occultetur, &
omnes

omnes subinde occultet, ipsumque Solem maximè, dum is patitur Eclipsim.

Dico III. Parallaxis est diversitas, seu differentia aspectus, inter verum, & apparentem ejusdem astri locum. Quod quidem ut intelligas, sume figuram 3 tabula 3. & nota hic non agi de loco physico in quo res est; nempe de concava superficie corporis immediatè ambientis; sed potius de loco astronomico, qui dicitur esse punctum in firmamento, in quo, vel potius sub quo planeta est, aut cui respondet per lineam ductam à centro mundi, per centrum ipsius planetæ, & in firmamento desinentem: quo pacto m est verus locus astri i: alioquin si astrum illud conspicitur ex superficie Terræ; puta ex b, apparebit respondere puncto firmamenti l. qui idcirco dicitur esse tantum locus apparens; diversitas autem, & distantia inter l & m; dicitur esse parallaxis: & pro quantitate arcus illius intercepti, dicitur, esse tanta vel tanta parallaxis. Quare

Notabis i. Oculo existente in centro mundi, nullam fore parallaxim. Item, astrum in vertice positum, nullam efficere parallaxim; at quò magis descendit à vertice, acceditque ad horizontem; eò majorem habet parallaxim. Item, quò astra nobis viciniora sunt, eò majorem efficiunt parallaxim; namque etiam ob causam judicamus Lunam esse omnium Stellarum infimam, quia majores efficit parallaxes, quàm reliqui planetæ. Contra autem quò altiora sunt astra, eò minorem efficiunt; unde judicamus Saturnum esse proximum firmamento; quia nullam efficit parallaxim.

Dico IV. Ex principiis Opticæ; quando res eadem, cæteris paribus, videtur minor, aut minùs luminosa; signum est manifestum, quòd à nobis fiat remotior. Atqui Planetæ iidem, sub iisdem meridianis, etiam quando purior est aër, nec fieri ulla re-

fractio radiorum potest, apparent nobis modo propinquiores, modo remotiores; efficiuntque majores, aut minores parallaxes. Vnde judicamus illorum distantias à centro mundi variari; nec moveri circa Terram per Orbes Terra concentricos, sed potius excentricos; quales prospicere est in tab. I. fig. 2, & 3.

Notandumque est locum excentrici, in quo Planeta remotior est à Terra, vocari ipsius apogaeum: item vocatur ☿ aux, aut apsis suprema. Locus autem oppositus, in quo Terra vicinior est, vocatur Perigaeum, ☿ oppositum augis, apsisque infima. Quo pacto Sol est in Apogæo circa initia Cancrī: tuncque apparet minor: locus autem Perigæi ipsius est circa initia Capricorni, tuncque apparet major.

Item cum alii Planetae præter Solem in suo Apogæo, non appareant ejusdem semper magnitudinis, habeantque inaequales parallaxes, ut Luna; idcirco necesse fuit in illorum Orbibus excentricis affingere præterea ☿ epicyclos, in quibus circumagantur intra excentricum, unde à Terra magis distent modo, modo ad eam magis accedant. Quanquam in eorum sententia qui statuunt Cælum Planetarum esse liquidum, Orbes illi concentrici, ☿ Epicycli, non sunt reales, sed tantum imaginarii, ut explicetur illa diversitas, ☿ apparens anomalia seu irregularitas motuum, quibus Planetae ab Intelligentiis per coelestem regionem deferuntur ad bonum universi.

Tabulas reperies ad finem Tractatus de Sphæra Terreſtri.

METHODVS

ET

INSTITVTIO

MATHEMATICÆ.

SPHÆRA MVNDI.

CAP. I. *Protheoria Cœli.*



*S*uppono, quod in Sphæra Terrestri probaturus sum, Terram ad Mundi centrum esse dispositam; eamque diversis excavatam partibus continere aquas, cum quibus unum globum efficiat; tum ambi-ri aëre undequaque circumfuso, supra quem Sphæra ignis locum teneat. Hic mihi tantum sermo est de Sphæra, seu Mundo Cœlesti, qui mundum elementarem istum ambitu suo complectitur. Sed

Notandum est, Mundi systema, sive ordinem partium, variè tradi ab authoribus diversis, variasque hypotheses constitui. Nam Copernicus quidem, Solem immotum in centro mundi collocat; Terram autem cum aliis elementis, Sphæra lunari solida inclusam, circa Solem diurno motu ferri supponit, ut descriptum vides *in tab. I, fig. 9.* Quanquam Aristotelis, Ptolomæi, veterumque omnium doctrina fuit, Mundum elementarem medio in mundo consistere: circa hunc volvi Cœlos solidos, tanquam Sphæras crySTALLINAS, alias aliis inclusas
cum

cum syderibus infixis, eo ordine, quem oculis subjicit *figura prima tab. 1.* Vbi quidem Luna ponitur orbe in infimo, quam alii Planetæ sex ad firmamentum usque, seu Cœlum Stellarum fixarum consequuntur, adjectis iis characteribus, quibus designari solent ab Astronomis.

Item quia pro diversitate motuum qui deprehenduntur in astris, diversas supponunt Sphæras solidas, quarum proprii sint illi motus; ideo statuunt primum aliquod mobile, cujus impetu inferiores orbes rapiantur ab ortu in occasum; cum aliunde supponant, eos motu proprio ferri ab occasu in ortum, secundum ordinem Signorum Zodiaci. Item quia supponunt in iisdem astris motum quendam trepidationis, seu librationis, tum à Septentrione in Meridiem, tum à Meridie in Septentrionem, ideo inferunt Cœlum aliud interjectum à quo efficiatur.

At Tycho Brahe recentiorum Astronomorum facile princeps; etsi cum antiquis hoc habeat commune, quod Terram, aliaque elementa inedio in mundo collocet; quod Saturnum, Iovem, ac Martem ordine consequenti existere infra Stellæ fixas scribat, Lunamque omnium infimam esse velit; ab iis tamen discedit, quod existimet spatium illud ingens à mundo elementari ad firmamentum usque, in quo decurrunt Planetæ, esse liquidum; Veneremque, & Mercurium, quasi Satellites quosdam circa Solem deferri, cum perspiciantur esse in modum supra, in modum infra, in modum ad latera ipsius. Ut intueri licet *in tabula 2.* Atque ut id, quod res est, aperiā;

Dico 1. De facto regionem illam Planetarum

rum esse liquidam, & permeabilem; non autem conflata ex solidis Sphæris tam multiplicibus. Probatur, quia hæc sola constitutio Cœli admittenda est, quâ sublatâ explicari non possunt phænomena, seu res illæ variæ, quæ in Cœlis apparent. Atqui sublatâ, seu negatâ regionis illius liquiditate, multa quæ manifestè apparent, explicari non possunt. Nam primò quidem explicari non potest sine corporum penetratione, motus illius Planetæ, quem Martem appellant; siquidem per eadem cum Sole spatia traducitur; ut systema Tychonis repræsentat, & supponimus ab omnibus jam vulgè Astronomis admitti. Item hoc ipsum arguunt cometæ, qui sæpenuerò supra Lunam, & Solem cursus tenuerunt syderibus aliis prorsus insuetos. Item in hac tantùm nostrâ hypothesi explicari possunt ea, quæ de motu Veneris, & Mercurii; tum de motu aliorum Planetarum circa Solem, nec non circa Iovem & Saturnum vulgè proferuntur; ut postea exponam; nec opus nobis est confugere ad orbés excentricos, aut Epicyclos reâles, quibus alii tantopere distorquentur, ut de motu Planetarum tam vario & multiplici respondeamus; cum hæc facilè in Cœlo permeabili præstari possint; per varium lationis modum, quem ab Intelligentiis motricibus accipiunt.

Dico II. Præter hoc Planetarium Cœlum, duplex aliud admitti debet; nempe Firmamentum cui Stellæ affixæ, tum Empyreum beatorum sedes, quæ corpora solida sunt. Probari quidem istud certis experienciis, aut certa ratione physica non potest; at satis compertum habetur ex Scriptura sacra. Primò, cum in Iob legimus, *Cœlos esse solidissimos & quasi are fusos,* quod

quod attribui Cœlo Planetarum non potest : ergo tantum Empyreo , & Firmamento : cum alii Cœli propriè dicti nulli sint , quibus id quod dicitur in plurali , accommodetur. Item hoc satis innuit B. Paulus , cum ait , *se raptum fuisse ad tertium Cœlum* ; sic enim tres propriè dicti cœli recenseri possunt ; cum nubes , & aër , tum æther , impropriè tantum & ex vulgari sermone appellentur cœli , quia pertinent ad regiones Terræ superiores. Item *Genesis* 1. ex communi doctrina SS. Patrum apud Salianum , tunc sermo est de illo Cœlo , quod Empyreum nominamus , ubi legimus *Deum in Principio creasse Cœlum & Terram* ; cum præterea dicatur *creasse & Firmamentum in medio aquarum* , in quo aliquantò post *Stellas* apposuerit ; unde ajunt malè , qui Firmamentum , non pro ejusmodi Cœlo altero , sed potiùs pro aëre sumendum putant ; cum nullibi aër dicatur Firmamentum ; nec bene Firmamentum appelletur , id quod omni firmitate caret , quin potiùs habet perfectissimam liquiditatem.

Notandumque est , ex eo etiam loco certum fieri , quemadmodum aquæ nostris elementaribus similes existant supra Firmamentum , ibique conserventur ; quod alibi non semel confirmat Scriptura Sacra , ut quando legimus , *Aquæ , quæ supra Cœlos sunt , laudent nomen Domini* , *Psal.* 148. Item , *Danielis* 3. Et si autem quo usu illæ à Deo conserventur , ignoremus , eas nihilominus existere non dubitemus , inquit D. *August.* de *Genes.* ad *lit.* *Quia major est Scripturæ auctoritas , quàm omnis humani ingenii capacitas.*

Dico III. Cœlum illud , quod ambitu suo reliquas mundi partes complectitur , rotundum est.

est. Probatum, quia hanc debuit habere formam, quæ omnium perfectissima est : Item, ea est omnium capacissima, ut in Geometria exposui, *De figuris isoperimetris*. Confirmatur, quia Stellæ Firmamento affixæ, feruntur circa Terram motu circulari : Nam siue existant in Oriente, siue in Meridie, aut Occidente ; apparent semper sub eadem magnitudine. Ergo ubique in suo motu à nobis æquidistant. Alioquin juxta principia Opticæ ; si qua parte fierent à nobis remotiores, viderentur etiam minores ; quod non contingit.

CAP. II. *Varia Cœli regiones, per circulos imaginarios distinctæ.*

Posita ante oculos figura prima tertiæ tabulæ ; & secunda tabulæ secundæ ; aut potius Sphæra aliqua materiali, si quæ tibi est in promptu : finge tibi Cœlum quasi niti duobus polis oppositis, per quos, simul ac per centrum mundi, trajiciatur veluti axis quidam, circa quem perpetua circulatione moveatur. Ex polis illis alter dicitur Arcticus, seu Borealis, aut Septentrionalis, vulgo *Nord* : Italis *Tramontana* : alter verò Antarcticus, seu Australis, vel Meridionalis, vulgò *Sud*.

Dico autem I. Sphæra illa universa, aut Cœlum ipsum aspectabile, tam multis ornatum luminaribus ; quod vulgò appellamus *Firmamentum*, trifariam dividitur per tres circulos imaginarios. Nam primò, per *Horizontem*, seu *Finitem*, dividitur in duo Hemisphæria ; quorum alterum dicitur superius ; alterum verò inferius. Sic in tabula 4. figura 1, 2, & 3. aliisque similibus, linea *c. d.* repræsentat istum horizontem. Item circulus *a. b.* in fig. 1. tab. 2.

Secun-

Secundus est *Æquator*, medius inter duos polos; per quem dividitur Mundus in partem Borealem, & Australem: diciturque etiam ille circulus *Æquinoctialis*, quia quando Sol annum cursum conficiens, sub ea linea inexistit, tum efficit æquales dies cum noctibus.

Tertio denique est *Meridianus* per utrumque polum, & *Æquatorem* ductus; cujus beneficio Mundus universus dividitur æqualiter in partem Orientalem, & Occidentalem. Dicitur *Meridianus*; quia quando Sol ab horizonte procedens illum attigit, est *Meridies* iis omnibus, qui sub eo circulo per totum hemisphærium existunt; cum ex opposito consequenter sit media nox iis, qui sub illo habitant in hemisphærio inferiori.

Notabis verò, *Æquatorem* aliosque complures circulos, eosdem semper, atque immutabiliter, secundum quoscunque mundi habitatores, in eadem Cœli parte describi. At *Meridianus* non uni tantum parti mundi addicitur, sed potius tot concipiendi sunt *Meridiani*, quot puncta verticalia ab ortu in occasum designantur; ita ut non possit esse idem *Meridianus* duorum hominum, quorum alter sit Orientalior altero. Item

Not. 2. Mundi horizontem, cujus meminimus modò, vocari *Astronomicum*, & *rationalem*: quia is tantum est in usu apud Astronomos, solumque ratione percipitur; & fingitur Mundum ex æquo dividere in duo hemisphæria: quo pacto differt ab horizonte sensibili, qui scilicet visu nostro definitur; & est spatium illud in superficie vel Terræ, vel Maris, quod potest attingere oculorum acies circumducta, sublatis omnibus impedimentis: ut *videre est in fig. 1. tab. 8.* At

Not.

Not. 3. Vnicuique ex iis circulis, suos attribui polos imaginarios, & axem, circa quem fingatur posse verti. Sic *Æquator* habet pro polis *Arcticum*, & *Antarcticum*. Alter verò ex polis nostri horizontis est punctum verticale, seu vertici nostro imminens, quod vulgò appellant *Zenith*. Tum alter, est punctum ipsi diametraliter oppositum, & infra aliud hemisphærium, quod vocant *Nadir*.

Dico II. Ab *Æquatore* hinc atque inde 23 graduum, & semis intervallo, designantur duo circuli *Æquatori* paralleli; quorum alter est *Borealis*, & vocatur *Tropicus Canceri*; quia in eo est initium illius signi quod appellatur *Cancer*; *Australis* verò alter, dicitur *Tropicus Capricorni*; quia in eo incipit signum *Capricorni*, de quo postea. Illi autem Tropici dicuntur *metæ Solaris* cursus annui: quia *Sol*, vel accedendo ad *Septentriones*, vel recedendo ad *Austrum*, nunquam transilit istos terminos; quamobrem & ibi dicuntur fieri *Solstitia*; quòd ibi veluti stet, non tenendo ulterius, cùm potius aliam in partem convertatur; unde & illi circuli vocantur tropici, à *τροπή*, id est, conversio.

Dico III. In distantia etiam 23 graduum & semis à polis mundi, designantur minores circuli, quos vocant *Polares*, quia polis mundi sunt proximi. Et in iis quidem esse constitutos polos *Zodiaci*, dicam postea. Verùm his suppositis;

Dico IV. *Cœli* facies universa, tum mundus universus respectivè ad illam cœli faciem, vulgò dividitur quinque in regiones, seu plagas diversas, quas appellant *Zonas mundi*. Nam *Zonæ* illæ definiuntur, *Regiones* circa mundum,

dum, temperaturâ differentes, ob Solis propinquitatem, vel distantiam.

Ac primò quidem illa dicitur Zona torrida, quæ intra Tropicos continetur, dividiturque bifariam per Æquatorem. Dux autem aliæ utrinque comprehenduntur inter Tropicos, & circulos polares, quæ appellantur Temperatæ. Dux illæ denique vocantur frigidaë, quæ circulis polaribus definiuntur. Item

Notabis 1. Mundum etiam dividi secundum latitudinem per varia Climata: quæ Climata, sunt spatia & Zonæ quædam, universum ambientes mundum, ea latitudine præditæ, juxta quam dies anni maxima, in fine per semihoram varietur: unde consequens est, ut Clima sic claudatur duobus circulis Æquatori parallelis; iique dicuntur existere sub eodem Climate, qui intra parallelos ejusmodi habitant circa Terram. At

Not. 2. Quemadmodum in Sphæra Cœli designentur circuli varii, ex quibus alii majores dicuntur, quod Sphæram dividant in duas partes æquales: contrà autem alii sunt minores, ut Tropici, & polares circuli: quod repræsentare tibi potes commodè in Sphæra materiali, aut saltem in figurâ primâ tabulæ tertiæ. Item

Not. 3. Quemadmodum etiam tota illa mundi Sphæra dividatur in partem Orientalem, vulgò *Est*, Occidentalem, *VVest*; Meridionalem, *Sud*: & Septentrionalem, *Nord*. Cum aliis intermediis, quas propriis, & vulgò apud nos receptis nominibus designatas videre est *tab. 3. fig. 2.*

CAP. I. De Zodiaco, & Signis Cœlestibus.

Zodiacus est circulus in Sphæra major, certa explicatus latitudine, sub qua Planetæ suos cursus tenent; duabus in oppositis partibus obliquè interfecans Æquatorem; à quo etiam dividitur duas in partes æquales, quarum altera ad Tropicum Australem; altera autem ad Septentrionalem declinat. Eam habet appellationem à voce Græca Ζῳδιακός, quod est, animal, quia distribuitur in 12 partes, quarum quælibet, unâ demptâ, nomen sortitur alicujus animalis. Item nominatur & *Signifer*, quia partes illius dicuntur *Signa*: ac denique propter situm ab aliis vocatur *Circulus obliquus*. At

Sciendum est, illum circulum secundum longitudinem dividi variis modis. Primò enim dividitur in 12 partes æquales, easque singulas 30 graduum, quæ vulgò *Signa* appellantur, & *Dodecatemoria*, nomenque trahunt à Signis Stellaris sibi respondentibus. *Signa* autem illa Stellata sunt 12 constellationes, per longitudinem Zodiaci, & juxta hujusmodi *Dodecatemoria* ordine dispositæ, solentque his versibus comprehendere; quorum prior Septentrionalia; posterior verò Australia continet.

Sunt Aries, Taurus, Gemini, Cancer, Leo, Virgo, Libraque, Scorpius, Arcitenens, Capri, Amphora, Pisces.

Quæ nomina, simul cum propriis singulorum characteribus, quibus designantur ab Astronomis, videre est *tabula 2.* cum nominibus, & propriis etiam characteribus Planetarum.

Notabis autem differre *Signa Stellata*, & *Dodecatemoria*, quod *Dodecatemoria* sint semper inter se æqualia, æqualibus triginta partibus absoluta.

soluta. At Signa Stellata, nec magnitudine, aut numero Stellarum sunt paria; nec propria Dodecatemiorum spatia sic complent, quin deficient aliqua, aut excedant: quinetiam pleraque à sedibus suis promota, in regiones consequentium Signorum dicuntur concessisse; ut explicabimus, ubi *de motu Astrorum cap. 9.*

Not. 2. Singulis anni mensibus suum esse ad dictum Signum, sub quo Sol existat. Ita

Pro Marte est Aries, reliquis reliqua ordine quadrant.

Quaquam ita singulis deinceps mensibus respondent, ut tamen non habeant initium sui, conjunctum cum initio mensis proprii; quin potius in Signa illa Sol non ingreditur, nisi sub postremam mensis partem; ut declarabitur in *praxibus astronomicis, cap. 12.*

Not. 3. Initium Zodiaci, & Signorum, peti à principio Arietis: quia creditur Sol ibi fuisse initio mundi creatus.

Not. 4. Illa vocari *Signa*, eam maximè ob causam, quòd designent nobis varias anni partes ac tempestates; unde fieri consuevit quadripartita Signorum divisio, pro quatuor anni tempestatibus. Sicque ab initio Arietis, seu æquinoctio verno incipit Ver, 21. Martii. Tum sequitur Solstitium æstivum, initio Cancrì, 22. Junii. Deinde fit Æquinoctium Autumnale, incipitque Autumnus, initio Libræ, 23. Septembris. Ac denique est Solstitium Hybernium, & initium Hyemis, in Tropico Capricorni, 22. Decembris.

Notabis autem 5. Tunc quidem Solem dici esse, vel in Ariete, vel in alio Signo; sed hoc nihil aliud significat, quàm Solem esse sub tali Signo, seu illi respondere per lineam ductam

ductam à centro mundi , per centrum Solis, ad tale Signum.

Sciendum præterea est, Circulos quidem alios in Sphæra, solùm esse divisibiles secundùm longitudinem , instar lineæ. At Zodiacus habet & latitudinem 12 graduum ; aut quod nonnulli volunt , 16. Neque verò id eam tantùm ob causam fit , ut intra se contineat figuras Signorum ; sed etiam propter motum Planetarum , quem sub ipso servant. Videmus enim , ut scribit Clavius, Lunam v. g. diversis temporibus, in eodem Zodiaci gradu existentem , non tamen in eodem puncto horizontis, aut oriri, aut occidere : neque umbram Meridianam eadem longitudine projicere , neque æqualiter distare ab Æquatore , sed modò magis , modò minùs. Vnde colligimus in illo Zodiaco existere latitudinem.

Sciendum vero est 3. Viam Solis sub Zodiaco non ita esse vagam , sed eandem prorsus & sub simplici linea, quæ per mediam Zodiaci longitudinem traducatur. Quia videmus Solem diversis temporibus , in eodem Zodiaci gradu existentem , in eodem horizontis puncto oriri , aut occidere ; eandem servare distantiam ab Æquatore ; umbras Meridianas ejusdem longitudinis projicere , &c. Hanc autem lineam idcirco vocant *Solis circulum, iter, orbitam* : Item & *Eclipticam* ; quia nunquam contingunt Eclipses, aut Solares, aut Lunares, nisi quando Luna, aut Soli conjungitur , aut ipsi diametraliter opponitur existens in eadem hac linea.

Notabis enim , viam, quam Luna sub Zodiaco sequitur , diversam esse à Solari, quæ tamen Solarem quibusdam in partibus oppositis interfecet , uti quidem representat figur. 4. tabula 8.

quæ intersectiones vocantur *nodi Ecliptici*, quia nunquam fieri possunt Eclipses, aut Solares, aut Lunares, nisi Luna existente in alterutra ex illis intersectionibus. Alioqui sufficientem cum Sole aut conjunctionem, aut oppositionem non haberet. Quo loco observabis, spatium extra sectiones, intra circulos interceptum, reddere figuram quasi Draconis, ut imaginantur Astronomi; ita ut ejusmodi spatiorum latitudo ab ipsis vocetur *Draconis venter*; sectiones autem dicuntur tum *Caput*, tum *Cauda* illius *Draconis* imaginarii.

Not. 2. Eclipticam utrimque terminari ad eos Tropicos, quos superiori capite aiebam distare ab Æquatore, gradibus 23 & semis, & esse metas Solaris cursus annui. Cum è contra Zodiacus, & via Lunarum curriculum, ultra porrigatur ad latitudinem 6 graduum; quo pacto Tropici Lunares à Tropici Solaribus tot gradibus distant.

CAP. IV. *Officia, & usus Circulorum Cœlestium.*

HÆc, positâ ante oculos *fig. 1. tabula 1.* aut potius Sphærâ materiali, quam Armillarem vocant, commodiùs comprehendes, Isagoquo aliquo hujus scientiæ perito. Et verò etiam hîc indico tantum nonnullas utilitates hujusmodi circulorum, quas aliis in locis, & maximè in Praxibus, sub finem tractatus exponam. Ut autem ab Horizonte incipiam;

Dico I. Horizontis præcipua sunt ista officia. Primò, dividit Cœlum in duo hemisphæria æqualia; supremum alterum, seu visum: alterum verò inferum, seu occultum. 2. Determinat quantitatem cujuslibet diei, & noctis
arti-

artificialis. 3. Ortus & occasus omnium syderum manifestat; tum eorum latitudines ortivas. 4. Distinguit inter Sphæram rectam, & obliquam. 5. Ostendit altitudines tum poli, tum Æquatoris, &c.

Dico I I. Æquatoris illæ sunt utilitates præcipuæ. 1. Dividit Cœlum in partem Septentrionalem, & Australem. 2. Ostendit puncta æquinoctiorum; siquidem Zodiacum secant in principio Arietis, & Libræ, ubi fiunt æquinoctia. 3. Est mensura temporis horarii; sic enim ex elevatione 15 graduum illius supra horizontem, intelligimus horam integram esse transactam. Item, aliàs dicam, quemadmodum sit mensura diei naturalis; ortus & occasus Signorum: quomodo sit terminus, à quo numerantur declinationes; item & quomodo sit principium latitudinum Geographicarum; multaque id genus alia.

Dico I I I. Meridiani officia sunt. Primò quidem determinare puncta Meridiei, ac mediæ noctis. At suis postea locis tradam, quomodo beneficio Meridiani, elevationes poli; Sphæræ habitudinem ac situm; Solis & omnium Stellarum maximam à Terra altitudinem, quæ dicitur Meridiana, deprehendamus. Item quem usum habeat in explicandis locorum distantis, maximè secundum longitudinem, aliisque hujusmodi quàm plurima.

Dico I V. Zodiacus & Ecliptica, plures etiam habent usus, qui commodiùs tunc exponuntur, ubi agitur de Signis: de Cœli divisione in 12 regiones: de motu Planetarum proprio, de ipsorum latitudine; de vero loco, & defectibus.

Dico V. Tropicorum usus imprimis est, ut ostendant loca Eclipticæ, in quibus Solis con-

versiones, ut aiebamus; tum ubi maximæ ipsius declinationes fiunt; ideoque distant ab Æquatore grad. 23 & semis. Intra se includunt Zonam torridam, ut Polares frigidam.

Coluri, qui in Sphæra materiali apponuntur, usum ferè alium non habent, nisi quod structuram illam artificialem continent. Quamquam sic disponuntur, ut in Zodiaco designent 4 puncta Cardinalia, nempe duo æquinoctialia, & duo Solstitialia, à quibus initium sumunt 4 anni tempestates. Item Colurus Solstitionum, hoc etiam dicitur habere proprium munus; quodd non solum declinationes Solis maximas metiatur, sed etiam quodd contineat polos Zodiaci (qua parte secatur hinc atque inde polarem circulum) eorum distantiam à polis mundi exhibendo, nempe 23 & semis. Vocantur autem Coluri voce Græca, id est imperfecti & mutili, quodd habitantibus in Sphæra obliqua, non appareant secundum aliquam sui partem, quæ semper infra horizontem depressa volvitur.

C A P. V. *De aliis circulis Sphæra Coelestis, & de ejus diversa positione.*

Alia sunt complura circulorum Coelestium genera, varios ad usus instituta, secundum Astronomorum imaginationem: ut Circuli verticales seu Azimuthales: item Circuli quos Arabicè vocant Almucantarath: Circuli horarii: Circuli longitudinum, & latitudinum: de quibus singulis ut agam;

Dico I. Longitudo mundana, seu Astronomica, & Geographica, est distantia loci alicujus, proprii-ve illius Meridiani, à primo Meridiano. Notabis autem, per se, & ex rei natura,
non

non posse dici unum Meridianum alio priorem, aut omnium primum: ut tamen aliquid certum ac fixum in isto negotio statueretur, conveniunt Astronomi, & Geographi, ut sumeretur ille pro primo, qui est Meridianus insularum, quas vocant *Açores*, & Viridis promontorii: isque est vulgo receptus, quamvis nonnulli dissentiant. Res pender ex hominum arbitrio, & instituto. Quâ igitur proportionem receditur ab illis insulis Orientem versum, plures numerantur gradus longitudinis, usque ad oppositam hemisphærii partem; iidemque sunt longitudinis circuli, ac Meridiani; habentque eandem longitudinem ii omnes, qui sub eodem sunt Meridiano. *vide fig. 8. & 9. tab. 8.*

Dico I I. Latitudo Astronomica, seu Geographica, & mundana, est distantia loci alicujus ab Æquatore versum Polum. Quare duplex est latitudo; altera quidem Borealis, quando est distantia ab Æquatore versum Polum Borealem: altera autem è contra, est Meridionalis.

Notabis igitur, circulos latitudinis, esse omnes Æquatori parallelos: eosque omnes, qui circa mundum sunt sub eodem parallelo, habere eandem latitudinem: atque ita *v. g.* qui septem gradibus distant ab Æquatore, dicuntur esse sub septimo parallelo: qui enim existerent sub Æquatore, nullam haberent latitudinem.

Notandumque est etiam, illos vocari circulos declinationum, quibus *v. g.* Sol dicitur distare ab Æquatore: eo enim tantum tempore Sol non habet declinationem, quo est Æquinoctialis; maximamque Solis declinationem tum Australem, tum Borealem indicant Tropici, ut jam insinuavimus. *vide easdem fig. 8, & 9.*

Dico I I I. Circuli Azimuthales, seu verticales,

les, ii sunt, qui finguntur traduci per nostrum zenith, seu punctum verticale, ex una Horizon-
ris parte, ad aliam oppositam: ut in *fig. 2. tab. 5.*
Ex iis duo præcipui dividunt nostrum hemis-
phærium quatuor in partes, quæ solent appella-
ri Quartæ. Quo pacto Coluri duo in Sphæra
verticali, forent instar duorum ejusmodi verti-
calium, qui dicuntur principales, distinguerent-
que inter quatuor hemisphærii Quartas: nempe
inter Quartam Orientalem Septentrionalem, &
Quartam Orientalem Meridionalem: tum in-
ter Quartam Occidentalem Meridionalem, &
Quartam Occidentalem Septentrionalem.

Dico I V. Almucantarath, sunt circuli pa-
ralleli horizonti, utiles potissimum in Astro-
labio, ad elevationes Astrorum indicandas.
Minores fiunt illi circuli, qua proportionem
fit recessus ab horizonte ad zenith. Habesque
illos repræsentatos pro Sphæra obliqua in *fig. 1.*
tab. 5.

Notandumque est infra horizontem fingi
quoque istiusmodi horizonti parallelos, qua-
lis est crepusculus, infra horizontem posi-
tus ad gradum 18; quia vulgè existimatur tunc
incipere crepusculum, cum mane Sol ad illum
pervenit: aut desinere, cum serotino tempore
illum attingit.

Mitto loqui de circulis duodecim Domorum
Cœlestium, qui scilicet per initia 12 Signorum
Zodiaci traducuntur à polis, in quibus concur-
runt; unde hoc pacto Cœlum dividitur 12 in
partes, quas Domos appellant Astrologi. Mitto
etiam loqui de circulis horariis, de quibus alias
occurreret dicendi locus. Superest tantum, ut hîc
agam de rectitudine & obliquitate Sphære
Cœlestis & mundanæ.

Notan-

Notandum igitur est, Sphæram illis tantum dici rectam, qui manent sub Æquatore, quia neuter polorum magis altero illis elevatur, cum uterque videatur jacere ad horizontem; unde & dicuntur quoque habere horizontem rectum.

Alioquin qua proportionem receditur ab Æquatore ad alterum ex polis, ille videtur elevari supra horizontem, depresso altero infra oppositam partem horizontis: illeque horizon dicitur obliquus, qui amplius per utrumque polum non traducitur; tum Sphæra quoque in eo statu dicitur Sphæra obliqua; dum tandem deveniatur usque ad 90 gradus, unde reddatur Sphæra verticalis; tuncque Æquator fit simul circulus horizontalis. Sic in *tab. 4. fig. 1.* est Sphæra recta. In *fig. 5.* est obliqua. In *f. 4.* est verticalis.

Item, in *tab. 8. fig. 7.* Sphæra est obliqua. In *fig. 8. & 9.* est verticalis.

Item, in *tab. 4. fig. 2.* est recta homini posito in *f.* sitque illi obliqua ambulando ad *g.* unde & illi obliquatur horizon *a. b.* cum antea rectus illi esset *c. b.*

CAP. VI. *Astrorum Numerus, & Figura.*

Duplex est Astrorum, seu Stellarum genus. Aliæ dicuntur fixæ, & inerrantes; quia easdem inter se distantias, situs, ac positiones servant; cujusmodi sunt Firmamenti Stellæ. Aliæ autem, quæ propriè appellantur Planetæ, sunt errantes; cum easdem inter se & cum Stellis firmamenti habitudines non servant. Sic enim Luna *v. g.* modò accedit ad Solem; modò longissimis intervallis ab eo recedit. His igitur suppositis;

Dico I. Ex Stellis fixis, quæ Cœlo sereno

commode visu percipi possunt, numerari & Astronomis solent tantum 1022. Quanquam fateor alias esse multo plures; quæ per tubum opticum observantur à recentioribus; sicque explicatur illud Abrahamo dictum, *Numeras Stellas, si potes.* At

Not. Astronomos, ut res tota facilius comprehenderetur, Stellas hujusmodi conspicuas omnes redegisse in certos Asterismos, seu constellationes, ex pluribus Stellis veluti constitutas; quas etiam appellant imagines, quod illius rei, cujus nomen sortitæ sunt, figuram aliquo modo repræsentent. Sunt autem illæ imagines, seu constellationes omnino 48. inter quas primum dignitatis locum videntur tenere 12 Signa Zodiaci, jam à nobis posita.

Extra Zodiacum ad partes Septentrionales numerantur 21. Reliquæ ad plagam Australem attinent. Atque ut commodius mendantur memoriæ, his versibus tradi solent:

Ad Boreæ partes Arcti junguntur & Anguis.

Post has Arctophylax, pariterque Corona, genuque Prolapsus, Lyra, Avis, Cepheus, & Cassiopeja,

Auriga, & Perseus, Deloton, & Andromeda astrum,

Pegasus & Delphin, Telum, hinc Aquila, Anguitenensque.

Astrum respiciunt Orion fulgidus ense,

Sub pedibusque Lepus, Canis hinc, Procyonque Ratisque,

Argo: hydra, & Crater, Corvus, Centaurus, & Ara, Et Lupus, atque Corona micans, & Piscis in unda Hydrochoi, Cetusque immanior, Eridanusque.

Notandumque est 2. Addisci posse hac methodo Cœli omnes Stellas in Globo materiali, in quo descriptæ sunt, si nocte serena cum Cœlesti

lesti conferantur. Aut si juxta *figuram 9. tab. 5.* Coelum ad Signa Zodiaci, 12 in regiones dividatur, per circulos, quos vocant Domorum Cœlestium, sicque ex Æquatore in polum coëant, ut triangulâres figuras reddant, quarum basis est in isto Æquatore: Tum oportebit advertere, quænam Stellæ ad singula Signa pertineant. Quo pacto, ad Arietis Domum, ut ajunt, spectant ex parte Septentrionali, *Cepheus, Cetus*; & aliæ Stellæ quæ concluduntur isto triangulo. At

Not. 2. Ex iis constellationibus quæ circa polum Septentrionalem convertuntur, præcipuè à nobis considerari debere *Ursam minorem* septem omnino stellis conspicuam; quarum tres per modum caudæ cujusdam ad quatuor alias consequuntur; *uti videre est in tab. 3. fig. 5.* Harum ultima dicitur polaris, quia polo vicinior est, nec ab eo nunc distat nisi duobus ferè gradibus. Vocatur & *Stella maris*, quia nautæ ad illam intendunt, ut rectum in navigando cursum teneant. De majori urfa isti propinqua, nihil est quod plura dicam. Ad polum Australem nulla est hujusmodi, nisi pauldè remotior constellatio.

Dico II. In Cœlo Planetario occurrunt septem illi celebres, & omnibus familiares Planetæ, jam *cap. 1.* ordine enumerati, quos inter Sol & Luna principatum tenent.

Sed præterea longè plures alii à recentioribus deprehensi sunt. Ac primò quidem Galilæus 4 Planetas circa Iovem retexit, quos appellavit Mediceos, in honorem Ducis Florentini, dicunturque etiam Iovis satellites. Item, & numerantur complures alii 30. circa Solem cursitantes, quos nuperi authores observarunt;

suntque illa corpora opaca, quibus postea dicemus effici, ut judicemus aliquas in Sole ipso maculas existere.

Item, & in illa Cœlesti Planetarum regione non semel apparuerunt Stellæ aliæ, quæ aliquanto post longius delatæ versùs firmamentum, omnem oculorum aciem effugerunt: qualem apud Tychonem legimus fuisse visam Hipparcho, anno circiter 125 ante Christum natum: qualis etiam spectabatur temporibus Adriani Imperatoris.

Notandum verò est, non tantùm stellas, sed etiam & cometas spectabiles nonnunquam fuisse in illa Planetarum regione, vel supra Solem ipsum. Hoc probarunt temporum illorum Mathematici, ut Tycho; nempe, quia occultabantur ab istis Planetis tanquam inferioribus; tum quia minorem efficiebant parallaxim, aut ferè nullam. - Est autem probabilius, cometas ejusmodi, aliunde genitos non fuisse, quàm vel ex materia Cœli addensata; vel ex pluribus stellis, ope Angelorum simul conglobatis, ut Deo providente, forent calamitatum prænuncii, ac veluti prodromi: neque enim *unquam visus Terris impune Cometes.*

Dico III. Astra sunt figuræ Sphæricæ. Probatur de Luna; quia si superficies illius, quæ saltem nobis obvertitur, esset plana; tota simul illuminaretur, quotiescunque à Sole radios excipit: cum autem è contra paulatim, & successivè, prout à Sole magis recedit, illuminetur circulariter; signum est eam esse rotundam. Ergo à pari probabilius est, stellas alias esse rotundæ figuræ; cùm illa sit figura omnium præstantissima, debeaturque consequenter corporibus id genus præstantissimis. Confirmatur de
Venere

Venere & Mercurio : nam beneficio tubi optici, deprehenduntur eodem modo illuminari, ac Luna. Confirmatur etiam de Sole, quia illius sphaericitas causa esse debet, cur lumen per rimas etiam irregulares ab eo immissum, & in planum perpendiculariter incidens, affectet semper figuram orbicularem.

CAP. VII. *Astrorum Lumen, Macula, Eclipses.*

Lucere Solem, & quidem proprio lumine, certum est : an alieno tantum luceant stellarum reliquae, disputatur.

Dico I. Probabilius est illas, quicquid ferè habent luminis à Sole mutuari. Quamobrem Sol vocatur *Pater luminum*, & quasi fons luminis totius, quo reliquae Orbis partes collustrantur. Probatur experientia in ipsa Luna; si quid enim obstet propagationi luminis Solaris, ut Terrae interposito, vel si qua parte Soli non obvertitur, deficit prorsus. Item, ex Planetis aliis Mercurius, & Venus videntur quoque perinde ac Luna crescere, aut decrescere, pro variis oppositionibus quas habent cum Sole. Est autem maximè probabile, rem perinde se habere de aliis; nempe simili modo à Sole collustrari.

Notandumque est consequenter, Lunam ad nos non profunderè aliud lumen, quàm solare reflexum : ideoque non habet superficiem æquabilem, sed potius montibus asperam, ut lux hinc inde reperiussa in omnem partem, ad nos transmittatur; quod alioquin secùs contingeret. Item

Not. 2. Lunam ubi plena est, non ideo plus luminis mutuari à Sole : Nam cæteris paribus, majori lumine perfunditur in novilunio, tunc ubi nos latet. Ratio est, quia in plenilunio ma-

jorem habet à Sole distantiam ; tunc enim ipsi opposita est diametraliter, & quidem secundum majorem partem diametri circuli illius quem Sol decurrit. Dixi cæteris paribus, fieri enim potest ut aliquando, etiam in ipso novilunio, Sol magis à Luna distet, si nimirum tunc extiterit in apogæo.

Dico II. Apparent non modò in Luna, sed etiam in Sole ipso maculæ; quas quidem ut sine ulla offensione oculorum contempleris; excipiendi sunt perpendiculariter radii solares in aliquo plano, puta in charta, per tubum aliquem opticum: vel saltem, hoc tibi erit satis, si factò foramine exiguo, seu rima, intra cubiculum exceperis Solis radium perpendiculariter cadentem supra aliquod planum. Tunc enim apparent tibi maculæ modò plures, modò pauciores oberrare ad discum solarem. Cum autem eadem non sint, nec eodem numero, aut eadem in parte, signum est eas non inhærere nisi Soli; nec esse veras maculas, sed tantum apparentes; Nec alitunde oriri, nisi ex Planetis quibusdam, seu corporibus opacis, quæ circa ipsum Solem deferantur, fortasse ad nimias ipsius vires retundendas, propter bonum universi.

Contrà autem maculæ lunares veræ sunt; ipsique Lunæ inhærent. Nam eadem semper apparent, certamque sedem servant. Quanquam aliud nihil sunt illæ maculæ, quàm lux inæqualiter diffusa, ex eo quòd Luna non sit perfectè rotunda; sed potiùs in ingentes quosdam veluti montes protuberet. Quod beneficio tibi optici idonei facilè dignoscitur; tunc maximè ubi ipsa crescit. *Quemadmodum representari vides in una ex figuris intermediis tabula 4.*

Dico III. Solis eclipsis, est apparens luminis defectus

defectus in Sole, ex apta interpositione Lunæ inter aspectum nostrum, & corpus solare. Dixi apparentem esse illum luminis defectum, quia tunc nulla sui luminis parte privatur Sol, etsi contrā nobis appareat. Dixi oriri ex apta interpositione; hæc enim eclipsis continget tantum, Lunā existente vel in capite, vel in caudā Draconis, ut supra exposui; vel saltem, si non multum ab iis abfuerit.

Atque hinc colliges solarem eclipsim non posse quidem fieri nisi in illa conjunctione luminarium, id est, in novilunio; nec tamen fiet in novilunio, nisi tunc Luna in metas eclipticas inciderit. At

Not. 1. Posse observari eclipsim solarem sine offensione oculorum, si utaris illa methodo, quam tradebam modò ad maculas ipsius Solis contemplantas. Item

Not. 2. Sic posse te dimetiri quantitatem eclipsis, si diametrum orbis illius lucidi, quem juxta hanc methodum in plano exceperis, si inquam illam diametrum ex more divideris 12 in partes æquales, quas vocant *digitos* aut *puncta*. ut in fig. 8. tabula 4.

Notabis 3. Consequenter ex dictis, admirabilem prorsus, & contra naturæ ordinem fuisse illam Solarem eclipsim, quæ Christo Domino patiente contigit. Tunc enim erat plenilunium; quare Luna mutato cursu in contrarias partes, regressa est ad Solem, ut ipsum nobis occultaret: quod D. Dionysius Areopagita in epistola ad Polycarpum testatur se vidisse. Item

Notabis 4. Non rarò Eclipses Solis fuisse inæquales duratione, & obscuritate; quanvis in singulis Sol, & Luna eisdem servarent situs: ut scribit Clavius in cap. 4. *Sphæra de Sacro Bosco*.

subditque à se visam circa meridiem eclipsim Solarem, quam secutæ fuerint tenebræ quodammodo majores, quàm nocturnæ. Neque enim ubi pedem quis poneret, videre poterat; clarissimæque in cœlo stellæ apparebant, & (quod mirabile erat) aves ex aëre in terram, præ horrore tam tetræ obscuritatis, decidebant. Hæcque diversitas, ut docet, oritur ex eccentricitate motus, quem tenent illi Planetæ, unde modò longiùs à se invicem, aut à terra distant, modò propiùs accedunt. Tunc enim, juxta optidorum leges, quando Sol longiùs à Luna abest, magis-ve Luna ad terras accesserit, major in terras projicietur umbra à Luna, & major terrarum tractus per longius tempus obscurabitur; quod probat experientia, facta ejusmodi oppositione majoris lucidi, cum alio corpore etiam minore.

Dico I V. Eclipsis Lunæ, est verus luminis defectus in Luna ortus ex idonea interpositione Terræ inter Solem, & ipsam Lunam. Fit enim tunc tantùm quando Luna est Soli diametraliter opposita, ac proinde cum existit vel in capite, vel in cauda Draconis, eo modo quo jam exposui. Tuncque etiam idcirco rectè dicitur Luna ingredi in umbram Terræ, *uti videre est in tabula 5. fig. 8. & in tab. 4. fig. 10.* Vbi Sol est in *a.* Luna in *c.* Terra autem in *b.* ex qua projicitur umbra conoides, quia Sol est major Terra, juxta illud quod observavi in *Prefatione.*

Notabis autem ex dictis, Lunarem ejusmodi eclipsim non contingere nisi in plenilunio, quanvis non contingat in omni plenilunio, cum in omni plenilunio non habeat sufficientem oppositionem cum Sole. *Quinetiam*

Notabis 2. Fieri posse, ut Luna in diametrali oppo-

oppositione, & sufficienti, non ideo tamen patitur eclipsim, si à terra fuerit remotior: ut ostenditur ad eandem Figuram 10 in *f*. Item licet reperiatur intra metas eclipticas, id est, intra eam latitudinem, in qua potest pati eclipsim, nec in totam Terræ umbram incurrat, non erit eclipsis totalis, sed tantum ex parte, & ad breve temporis spatium, puta si Luna fuerit in *d*, aut in *e*, aut si per apicem conï duntaxat transierit.

Not. 3. Ex Clavio; id esse discriminis inter eclipsim Solis, ac Lunæ, quodd eclipsis Lunæ est universalis per totam Terram, ita ut absolutè, & pro omnibus regionibus ipsius lumen deficiat. Solis verò eclipsis non ita est universalis; potestque apparere deficiens in uno climate, non autem in alio. Quia eclipsis Solis dependet ex aspectu nostro, qui diversus est, pro diversis climatis. Lunæ verò eclipsis dependet tantum ex umbra Terræ, quæ pro omni climate semper est eadem.

C A P. VIII. *Astrorum distantia, & magnitudo.*

Altitudinem Cœli quis dimensus est, inquit Sapiens Eccles. 1. Res enim adeo difficilis semper visa est, ut vulgus imperitum, à quo methodus ignoratur, eam esse impossibilem iudicet. Suppono autem mensuram ejusmodi cœlestium magnitudinum esse Globi Terrestris semidiametrum, quam in tractatu de Sphæra Terrestris ostendam esse leucarum Gallicarum circiter 1718. At posita ante oculos *figura 3. tabula 4.* in qua minor circulus Terram repræsentat, ex cujus superficie Luna e videatur.

Dico I. Sic Lunæ distantiam illam potes depre-

prehendere. Primò, nota sit tibi elevatio Lunæ supra Horizontem, beneficio Quadrantis Astromici; supponaturque esse 30 grad. sic inferam: ergo arcus $e d$ erit grad. 60. Quare ut pergam ad investigandam quantitatem trianguli c, a, e , ex quantitate arcus d, e , judico angulum c esse grad. 60. Item notâ quantitate arcus b, f , & consequenter anguli ipsi oppositi, inferam quantitatem anguli interni e, a, c : quæ quidem si reperitur esse graduum *v. g.* 100 supererunt 20 grad. pro angulo e : Aliunde verò supponitur c, a , pro Terræ semidiametro leucarum 1718. Quare ex præceptis Trigonometriæ sic agam: si sinus anguli e 20 grad. dat 1718 leucas pro latere a, c , sibi opposito; quot dabit sinus anguli c , pro latere a, e , quæ est distantia Lunæ à superficie Terræ; cui addenda est Terræ semidiameter, ut habeatur distantia à centro Mundi.

Hæc autem est communior methodus investigandi alicujus Planetæ distantiam, quæ beneficio parallaxis perficitur in hunc modum; supposita *fig. 3. tab. 3.* Esto circulus minor b, g , pro Globo Terræ; cujus semidiameter est b, a . Item, esto Planeta i . Item, esto Planetæ illius verus locus m in Firmamento l, m, e , elevatus supra Horizontem gradibus 40. locus verò illius apparens, esto l , elevatus duntaxat 30 grad. ergo parallaxis erit tantum 10 grad. & consequenter angulus arcui l, m oppositus, erit 10 grad. ergo & angulus ipsi ad verticem oppositus intra triangulum b, i, a , cujus notum mihi est latus b, a leucarum, ut supra dixi, 1718. Item, angulus a mihi quoque redditur notus ex arcu m, e , quem necesse est esse grad. 50, ex hypothesi quod elevatio loci m fuerit grad. 40. Atque his positis, sic ajo, si parallacticus angulus i ; aut potius, sinus anguli

i 10 grad. dat mihi latus b , a leucarum 1718: quot dabit sinus anguli a , 50 grad. pro latere b , i , quæ est distantia à superficie Terræ.

Consimili ferè methodo per Trigonometriam investigatur à nonnullis altitudo solaris, *ut in fig. 4.* quam methodum habes disertè explicatam apud Blancanum; sufficitque mihi ali- quod hujus rei tam præclaræ specimen dedisse.

Quare

Dico II. Ex communiori Astronomorum observatione, & calculo; Luna apogæa distat à centro Terræ semidiametris ipsius Terræ, seu radiis 61, & consequenter leucis 104798: qui numerus oritur ex ductu 61, in 1718 leucas, quas supponimus contineri in semidiametro Terræ.

Luna autem perigæa, seu in minima distantia, est semidiam. 52; seu leucarum 89336.

Sol perigæus à centro Terræ distat 1101 semid. seu leucis 189518. Apogæus autem, & in maxima distantia, ut notat Clavius, est semid. 1216; seu leucarum 2089088.

Stellæ Firmamenti ab eodem Terræ centro distant semid. 14000 seu leucis 24052000.

Notandum verò est, hîc me sequi communes aliorum observationes, cum P. Bourdino, perinsigni Mathematico; vel cum Clavio. Et si aliqui nonnihil discrepent, ut Lanspergius, &c.

Dico III. Quod spectat corporum ejusmodi cœlestium, ac cœlorum in quibus existunt, magnitudinem; de illa variis modis statui à nobis potest.

Ac primò quidem ex umbra Terræ nonnulla petuntur argumenta pro magnitudine Solis & Lunæ. Suppono autem umbram ex Sole à Terra projectam, esse finitam, radiosque solares tandem concurrere; *ut in fig. 8. tab. 5*: alioquin
si um-

si umbra illa projiceretur in infinitum, non modo Lunam involveret, quando patitur eclipsim; sed etiam & Martem, Iovem; aliosque Planetas, nec non Stellaras Firmamenti: quod verum non est, ut patet experientia. Item certum est umbram illam Terræ fieri conicam, ut patet in Luna, ubi deficit; tunc enim confinium umbræ semper circulare est: quod aliunde non provenit, quàm ex forma ejusmodi umbræ rotunda. Item, certum est Lunam non pati eclipsim, nisi quatenus in illam Terræ umbram incurrit; unde & longior est illa eclipsis, quod Luna minùs distat à Terra; quia coni pars ea semper est major, quæ magis accedit ad basim. Atque his suppositis; infero primò, Solem esse majorem Globo Terræ; quia quotiescunque umbra corporis opaci conica est, radiique extremi tandem coëunt; tunc semper lucidum, est majus illo corpore opaco; ut patet hîc in *fig. 8. tum in 7. ad literam c.*

Infero secundò, Lunam esse minorem, non modò Sole, sed & ipso etiam Globo Terrestri, siquidem tota interdum occultatur intra umbram Terræ; quæ tamen umbra, cum in modum turbinis cujusdam, ac coni, à Terra prodeat, decrescit semper, quod magis ab ipsa terra longiùs effunditur, ut patet consideranti figuras in illa tabula descriptas.

Præterea verò posset ex principiis Geometriæ assignari corporum illorum determinata magnitudo in hunc modum *ad figuram 8. tabula 3.* si ex nota distantia per idoneum instrumentum deprehenderetur ab oculo *a* diameter astri *b, c*, fieret enim triangulus Isosceles *a, b, c*, cujus cognito angulo *a* consequenter cognosceretur quantitas eorum angulorum, qui sunt
ad

ad basim b, c , unde sic definiret Astronomus; ut Sinus anguli b ad latus, seu ad distantiam notam a, c ; ita Sinus anguli a , ad latus ipsi oppositum b, c , sed istud non inoror.

Hunc habes modum satis vulgarem & tutum inquirendæ *v. g.* Solaris magnitudinis: nempe cum Astronomi certa ratione & experimento deprehenderint diametrum corporis Solaris occupare dimidiatum gradum illius circuli, quem diurno motu percurrit; ubi ex distantia Solis à centro mundi habetur circumferentia circuli, facile est per divisionem Arithmeticam assequi quantitatem illius dimidiati gradus. Atque hoc pacto affirmant Solarem diametrum continere Terræ diametros quinque cum dimidia. Vnde etiam juxta præcepta Cyclometriæ facile judicant de aliis ejus magnitudinibus. Ita cum diameter Solaris se habeat ad diametrum Terræ *ut 5. cum dimidio ad 1*: Item, cum Sphæræ sint in triplicata proportionem suarum diametrorum, *quemadmodum explicui in Elementis Geometriæ*; consequens est ut corpus Solare contineat magnitudinem Globi Terrestris plusquam centies sexagesies sexies; cum tamen Luna sit quadragies minor ipso Globo Terræ.

Sic perinde per proportionem Astronomi Geometricè definiunt aliorum Astrorum magnitudines. Vt cum ajunt Stellas Firmamenti quæ dicuntur primæ magnitudinis, esse centies septies majores Globo Terræ: alias autem quæ dicuntur etiam sextæ magnitudinis, superare ipsum Terræ Globum decies octies.

Notabis verò duplicatam Astri alicujus distantiam à centro Terræ, constituere integram diametrum cœli, seu circuli illius, quem Astrum percurrit diurno motu. Tum cognita ejusmodi dia-

diametro, juxta Cyclometriae leges, & adhibitâ regulâ *Trium*, facillè judicatur de circumferentia. Atque ita

Dico IV. Lunæ perigææ circulus est leucarum 561540, apogææ 658730.

Solis perigæi ambitus est leucarum 11889541, apogæi 13131410.

Firmamenti ambitus secundùm majores circulos, putâ secundùm Æquatorem, est leucarum 151184000. Quo ex numero, juxta præcepta tradita in Geometria, potest colligi concava superficies Firmamenti; & totius mundi capacitas, seu quænam ambitu Firmamenti contineri possent. Hæc autem capacitas, quanvis stupenda est, repleri tamen potest arenulis, quarum numerus non constabit pluribus figuris quàm 50, ut cum Archimede, facillè definiri potest ope triplicatæ proportionis; quam methodum explicui in Geometriâ.

CAP. IX. *Astorum Motus.*

EX hypothesi quodd Terra in centro Mundi quiescat (ut ostendemus in tractatu de Sphæra Terrestri) necesse est moveri cælum, & astra, cum ab astris successivè in diversis partibus illuminetur, ipsique oriantur, & occidant. Quin & absolute loquendo, necesse est Planetas ipsos moveri, siquidem modò conjuncti sunt simul, modò ab invicem distant; quæ sine motu perfici nequeunt.

Sciendum verò est, quod primo capite jam insinavi, juxta antiquos, motum hanc cælorum esse duplicem, ut nihil dicam de motu trepidationis. Supponunt enim existere inter cælos, quod vocant *Primum mobile*, cujus sit proprius ille qui dicitur *Primus motus*, vi etiam cujus,
cæli

cœli inferiores rapiantur ab ortu in occasum, diurnam hanc revolutionem obeundo super axem & polos Mundi. At præterea alter est qui dicitur *Secundus motus*, proprius Stellarum, sive inerrantium, sive errantium, qui fit super polos, & axem Zodiaci, ab occasu in ortum. Pluresque enumerant Sphæras ejusmodi secundorum mobilium; quales sunt Sphæra Solis, Lunæ, & aliorum Planetarum, quibus accedit & Sphæra Stellarum inerrantium. Sic autem probant motum secundum istius Sphære Stellarum inerrantium; quoddam deprehendatur mutasse locum Solstitiorum & Æquinoctiorum: nempe ut ajunt, prima Stella Arietis, quæ tempore Ptolemaei fuit circa initium Dodecatemorii ipsius Arietis, jam hodie 28 gradum ejusdem occupat, sicque movetur ab occasu in ortum, secundum ordinem signorum Zodiaci. Notabis enim cum Clavio, hæc ab Astronomis supponi quasi duplex genus Zodiaci. Quippe alterum fingunt in duodecim partes æquales, seu *Dodecatemoria* distinctum; huncque immobilem eo sensu, quod ejus *v. g.* Æquinoctia, & Solstitia, non deserant unquam Æquinoctia, & Solstitia primi Mobilis: Alter verò est Zodiacus signa stellata continens, qui superiori quidem responderet, sed non immutabiliter.

Quod autem ad Planetas attinet; sic probant quemadmodum proprium habeant motum ab occasu in ortum: quia scilicet successivè ad diversas Zodiaci partes respondent; nec consequenter eodem in loco cœli oriuntur, & occidunt; neque verò etiam ad easdem cœli partes, circa Meridiem quotidie perveniunt, cum ab altero polo recedant modò, modò ad eum accedant. Porro

Sciendum est secundò ; ex Planetis nonnullos propter epicyclos , & excentricos orbes , in quibus moventur , fieri præterea modò *directos* , modò *retrogrados* , modò *stationarios*. Dicuntur autem *directi* , quando secundum signorum seriem promoventur in signa consequentia , ut ab Ariete in Taurum ; tuncque etiam est velocior motus , quòd epicyclus & excentricus in eandem simul partem secundum signorum ordinem moveantur. Alioquin ubi moventur in partes contrarias , & epicycli motus superat motum excentrici , fiunt *retrogradi* , & contra signorum ordinem feruntur in antecedentia ; ut ab Ariete in Pisces. *Stationarii* denique sunt , quando in eodem Zodiaci loco videntur subsistere ; id est , non deferri , aut in antecedentia , aut in consequentia.

Notandumque est motum illum Planetarum nobis apparentem , dici inæqualem , seu irregularem , quòd æqualibus temporum spatiis , non videantur æquales arcus Zodiaci conficere. Est tamen per se regularis , & æquabilis , cùm in se nihil habeat inordinati. Et verò constat experientia illos orbes statò tempore idem repetere curriculum. Idque etiam confirmant Eclipses , varique Planetarum aspectus , qui multò ante , ad certum tempus & locum notari , & prædicti possunt. Sic igitur , quia Planetæ illi circumferuntur orbibus excentricis , quos etiam non observamus nisi ex Terra , quæ est veluti mundi centrum ; ideo dicuntur moveri irregulariter , respectivè ad mundi centrum : quanquam alioqui de se , & respectivè ad sua centra , moventur regulariter. Item ,

Not. 2. Servandum esse hunc loquendi modum , & supponendos nobis esse quasi excentricos ,

tricos, & epicyclos reales, quanvis sint tantum imaginarii, ut monebam initio, *ad finem præfationis*: alioqui res satis commodè nequiret nobis repræsentari, & exprimi. Item, ut explicetur via Planetarum sub Zodiaco secundum ordinem signorum, meritò usurpantur & nomina, aut *primi*, aut *secundi motus*: *motus proprii*, & *motus violenti impressi à primo mobili*, quanvis nullum sit ejusmodi *primum mobile*, aut *motus violentus*.

Notabis enim 3. Cœlos & Astra non habere de se inclinationem ad motum localem ullum, sed potius habere indifferentiam ad quemlibet; ut supponimus *ex Physica de Cœlo*. Ergo nullus iis potest esse violentus, quantumcunque sit ab extrinseco impressus. Item, supponimus quoque ex eadem Physica nullum esse in astris motum, qui ab Intelligentiis non fiat ex arte, & sapientia maxima, prout exigit bonum universi. Item, supponimus quoque cœlum Planetarium saltem, esse liquidum, tum per illa spatia deferri ab Intelligentiis Planetas: qua in hypothese stare non potest raptus ejusmodi, & motus violentus à superioribus cœlis impressus.

Not. 4. Hæc quidem, quæ à nobis traduntur, pertinere ad eam partem Astronomiæ, quæ propriè nominatur *Sphæra*, de variis Cœli regionibus, circulis, & eorum usu, de numero, situ, magnitudine, motu, cæterisque id genus affectionibus corporum cœlestium. Altera verò est Astronomiæ pars, quam appellant *Theoriam Planetarum*; quæ illorum loca ipso cœlo, tum motus, aspectus, conjunctiones ad determinatum tempus definit, rerumque earum tabulas ad communem, & publicam utilitatem describit. Sic olim *Hipparchus* Solis ac Lunæ motus & perio-

periodos observavit; quem *Ptolomæus Alexandrinus* Astronomiæ princeps, multis post annis est secutus, primusque non modò Solis & Lunæ, sed reliquorum etiam syderum motus explicuit Tabulis, quæ fuere in usu usque ad annum *Christi* circiter 880: quo tempore, cum deprehenderentur non ampliùs consentire cœlo, in earum locum subrogatæ sunt *Tabule Albategniana*, authore *Albategnio Arabe*, quas etiam tum postea *Arzachelis* cujusdam studio emendari oportuit; dum tandem sumptibus *Alphonfi X. Hispaniæ Regis*, nomine ipsius consecratæ *Alphonfinæ Tabula* prodierunt; quarum tamen insufficienciam probavit eventus: quamobrem circa annum 1461 *Purbachius* & *Regiomontanus* viri per celebres, earum emendationem tentarunt, tum deinde *Nicolaus Copernicus*; ex cujus inventis *Reinholdus* construxit eas, quæ dictæ sunt *Prutenicæ*. Sed cum etiam deficerent; *Tycho Braheus* negotium illud promovebat, nisi obstitisset mors præpropere; quanquam ex ejus observationibus *Keplerus* Rudolphi Imperatoris mandato, circa annum 1627, *Tabulas Rudolphinas* elaboravit, non tamen erroris omnis expertes. Unde & huic rei nupèr *Lanspergius* operam dedit plusquam per 40 annos; quàm foeliciter, alii viderint. Illos taceo qui subinde scribunt *Ephemerides*, annotando, quæ ad singulos dies debeant contingere circa Planetas.

C A P. X. *Motuum Cœlestium affectiones nonnullæ.*

DE variis stellarum aspectibus; de earum velocitate in motu; de ortu, & occasu jam acturus;

Dico I. Aspectus illi sunt certæ Planetarum sub

sub Zodiaco habitudines, seu dispositiones, unde speciales quidam in natura effectus producuntur. Præcipui autem numerantur quinque, quos intueri licet cum propriis etiam characteribus *in tabula 5. fig. 5.* Primò enim est Synodos, seu conjunctio; quando Planetæ sunt sub eodem Zodiaci gradu.

2. Est aspectus Hexagonus, seu Sextilis, aut Sexangularis; quando Planetæ sexta Zodiaci parte, id est, duobus Dodecatemoriis à se invicem distant.

3. Est Tetragonus, seu Quadratus, aut Quadrangulus, cum distant tribus Dodecatemoriis.

4. Est Trigonus, seu Triangularis, cum distant 4 Dodecatemoriis.

5. Denique est Oppositio, seu Diametralis aspectus; cum sex dodecatemoriis, seu sex signorum intervallo à se invicem sunt remoti.

Notabis etiam, tunc dici Planeta *exaltari*, ubi in eo est signo, cum quo majorem exercet virtutem; cui quidem Planetæ *exaltationi* opponitur *casus*; quando in eo signo est, in quo minus habet virtutis.

Dico I I. Stellæ moventur sub Zodiaco, inæquali cum velocitate. Ajunt enim Stellas inerrantes, suam illam periodum non absolvere nisi annis circiter 28800: qui ab aliis dicitur annus Platonius. Utque alias ex errantibus prætermittam;

Dico I I I. Sol Zodiacum percurrit diebus 365, cum horis 5. & 48 minutis integris, non numeratis minoribus aliis. Quare

Not. 1. Solem quotidie promoveri sub ecliptica uno circiter gradu. Item sic nova quotidie puncta designare in Horizonte, sive ortiva, sive occiduo: Item sic promoveri ab uno Tropico,

ad alterum per lineas spirales, & per circulos, quos vocant parallelos, quales descriptos vides in *tab. 4. fig. 1. 4. & 5.* suntque ex istis parallelis alii Boreales, alii Australes qui suum initium sumunt ab Æquatore, incipiuntque ab eo numerari.

Notandumque est 2. Solem in decurrendis signis Borealibus morari dies 187, tuncque fieri apogæum; cum in Australibus fiat perigæus; in quibus non versatur nisi dies circiter 178. Item,

Not. 3. Solem sic ascendentem vel descendentem ab uno Solstitio ad aliud, describere circiter 182 parallelos, pro numero dierum, quibus conficit illud spatium. Etsi autem illi paralleli non sint omnino circuli, sed Spiræ, quia tamen in eo non fit error sensibilis, solent nihilominus appellari circuli, quos inter numerantur Tropici & Æquator.

Dico I V. Luna curriculum illud Zodiaci perficit diebus 27, cum 7 horis & 43 min. Quamobrem ex usu vulgari solent attribui Lunæ 13 gradus, præter aliqua minuta, quos singulis diebus percurrat. Dum interim in ipsa Luna, sive crescente, sive decrescente observandæ sunt phasæ diversæ. Ac primo quidem die, qui est congressus, seu conjunctio cum Sole, caret omni lumine, & dicitur *Luna silens*, estque in apogæo. Tum quarto die sextilem habens aspectum in media longitudine, fit *Corniculata*. Deinde septimo, in perigæo existens, & quadrato aspectu, dicitur *Dividua*. Undecimo, fit triangularis aspectus, repetitque mediam longitudinem, estque *utrinque gibbosa*. Decimo quinto iterum redditur apogæa, & fit oppositio; diciturque *Plenilunium*. A quo quidem plenilunio digrediens, eisdem situs & aspectus repetit ordine
retro-

retrogrado : cornua intendens ad occasum , & matutino tempore apparens ; cum è contrà crescens vespertino tempore conspicua est, cornibus obversis ad Orientem. Nam pars Lunæ illuminata , semper Solem respicit : quæ contemplari licet *in tab. 4. fig. 9.*

Dico V. Diurni motus major est , aut minor velocitas pro magnitudine circuli , quem astra obeunt. Nec multum laborant Astronomi in definienda illa velocitate , ubi constat de magnitudine circuli, quam faciliè conficiunt ex distantia cognita ; ut *cap. 8.* aperui. Nam si numerum leucarum qui continetur in illo circulo, divides per 24, indicabit *Quotiens* , quot singulis horis leucæ decurrantur. Quare supposito illo nostro calculo , de magnitudine circuli uniuscujusque, quem astrum obit diurno motu, consequens est , ut Luna perigæa singulis horis conficiat leucas circiter 23230 : apogæa verò circiter 27447.

Ita Sol in minima distantia horis singulis leucas peragrat circiter 494564 : apogæus autem , seu in maxima distantia circiter 547142.

Ita etiam stellæ Firmamenti positæ ad Æquatorem , una hora perficiunt leucas circiter 6299333 ; atque uno minuto plures quàm 104988.

Notabis verò hîc addi particulam *circiter*, quia negliguntur fractiones, quæ nihili habendæ sunt in tanto numero, etsi aliquantisper augere illum possent. Item

Not. 2. Non eundem esse hunc omnium Astronomorum numerum : quia non eodem leucarum genere utuntur omnes , ex quibus tamen aliæ aliis sunt vel duplo , vel triplo majores. Item , quia in instituendo suo calculo ,

sæpe aberrant. Dubium autem esse vel imperitis non potest, quin principia, quibus hoc loco nituntur Astronomi, certissima sint; alioquin etiam de eclipsibus luminarium cœlestium; de earum momentis, & duratione tam constanter non pronunciarent.

Dico VI. Initium & finis motus cœlestis supra Horizontem, vocatur tum ortus, tum occasus. Sic enim dicitur nobis oriri Sol, cum ascendit supra Horizontem: contra autem occidit, cum infra Horizontem demittitur.

Notandumque est, ortum hujusmodi, aut occasum Solis, vulgè triplicem assignari. Primus, qui & verus dicitur, est Æquinoctialis; quando Sol est in Æquatore. Secundus est æstivus nobis, quando Sol est in Tropico Cancræ. Tertius denique est Hybernus, quando est in Tropico Capricorni. Latitudo autem vel ortiva, vel occidua, est puncti illius horizontalis, in quo data die Sol oritur, distantia à puncto æquinoctiali, in quo scilicet Horizon secatur ab Æquatore. At

Not. 2. Ortum aut occasum signorum Zodiaci, propriè appellari ascensum, aut descensum. Ascensus, vel ut loquuntur, ascensio signi astronomici, est pars aliqua circuli æquinoctialis, à principio Arietis numerata, quæ cum certo arcu Zodiaci, aut eclipticæ ascendit supra Horizontem. Aliaque est ascensio aut descensio recta, alia autem obliqua. Quæ ratione partium Zodiaci dicitur recta, est quando plures gradus oriuntur de Æquatore, quàm de ecliptica. Obliqua verò contra est, quando pauciores gradus oriuntur de Æquatore, quàm de ecliptica. Atque ita per proportionem dicendum est de recta aut obliqua signi descensione.

CAP. XI. *Instrumenta Astronomica.*

VT non agam modò de Quadrante Astronomico, cujus structura jam explicata est in Geometria;

Dico triplex esse genus Sphæræ materialis, seu artificialis, cujus est in rebus Astronomicis usus perinsignis. Ac primò quidem est Sphæra armillaris, sic dicta, quia ex armillis, id est, circulis constat, quibus variæ cœli regiones repræsentantur. *ut in tab. 2. fig. 1. & 2.*

Secunda est Sphæra solida, seu Globus Astronomicus, qui ab inventore nominatur Sphæra Aratea, continens descriptos circulos, & stellas, eo per proportionem modo, quo sunt in cœlo ipso. *Schema vides in tab. 8. fig. 7.*

Tertia est Sphæra plana, seu Planisphærium, quod alio nomine Astrolabium appellant. Idemquæ est ac Globus cœlestis complanatus, seu in forma plana repræsentatus. Sed antequam tibi usui esse possit, observanda est illius structura.

Prima pars est armilla suspensoria, à qua libere dependet totum Instrumentum. Duas habet facies; quarum altera vocatur posterior, seu dorsum Astrolabii. Altera anterior, quæ & mater nuncupatur; quodd suo veluti in gremio varias regionum diversarum tabellas, seu tympana contineat. Tum in circuitu est limbus in 360 partes, seu gradus Aiquatoris divisus, cum notis horarum æqualium.

Notandum verò est plures adesse tabellas, quæ variis in mundi plagis deserviunt, pro diversa poli elevatione, aut Sphæræ obliquitate.

Not. 2. In singulis hisce tabellis hæc imprimis esse observanda.

1. Vnamquamque tabellam habere tres circulos concentricos; quorum minimus centróque proximus repræsentat Tropicum Cancrî. Qui maximus est, & à centro remotissimus, supponitur pro Tropico Capricornî; medius denique est Æquator, seu circulus Æquinoctialis.

2. Duæ sunt Diametri in centro circulorum sese interfecantes; totamque faciem in 4 Quartas, seu arcus 90. gr. dividunt. Quæ autem Diameter ab armilla descendit, vocatur linea medii cœli, seu circulus meridianus. Quæ autem transversa est, vocatur Horizon rectus; cuius quidem sinistrum latus Orienti, dextrum Occidenti adscribitur, Instrumento ante oculos obverso.

3. Tabellis singulis sunt inscripti circuli elevationum, seu almucantarath, astrorum elevationibus indicandis; quales videre est in *fig. 1. tabula 5.* Atque horum quidem circulorum maximus & totius structuræ basis, est Horizon obliquus. Cum è contra omnium minimus est ad verticem, seu ad zenith. Deberent autem tot poni almucantarath hujusmodi, quot gradus, nempe 90; sed vitandæ confusionis gratia, bini tantùm, vel terni describuntur.

4. Præterea superadduntur verticales, seu azimuthales circuli, quales seorsim tibi repræsentato in *fig. 2. ejusdem tab. 5.*

5. Sub horizonte obliquo solet describi linea crepusculina; tum arcus horarum inæqualium. At

6. Diligenter hîc observanda sunt tria punctorum genera, quæ per diversas circulorum sectiones designantur, tam in parte Orientali, quàm in Occidentali.

Primum est punctum veri Orientis, tum veri Occi-

Occidentis ad intersectiones circuli Æquinoctialis & Horizontis obliqui.

2. Est Oriens, tum Occidens æstivus ad intersectiones ejusdem Horizontis obliqui & circuli Cancræ.

3. Denique est punctum Orientis, tum Occidentis hybernæ, ad intersectiones Capricorni & ejusdem Horizontis.

4. His regionum tabellis incubat Aranea, quæ Zodiacum maximè continet; tum nonnullas ex illustrioribus Firmamenti stellis, quæ denticulorum extremitatibus designantur.

Ac denique supra Araneam applicatur regula versatilis, quam appellant Ostensorem, cum sua linea fiduciæ, quæ limbum possit percurrere, & quæsitæ puncta aut sectiones, gradus-ve indicare.

Posterior Astrolabii facies, seu dorsum has præcipuè partes habet. 1. Per lineam meridianam ab armilla descendente; tum per horizontalem, in quatuor Quartas, seu arcus 90 graduum distinguitur.

2. Continet plures circulos concentricos: ex quibus unus divisus est in 360 gradus, qui sunt gradus elevationum ab Horizonte ad verticem. Alius mensium dies; alius denique signorum gradus singulis mensium diebus respondentes indicat.

3. In medio est Quadratum Geometricum pro Altimetria, simul cum dioptra, seu mediclinio varios in usus. De usu Instrumenti hujus tum in praxibus Astronomicis, maximè autem in Chronologicis sermo est futurus.

CAP. XII. *Praxes Astronomica.*

Probl. I. *Scire modum investigandi astrorum distantias, magnitudines, motuum velocitatem ipsis propriam.*

Habetur hujus quæstionis solutio, ex doctrina capitis octavi, & decimi.

Probl. II. *Scire locum Solis in Zodiaco; seu gradum, cui dato die respondeat.*

Habes ex cap. 3. Quænam cujusque mensis propria sint signa, etsi in illa signa Sol non ingrediatur, ut ajunt, nisi sub postremas mensium illorum partes. Nam excepto Piscium signo, quod attingit 19 Februarii, ad alia non pervenit, nisi post vigesimam diem. Quotâ autem die post vigesimam fiat ille ingressus, ut commodè scias traduntur illi versiculi:

*Amphora, sic Aries, Taurus, capit insuper unum :
Sed Gemini, Cancerque duos : duo sumit &
Hircus :*

*Tres Leo, tres Virgo, tres Pondus, tresque Sagitta :
Scorpius at quatuor : minùs uno denique Pisces.*

Atque his præsuppositis, ut solvas problema; numera gradus eclipticæ juxta datam diem à tempore ingressus solaris in tale signum, remque attinges.

En aliam expeditiorem praxim. Adi ad dorsum Astrolabii, & quære in ejus limbo diem mensis, quæ data est. Deinde illi diei applica lineam fiduciæ. Tum extremitas illius lineæ designabit tibi in circulo superiori gradum eclipticæ quæsitum.

Problema III. *Solis declinationem pro data die invenire. Nempe quam ipse, & parallelus, in quo est, habeat distantiam ab Æquatore.*

Quære locum Solis in Zodiaco, juxta præcedens problema. Tum partem illam, seu gradum eclipticæ applica ad circulum meridianum, qui Sphæram, seu globum artificialem ambit. Deinde numera gradus illius arcus, qui tenditur ab Æquatore ad partem illam Solis assignatam, & habebis intentum.

Quinam sint paralleli Solis; explicui *cap. 10. Assertion 3.* Item, habes & *cap. 5. Assert. 2.* quid sit illa Solis declinatio, sive Borealis, sive Australis. Item, & *cap. 4.* legere est, quemadmodum in Tropici habeat maximam declinationem, nempe grad. 23. & semis.

Probl. IV. *Solis aut syderis cujuscunque altitudinem seu elevationem quavis hora deprehendere; id est, quot gradibus distet ab Horizonte versus Meridianum.*

Vtere vel Quadrante astronomico, vel dorso Astrolabii ritè disposito. Dioptram in objectum destina, vel per ejus pinnulas, radium excipe. Tunc videbis quot gradus abscindat dioptra, numerando illos à latere horizontali, seu quod est infra positum, & parallelum Horizonti.

Notabis autem, Solis, aut cujuslibet astri maximam elevationem, seu altitudinem, esse meridianam; tunc scilicet, cum cœli medium circum, id est meridianum attingit. Quanquam

Not. 2. Meridianam ejusmodi altitudinem esse vel majorem, vel minorem, prout astrum

est in meridiani parte quæ magis, aut minùs distet ab Horizonte. Vt autem illam aut Solis, aut astri cujuscunque altitudinem meridianam, obtineas: supponitur linea meridiana jam aliquo in plano horizontali ritè descripta, cujus beneficio accuratè habeas sydus meridianum. Tunc autem juxta illam lineam meridianam adhibito Astrolabii dorso, alio-ve id genus instrumento idoneo; Alidada designabit tibi gradum elevationis supra Horizontem.

Probl. V. Solis, aut stellæ in aranea Astrolabii signata altitudinem inventam constituere in proprio Almucantarath, seu circulo elevationis.

Quære Almucantarath similis altitudinis. Deinde punctum Araneæ, in quo est vel Solis gradus, vel stella prædicta, tandiu circumferas, dum respondeat illi Almucantarath, ex parte quidem Orientis, si altitudo quæ sita est antemeridiana, ex parte autem Occidentis, si est pomeridiana. Quod si omissus est ille circulus in descriptione Astrolabii, dispone nihilominus punctum illud Araneæ in eo circiter loco, ubi describi debuisset. Ostendam postea in Chronologia, quemadmodum hoc factò habeas in promptu horam, vel æqualem, vel inæqualem.

Probl. VI. Faciem Coeli exponere: seu quam astra sint supra Horizontem, & quam Coeli partem singula obtineant.

Vtere Astrolabio: gradum eclipticæ in quo est Sol, applica supra Almucantarath, seu circumulum elevationis convenientem altitudini, quæ datæ horæ respondet. Tunc apparebit quænam constellatio sit exortiva, quænam occidua, &c.

No-

Notabis autem gradum illum, seu signum & partem Zodiaci quæ tunc reperitur ad Horizontem, vocari à Genethliacis gradum ascendentem; & angulum Orientis; item & Horoscopum. Pars illi adversa dicitur angulus Occidentis. Pars ad lineam meridianam, vocatur angulus medii cœli. Pars denique illi opposita est angulus Terræ, seu gradus mediæ noctis: has enim 4 mundi partes Astrologi vocant quatuor cœli angulos. Quemadmodum verò & illud etiam fiat ope Globi Astronomici explicabo problemate 12.

Probl. VII. Lineam meridianam, seu lineam, quæ directè respondeat circulo meridiano loci alicujus, designare.

Habetur illud in promptu per acum magneticam, observatâ illius declinatione. Nam secundùm longitudinem suam designabit lineam quæsitam, & utrumque polum mundi. Verùm ut istud astronomicè consequaris; fac *ut in fig. 6. tabula 4.* In dato plano fige stylum, seu gnomonem rectum *e, f*, descriptis ex loco illius styli circulis ad libitum. Deinde adverte, quem ex illis circulis attingat extremitas umbræ matutinæ. Aut si lubet; non descriptis priùs illis circulis, quovis tempore matutino describe circulum ex loco styli per extremitatem umbræ: tum illi extremitati punctum appone; *ut in h.* Ac re quidem illâ peractâ, expecta post meridiem, donec ejusdem styli umbra partem aliam circuli attingat, ut in *g.* Tum diviso bifariam in partes æquales illo arcu *h, g*, ex puncto divisionis *d* ducas rectam ad centrum *e*, hæcque erit linea meridiana.

Notandumque est, Te lineam æquinoctialem,

id est *Æquatori mundi parallelam* posse hoc pacto habere commodè, si per meridianam inventam, rectam aliam duxeris ad angulos rectos; ista enim erit *æquinoctialis*.

Item hoc pacto designabis 4 mundi partes. Nam linea quidem meridiana dabit puncta Septentrionis & Meridiei; linea autem æquinoctialis indicabit puncta veri Ortus, & Occasus.

Not. 2. Hac etiam methodo posse describi lineam *Æquinoctialem*, tum & consequenter *Meridianam*. Si diebus æquinoctialibus posito aliquo gnomone, duas saltem umbras ab illo profusas observaveris, & earum extremitates scriptis punctis notaveris. Nam si per illa puncta lineam duxeris, erit *Æquinoctialis*. Item si per istam æquinoctialem ad angulos rectos rectam aliam descripseris, hæc erit *Meridiana*.

Not. 3. Eam esse methodum, qua figas stylum perpendicularem. Primò, describe duas lineas rectas in crucem; id est sese orthogonaliter intersecantes. 2. Posito crure circini in sectione linearum ejusmodi, designa puncta 4 in diversis illis lineis ad æqualem distantiam. 3. Posito stylo in sectione, seu concursu duplicis illius lineæ; tunc à singulis punctis priùs notatis, aperi circum usque ad apicem styli; si æqualiter undequaque distet, concludes esse perpendicularem.

Probl. VIII. *Æquatoris altitudinem, seu elevationem supra Horizontem invenire.*

Suppono iis tantùm esse rectum *Æquatorem*, qui sub ipso existunt, habentque polos mundi ad Horizontem. At inclinatur & fit nobis obliquus ea proportionem, quâ ab ipso recedimus. Vnde si ab eo distamus v.g. 40 gradibus, tantùm quoque habet & obliquitatis seu inclinationis
Hori-

Horizontem versùs. Qua quidem in obliquitate & inclinatione distat certis gradibus ab Horizonte, seu certo graduum numero dicitur esse supra illum elevatus. De hac autem elevatione quæritur, quanta sit. Et quidem commodè illud statui potest diebus æquinoctialibus, si horâ meridianâ, & disposito ad lineam meridianam instrumento, Solis in Æquatore tunc existentis radium per pinnulas exceperis: Dioptra enim secundùm lineam fiduciæ designabit gradum illius elevationis, numerando à latere instrumenti, quod est parallelum Horizonti. Istud autem idem est, ac inventio altitudinis solaris meridianæ, tempore Æquinoctii.

Item potes quoque & percommodè illam Æquatoris elevationem indagare in Solstitio, sive æstivo, sive hyberno; tunc enim satis comperta est Solis declinatio; nempe 23. graduum, & semis; quos designatis gradibus, vel addere, vel detrabere debeas.

Notandum enim est gradus illos solaris declinationis subtrahendos nobis esse in Solstitio æstivo: contra autem in hyberno esse addendos. *Exempli causa.* Die 22. Iunii horâ meridianâ Sol in Tropico Cancrî, seu in primo gradu illius signi existens, dat in instrumento 64 gradus elevationis cum minutis 30: quamobrem subtracta declinatione 23. gr. cum 30. minutis, superest ut dicamus in hac urbe altitudinem Æquatoris esse graduum 41.

Probl. I X. *Invenire distantiam puncti verticalis ab Æquatore.*

Inventa elevatione Æquatoris, complementum illius usque ad 90 gradus, dabit quæsitam distantiam. *Exempli causa.* Si in hac urbe est

altitudo *Æquatoris* 40 graduum cum dimidio , consequens est ut distet ab *Æquatore* gradibus 49. cum dimidio.

Notandumque est , istam distantiam eandem esse cum latitudine *Geographica* , seu *munda-*
na ; Vt supra monui.

Probl. X. Poli altitudinem indagare.

Facile est ex dictis : nam supposita *Solis* altitudine meridiana in alterutro *Æquinoctiorum* , juxta *probl. 8.* Habes consequenter distantiam puncti verticalis ab *Æquatore* , & mundanam latitudinem : ut modò ahebam. Hæc autem distantia , & latitudo , æqualis est cum elevatione poli supra *Horizontem* : vel si lubet , æqualis est arcui *Meridiani* posito inter polum *Mundi* elevatum , & *Horizontem*. Quare. ut habeas poli altitudinem , investiganda est *Solis* meridiana altitudo ; aut additis , aut subtractis declinationis gradibus , quando investigatur extra tempus *Æquinoctiorum*.

Notandum autem est , hoc pacto , indirectè solùm deprehendi poli altitudinem. Neque verò in se directè omnino potest haberi , cùm ad illa cœli puncta , quæ poli appellantur , nullum sit astrum nobis visibile. Quamobrem *Geographi* ad stellas polo viciniore solent intendere , & quidem , ad eam maximè , quæ *Polaris* nuncupatur , ut inde judicent de poli altitudine : sicque agunt. *Primò* , investigatur altitudo meridiana illius stellæ , nempe cùm ad meridianum circulum attigit. *Tum secundo* , horis postea duodecim , cùm ad oppositam meridiani partem devenit , iterum quæritur ejus altitudo , observaturque illarum altitudinum meridiana-rum differentia ; tunc autem media pars inven-
tæ

tæ differentia additur minori altitudini meridianæ, ut habeatur poli altitudo. *Exempli causa.* Si una ex stellis polo vicinioribus, in superiori altitudine meridiana inveniatur esse gradum 60; & in inferiori habeat tantum 40. utriusque illius altitudinis differentia erit 20. cujus numeri pars dimidia est 10: hunc igitur numerum si addideris ad 40, fient 50: adeoque pronuntiabis, polum tunc esse elevatum gradibus 50.

Not. 2. Eam methodum non esse navigantibus commodam, cum tandiu eodem in loco morari non possint. Quamobrem ex tribus iis stellis, quæ caudam ursæ minoris constituunt, duas posteriores supponunt tanquam basim trianguli æquilateri, cujus in apice polus mundi existat, eamque in partem destinant dioptram; nec certè aberrare hoc modo possunt, nisi valde leviter.

Probl. XI. Longitudinem Geographicam investigare.

Operosa res est, nec tam accuratè potest perfici. Habetur autem maximè per Lunares eclipses. Supponendum est enim distantiam longitudinis, qua unum oppidum v. g. differt ab alio, esse distantiam meridianorum, qui sunt ipsis proprii. Ut igitur possit intelligi quam habeant inter se distantiam longitudinis Roma v. g. & Lutetia Parisiorum, oportet quàm diligentissimè tum Romæ, tum Lutetiæ simul observari certam alicujus eclipseos lunaris partem, puta vel initium, vel potius medium. Deinde rescire, quâ horâ Romæ, quâ horâ Lutetiæ hæc contigerit. Cum enim in eodem toto hemisphærio simul appareat Lunæ ingressus intra umbram Terræ, nec sit eadem hora sub diversis

versis meridianis ; si dicatur fuisse hora 9 Romæ initio illius eclipsis ; Lutetiæ autem fuisse 10. concludendum erit Lutetiam distare Roma secundum longitudinem 15 meridianorum, per 15 diversos gradus Æquatoris transeuntium. Sic enim uni horæ 15 gradus Æquatoris attribuantur, ut jam monui.

Notabis verò in his problematis egisse nos tantum de ea Longitudine & Latitudine, quæ dicitur Mundana, aut etiam Geographica. Nam in Astronomia, alia est quæ dicitur Latitudo stellæ, nempe distantia stellæ illius ab ecliptica ; seu arcus inter eclipticam, & verum locum stellæ illius. Longitudo autem stellæ, est illius distantia à principio Arietis, seu à puncto æquinoctiali verno, versùs signa Tauri, Cancrì, & alia consequentia ; vel si lubet est arcus Zodiaci ab initio Arietis per illa signa productus.

Probl. XII. *Sphæram armillarem, aut Globum Astronomicè constituere.* Gallicè, Le monter astronomiquement : Id est ita disponere, ut Meridianus Sphæræ, sit intra Meridianum mundi ; tum habeat elevationem Poli, quæ dato loco sit propria ; unde consequenter Polus tuæ Sphæræ, aut Globi Polo Mundi, Meridianus, Meridiano, Æquator Æquatori, aliique circuli, mundi similibus circulis conformentur.

Praxis. Si habueris meridianum in plano descriptum, illi meridianum Instrumenti conforma : alioquin utere acu magnetica, quæ tibi meridianum designabit. Deinde Polum eleva supra Horizontem Instrumenti, juxta datam elevationem. Resque perfecta est.

Notabis autem Beneficio Sphæræ armillaris,

ris, aut Globi astronomicè constituti, sic posse te faciem cœli exponere : assignare, & distinguere varias mundi plagas. Item & ventos varios, prout in Horizonte illius Sphæræ describi solent. Item, sic potes deprehendere altitudinem Solis meridianam, ad datam quancunque diem, si locum Solis, seu gradum eclipticæ, in quo tunc existit, ad meridianum æreum Sphæræ circumductum applicueris; tum enim si ex ea parte numeraveris gradus usque ad Horizontem, habebis intentum. Item Sphærâ astronomicè constitutâ, sic potes indicare viam Solis in cœlo; Quos gradus Horizontis abscindat, data quacunque die. Item, quàm magnos arcus diurnos, & quàm longos efficiat dies dato anni tempore; ceterâque id genus, quæ distinctis problematis explicari debent in Chronologia.

METHODVS

ET

INSTITVTIO

MATHEMATICÆ.

CHRONOLOGIA.

PRÆFATIO.

TRactatus iste attexendus est *Astronomia*, cum ex ea petatur maximè: *Temporis enim durationem*, & partes, quas consideras, per *Astrorum*, ac *cœli conversiones* dimetimur.

Triplex autem est Chronologiæ genus. Nam primò, alia est *Physica*, de *natura*, & *proprietatibus temporis*; Secundò, est *Historica*, qua rerum *gestarum tempora* observat; *varias annorum epochas*, etiamque multiplicem definiendo; Tertio denique, alia est *Mathematica*, qua *temporis ipsius veluti extensionem*, seu *durationem* metitur, suasque in partes, ad *hominum usum* dividit.

Atque illarum quidem partium, ex quibus constare dicitur *Tempus*, alia sunt minores, maiores alia. Ex minoribus primùm constituuntur maiores; sicque *hora* ex *momentis*, seu *minutis*: ex *horis* *dies*: ex *diebus* *hebdomada*, & *mensēs*; ex *mensibus* *anni* fiunt.

Præterea verò alii sunt longiores *Temporum circuli*, & *mensura*; nempe *annorum varia periodi*, qua singula jam paucis prosequor.

Tabulas reperies ad finem *Tractatus de Sphæra Terreſtri*.

METHODVS

ET

INSTITVTIO

MATHEMATICÆ.

CHRONOLOGIA.

CAP. I. De Die.



*D*ies est vel Astronomicus, vel Politicus, seu Civilis; Astronomicus est, quem Astronomi definiunt; dividiturque in Naturalem, & Artificialem. At

Dico I. Dies naturalis, est temporis intervallum, quo Sol ab aliquo cœli puncto, seu meridiano digressus, ad eundem revertitur. Vel si lubet, est Solis ab aliquo meridiano fixo, ad eundem conversio, quæ spatio 24 horarum æqualium perficitur. *vix* *ἡμέρας* Græci vocant, quia diem artificialem simul cum nocte complectitur.

Dico II. Dies artificialis, est duratio temporis ab exoriente Sole, usque ad ipsius occasum; seu quandiu Sol lucet in nostro hemisphærio: Huicque opponitur Nox, perinde *Artificialis*.

Notandumque est 1. Artificialem differre à *Naturali*, quodd iste semper, & ubique idem sit: *Artificialis* verò perpetuam ferè mutationem habet, præsertim apud eos, qui regiones Æquatori affines non habitant. Nam, ut dixi, *Artificialis*

cialis complectitur solum spatia temporis intercepta inter ortum Solis, & ipsius occasum, quæ modò breviora, ut in hyeme; modò longiora sunt, ut in æstate. Quare

Not. 2. Longiores tunc esse dies, & longiorem Solis moram supra Horizontem in æstate, ubi Sol ipse arcus cœli percurrit majores respectivè ad nostrum hemisphærium; cujusmodi vides in Sphæra obliqua *tab. 4. fig. 5*, cum è contra videas in parte opposita, breviores esse arcus diurnos, qui tempore hyberno decurrunt, tuncque Solem minùs morari supra Horizontem. Item, *ad fig. 1.* pro Sphæra recta, vides esse omnes ferè æquales arcus diurnos, & nocturnos: ne quid dicam de crepusculis, seu de tempore, in quo aër splendescit à radiis Solis, vel manè ante illius ortum, quod vocatur *Aurora*, & *diluculum*, seu *crepera lux*, aut *dubia*: vel serò, post occasum. Incipit autem manè crepusculum, aut finitur serò, quando Sol in inferiori hemisphærio pervenit ad eum circumulum Horizonti parallelum, qui ab ipso Horizonte distat gradibus 18.

Notandum verò est 3. Non esse eadem apud omnes diei naturalis initia; pro diverso eorum arbitrio, & instituto. Nam Iudæi quidem, & Babylonii, quos etiamnum imitantur insularum Balearium incolæ, diem appellabant ortum Solis ab uno ortu, ad ortum alterum. Itali è contra, definiunt diem ab uno Solis occasu, ad alium: sicque horas incipiunt numerare ab occasu Solis; cum Babylonii rationem contrariam servant, numerando illas ab ortu. At Romani olim, quem etiam usum sequitur Romana Ecclesia, diem perducunt à media nocte, usque ad proximè sequentem noctem mediam:

Arabes

Arabes autem & Astronomi diem potius computant à meridie , ad sequentem meridiem ; quia Sol , & Astra eodem semper modo se habent respectu circuli Meridiani in omni regione ; quod non contingit respectu Horizontis , qui pro varietate polaris elevationis , semper mutatur.

Dico I I I. Idem hic naturalis dies , ex die & nocte artificiali constans , vocatur & *Civilis* , seu *Politicus* ; prout ex diverso populorum , aut civitatum instituto , certum accipit principium , ac finem ; quemadmodum jam exponebamus. Et quidem ex diebus illis politicis , alii sunt *Festi* , quibus maximè rebus sacris vacare teneamur ; alii autem sunt *profesti* , quibus humanæ vitæ utiles operas exercere liceat ; sicque habentur vulgò digesti in Tabulis , quas Arabes vocant *Almanach* ; latini *Calendaria*. Nam Calendarium est ordo & series mensium , lunationum , tum dierum festorum omnium , quæ per annum contingunt : diciturque Calendarium à *Calendis* , quæ in uno quoque mense sunt dierum primi.

C A P. I I. De Horis.

Hora est unum ex illis minoribus temporis spatiis , in quæ dies omnis dividi consuevit ; sicque *Hora* vulgò definitur , est pars vicesima quarta diei naturalis ; vel duodecima diei artificialis inæqualis. Nam

Dico I. Ex horis aliæ vocantur *æquales* , quæ sunt vicesimæ quartæ partes diei naturalis , ut inodò agebam. Dicuntur etiam *Astronomicae* , tum & *Æquinoctiales* , quia singulæ ex illis sunt spatium temporis , quo *Æquator* 15 gradibus ascendit supra Horizontem ; aut etiam spatium ,

tium, quo Sol decurrit 15 Meridianos. Dividuntur autem singulæ in duas medias; tum in quatuor quadrantes; ac denique in 60 minuta, seu scrupula.

Dico I I. Aliæ vocantur *hora inæquales*; Græcis *καταμυγῆ*. Sunt autem partes duodecimæ tam diei artificialis, quam noctis; seu temporis illius, quo Sol aut inoratur supra Horizontem, aut infra delitescit; dicunturque *inæquales*, non quodd horæ unius ejusdemque diei, aut noctis ejusdem sint inter se inæquales; sed quia cum sint duodecimæ partes æquales dierum inæqualium, puta dierum æstivorum, & brumalium; necesse est consequenter horas brumales, & æstivas, esse hoc pacto inter se inæquales; item & dicuntur inæquales; quia æstivo tempore, diurnæ sunt longissimæ; nocturnæ autem brevissimæ; contra autem hyberno. Vocantur præterea *Temporariæ*, quia pro diversitate, seu pro longitudine, aut brevitate dierum, diversas sortiuntur magnitudines. Item vocantur *Antiquæ*, quoniam erant in usu apud antiquos, & maximè apud Iudæos, cui rei congruit dictum illud Christi Domini *Ioan. II. Nonne sunt duodecim hora diei?* Item, dicuntur quoque *Planetariæ*, quodd crederent veteres quidam Astronomi, septem Planetas istis horis successivè dominari, ea lege, & ordine, ut prima diei hora illi cedat Planetæ, à quo dies hebdomadaria suum nomen trahit.

Notandumque est ex Baronio ad annum Christi 34. Iudæos tum diem, tum noctem divisisse non modò in horas temporarias 12; sed præterea & in quatuor partes æquales, quasi in 4 stationes, quarum singulæ continerent tres ex iis, quæ dicuntur temporariæ, & inæquales ho-

ræ. Quæ autem erant 4 partes noctis, vocabantur *Vigilia*, nomine à Vigilibus mutuato. Earum prima incipiebat ab occasu Solis; secunda desinebat cum nocte media, & ab eadem incipiebat tertia; ultima denique ad Solis ortum finiebat. Iam verò quæ erant diei quaternæ partes, propriè vocabantur *hora*, ex tribus temporariis, ut dixi, constantes; ita ut pars ultima horæ huiusmodi v. g. secundæ, esset hora sexta communis & temporaria; quam sequebatur hora tertia Iudæorum propria, continens ex temporariis septimam, octavam, & nonam. Et quidem juxta hunc calculum rectè ait S. Marcus Christum Dominum crucifixum fuisse *hora tertia* (nempe tertia ex quatuor illis æqualibus, in quas dividebatur totus dies) cum S. Ioannes scribat fuisse damnatum à Pilato *hora quasi sexta*; id est, sexta temporaria; nec te moveat, quòd ista in Evangelio videantur confundi tantisper, quia sic tantum horæ designantur ex opinione vulgi. At facilè vulgus etiam appellat horam sextam, ubi sunt initia horæ septimæ, seu tertiæ illius, quæ est quarta pars diei Iudæicæ, aut è contra.

C A P. I I I. De Hebdomade.

E *Βδομὴς*, Latinè *septimana*, est periodus septem dierum in orbem perpetuo recurrens. Atque huius quidem usus videtur esse à Deo, sub prima mundi exordia institutus, quem Hebræi deinceps religiosè observarunt. Inde autem ad alios est propagatus.

At Hebræi primum ac principem hebdomadæ diem vocarunt Sabbathum, quasi diem quietis, ad colendam memoriam illius diei, quo dicitur Deus quievissè perfectâ mundi creatione.

ne. Quinetiam hujus diei nomen ad ipsam hebdomadam transiit, ut Sabbathum idem esset ac hebdomada, dicereturque prima Sabbathi, aut secunda Sabbathi, quam nuncupamus primam aut secundam hebdomadæ diem.

Ethnici diebus illis singulis imposuere nomina Planetarum, ducendo principium à die Solis, quem sequuntur dies Lunæ, Martis, Mercurii, Iovis, Veneris, & Saturni.

Christiani dies illos appellarunt Ferias, ut intelligant feriari se debere à rebus prophanis, nec spirare nisi cultum Divinum eos maximè qui celebrandis nostræ Religionis mysteriis sunt consecrati. Feriarum primam vocant Diem Dominicam; quòd in ea Christus Dominus à mortuis fuerit suscitatus: Sabbathi nomen retinetur pro feria septima, ut sciamus, inquit, illud Iudæorum Sabbathum non fuisse, nisi umbram Dominicæ diei, & quasi parascevem, seu præparationem ad illam celebrandam.

Elegère autem septem Alphabeti literas A. B. C. D. E. F. G; quibus singuli dies hebdomadæ intra annum designarentur; ea methodo, ut singulæ ex illis literis diem Dominicam certo ordine commonstrare possent; unde & nominari solent *Literæ Dominicales*.

C A P. I V. De Mense.

Duplex est Mensis genus, alius enim est Solaris, Lunaris alius.

Dico I. Solaris mensis, est spatium temporis, quo signum unum Zodiaci à Sole decurritur: quare cum supponatur obire 12 illa Zodiaci signa diebus 365 cum aliquibus horis, ac minutis; ideo singulis mensibus tribuuntur modò 30 dies, modò 31, si Februarium exceperis,

peris, quia olim postremus accessit ad menses alios, annique dies tantum residuos continet.

Notandumque est mensem hujusmodi ad communem usum hominum accommodatum, dici medium, & æqualem; cum hic prætermittatur ille, qui dicitur *verus*, seu *inequalis*: quia ut docent Astronomi, certum illi attribui tempus non potest, propter inæqualem Solis motum; qui aliquando diebus 30, aliquando paucioribus, aut pluribus aliquod Signum peragat. Quæ quidem res perinde se habet in aliorum luminarium motibus.

Dico I I. Lunarior mensis, est spatium temporis quo Luna totum percurrit Zodiacum: aut spatium inter duas Solis & Lunæ synodos, seu conjunctiones comprehensum. Duplex enim est Mensis lunaris: alter quidem Periodicus, estque illud temporis spatium quo Luna ab aliquo Zodiaci puncto digressa, ad idem revertitur, & vulgò definitur diebus 27, cum horis 7, & aliquibus minutis.

Alter vero est lunaris mensis, quem *Synodicum*, seu *Mensem Syzygia*, aut *conjunctionis* lunaris appellant; estque illud spatium temporis quo digressa à Sole, iterum cum eo conjungitur; definiturque numero dierum 29, cum horis 12 & una media, præter aliqua minuta, seu scrupula: ubi enim Luna suam periodum dierum 27, & horarum 7 conficit, Sol interim aliquantum progreditur, hoc est gradus ferè 27; quos proinde, ut scribit ille, circulo suo transacto emetiri Luna debet, ut iterum cum Sole jungatur; quod non fit nisi diebus 2, cum horis 5; qui superiori numero mensis periodici additi, reddunt dies 29, cum horis 12, ut minuta negligam: sicque illi menses synodici

fiunt alternis dierum 29, & 30, bis duodecim horis, quæ erant superstites, in unum diem conflatis.

Notandumque est mensem hunc synodicum dici *usualem*, seu *popularem*, aut *civilem*; quodd in illius durationem tantum soleamus intendere, ejusque habeatur solum ratio, quando annus in menses dividitur.

Not. 2. Ex communiori usu conjungi menses Lunares cum Solaribus; eamque lunationem dici propriam illius mensis Solaris, in quo finitur. Ita enim vulgò inquirunt,

In quo finitur, mensi lunatio detur.

Nec sine certa ratione id fit, quam explicat Clavius in *Calendario Gregoriano cap. 17.* Et verò sic alioquin contingeret, ut aliquando per totum annum menses vix haberent unum aut alterum lunationis propriæ diem, tunc maxime quando prima anni lunatio incidit in primum Januarii. Nam lunationes aliæ illius anni incipiunt tantum diebus mensium postremis.

Not. 3. Olim apud Ægyptios caput mensium extitisse *Thot*: apud Romanos *Martium*: atque inde nomen *Quintilis*, *Sextilis*, &c. quæ nomina suis mensibus alioqui non quadrarent. At ubi Numa Ianuarium & Februarium adjecit, tunc cœperunt numerari à primo Januarii. Iam verò

Not. 4. A Romanis menses divisos fuisse in dies triplicis generis, *Calendas*, *Nonas*, & *Idus*. Primus autem cujuslibet mensis dies dicebatur *Calendæ*, à Græco *καλεῖν*, id est vocare; quodd eo die populus vocaretur tum ad nundinas, tum ad Capitolium, ut quæ in mensem illum ad Deorum cultum servanda essent, acciperent à Pontificibus. Tum sequebantur *Nonæ*, quasi *Nundinæ* ut alii volunt; ac tandem *Iduum* dies illi

illi octo , qui sequuntur *Nonas* , ab *Iduando* appellati , ut inquit , quod significabat *dividere*. Quia verò *Calenda* solùm certam ac eandem sedem habent in quolibet mense , cum semper cadant in primam diem ; variis autem locis disponantur dies *Nonarum* & *Iduum* ; ut certa methodo singulis adscribantur suæ *Nona* , aut *Idus* ; hi solent vulgò tradi versiculi ,

Sex Majus Nonas, October, Iulius, & Mars:

Quatuor at reliqui: dabit Idus quilibet octo.

Quare ubi tibi compertum est de die nonarum , facile est consequenter judicare de reliquis. At

Not. 5. A tribus istis diebus, alios omnes qui antecedunt, trahere suam denominationem. Ita enim qui præcedit Calendas, dicitur pridie Calendas, seu primus Calendas, id est ante Calendas ; tum secundus Calendas, & sic deinceps de aliis : quod per proportionem dicendum est de Nonis, & Idibus.

CAP. V. De Anno.

VT Mensis , ita & Anni duplex est genus : alius enim est Solaris, Lunaris alius.

Dico autem primò. Annus Solaris , est spatium temporis, quo Sol ab aliquo coeli cardine, seu puncto Zodiaci profectus , ad idem revertitur. Constatque punctis illis quatuor , quæ dicuntur præcipua & cardinalia, nempe Æquinoctio verno ; Solstitio æstivo : Æquinoctio Autumнали : & Hyemali Solstitio : à quibus Ver , Æstas, Autumnus, & Hyems inchoantur.

Notandum verò est , istud Solis curriculum olim apud Ægyptios , & Romanos definitum fuisse numero dierum præcisè 365 ; qui tamen à coelesti motu sex circiter horis aberrabat. Quo

siebat, ut quarto quoque anno vertente, primus anni dies, aliique inde consequentes suam deferrent sedem, nec habere statum ullum possent. Quamobrem etiam quæ festa certis temporibus debebant celebrari, ea modò in æstatem, modò in hyemem incurrebant. Sed hunc errorem Iulius Cæsar tandem emendavit, illis trecentis sexaginta quinque diebus, sex horas adjiciens, quæ quarto quoque anno exacto in unum diem collectæ infererentur mensi Februario, omnium olim ultimo, brevissimoque; dictusque fuit ille dies *Bissextilis*, seu *Bissextus*, quia intercalatur ad sextum Calendas Martias, hoc est, die 2; Februarii, atque idcirco bis, sexto Calendas usurpatur. Nec modò ille dies, sed annus quoque ille dicitur bissextilis. Quare

Not. 2. Servatam deinceps fuisse in Imperio Romano formam anni illius, qui ab auctore suo dictus est *Iulianus*: duplexque est, alter *communis* dierum 365: alter verò *Bissextilis* dierum 366.

Dico II. Lunaris annus, est illud spatium temporis, quo Sol & Luna duodecies conjunguntur. Sicque annus lunaris ex 12 lunationibus synodicis constitutus, est dierum 354. Quo solum anno lunari hodie utuntur Turcæ & Saraceni, nec apud eos habet certum initium, aut certa tempestate ac puncto cœlesti definitur; quomodo apud nos Iulianus semper incipit circa brumale Solstitium. Alii autem sic ad Lunæ motum annos accommodarunt, ut simul tamen Solis motum adjungerent. At

Notabis 1. Annum Lunarem à Solari deficere undecim circiter dies; unde si hoc anno novilunium, ut Græci vocant, id est, novilunium incidit in Calendas Ianuarias, Lunaris annus

com-

communis ex duodecim lunationibus absolvetur vigesimo Decembris, tunc 21 Decembris novus inchoabitur, retro actis semper noviluniis spatio dierum undecim, dum anno tertio fiant tandem Lunationes tredecim, quarum ultima finietur 27 Decembris; vocabiturque istiusmodi Lunaris annus embolismicus, seu embolismalis, propter embolismum, seu intercalationem lunationis illius. Sicque

Not. 2. Lunarem annum fieri etiam duplicem, perinde ac Solarem: nempe alter est *communis*, ex duodecim tantum lunationibus constans, alter verò *embolismicus*, in quo tredecim absolvuntur.

Notandum verò est, à Metone perinsigni Astronomo fuisse olim observatum, quemadmodum elapsis annis 19, recurrant novilunia ad eosdem dies, idemque, ut putavit, punctum temporis. *Exempli gratia.* Si hoc anno prima Ianuarii die fuerit novilunium; in eandem similiter cadet novilunium post annos 19. Indequé profluxit celeberrimus ille Cyclus, seu series numerorum ab 1 usque ad 19 in perpetuum revolvibilis, cujus beneficio intelligeretur, quo die mensis cujuscunque fieret novilunium. Quare cum tantæ esset utilitatis, solebat in Calendario describi aureis characteribus, vocaturque aureus numerus. Sic igitur vulgò definitur ille aurei numeri Cyclus decennovalis, seu enneadecaëteris. Est revolutio numeri 19, ab 1 usque ad 19; qua revolutione peracta, iterum reditur ad unitatem. *Exempli causa,* cum anno 1653 aureus numerus sit 1. anno sequenti erit 2; & sic deinceps usque ad 19: itaque numerus anni proprius in serie 19 expansa per singulos anni dies, ostendet novilunia,

quotiescunque occurrer. Quilibet verò aurei numeri annus terminatur in fine mensis Decembris, & in principio Ianuarii sequentis anni alius sumit initium.

Dico I I I. Apud diversas nationes, pro earum arbitrio, diversa extitere annorum initia. Nam ut agam tantùm de Hebræorum, & de Romanorum annis, quorum usus in universa penè Europa saltem, jam adhuc perseverat.

Notabis Hebræos, seu Iudæos olim annum inchoasse ab Æquinoctio verno, quodd eo tempore inundum fuisse conditum crederent, ut jam monui: quanquam ubi commorati sunt apud Ægyptios, eorum consuetudini obtemperarunt, annum inchoando à mense *Thoth*, qui (ob neglectam intercalationem unius diei quarto quoque anno, more nostri bissextilis,) nulli respondebat certo puncto anni cœlestis. Sed ubi discessere ab Ægyptiis, iussi sunt à Deo caput anni sui rursus à vere accersere. Sic enim legimus Exodi 12. *Mensis iste Nisan vobis principium mensium: primus erit in mensibus anni.* Quod tamen accipiendum est solùm de anno Sacro, secundùm quem festa anni, & neomeniæ, & sacra omnia debebant componi. Nam, ut observant sacre Scripturæ interpretes, saltem *Civilis* Iudæorum annus, etiam post egressum, ab Ægypto, semper à *Thisri*, ut vocant, seu septimo mense habuit initium; nec suos contractus, ac politica negotia dirigeabant, nisi juxta calculum anni hujus civilis. At

Not. 2. Iudæorum annum fuisse Lunarem primumque mensem Lunarem sacri anni caput, & à Deo imperatum, eum fuisse cujus dies, seu lunatio decinia quarta, numerato etiam ipso die novilunii, caderet vel in diem Æquinoctii verni,

verni, vel quæ post illud Æquinoctium primò occurreret; quemadmodum à majoribus traditum acceperant. Iam verò, ut de anno Romano, & de nostro agam,

Not. 3. Hujus initium peti à Calendis Iannariis, nec distare à brumali Solstitio, nisi diebus paucissimis. Neque verò etiam Christiani, ab illo usu qui jam in Imperio Romano invaluerat discesserunt, quanvis Christi natalibus adhærescant, quòd parum discreparent, reputeturque parum pro nihilo.

C A P. V I. *Anni instauratio Gregoriana.*

Etsi Ecclesia Catholica cæremonialibus Legis Mosaicæ præceptis non est obnoxia, quòd ipsa moriente Christo mortua sint; celebrari tamen Pascha voluit ad aliquam Iudaici Paschatis imitationem, propter Sacramentum, & recondita mysteria quæ in illa solemnitate Paschæ Resurrectionis Dominicæ includuntur: ut fusè tradit D. August. *lib. 2. ad inquisitiones Iannarii, cap. 1. & 2.* Quare ut Pascha antiquum primo mense, seu primâ anni Lunâ (de qua modò superiori in capite aiebam) ex Divino præcepto celebrabant: ita & Christianorum Pascha, sanctissimorum Patrum qui Nicæam ad Concilium convenerant decreto, primo illi mense addicitur. Quam etiam ob causam ne discordia in eo celebrando, quod sæpe ante contigerat, suboriri posset; statuerunt de primo mense, & de die illius quartadecima, cum de sede verni æquinoctii, tanquam regulâ istius primi mensis. Nam eum esse dixerant primum mensem, cujus dies quartadecima in Æquinoctium vernum caderet, aut illud ipsum proximè sequeretur. Deinde Æquinoctii sedes, seu

epocha, ex peritissimorum Astronomorum iudicio, & consensu ad 21 Martii constituta est: ac tandem Calendario aptatus fuit aureus numerus, cujus beneficio novilunia, & alii dies Lunæ in promptu haberentur. Porro in hoc Ecclesia discessit à Iudæorum consuetudine, quòd Pascha non in ipsa quartadecima Luna primi Mensis, ut Hebræi, sed in Dominica, quæ XIIII Lunam primi mensis proximè sequitur celebrari iussit, eam maximè ob causam, quòd primâ Dominicâ post Iudæorum Pascha Christus Dominus à mortuis resurrexit. Quemadmodum enim, ut scribit author Calendarii Gregoriani, Iudæi Pascha celebrabant in Luna XIIII, propter immolationem Agni, qui mortem Christi præfigurabat, ita nos hocce in festo memoriam Christi Resurrectionis quæ Dominico die contigit, celebramus; unde etiam necum Iudæis concurramus, si XIIII dies Lunæ primi mensis in diem Dominicum incidat, solennitas Paschæ transferri debet ad diem sequentem Dominicam. Itaq; ad rectam Paschæ celebrationem, unde pendent cætera festa mobilia, hæc tria præcipuè observat Romana, & Catholica Ecclesia, nempe Æquinoctium vernum; Lunam XIIII primi mensis, & diem Dominicam quæ post illam Lunam XIIII consequitur.

At rebus ita constitutis, factum est nihilominus per Astronomorum errorem, ut tandem Æquinoctium vernum non amplius contingeret die 21 Martii, sed tantum circa undecimum. Novilunia item non rectè per aureos numeros in Calendario collocatos indicabantur; sed quatuor diebus, & amplius, serius quàm oportebat; ac proinde Pascha suo tempore juxta Concilii Nicæni sanctionem non celebrabatur.

tur. Quamobrem autoritate Gregorii XIII Summi Pontificis, adhibitis orbis totius Astro-
nomis præstantissimis instituta est Calendarii
emendatio anno 1582; justam anno mensuram
præfigendo, tum exemptis diebus decem, Æqui-
noctium vernum ad pristinas sedes revocandò;
ac denique 30 numeros epactales in locum au-
rei numeri subrogando. Quod autem spectat ad
illius anni formam:

Dico I. Qui cœlestis ac tropicus annus ap-
pellatur, nempe illud temporis spatium, quo
Sol ab æquinoctiali, vel Solstitiali puncto,
alio-ve simili ad idem revertitur; ille inquam
annus, est inæqualis, ac modò major, modò
minor aliquibus scrupulis; nobisque ignotus:
Quamobrem

Dico II. Astronomi mediam inter utrumque
sequentes viam; annum tropicum, quem idcir-
co appellant *medium* & semper *aqualem*, defi-
nierunt numero dierum 365, cum horis 5 &
minutis primis circiter 49. ac proinde,

Notabis 1. Annum Iulianum Tropico, seu
cœlesti esse majorem horariis scrupulis primis
circiter undecim. Quo factum est ut anni illius
cœlestis, seu Tropici caput in anno Iuliano re-
trocederet; & Æquinoctium vernum, *exempli*
causa, jam à temporibus Nicæni Concilii, ad
diem Martii undecimum perveniret tandem.
Quanquam,

Not. 2. Annum Iulianum, etsi major est Tro-
pico, & cœlesti, non idcirco expungi ex com-
muni hominum usu: quin potius valde est com-
modus, retineturque: sed ne in posterum nos
similem in errorem inducat, & melius consen-
tiat cum Tropico, provisum est ut singulis an-
norum centuriis vertentibus, dies unus bissex-

tilis omittatur, quartâ duntaxat exceptâ centuriâ, quæ bissextilem ex more retineat.

Notabis igitur 3. Ex annis solaribus alium esse *Tropicum* & exactum, alium autem quem *Civilem*, *popularem* aut *politicum* vocant. *Tropicus* verò alius est *inæqualis*; alius autem *medius* & *æqualis*. At *civilis* annus, qui idem est ac *Iulianus*, alius est *communis* dierum 365. *Bissextilis* alius dierum 366.

Notabis autem annum hunc à Summo Pontifice meliorem in statum exemptis diebus 10 sic restitutum, non admitti à solis Hæreticis, qui semper servant antiquum numerandi stylum, in odium Sedis Apostolicæ.

CAP. VII. Varii annorum Cycli, & Periodi.

Cycli & Periodi vocantur certi annorum numeri, in orbem redeuntés, quibus tanquam fidis custodibus, intacta servatur temporum series. Apud Græcos olim erant celebres illæ *Olympiades*, seu *Tetraëterides*, quæ quatuor annis integris constabant, sic ut anno ineunte quinto committerentur ludi Olympici. Apud Romanos in usu erat *Lustrum*, quinque annis descriptum; quibus peractis solvebantur census & tributa. At Imperante Constantino Magno statutum est, ut sublatís Olympiadibus & Lustris, subrogaretur *Indictio*, id est, spatium annorum quindecim, quo Provinciæ Romani Imperii debebant tributa pendere. Illaque annorum forma duxit initium à primordiis Christianæ libertatis; ab eo nimirum tempore, quo Constantinus victo Maxentio, potestatem omnibus fecit Christianæ Religionis palàm profitendæ. Atque hujus quidem *Indictionis* usum etiam servant Romani Pontifices. Apud Iudæos

dæos duæ fuerunt insignes annorum periodi: harum altera constabat annis septem; quorum ultimus erat *annus Sabbathicus*, quo debebat Terra cessare ab omni cultu. Altera vocabatur *Iubilaum*, eratque annorum 50, quorum ultimus dicebatur *Iubilæus*, nec solum Terra tunc jubebatur cessare à cultu, sed præterea xs alienum remitti, & servi in libertatem debebant restitui. Nihil hic ago de *saeculo* quod est spatium annorum 100; nec de *ævo*, quod propriè loquendo, mille annos continet. Item, hic revocandus est in memoriam *ex cap. 5.* aurei numeri Cyclus decennovalis. Superest modò ferè tantum ut agam de Cyclo Epactarum, & de Cyclo Solari. Quare

Dico I. Epactam esse uumerum dierum undecim, quibus annus Lunaris superatur à Solari. Ac proinde si hoc anno fuerit Epacta xj, altero vertente anno Epacta futura est xxij. Tertio autem anno debet esse tantum iij. Quia quoties additis pluribus ejusmodi Epactis occurrit numerus 30, illi detrahendus est numerus 30, debetque id quod superest retineri pro numero Epactali anni consequentis; sic autem tertio quoque anno quo rejicitur numerus 30, fit Luna embolisinica. At

Notabis 1. Sic progredi semper Epactas per additionem xj, donec occurrat numerus aureus 19 suam periodum obeundo; quo in casu addendus erit numerus xij, loco xj, ut habeatur Epacta anni consequentis. Iam verò

Not. 2. Submotis ex Calendario numeris aureis, quòd tantisper aberrarent; in eorum locum successisse alios Epactales ab 1 usque ad 30: ex iis autem quæ dicitur anni currentis Epacta, comonstrat novilunia. Epacta verò illa non

incipit nisi cum Mense Martio ; tunc finiente Epacta anni superioris.

Not. 3. Vbi in serie Epactarum loco xxx aponitur vel Stellula, vel zero ; per illud significatur , nihil ex præcedenti anno superfuisse pro Epacta, quia Sol & Luna simul finierant. Quæ cætera spectant ad descriptionem Epactarum in Calendario , tu vide si lubet in Calendario Clavij , *cap.* 10. puta quod interdum duæ Epactæ eidem diei addicantur , ne Epactarum numerus superet dies lunares , qui in singulis mensibus sunt alternis 29 & 30. &c. .

Dico I I. *Cyclus Solaris* , seu literarum Dominicalium , est series numeri 28 annorum , à primo usque ad 28 revolubilis , qua peracta redeunt eadem literæ, ordine eodem hebdomadæ ferias designando. Suppono enim , quod jam antea diximus, seriem literarum A.B.C.D.E.F.G. disponi in Calendario, ut per eas designentur septem feriæ hebdomadæ: resque ita se habet ut litera A quæ semper initio anni præfigitur , reperiaturo quoque in fine , eandemque indicet feriam , nisi annus fuerit bissextilis. Quare si hoc anno A fuerit litera Dominicalis , consequente anno proximo erit B , & sic deinceps ; illaque revolutio & Cyclus absolveretur eo ordine post 7 annos , nisi obstaret dies bissextilis , quarto quoque anno intercalatus : is enim efficit ut huiusmodi orbis literarum non compleatur nisi post annos 28 ; vocatur autem Solaris Cyclus , quia constat ex annis Solaribus , qui ex ductu 4 in 7 , illum numerum constituunt : Cyclusque iste ex more Romano incipit ab anno bissextili, qui Dominicales literas habet G & F.

Notandumque est has literas per singulos anni dies ita esse dispositas , ut singuli menses
 primo

primo sui die certam ex iis habeant sibi affixam. Sic litera A obtinet primum Ianuarii & Octobris diem: litera D, cadit in primum Februarii, Martii, & Novembris; & sic per proportionem de aliis. Quæ memoriæ causa duobus istis versiculis comprehenduntur ea methodo, ut singula vocabula inensem aliquem ordine designent, incipiendo à Ianuario; primæque litera singulorum vocabulorum ea est, quæ primæ illius mensis diei affigitur:

Astra dabit Dominus, gratisque beabit egenos:

Gratia Christicola feret aurea dona fideli.

Notabis verò, tria Cyclorum genera, ex iis quos exposuimus, maxime in usu esse apud Chronologos: nempe Cyclum decennovalem aurei numeri; tum Cyclum Solarem annorum 28; ac denique Cyclum Indictionum ex annis 15.

At multiplicato Solari Cyclo per Decennovennalem aurei numeri, fit numerus 532, quem vocant Periodum Dionysianam, ab inventore *Dionysio Exiguo*, qui observavit perfecto illo 532 annorum orbe, redire eandem Cyclorum ejusmodi combinationem, & consequenter novilunia non solum ad eosdem dies, sed etiam ad easdem ferias in Calendario reverti.

Huc adde & Periodum Iulianam annorum 7980, quæ oritur ex multiplicatione periodi Dionysianæ, per Cyclum Indictionum annorum 15; habetque magnos usus in Chronologia historica, ut docet *Petavius De Doctrina Temporum Iulianam* appellant quia consurgit ex tribus Cyclis anni Iuliani inter se multiplicatis; tuncque absolvitur, cum redit trium Cyclorum ex quibus conflatur, eadem conjugatio; neque verò ea quæ primo hujus periodi anno fuit Cycli Solaris, aurei numeri, & indictionis

conjugatio, continget unquam nisi completo annorum 7980 numero.

Nihil hic dico de multiplici annorum æra, qualis est *v. g. æra Christiana*, nempe anni à Christo nato; æra Romana, Constantinopolitana, & aliæ id genus, quales dicuntur anni à primordiis, vel talis Regni, vel urbis conditæ. Item nec de variis temporum Epochis, seu capitibus quibusdam certis, atque indubitatis, ad quæ rerum gestarum historia dirigatur; hæc enim ad Chronologiæ Mathematicæ institutum non spectant.

CAP. VIII. *Præxes Chronologica.*

Probl. I. *Dati anni Cyclum Solarem invenire.*

Anno Domini proposito addantur 9 : tum compositus ille numerus dividatur per 28; numerus qui ex divisione relinquitur, est Cyclus Solaris dati anni. Si autem ex divisione nihil remanet, numerus Cycli Solaris est 28.

Notabis autem Quotientem in hac divisione indicare quot revolutiones illius Cycli peractæ sint à Christo nato, usque ad annum propositum.

Not. 2. Fieri additionem numeri 9. quia anno hujus Cycli 10 natus est Christus, fluxerantque jam 9.

Probl. II. *In quam hebdomada feriam cadat prima dati anni dies invenire.*

Annum Christi præcedentem divide per 4. Tum quotientem addas numero divisio, neglectis divisionis reliquiis. Præterea verò ex summa illa totali subtrahe 10. ac denique residuum numerum divide per 7. Residuum ex divisione
osten-

ostendet quæsitum numerum : vel si nihil super-
erit, numerus 7 erit quæsitus. Nec habetur hoc
loco ratio ulla Quotientis. *Exemplum.* Propo-
sita quæstio sit de anno 1654. Est ergo annus
præcedens dividendus per 4. ex qua divisione
habetur pro Quotiente numerus 413. Hic ad-
ditus ad numerum divisum reddit 2066. Sub-
tractis autem 10 supersunt 2056. Qui numerus
divisus per 7, non habita ratione Quotientis, re-
linquit 5, ergo prima anni illius dies fuit feria 5;
nempe dies Iovis.

Probl. III. *Dati anni literam Do-
minicalem reperire.*

Quam ex superiori problemate invenisti fe-
riam, illam subtrahe ex 9. Atque ita 5 subtrahe
ex 9. Supersunt 4. Qui numerus residuus indi-
cat literam quæsitam esse quartam inter Domi-
nicales, facta enumeratione ab A inclusivè. Un-
de sequitur D esse literam Dominicalem dati
anni. Supponimus enim ex dictis, literam A
semper esse affixam anni principio.

Probl. IV. *Annum Bissextilem determinare, id
est, aperire an sit hoc anno, vel quando
futurus sit annus Bissextilis.*

Praxis. Datum Christi annum divide per 4.
Si nihil ex tali divisione fuerit residuum, dic
eum annum esse bissextilem : si autem residuus
fuerit aliquis numerus, ille tibi designabit an-
num à bissexto. *Exemplum.* Ex divisione 1654
superest numerus 2. Ergo ante duos annos, nem-
pe anno 1652 erat bissextus : ergo & ad duos
annos, nempe anno 1656 est futurus.

Probl.

Probl. V. *Dato anno, invenire numerum Indictionis Romanae.*

Praxis. Anno Domini proposito addantur 3. quia supponitur Christus Dominus quarto Cycli hujus anno fuisse natus, unde consequenter jam 3 effluxerant. Tum compositus numerus ex dato Christi anno & numero 3, dividatur per 15. Numerus ex divisione relictus, erit Indictio quæsitæ. Si nihil relinquitur, dices annum Indictionis esse 15. Quotiens verò demonstrabit quot revolutiones hujus Cycli usque ad datum annum transierint. Quo pacto anno 1654, Indictio est 7: hujusque Indictionis Cycli fluxerunt 110.

Probl. VI. *Aureum numerum dati anni invenire.*

Praxis. Dato Christi anno adde unitatem. Deinde totum illum numerum divide per 19. neglecto Quotiente: qui residuus est numerus, erit currentis anni aureus numerus. Sic dato Christi anno 1654, numerus aureus erit 2.

Probl. VII. *Epactam dati anni invenire.*

Praxis. Supponitur semper esse inventus illius anni aureus numerus. Qui quidem numerus aureus vel est ternarius; vel multi simul ternarii præcisè, & tunc ipsi adde 20. summa dabit Epactam quæsitam, rejectis 30; ubicunque occurrerint. Sic anni 1651 numerus aureus est 18, qui numerus est multi ternarii præcisè. Quare additis 20. fiunt 38. unde subtrahendo 30, remanet numerus 8 pro Epacta. Alioquin si numerus aureus fuerit minor unitate, quàm ternarius, aut ternarii: adde illi 10. tum summa col-

collecta dabit Epactam. Si tamen rejeceris 30 ubi occurrerint : sicque anno 1654 Epacta est 12. Tertio denique si numerus aureus fuerit major unitate quàm ternarius, aut ternarii; ipse numerus aureus erit quæsitæ Epacta.

Probl. VII. *Reperire quando sit futurum novilunium dato mense.*

Praxis. Epactam anni currentis adde numero mensium à Martio inclusivè. Tum numerus inde productus, subtrahatur ex 30. Sin productum ex Epacta & numero mensium superavit 30; erit illud subtrahendum ex 60. Numerus residuus indicabit diem mensis in quo fiet novilunium. *Exemplum.* Quæritur quo die mensis Augusti anno 1651. futurum sit novilunium. Suppono Epactam illius anni esse 8. huic addo 6. qui est numerus mensium à Martio : fiuntque 14 ex collectione utriusque hujus numeri. Si ergo subtraxeris 14 ex 30. restabunt 16. unde statuas fore novilunium illius mensis die circiter 16.

Probl. IX. *Data die atatem Lunæ reperire.*

Praxis. Vbi ex præcedente problemate novilunium es assecutus, si data mensis dies posterior est novilunio, numera quor' dies inclusivè ab eo effluxerint; sin autem anterior est, pertinebit ad ultimas partes præcedentis. *Exemplum.* Si quæritur ætas Lunæ die 24 Augusti anni 1651. in quo reperi novilunium incidere in diem 16; dicam consequenter esse dierum 9. Si quæritur de octava die Augusti, dicam esse 22 Lunæ præcedentis ex hypothesi quodd illi attribuam 30 dies. Nam si ex 30 subtraxero dies numeratos à novilunio invento, & consequenter à fine illius Lunæ præcedentis, quos invenio esse 8: supererunt 22.

Alia

Alia quoque est vulgaris ista inveniendæ ætatis lunaris Methodus. Iunge simul tres illos numeros, nempe Epactam anni propriam; Numerum inensium inclusivè à Martio usque ad datum mensem: ac denique diem datam mensis illius. Si summa ex tribus illis numeris collecta, fuerit infra 30. ostendit ætatem Lunæ: sin fuerit supra 30; ex ea subtrahere 30, residuus numerus erit ætas Lunæ quæsita.

Notabis verò, quòd ubi quaritur de ætate Lunæ mense Ianuario, aut Martio; nihil esse addendum ad Epactam præter dies mensis. Mense autem Februario, & Aprili addenda est tantum unitas.

Not. 2. Hoc modo per Epactas nihil præcisè definiri posse, quia supponitur semper Luna esse 30 dierum, cum tamen subinde sit tantum 29. Quanquam non longè à rei veritate aberrant, sufficiuntque ad usum communem. Quinetiam maturo consilio hunc usum sequitur Ecclesia: cum enim, inquit Clavius, nullus Cyclus lunaris perfectè calculo astronomico respondere possit, præstat ut seriùs per Epactas demonstrentur novilunia, quàm ut aliquando suas sedes antevertant, ne aliquando Sacrosanctum Pascha vel ante Lunam xiv, vel in ipsa xiv cum hæreticis quartadecimanis celebretur. Monetque ipse Clavius, si conjunctionem luminarium habere velis, non tantum ex usu Ecclesiæ; sed etiam magis astronomicè, inventum per Epactam novilunium, tribuendum esse antecedenti diei; vel si lubet consule Tabulas Ephemeridum cœlestium.

Probl. X. *Cognitâ ætate Lunæ, ipsius locum in Zodiaco assignare.*

Suppono mihi esse notum Solis locum in Zodiaco. Puta, scio 31 Octobris Solem esse in 8 gradu Scorpii. Item suppono ætatem Lunæ mihi cognitam, esse v. g. dierum 16. Et consequenter decima sexta ante die simul conjunctam fuisse cum Sole sub 23 gradu Libræ. At suppono 3. Lunam una circulatione diurna peragrarè circiter 13 gradus Zodiaci, cum Sol vix uno gradu promoveatur. Quare si 16 illos dies multiplico per 13 gradus, productus numerus designabit quot jam gradibus distet à Sole, si tamen habeatur ratio graduum quos etiam eo tempore Sol obiit. Deinde cognitis gradibus iis quibus Luna recessit à Sole, infero consequenter, sub quo signo, & sub quo illius gradu existat; cum signa singula 30 gradus habeant.

Notabis etiam Lunam singulis diebus à Sole magis discedere tribus circiter horæ quadrantibus. Quamobrem si hodie Luna simul cum Sole orta est, cras non attinget Horizontem nisi tribus circiter post quadrantibus.

Probl. XI. *Reperire Lunam Paschalem dati anni.*

Praxis. Adi ad Calendarium Gregorianum, quo solum jam utitur Ecclesia Catholica: Tum ab 8 Martii usque ad 5 Aprilis, quære Epactam anni currentis; hæc ostendet tali die esse novilunium. Tum inde enumera 14 dies. Inventa autem decimaquarta die; quære illius anni litteram Dominicalem quæ proximè sequitur adinventam diem quartamdecimam; tum habebis Paschale festum.

Notabis autem, eas tantum Lunas quæ incipiunt ab 8 Martii, usque ad 5 Aprilis inclusivè, posse fieri Paschales; nec proinde posse Pascha citius contingere quam 22 Martii, cum scilicet Lunæ dies quattordecima incidit in 21 Martii, diesque postera est Dominica. At nequit etiam Pascha tardius esse, quam 25 Aprilis. Item consequenter etiam

Not. 2. Lunam Martiam nunquam fieri posse Paschalem: nam, ut supra aiebam, Luna illi tantum tribuitur mensi in quo finitur. Luna autem Paschalis finitur semper extra mensem Martium; unde consequens est ut Luna Martia nunquam possit esse Paschalis, aut Luna primi mensis secundum Iudæos, & Decretum Nicænum.

Probl. XII. *Dato diei aut noctis tempore, quam sit hora invenire.*

Hæc quæstio cum aliis ejusdem generis attinet maximè ad Chronologiam, cum sit de parte aliqua temporis designanda: nam quæ sunt de horis per Gnomonem designandis, explicantur in Gnomonica. Propositam verò quæstionem solves adhibito Astrolabio, in hunc modum: Ac primò quidem suppono tibi esse notam Solis elevationem supra horizontem *juxta 4. praxim Astronomicam*. Item & *juxta quintam*, gradum Zodiaci quem Sol, aut Luna occupat, ritè esse dispositum in circulo elevationis, seu in Almucantarath congruo. Atque his suppositis; illi gradui, seu parti Zodiaci applica Ostensorem secundum lineam fiduciæ; hæc in limbo designabit horam quæsitam in parte ortiva, si quæritur aliqua ex antemeridianis; contra autem in parte occidua, si quæritur aliqua ex pomeridianis.

Idem

Idem præstari potest per Stellam aliquam tibi notam, quæ in Aranea descripta fuerit, si inventa ipsius altitudine, seu elevatione supra horizontem, disponatur in idoneo Almucantarrath.

Nota hîc agere me tantum de horis æqualibus, seu Æquinoctialibus. Nam si indaganda est hora inæqualis, seu temporaria; lineam fiducia applica ad oppositam Solis partem, seu ad signum, & gradum in Zodiaco oppositum; pars Ostenforis inferior denotabit horam inæqualem.

Probl. XIII. *Solis ortum & occasum, & consequenter quantitatem diei artificialis invenire quovis anni tempore.*

Praxis. Beneficio Astrolabii. Inventam Solis partem, seu gradum colloca in Horizonte exortivo. Tum Ostenforem per illam Solis partem traducas; is in limbo horam quæsitam Solis ortivi indicabit. Quo etiam pacto Solis horam occidnam investigabis, si Zodiacum, seu partem illam Zodiaci in qua est Sol transferas ad Horizontem occiduum.

Ita si partem Solis cum Ostenfore disposueris ad lineam crepusculinam, habebis crepusculum datæ diei, tum matutinum, tum serotinum.

Praxis. Beneficio Globi Astronomici, aut Sphæra armillaris. Suppono 1. instrumentum astronomicè constitutum, ex duodecima inter praxes astronomicas. Suppono 2. habere te partem Zodiaci, seu eclipticæ in qua Sol existit. His suppositis; partem, seu gradum Solis adijunge ad circulum meridianum, simul apponendo indicem horarium supra horam meridianam. Deinde partem illam Zodiaci devolve ad Orientem, dum

dum Horizonti perfectè respondeat; tunc index horarius ostendet tibi qua hora Sol oriatur. Idem per proportionem efficies ad investigandam horam occasus.

Notandumque est inde te posse statuere de longitudine datæ diei, numerando horas interceptas inter initium, & finem; seu inter Ortum, & Occasum.

Probl. XIV. *De crepusculo tum matutino, tum serotino statuere.*

Praxis. Iam ostendi quemadmodum id possit præstari per Astrolabium: hîc agitur de Sphæra armillari, aut Globo. Quia igitur supponimus tunc esse crepusculi matutini initium, quando Sol pervenit ad 18 gradum infra Horizontem. Atque ita finire crepusculum serotinum, quando jam gradibus 18. descendit infra horizontem occiduum; habebis consequenter horam ejusmodi crepusculi, si partem Zodiaci in qua est Sol, infra horizontem demiseris gradibus 18: tunc enim index horarius indicabit tibi horam quæsitam. Scies autem Solem descendisse 18 gradibus infra horizontem, si partem oppositam elevaveris 18 gradibus supra horizontem, numerando gradus illos in Æquatore.

Probl. XV. *Scire quanam sit hora ubi vis gentium.*

Hoc facilè assequeris ope Globi Terrestris. Si primò tibi nota fuerit hora regionum illarum quæ sunt sub tuo meridiano: nam illum meridianum oportebit admove-re, & directè applicare ad meridianum immobilem tui instrumenti, apponendo indicem horarium ad talem horam v. g. tertiam. Tunc autem circum-

volvendo globum, meridianus immobilis designabit tibi regiones, quibus ea sit hora, quæ ostendetur in indice horario.

Notandumque est ad varia id genus problemata explicanda: primò, Terram quotidie lustrari à Sole, & singulos successivè meridianos ab ipso adiri, dum tandem perficiat diem 24 horarum. Quamobrem necesse est, ut singulis horis perlustret 15 meridianos; nam si numerus 360 dividitur per 24, dabit pro singulis horis 15. Supponendum præterea est, in ea omni regione esse meridiem, cujus in meridiano Sol versatur; & consequenter ad decimum quintum meridianum illum quem jam ante præterit, esse horam primam; ad alium, esse horam 2. ad alium, tertiam & sic de cæteris. Item, Solem easdem simul, & novas tum horas, tum anni tempestates efficere respectivè ad diversas mundi regiones. Vnde meritò quis posset asserere, nunc temporis esse quamlibet horam, & quamlibet anni tempestatem: atque ita singulas diei horas, Terram peragrarè semper, &c. Suppono denique homini sub eodem meridiano quiescenti, semper diem naturalem esse 24 horarum, quia tanto est opus temporis spatio, ut ad eundem meridianum Sol regrediatur. At

Not. 2. Quodd iter facienti in Orientem, dies sit minor quàm horarum 24: nam Sol priùs est futurus in eo meridiano, in quo ipsi occurrer, quam in illo unde discessit. Contra autem tibi iter facienti versùs Occidentem, major est futura dies quam horarum 24. Nam ante Sol attinget meridianum à quo recessisti, quàm ad te perveniat. Quamobrem

Notabis 3. Posse contingere ut duæ naves ex eodem portu solvèntes, altera quidem in Orientem,

tem, altera autem in Occidentem, in aliqua tandem mundi parte concurrant, unoque die toto inter sese diffideant: imò si supponamus hinc Petrum in Orientem proficisci; Paulum verò in Occidentem, qui universo orbe peragrato, per aliquot annos tandem ad Ioannem hic semper commorantem eadem redeant hebdomadâ; fieri poterit, ut si unusquisque retineat eandem numerandi temporis rationem, Ioannes quidem numeret diem Martis: Petrus autem diem Mercurii; & Paulus diem Lunæ. Deinde postridie Petrus habebit diem Iovis, Ioannes diem Mercurii, & Paulus diem Martis. Tum sequenti die, quando Petrus numerabit diem Veneris, Ioannes numerabit diem Iovis, & Paulus diem Mercurii, & sic de aliis; unde in eadem hebdomada respectivè ad tres illos homines, ter numerabitur dies Iovis.

Hinc etiam solvitur illud paradoxum, cum ajunt fieri posse ut duo fratres simul nati, simul obierint, quorum tamen alter plus vixerit: quia plures numeravit vitæ dies, &c.

METHODVS ET INSTITVTIO MATHEMATICÆ. GNOMONICA.

P R Æ F A T I O.

Non modo utilitatem, sed etiam iucunditatem haud mediocrem affert Horologiorum constructio, quibus hora designentur, distinguanturque inter se. At varia sunt Horologiorum species, quas facile prætermitto, ut agam tantum de Solaribus, cum procul dubio longè cæteris præstent, sintque Horologiorum omnium, atque horarum prima mensura. Vocantur etiam Græcè Sciotherica, ab umbra Solis quæ in singulas diei horas ope styli, seu Gnomonis infixi destinatur. Item Ars construendi Horologia istiusmodi appellatur Gnomonica, à Gnomone, seu Stylo, qui horarum omnium est veluti index; & Horologii Sciotherici pars maximè insignis. Hæc autem Ars nititur quidem principiis quæ Mathematicè falsa sunt, cum supponat Stylum in centro mundi; aut Terram esse instar puncti cuiusdam; sed nihilominus certissima est, cum illa Terra magnitudo, aut distantia à centro mundi nihili reputanda sit respectivè ad cælum, nec minùs infallibiliter designentur hora.

Tabulas reperies ad finem Tractatus de Sphæra Terrestri.

Mathematica,

H

ME

METHODVS

ET

INSTITVTIO

MATHEMATICÆ.

GNOMONICA.

CAP. I. *Varia species Horologiorum Solarium.*



Hæc sunt vel Mobilia, quæ gestari solent, ut Cylindrus; tum pixides instructæ acu magneticâ; vel Immobilia, id est, alicui certo loco affixa. Item, vel Regularia sunt, vel Irregularia. Regularia dicuntur ea quæ describuntur in plano disposito ad aliquam determinatam ex præcipuis mundi partibus, puta, vel directè ad Orientem, vel ad Occidentem, &c. Irregularia autem sunt ea, quæ ad illas mundi partes præcisè non convertuntur, sed potiùs ab iis declinant. Iam verò

Dico I. Ex Regularibus, primò est Horizontale. 2. Verticale ad meridiem. 3. Verticale ad Septentrionem. 4. Meridianum Orientale. 5. Meridianum Occidentale. 6. Æquinoctiale superius. 7. Æquinoctiale inferius. 8. Polare superius. 9. Polare inferius.

Horizontale, est illud quod Horizonti æquidistat.

Verticale, quod erigitur perpendicûlariter supra

pra Horizontem ; tenditque directè ad punctum verticale , & est parallelum circulo verticali primario. Duplexque est. Primò enim est verticale ad Boream , seu quod respicit Septentrionem. Alterum verò est Meridionale, quod respicit Meridiem.

Meridianum est illud quod æquidistat Meridiano circulo : duplexque in genus dividitur, primò in Orientale quod Solis ad ortum spectat. 2. Est Occidentale quod obvertitur Occidenti.

Æquinoctiale est quod æquidistat Æquatori mundi , similemque habere debet elevationem supra Horizontem. Aliudque est superius, quod supra describitur : aliud autem inferius , quod delineatur infra planum.

Polare est parallelum axi Mundi , & velut in eo jacet. Aliudque est superius , aliud verò inferius.

Dico I I. Irregularia sunt, aut declinans, aut inclinans. Declinans est quod æquidistat alicui circulo verticali , declinanti à verticali primario & propriè dicto : duplexque habet sub se genus. Primò enim aliud est quod declinat à meridie, vel in Ortum, vel in Occasum. Secundò aliud est quod declinat à Septentrione , vel in Ortum, vel in Occasum. Inclinans seu inclinatum est illud quod deficit à puncto verticali, inclinaturque ad Horizontem , quod ipsi non æquidistet.

Dico I I I. Ratione horarum dividuntur præterea in Astronomicum , Italicum, Babylo-
nicum, & Antiquum, seu Iudaicum.

Astronomicum æquales horas à meridie , ad mediam noctem ; tum à mediâ nocte, ad meridiem indicat ; estque in usu præcipuè tota fere in Europa.

Italicum horas æquales ab occasu, ad occasum demonstrat. Ita ut ex 24, ea dicatur prima, quæ est hora Solis Occidentis; nobisque appellaretur vel 6, vel 7, vel octava serotina: contra verò Babylonicum, horas æquales indicat ab ortu, usque ad sequentem ortum.

Antiquum, seu Iudaicum, ostendit horas inæquales, de quibus in Chronologia diximus. Agemus autem duntaxat de horologiis astronomicis; ac præcipuè de iis quæ regularia sunt. Cum inde satis cuilibet pateat aditus ad alia.

C A P. II. *Quænam in genere sint necessaria ad constructionem horologii Sciotherici.*

Dico I. Debet sciri elevatio poli, juxta quam statuere oportet de centro horarum, de altitudine styli, de ipsius horologii dispositione, aliis-ve id genus.

Item debet sciri methodus inveniendæ lineæ meridianæ, ut horologii descripti linea meridiana ritè constituatur sub meridiano dati loci. Quæ supra jam tradidimus in praxibus Astronomicis.

Item opus est normâ, & circino. Tum Quadrante astronomico rectè diviso in gradus 90. in quo etiam descripta sit linea horaria, & puncta horaria designata ad quindenos gradus. Cujusmodi videre est in tabula 4. Geometria fig. 5.

Dico II. Ad perficiendum ipsum horologium Sciothericum tria in genere necessaria sunt. Primò, horarum descriptio in dato plano. 2. Ratio styli; id est, qualis, & quanta esse debeat altitudo styli: ac tandem quo in loco debeat figi. 3 Denique applicatio & dispositio ipsius horologii jam perfecti.

Notandum verò est 1. In genere ad describendas horas præsupponi communiter duas lineas rectas sese ad angulos rectos interfecantes instar crucis cujusdam, quarum altera est linea meridiana, seu linea horæ duodecimæ. Altera verò est occulta, in transversum illam secans orthogonaliter, quàm vulgò appellant lineam horarum, quia in ea designantur puncta horaria; vel lineam æquinoctialem, quia repræsentat circulum æquinoctialem, qui est prima regula horarum omnium.

Notabis enim 2. Horas omnes saltem astronomicas, seu æquales, distingui inter se proportionaliter intervallo 15. graduum, per ordinem ad circulum Æquinoctialem, quia spatium unius hujusmodi horæ Sol decurrit 15. Meridianos per quindecim Æquatoris gradus transeuntes. Vnde & hora astronomica vulgò sic definitur: Est spatium temporis quo Sol decurrit 15 meridianos; vel si lubet, quo 15 gradus Æquatoris ascendunt supra Horizontem; ut jam monui.

Not. 3. Ad debitam applicationem & dispositionem horologii esse opus libella, aut perpendiculo; ut examinetur, an sit vel Horizonti parallelum; an verticale perpendiculariter directum, &c.

CAP. III. *Horologium Horizontale construere.*

EX dictis superiori in capite, tria hîc præcipuè præstanda sunt. Primum, puncta horaria designare oportet. 2. Centrum horarum reperire, à quo per puncta jam inventa ducantur circuli, seu lineæ horarum. 3. Denique locum styli, & ipsius altitudinem præscribere.

Hæc igitur ut distinctis problematis perficiam ;
esto

Probl. I. *Puncta horaria designare.*

Statue tibi ob oculos figuram 1. tabule 7. Ac primò quidem describe in crucem duas lineas , nimirum lineam *a b* , quæ erit linea horæ 12 ; tum lineam *c, d* , occultam , quæ erit Æquinoctialis , & postea delenda , quando perfectum fuerit horologium.

2. Ex Instrumento , id est , ex Quadrante astronomico, vel semicirculo ad id comparato, transferantur ope circini puncta horaria in istam lineam Æquinoctialem. Nempe illa puncta per idoneam extensionem circini petuntur ex Instrumento, figendo crus alterum illius circini in concursu lineæ meridianæ , & æquinoctialis ; alterum extendendo ad spatia horæ quæsitæ. Tum servata illa extensione , quæsitæ puncta designantur in horologio, crus idem circini figendo pariter in concursu lineæ Æquinoctialis, & meridianæ ipsius horologii.

Notandumque est , Horas matutinas describi in ea parte quæ scribentis dextram spectat ; horas autem serotinas in opposita. Item

Not. 2. In ista linea Æquinoctiali reperiri tantum ex matutinis 11, 10, 9, 8, & 7. Ex serotinis 1, 2, 3, 4, 5.

Notabis enim 3. Quodd postea reperto horarum centro , aliarum facilis est descriptio , ut mox ostendam.

Probl. II. *Centrum horologii , seu horarum invenire.*

Hic maximè habenda est ratio elevationis polaris ; neque enim quodlibet hujusmodi horo-

horologium, quolibet in loco horas indicabit, sed tantum sub certa poli elevatione, quæ propria est regionis in qua usui esse debet.

Suppono igitur hac in regione polum elevari 49 gradibus. At quæro complementum arcus 49 graduum, usque ad 90. & video esse 41. Quare colloco pedem circini in centro instrumenti, tum inde pedem alterum extendo ad lineam Æquinoctialem descriptam in eo instrumento, qua parte secatur per radium gradus 41. numerando à linea horæ duodecimæ: illam verò circini extensionem transfero in horologium figendo crus alterum circini in concursu lineæ meridianæ, & Æquinoctialis, nempe in *e*. alterum verò defigo in parte lineæ meridianæ, puta in *f*, & dico illud punctum esse centrum horarum: Ex eo enim, & per singula puncta in linea Æquinoctiali jam designata, ducentur lineæ omnes, quas alii vocant arcus horarum. Quod videre est in tabula 6. fig. 2.

At præterea primò, per centrum illud horarum ducetur linea parallela Æquinoctiali, quæ erit linea horæ sextæ, tum matutinæ, tum vespertinæ.

Item, lineæ horæ 4, & 5, serotinæ producentur in superiorem partem ultra centrum horarum pro hora 4 & 5, matutina. Quemadmodum & lineæ horæ 7, & 8 matutinæ ultra etiam producentur, ad designandam horam 7, & 8, serotinam.

Sicque est absoluta horologii descriptio, cui figuram quancunque volueris affinges; & describes characteres horarum ad singularum linearum extremitates. Tum linea æquinoctialis *a, b*, deleri debet.

Probl. III. Locum, & altitudinem
styli exponere.

Non modò centrum horarum, sed etiam in hujusmodi saltem horologiis, locus styli est in linea meridiana.

Notabis autem hunc stylum communiter esse triangularem, cujus basis jaceat supra lineam meridianam, & desinat in centro horarum; porrigitur verò in altitudinem versùs lineam æquinoctialem. Vt observare est in *figura 1. tabula 7.* ad quam oportet inodò regredi.

Not. 2. Stylum hunc non habere determinatam altitudinem, nisi habita ratione loci in quo figitur: nam posita altera parte basis illius Trianguli in centro horarum, putà in *f*, quò longior erit hæc basis, unde consequenter pars altera hujus lateris magis distet ab hoc centro, ed debebit esse major styli altitudo, majorque fiet totus triangulus. Ita major est triangulus *o, n, f*, vel *m, l, f*, vel *g, e, f*, quam *k, h, f*. Quinetiam ea debet esse hujus styli altitudo, ut latus *f, o*, quod est subtensum angulo recto *n* vel *l*, vel *h*; congruat cum axe mundi, & directè ad polum tendat, ideoque etiam vocatur axis, ex eo quòd congruat cum axe mundi: & verò latus illud solùm, seu umbra ab illo projecta, horas designat. Vt igitur habeatur ejusmodi altitudo idonea,

Not. 3. Numerari oportere gradus altitudinis polaris, & adeundum esse Instrumentum, figendo crus circini in centro ipsius, deinde alterum extendendo ad lineam æquinoctialem, qua parte secatur à radio gradus, qui respondet numero graduum elevationis polaris. *Exempli causa*, quia supponimus in hac regione polum esse

esse elevatum 49 gradibus, crus circini debet extendi ad partem quæ secatur per radiu gradus 49; numerando à linea horæ 12. Illa autem circini extensio ubi investigata est, transferri debet in horologium, hoc pacto. Crus alterum circini sic aperti fige in concursu lineæ æquinoctialis, & meridianæ; puta in *e*, tum altero crure designa in ipsa lineæ æquinoctiali punctum *g*, ac tandem ex centro horarum *f*, per illud punctum *g*, ducas lineam *f, k, g, m, o*, in infinitum; hæc dabit styli quæsitam altitudinem. Nam si basis fuerit tantum *f, h*, stylus totus, ejusque altitudo erit *f, h, k*, alioquin si basis illa extendatur usque ad *e*, stylus erit *f, e, g*. Si usque ad *l*, stylus erit *f, l, m*, si usque ad *n*, stylus erit *f, n, o*, & sic in infinitum.

Notandumque est 4. Angulum quem axis ille efficit ad centrum horarum in horologio horizontali, habere semper gradus elevationis polaris; & consequenter in nostra hypothese, angulum hunc esse gr. 49.

Not. 5. Si loco styli triangularis apponitur tantum stylus rectus, qualis foret aut *h, k*; aut *e, g*; aut *l, m*, aut *n, o*, illius tantum extremitas per umbram à se projectam horas ostenderet.

Notabis autem sic perfectum horizontale ita applicari & disponi suo in loco debere; primum ut sit parallelum horizonti: quod beneficio libellæ probabitur. Quod etiam aliqui probant injecto argento vivo; si enim planum aliquantisper inclinaverit, facile illud argentum vivum eam in partem dilabetur. 2. linea horæ 12 debet perfecte disponi intra meridianum ipsius loci. Quemadmodum verò habeatur ille meridianus, jam supra exposui.

CAP. IV. *Alia methodo describere horizontale.*

ET si præcedens methodus nulli Horographo debeat esse incognita, quia est veluti basis & fundamentum Horographiæ totius, per propria & manifesta principia praxis illius: aliæ tamen occurrunt expeditiores, quarum usus non parum habet utilitatis, & jucunditatis.

Prima est beneficio Normæ, quam nostrates Squadram appellant, cui gradus Quadrantis astronomici inscriptos esse supponimus, cum centro idoneo ad oppositum latus; Qualem Normam vides in *tab. 5. fig. ultima*. Hac igitur Norma ritè disposita infra lineam æquinoctialem, & juxta meridianam, ducto filo ex centro per gradus quindenos in Norma designatos, notantur puncta horaria in linea æquinoctiali.

Deinde posito centro in concursu meridianæ & æquinoctialis lineæ, circumducitur, dum attingat meridianum, secundum gradum complementi elevationis polaris; ut habeatur centrum horarum.

Ac denique iterum applicata Norma juxta meridianam, & longitudinem Æquinoctialis, notatur in Æquinoctiali punctum ad gradum elevationis polaris, ut ex eo per centrum horarum ducatur axis, unde habeatur altitudo styli.

Secunda methodus est per Quadrantem astronomicum; quem etiam vocant Arcum, seu Quartam Æquinoctialem; quia supponitur habere divisionem per gradus quindenos. Qualem observare est in *tabula 7. fig. 2*. Vides autem quemadmodum disponi debeat juxta lineam meridianam sub Æquinoctiali; Item quemadmodum filo ex centro illius ducto per quin-

quindenos gradus, notentur puncta horaria in linea *Æquinoctiali*.

At postea descripto simili arcu ex concursu lineæ meridianæ, & æquinoctialis in *e*, ex puncto quo tangit lineam æquinoctialem, designa in illo arcu gradum elevationis, puta 49. Deinde per illud punctum ex centro *e* ducas lineam rectam; per quam, ad sectionem illius arcus ducatur orthogonaliter alia recta utrinque in infinitum, hæc in linea meridiana designabit centrum horarum; eritque etiam instar axis pro determinanda styli altitudine.

C A P. V. *Eodem circini intervallo describere horizontale.*

HOc loco subjiçienda est *figura 1. tabula 6.* Iuxta quam, descriptis in crucem ad angulos rectos duabus lineis, nempe meridiana, & *Æquinoctiali*. Tum aperto ad libitum circino, describe circulum occultum ex communi sectione duplicis illius lineæ. Iam circulus ille in sectione lineæ æquinoctialis designat una ex parte punctum horæ 3. ex altera punctum horæ 9.

Deinde 1. Ex puncto *f* eodem semper circini intervallo, designa in circumferentiâ circuli hinc, & inde puncta *l*, & *p*.

2. Ex puncto *l*, designa punctum *m*, in linea æquinoctiali, pro hora 4. tum ex isto puncto horæ 4, bis replicato circino juxta hanc lineam æquinoctialem, notabis punctum *n*, pro hora 5. Deinde ex isto puncto *n* quater replicato circino usque ad *o* notabis horam 11.

3. Idem præstabis ex parte opposita. Nam primò quidem ex puncto *p*, designabis punctum *q* in linea æquinoctiali, pro hora 8. tum ex isto puncto, bis replicato circino, usque ad *r*,

notabis punctum horæ. 7. Deinde ex isto puncto horæ 7, quater replicato circino usque ad 5. notabis punctum horæ 1. Supponitur autem hora 12 in intersectione lineæ meridianæ & æquinoctialis.

Superfunt igitur solùm investiganda puncta horæ 2. Vna ex parte; & 10, ex altera. Sic age; Ex puncto *h* ducas rectam occultam una ex parte ad punctum *l*; sectio in *t*. designabit horam 2. Altera verò ex parte, recta occulta ex *h* ad *p*, designabit similiter horam 10 in sectione æquinoctialis, ad punctum *u*.

Denique tandem pro centro horarum, & axe inveniendò; quære in arcu *f*. i. gradus elevationis polaris ex puncto *i*. Item per gradum elevationis polaris ducatur recta ex *e* centro circuli. Ac tandem per illam rectam ducatur orthogonaliter alia recta *z, p, q*. Hæc erit pro determinanda styli altitudine; aliunde verò centrum horarum designabit in sectione lineæ meridianæ.

C A P. VI. *Horologium verticale construere.*

Eodem modo in pariete regulari describitur, & styli genus idem habet, ac Horizontale. Differunt tamen non tantùm situ, sed etiam quòd in Verticali pro inveniendò centro horarum, accipiantur gradus elevationis polaris, & pro altitudine styli sumantur tantùm gradus complementi. Quæ duo contrario modo se habent in Horizontali. Cùm autem hîc distinguendum sit inter Verticale ad Meridiem, & Verticale ad Septentrionem;

Dico I. Verticale ad meridiem centrum horarum, & stylum habet sursum; potestque indicare horas à sextâ matutinâ usque ad 6. serotinam. At

Dico

Dico I I. Verticale ad Septentrionem est quasi Meridionale inversum, nam habet centrum horarum deorsum, paucasque admodum horas indicat. Nam in Gallia quidem horas tantum 4 mane ostendit; à quartâ, usque ad 8. Quomodo & post meridiem potest tantum à quartâ usque ad octavam horas indicare.

CAP. VII. *Construere Meridianum, sive ad Orientem, sive ad Occidentem.*

Horum Schema est in tabula 6. laterculo 4. Atque ut de Orientali primùm agam,

1. Ducatur linea *a. b.* Horizontalis, seu parallela Horizonti.

2. Ex *a* quolibet circini intervallo fiat occultus circulus incipiendo à linea horizontali, putà ex *d.* fiat autem ad partem dextram, ubi describendum est Orientale.

3. Quare, aut finge in Instrumento similem arcum, id est, ex eodem circini intervallo; tpm in illo arcu abscinde complementum elevationis polaris, seu elevationem Æquatoris; illudque intervallum transfer ad descriptum circulum ex puncto *d* & iste arcus abscindatur *v. g.* in puncto *e.*

4. Per illud punctum *e* & per extremitatem lineæ Horizontalis *a b.* ducatur recta *e. a.* quæ erit instar Æquinoctialis, quodd in ea designanda sint puncta horaria. Sed antequam inquiras de punctis horariis, describe lineam alteram illi æquinoctiali parallelam.

5. Circa superiorem æquinoctialis lineæ partem ad libitum designa punctum horæ 6. item & simile punctum in opposita parallela, ut inter utrumque istud punctum ad angulos rectos fiat linea horæ 6.

Notandum autem est horam hanc 6. Esse principium horarum in hoc genere horologii, & ab ea desumi earum intervalla. Item in ea esse locum styli, qui debet figi in parte superiori lineæ istius, id est, qua subit intra horizontalem.

6. Ex horologio Horizontali, vel ex Instrumento huc transfer intervalla Horarum. Ac primò quidem, distantia horæ primæ à duodecima quæ reperitur in horizontali, seu in Instrumento, erit hoc loco intervallum horæ 5. ex una parte, tum horæ 7 ex altera. Item distantia horæ 12. à 2, designabit horam 8. Item, distantia ab hora 3, erit intervallum horæ 9, quo similiter distabit à lineæ horæ 6. hujus horologii, & sic de distantia horæ 5. pro undecima.

Notabis autem eadem puncta horaria quæ notantur in lineæ æquinoctiali, debere quoque & notari in parallela ipsi opposita, ut commodè possint duci à puncto ad punctum lineæ horariæ parallelæ.

Not. 2. Primam ferè horam Solis quæ in istiusmodi horologio ostenditur esse 5. quam aliæ consequuntur usque ad undecimam inclusivè. Neque enim hîc 12 notari potest, cum horologium supponatur esse intra circulum meridianum. Item

Not. 3. Stylum in hoc Horologio esse rectum indicem determinatæ altitudinis, petiturque ab intervallo quod reperitur inter punctum horæ 6. & punctum horæ 9.

Iam verò quod spectat Occidentale. Non multum differt ab Orientali, nisi quodd arcus occultus ad designandum punctum lineæ æquinoctialis, describitur ex parte sinistra.

Item horæ serotinæ in Occidentali sunt descri-

scribendæ, incipiendo à prima usque ad 7 inclusivè, cum similibus intervallis ac in Orientali. At prima est in loco inferiori, quam aliæ suo ordine consequuntur. Item hora 6. est locus styli perinde ac in Orientali, habetque eandem altitudinem.

CAP. VIII. *Æquinoctiale construere.*

Sic vocatur, quia imitatur circulum Æquinoctialem in 24 partes æquales divisum, quæ singulæ sint graduum 15. pro singulis horis. Item quia debet istud Horologium ita disponi, ut servet eandem elevationem supra Horizontem, quam habet Æquator mundi pro dato loco.

Descriptio illius facilis est, & universalis pro quacunque mundi parte, & poli elevatione. Nam ut videre est *in tab. 6. laterculo 3.*

Primò sunt ducendæ lineæ duæ ad angulos rectos, quarum altera *a. b.* erit meridiana; altera autem *c. d.* erit linea horæ 6. tam matutinae, quàm serotinae.

2. Ex communi sectione hujus utriusque lineæ fiat circulus ad libitum in 24 partes æquales dividendus; nam in istiusmodi horologio æqualia sunt horarum omnium, & similia prorsus intervalla.

Notandumque est in Æquinoctiali superiori horas matutinas scribi ad dextram; serotinas autem ad sinistram. Quod contra est in inferiori.

Item nobis usui tantùm esse superius, quando Sol est in signis Borealibus. Inferius autem, quando est in Australibus, paucioresque horas ostendit quàm superius.

Not. 2. Habere stylum rectum, eumque in centro

centro defixum perpendiculariter; estque instar axis, seu intra Mundi axem, non tamen cum aliqua determinata longitudine, sed potius ad libitum.

Not. 3. Vulgò etiam Æquinoctiale ita posse fingi in Globo, ut horas ostendat sine stylo, sed tantum per extremitatem umbræ successivè in adversam partem recedentis, pro continuo accessu irradiationis Solaris. At eum in finem oportet horas esse alio ordine descriptas; ut satis patet consideranti.

C A P. I X. Polare construere.

Est parallelum axi mundi, & in eo quasi jacet, ut jam dixi. Quare tot gradibus debet esse elevatum supra planum horizontale, quot polus mundi. Quod inferius est quatuor ferè horas tantum habet in usu per totam Galliam, nempe ad dextrum latus matutinas 4, & 5. ad sinistrum autem serotinas 7, & 8. At superius ostendit horas à 7 matutina usque ad 5. serotinam inclusivè; non autem 6. quia Sol hora 6. est parallelus ipsi horologio, feritque tantum ipsius latus. Sic autem describitur;

Primò ex more solito ducantur linea meridiana *a. b.* tum æquinoctialis *c. d.* sese in crucem ad angulos rectos interfecantes.

2. Fiant utrinque ad hanc æquinoctialem duæ parallelæ in quacunque distantia.

3. In lineam æquinoctialem transferantur puncta horaria ex instrumento, ea methodo quâ supra dictum est *cap. 6.* pro Orientali & Occidentali.

4. Per puncta illa ducantur lineæ horarum parallelæ ad invicem. Quod quidem ut commodè

modè fiat, eadem puncta notentur in iis lineis quæ sunt parallelæ æquinoctiali.

5. Gnomon, seu stylus est in linea meridiana rectus perpendiculariter, habetque determinatam altitudinem juxta distantiam lineæ meridianæ ab hora 3.

Hujusmodi horologii schema est in tab. 6, laterculo 6.

Hactenus de regularibus horologiis. Quæ tamen accipienda non sunt pro Sphæra recta, aut verticali. Nam in Sphæra recta quæ Horizontalia sunt, non differunt à nostris polaribus Sphærae obliquæ. Item in Sphæra recta quæ verticalia sunt, non differunt à nostris æquinoctialibus. Meridiana habent nostris similia, nisi quodd in iis linea æquinoctialis est perpendicularis ad horizontem. Quæ autem apud nos sunt Polaria, ipsis sunt Horizontalia. At in Sphæra Verticali habent æquinoctiale pro horizontali.

C A P. X. De horologiis Irregularibus & Declinantibus.

Eorum naturam & species initio jam exposui. Hic tantum est tradenda praxis tum investigandæ declinationis, tum construendi horologii declinantis.

Dico igitur 1. Declinatio plani facile intelligi potest beneficio pixidis ac magneticæ instructæ. Vfusque ille est satis familiaris. Præterea verò accuratior est methodus, si semicirculum in gradus divisum ad planum ut decet applicueris, posito ad ejus centrum gnomone. Nam horâ meridianâ videbis quem gradum abscindat umbra, & quam in partem projiciatur, ut statuas de specie & quantitate illius declinationis. Atque his præterminis;

Dico

Dico I I. Vt sine alia arte, quolibet in plano verticali horologium construas; Fige in eo ad angulos rectos rectum aliquem stylum cuius-
cunque magnitudinis.

2. Vbi erit hora meridiana, extremitatem umbræ ab eo projectæ, puncto designa. Tum ad punctum illud beneficio perpendiculari excita perpendicularem. Hæc erit linea meridiana. Deinde

3. Vbi erit commodum, vel ante, vel post meridiem, & ex aliquo Horologio compertam habebis horam aliquam, extremitatem umbræ tunc projectæ, puncto notabis, sicque ages dum assecutus fueris puncta horarum omnium quæ in dato plano describi possunt.

At dimisso opere ad aliquot dies, vel hebdomadas, pro tuo libito; illud postmodum quacunque ex illis horis repete, tum videbis extremitatem umbræ distare aliquo spatio, à puncto ejusdem horæ aliquot ante diebus, vel hebdomadis notato. Per hæc duo puncta ducas lineam rectam in infinitum: hæc secabit meridianam initio depictam: sectio autem ejusmodi est centrum horologii; à quo describendæ sunt reliquæ horarum lineæ per alia puncta. Perfectumque erit horologium.

C A P. XI. *Communis methodus construendi horologii declinantis,*

V *Timur* Quadrante æquinoctiali de quo jam dictum est, statuiturque exemplum in *fig. ultima tab. 7.* Sed prius supponendum est semper in hoc negotio qualis sit declinatio. Id est, an sit declinatio à Meridie, aut à Septentrione: an ad Ortum, vel ad Occasum. Præterea quanta sit, id est, quot gradibus fiat declinatio.

clinatio. In nostra figura est declinatio à meri-
die in Ortum. Servaturque hæc praxis.

1. Scribenda est linea horizontalis *a. b.*

2. Ducenda est perpendicularis occulta *c. d.*

3. Figere oportet ad angulos rectos stylum
in intersectione duarum ejusmodi linearum, ad
punctum *e.*

4. Longitudinem styli designare in linea *c. d.*
ad punctum *f.*

5. Disponere instrumentum ad lineam *c. d.*
centro ejus applicato ad punctum *f.*, debetque
esse obversum ad partem declinantem, nempe
ad partem Orientalem, si declinatio est in Or-
tum; contra autem ad partem Occidentalem, si
declinatio est ad Occasum.

6. Numerare gradus declinationis à puncto
g. *exempli causa*, ad punctum *h.* Deinde à cen-
tro instrumenti, in quo designata est styli extre-
mitas, ducere lineam per punctum *h.* usque ad
horizontalem in *i.*

7. Per punctum *i.* traducere perpendicularem
l. m. quæ futura est linea meridiana.

8. Ad investigandum horologii centrum,
longitudo lineæ *f. i.* designanda est in linea ho-
rizontali à puncto *i.* alterutram in partem, puta
in partem *n.* ad punctum *n.*, quo quidem in pun-
cto disponitur centrum instrumenti, latere il-
lius jacente supra lineam Horizontalem. Dein-
de à linea Horizontali ex puncto *o.* numerare
gradus elevationis polaris, quæ *verbi gratia*, ab-
scindat gradum *p.* unde à puncto *n.* per punctum
p. ducatur in infinitum occulta *n. p. l.* quæ in
sectione lineæ meridianæ denotet punctum *l.*,
pro centro horarum.

9. Ex centro horarum *l.* delineare occultam
l. q. traductam per locum styli *e.*

10. Su-

10. Supra hanc lineam l , q . ad intersectionem in puncto e . excitare perpendicularem $r. e$. juxta longitudinem styli.

11. Ex centro l . ad punctum r . ducere occultam $l. r$.

12. In puncto r . lineæ $l. r$. excitare perpendicularem, quæ lineam $l. q$. secat in puncto f .

13. In puncto f erigere perpendicularem: seu lineam rectam $t. v$. per punctum f traducere ad angulos rectos; hæcque futura est linea æquinoctialis in qua potentur puncta horaria.

14. Longitudinem lineæ $r. f$. designare à puncto f . usque ad punctum x . in linea $l. q$. Deinde à puncto x rectam ducere ad intersectionem lineæ meridianæ, & æquinoctialis in puncto y .

15. In puncto x disponere centrum instrumenti, latere illius jacente supra longitudinem lineæ $x. y$,

16. Ex centro Instrumenti per gradus quindenos ducere lineas occultas, quæ lineam æquinoctialem secabunt, & in ea denotabunt puncta horæ 12. 11. 10. 9. 8. 7. 6.

17. Si ea est plani ratio ut plures horas capere possit, sive matutinas, sive serotinas, habita ratione declinationis; erit mutandus Instrumenti situs. Quare ut habeantur horæ ante 6, invertite instrumentum, ita ut centrum ad idem punctum x , & latus, ad occultam quæ designat punctum sextæ, dispositum servet, tunc per quindenos gradus notabis in linea æquinoctiali quot libuerit puncta alia horaria, puta puncta horæ 5. & 4.

18. Ut habeantur aliæ horæ pomeridianæ, sic invertenda est dispositio quam habet Instrumentum in figura, ut sit infra lineam $x. y$.
eodem

eodem latere applicato juxta illam lineam $x. y.$ uno verbo Instrumentum est duntaxat vertendum circa lineam $x. y.$ ut infra illam existat. Quo facto ducetur primum linea occulta fecans æquinoctialem pro hora 1, & sic de aliis, spatium graduum quindenorum observando.

19. Ac tandem deletis occultis lineis, ex centro horologii erunt describendæ horarum lineæ per assignata puncta horaria.

C A P. XII. *Horam noctu, ad radios lunares deprehendere.*

Suppono 1. Horizontale Solare, vel fixum, vel immobile; cujusmodi vulgò gestari à nobis solet.

Suppono 2. Adjunctum esse horologium lunare, quod vocant, constructum ex duobus saltem circulis concentricis; in quorum altero descripti sunt dies ætatis lunaris, appposito globulo ad numerum 30. in altero esse horas 12 hinc atque inde descriptas.

Suppono 3. Tibi esse notam Lunæ ætatem, vel per Epactam, vel quacunque aliâ methodo. His igitur suppositis sic age. Beneficio solaris horologii appositi ad radios lunares, eo modo quo solet aptari solaribus, vide quam horam designet umbra lunaris. *Exempli causa*, designet 8.

Deinde globulum dispone ad ejusmodi horam descriptam in circulo horario. Ac denique attende ad numerum ætatis lunaris; iste enim tibi indicabit horam quæsitam. Ut si fuerit dies Lunæ 12. designabit tibi horam circiter 5. cum media.

CAP. XIII. *Ad Horologium Lunare, periodicos motus maris exponere.*

VT si velis intelligere qua hora futurus sit major æstus maris, seu, quod vocant, plenum mare, dato in loco, *exempli causa*, Rupella:

Sciendum est primò, quâ horâ contingat tali in loco diebus plenilunii, quod satis docet experientia, potestque addisci ab incolis. Hac observatione supposita; globulum affixum rotæ mobili dierum lunarium dispone ad horam illam in qua contingunt ejusmodi æstus tali in loco, temporibus plenilunii, puta ad horam 10. Deinde scias ætatem Lunæ pro data die, *verbi causa*, sit nona dies Lunæ. Tunc vide cuinam horæ sit oppositus numerus ille 9. ætatis lunaris, & ostenderetur id quod optas.

METHODVS
ET
INSTITVTIO
MATHEMATICÆ.
SPHÆRA TERRESTRIS.
PRÆFATIO.

Quæ præsupponi debent de gravitate
Terrestri.

Elementis, ac rebus elementaribus innata
sunt potentia motrices, unde ad locum sibi
debitum, ac naturalem tendant, & in eo
firmentur. Ita gravitas Terræ est principium unde
movetur deorsum infra omnia alia elementa, aut
saltem nititur deorsum, ubi fuerit supra levius se,
premitque in ipsum, ac tandem proprio in loco im-
mota conquiescit.

Dico autem I. Tres illi sunt effectus gravitatis,
nempe motus deorsum: tum 2. gravitatio, & ni-
sus contra levius infra positum; ac demùm quies
proprio in loco. Hac patent manifestâ experienciâ;
supponunturque ex physica.

Notandum verò est, in corpore gravi præter
centrum magnitudinis (à quo scilicet partes reli-
quæ in suo genere aquè distant) esse & aliud quod
vocant Centrum gravitatis, in quo tota vis gra-
vitatis per universam magnitudinem diffusa uni-
tur; aut in quo etiam omnes alia partes aequipon-
derant; item & in quo solum per seipsum quiescit.
ubi

ubi suspenditur. Quæ omnia patent ipsâ experientia.

Notabis autem 2. Hac arte reperiri centrum gravitatis. Appende una ex parte corpus grave ut in fig. 8. tabulæ 8. Simulque ex loco suspensionis cadat perpendiculum, & observetur linea quam in eo designat: tum alia ex parte iterum cum eodem perpendiculo suspendatur: punctum illud in quo secabitur linea præcedens, est centrum gravitatis.

Notandumque est 3. Non semper idem esse centrum magnitudinis, & gravitatis: semperque illud contingit, quoties in illa magnitudine partes aliquæ sunt majoris gravitatis, quàm aliæ.

Dico II. Motus naturalis gravium per se non fit nisi secundum lineam rectam, ductam à centro mundi, per illud centrum gravitatis usque ad punctum cœli directà quasi tendentem; & vocari solet linea directionis. Neque res ulla gravitate prædicta quiescere, aut rectà stare potest, nisi servando illam lineam directionis; ut ostenditur in fig. 5. ejusdem tab. 8. Probaturque experientia.

Notandumque est ejusmodi lineas directionis undequaque ex centro mundi per superficiem terræ directà tendere ad puncta cœli diversa, ut patet in fig. 2. eosque homines rectos consistere, qui lineam ejusmodi servant quibuscunque tandem in Terra partibus, etiam diametraliter oppositis, sint constituti. Sic juxta eandem fig. 2. recti starent, positi in linea, vel a, vel b, vel c, vel e, vel f, &c. Sic in fig. 5. stant recti homines a, b, tum c, d, & e, f. Quod etiam observare est in fig. 6. tabulæ 5. quò spectat commune illud dictum ex Poëta; Cœlum undique sursum est, cui tamen rei non parum repugnat imaginatio. Quare

Not. 2. Graviter eos falli qui putant homines
supra,

supra, & infra positos ut in fig. 4. tab. 8. stare intra lineas parallelas; aut motus naturales rerum gravium, sic fieri per lineas parallelas; cum secus omnino contingat. Ita in fig. 3. perpendiculara ex diversis locis liberè descendunt, concurrunt tandem ad centrum Mundi. Nec possunt parietes, quanvis ad perpendicularum constructi; non plus distare à se invicem secundum partes superiores, quam secundum inferiores; quin etiam concurrerent omnino ad centrum Mundi, si infra semper demitterentur, quanvis in Terræ superficie 1000 leucis à se invicem distarent, ut in fig. 5.

Dixi motus naturales rerum gravium, per se fieri secundum ejusmodi lineam directionis; etsi per accidens fieri possint per lineas obliquas, & laterales, si quid obstitit: ut quando lapis, aut aqua per locum declivem prolabitur. Ratio est, quia ejusmodi linea directionis est omnium brevissima inter eas quæ ad Mundi centrum tendunt; Natura autem in omnibus sequitur viam brevissimam, cum nihil faciat frustra. At linea recta est omnium brevissima ex iis quæ ducuntur à puncto, ad punctum oppositum. Item

Dixi nos rectà consistere tunc tantum quando servamus illam directionis lineam: Quamobrem qui casuri sunt, naturali instinctu porrigunt brachium in partem contrariam, ut æquilibrium & lineam directionis servant, siquidem ut postea ostendam, brachium extensum plus ponderat, quam contractum. Item, hanc etiam ob causam grallatores perpetuò sese movere debent, ut lineam directionis quasi per fulcrum traductam conservent. Item, præterea senes gibbosi idcirco genua antrorsum valde incurvant, ut cum gibbo æquipondium servant, ac lineam directionis per centrum sive gravitatis productam. Ita similem ob causam ubi sedentes volu-

mus surgere, crura retrorsum, antrorsum verò caput & pedes inclinamus. Ita ædificia quæ multum inclinantur, non ideo tamen cadunt, modo lineam directionis per centrum sue gravitatis, ac basin traductam servant, ut narratur de Turri Bononiensi quæ ferè à 600 annis cum valde sit inclinata, non tamen cadit.

Dico III. Quam machina vim habent ad libranda, aut tollenda pondera, seu corpora gravia, tota illa petitur ex natura motus circularis. Nempe certum est experientiâ, partes illas diametri majorem habere in se, & majorem efficere motum, quâ proportionè à centro magis distant. Quo pacto potentia motrix beneficio alicujus machina plus potest, quàm si sola foret. Sic rotis quò majores sunt, eò graviora tolluntur pondera. Sic & Vectis beneficio, inquiebat ille, universa Terra moles, vel à debili potentia tolleretur, si daretur punctum extra Terram, quo firmari posset. Sed

Notabis Vectem, Gracis mochlium, esse paulum grandiore, cui subjicitur fulcrum quo sustinetur, & supra quod, tanquam supra axem moveatur, ut in tabula 8 figur. 10, & 11. Fulcrum illud vulgò hypomochlium vocant. Duplexque est genus Vectis, alter enim est in quo pondus levandum disponitur ad extremitatem ultra hypomochlium. ut in fig. 11. Alter autem habet hypomochlium in extremitate, & pondus citra hypomochlium ut in fig. 10.

Not. 2. Ad Vectem, & consequenter ad motum circularem, alias machinas revocari. Sic Temmo seu Gubernaculum quo naves inflectuntur, habet locum Vectis, aqua est instar hypomochlii, & navis tanquam pondus motum. Quod per proportionem de remis est existimandum. Ita etiam ma-
liss

lus in navi est instar Vēlis illius qui pertinet ad secundum genus, fundus navis quem premit, est velut hypomochlium. Quanquam alii putant sic à vento navim deferri per modum tractionis, aut pulsionis. At etiam ex his patet quid dicendum sit de forcipe, in quo quasi duo Vētes communi hypomochlio connectuntur. Item, quid de Tollenone, quid de cochleis, ceterisque id genus instrumentis, circa quæ versatur facultas quam Mechanicam appellant. Ut nihil dicam de cunso, cujus tanta vis est adhibito impetu ad dividenda ligna. Vim enim istam aliunde non habet, quàm quia constat duobus quasi vētibus secundi generis, cujus est commune hypomochlium in apice.

Notandumque est consequenter 3. Quemadmodum hac arte superemus ea, in quibus à natura vincimur. Nam (quod mirabile est) motu vēlis nauta flectendo gubernaculum, movet universam navim, quæ si fuerit 2000 doliorum, simul cum impositis mercibus vulgò est octo millionum pondo, ut notavit Pater Fornarius in sua Hydrographia. Dicitur verò tot doliorum navis, quia tantum aqua capere & gestare potest, quantum tot doliis contineatur, dolium autem ejusmodi vulgò æstimatur esse bis mille pondo. Sicque res illæ vehuntur unica navi, quæ à viginti millibus equorum gestari, aut à duobus, vel tribus millibus trahi vix possent.

Notabis 4. Libram & Stateram quæ examinantur pondera, revocari quoque ad vētem; eoque plus ponderabit pars ejus altera, quo longior fuerit; quo pacto etiam minus grave potest equiponderare majori.

Dico IV. Etsi major gravitas majorem impetum, majusque pondus de se efficiat, Inequalium tamen ponderum descensus videtur esse per se ferè equalis, ut patet experientiâ. Si enim ex loco edi-

tiori demittantur simul duo corpora gravia per aërem, quorum alterum, ceteris paribus, ab altero multum in gravitate superetur, descensum nihilominus ferè aequalem habebunt. Quod tamen secus contingit in aqua. Vnde conjiciunt satis probabiliter inæqualitatem ejusmodi motuum peti solum ex resistantia medi: quam inæqualitatem vix infert aër, cum de se vix resistat, dividaturque ferè tam facile à corpore gravi minimi ponderis, quam si foret maximi. Quomodo per proportionem festuca pro sua levitate maxima, tam facile movetur à puero, quam ab homine robustissimo, cum ullam vix habeat resistantiam.

Tabulas reperies ad finem hujus Tractatus.

METHODVS

ET

INSTITVTIO

MATHEMATICÆ.

SPHÆRA TERRESTRIS.

CAP. I. *Locus Terra.*

IN hypothesi Copernici, nec Firmamentum, nec Sol, motus ullos habent; quin potius ipse Sol in centro Mundi sic est dispositus, ut circa illam Terraqueus Globus Sphærâ Lunæ inclusus agitur, quem admodum representari vides in tab. 1. fig. 4.

Dico autem I. Rationes multas contra illam hypothesim solere afferri, quæ tamen facile eludi possunt. Quod enim videatur moveri Sol, non autem Terra; *Respondent*, motum illum Solis non esse verum, sed tantum apparentem; quo pacto quis navi in altum transvectus, iudicat Terram ipsam à se recedere, ipsaque moveri littora.

Item, quod vulgò ajunt fore in illa hypothesi, ut aëris obsistentis contrarietas sentiretur, in Terræ motu adeo vehementi: item, quodd facis accensæ flamma in oppositam partem distraheretur, uti videmus contingere, quando quis facem accensam gestans velocius currit: item quodd lapis sursum projectus, in eundem Terræ locum non recideret. *Respondent*,

dent, per se quidem ita res fieri debere; cùm secus eveniat per accidens. Istudque probant manifestâ experientiâ, quicumque navim ingressi, per mare vel concitatissimo cursu deferuntur; vident enim lapidem ex alta navi in fundum ad easdem partes recidere; nec secus etiam contingere alia, quæ contra hypothesim Copernici obijciuntur.

Item, quod dicimus mediam coeli partem, sexque omnino signa Zodiaci nobis esse conspicua supra nostrum Horizontem: nobis oriri Lunam, occidente Sole, tunc quando sunt plenilunia; quo in casu necesse est Lunam mediâ coeli parte distare à Sole; sicque omnino, ut modò aiebamus, in mediam coeli partem nobis apparere; quod in hypothesi Copernici minime fieret, siquidem ductâ lineâ rectâ per oculum, seu per Terræ superficiem ad coeli partes oppositas, minor tantùm Sphæræ dimidiæ portio relinqueretur nobis aspectabilis. *Respondent*, tam esse immensam coeli vastitatem, ut respectivè ad illam, totus iste ambitus qui supponitur à terra diurno motu perlustrari, sit tantùm instar puncti; nec impedire etiam quò minus horologia sciotherica perinde horas indicent, ac si forent in centro Mundi constituta; quod ipsi aiebamus in Gnomonica. Atque hoc modo ruit, quicquid Copernicæis obijcias. At nihilominus, quanvis præterea in illa hypothesi possint explicari omnia phænomenorum genera, ut quidem docent, non sequitur tamen rem de facto ita se habere. Indè

Dico II. Illud Mundi systema esse omnino repudiandum. Probatur hac ratione physica; quòd Terræ moles cum tantæ sit gravitatis, non videatur esse illi motui idonea; quin potius

tius ex eo statuendum est, infimum tenere in Mundo locum, ad quem videmus tendere omnia gravia.

Confirmatur; quia in hypothefi Copernici, debet Terræ globus moveri non tantum circa centrum Mundi, sed etiam & circa proprium axem. Atqui postea *cap. 5.* docebimus Terram esse corpus magneticum, cui consequenter repugnet motus circa axem.

Huc autem accedit sacræ Scripturæ auctoritas omni ratione firmior. Legimus enim Psal. 103. *Terram esse fundatam super stabilitatem suam; non inclinari in sæculum sæculi.* Item Eccles. 1. *Oriri Solem & occidere, & ad locum suum reverti. Gyrare per meridiem, & flecti in Aquilonem, & lustrare universa in circuitu, &c.* Item Iosue 10. *Iussus est Sol stare.* Isa. 38. *Dicitur reversus decem lineis per gradus quos descenderat.* Quia verò locorum ejusmodi sacrorum intelligentia ab adversariis alienum in sensum detorquebatur; ideo non semel eorum doctrina ab Inquisitione Romana proscripta est tanquam Fidei & Scripturæ contraria. Eamque ob causam Galilæus insignis mathematicus decreto illius Inquisitionis fuit carceri mancipatus; ut scribit Spondanus ad annum 1633. Nec postea ferè propugnatores habuit nisi vel sciolos aliquos ad ostentationem, vel hæreticos in contemptum Romanæ Ecclesiæ. Certè nemo sanæ mentis illam probet sententiam, quam sæculorum omnium placita, omniumque hominum genera convellant; nec potest vindicari ab hæresi, cum sacris literis, nemine ex sanctis Patribus dissentiente, adversetur.

Objic. Frustra essent tot cœlorum, & tam multiplices motus, si hæc omnia per motum

Terræ solius præstari possent. Respondeo ; Si eodem modo & uniuscujusque naturæ proportionato ; *transeat*. Sed pugnat contra naturam corporis gravis ita moveri.

Inst. Est illud potius naturæ Firmamenti consentaneum ut quiescat. Nam, ut ajunt, quod cœli & Planetæ superiores sunt, eò magis accedunt ad quietem, suntque in cursu lentiores. *Respondeo*, Falsum supponi ab adversariis.

Inst. Perfectibile quærit potius perfectivum, moveturque ad ipsum ex propria sui indigentia ; non autem perfectivum debet moveri ad perfectibile ; neque verò, ut ajunt, ignis ad carnem coquendam solet circa ipsam converti, sed potius caro circa ignem. *Respondeo*, perfectivum etiam nonnunquam accommodari perfectibili, & ad ipsum moveri, quando illud rei natura, & sapientiæ ordo postulat.

Notabis porro sic Terram esse in medio Mundi, ut in eo servet centrum suæ gravitatis, quæ est corporis gravis natura ; nec multùm ab eo gravitatis centro distare potest centrum magnitudinis, ut ex allatis argumentis satis potest conjici.

CAP. II. *Figura Terræ.*

Dico I. Terra est rotundæ figuræ. Probatur 1. Quia stellæ prius oriuntur iis qui sunt magis Orientales. Item quod magis acceditur ad Polum, ipse elevatur eò magis supra horizontem ; ut omittam alia id genus phænomena, quæ non possent explicari sine rotunditate Terræ. Alioquin nihil impediret quod minus stellæ simul orirentur, & occiderent tum Orientalibus, tum Occidentalibus. Item, nulla esset ratio cur fieret aliqua Poli elevatio. Probatur 2.

Per-

Perpendicularum ubicunque terrarum cadit ad angulos rectos supra ipsam Terram, quod satis experiuntur quotidie Architecti, cum muros extruunt. Atqui fieri istud non potest sine rotunditate Terræ: alioquin si plana foret, secus contingeret, *ut patet in fig. 3. tabula 3.* Item, si planâ esset superficie, quemadmodum opinantur *Sinæ*, vix paucis hominibus foret habitabilis, quia pauci in ea recti consisterent. Vt enim patet experienciâ, illi tantum possunt recti consistere in Terra, quorum longitudo corporis est in linea directionis, ac proinde perpendiculariter insistant centro mundi. At ii tantum hoc possent, qui mediam hanc Terrarum planitiem tenerent. Quod quidem ut oculis subjiciam, attende *ad figuram 6. tabula 8.* Vbi describitur recta linea tanquam rectum pavementum rectâ tendens ad cœli punctum quod respondet horizonti; tum finguntur prodire à centro Terræ lineæ transeuntes quidem ad angulos rectos per superficiem ipsius terræ, non autem ubi ultra per planum illud pavementum traducuntur. Qua facta descriptione, nemo est qui non videat eos solum rectâ consistere, qui ad mediam illam planitiem positi sunt; alios autem magis & magis inclinari; imò & ascendere potius cœlum versùs.

Notabis tamen istud quod asserimus de rotunditate Terræ esse accipiendum physicè, non autem Geometricè; hoc enim montes, & vastæ planities impediunt, ut satis pater.

Dico II. Terra diversis sui partibus excavata continet Aquas, unde aqua simul cum Terra Globum unum efficit, quem idcirco Terraqueum vocant. Quod est contra nonnullorum sententiam, qui volunt alium esse globum ter-

ræ, à globo Aquæ. Probatúr. Quia ex eclipsi Lunæ constat existere unicam Aquæ simul, & Terræ umbram, eamque conicam: quod signum est unicum solummodo ab utraque Globum effici. Confirmatur, quia idem est centrum quò tendit pondus Aquæ & Terræ; nam undeque demittatur aqua, per eandem semper viam cadet, ac terra ex eodem loco directâ. Nec tantùm per lineam rectam aqua nititur deorsum, sed etiam, & ad latus, unde sese effundat supra terram; quamobrem doliis conclusus liquor, premit etiam ad latera, & datâ viâ longiùs evibratur. Confirmatur præterea, quia,

Dico III. Mare secundùm superficiem extimam est formæ rotundæ; unde cum Terræ superficie unam quasi totalem rotunditatem, & consequenter globum unum constituat. Probatúr antecedens. Quia dum navis ex alto mari portum repetit, priùs videntur turrium cacumina, quàm fundamenta, & bases: quod oriri non potest, nisi ex tumore, & rotunditate aquæ; ut patet consideranti *figuram 7. tab. 8.* Item, naviganti ad Polum sub eodem Meridiano, sensim ille magis elevatur supra Horizontem: quod etiam aliunde oriri non potest quàm ex rotunditate illâ.

Notandumque est, maris superficiem ad extrema littora esse inferiorem de se universâ Terræ superficie. *Prob.* Quia ad mare omni Terrarum ex parte descenditur; uti quidem demonstrat fluviorum lapsus. Non enim aquæ pro suâ gravitate naturali descendunt, nisi ex loco superiori ad inferiorem. Quare etiam consequenter,

Dico IV. Aquam universam, seu mare secundùm superficiem extimam universam, esse inferius universâ superficie Terræ. *Prob.* Quia pars
maris

maris vicina littori non posset esse altior, quin statim in ipsum effunderetur. Quod à pari per proportionem dicendum est de quacunque aliâ parte maris: si enim foret eminentior, perinde omnino pro suâ naturâ fluxili prorueret in inferiorem, ut sese ad libellam componeret, servaretque eandem à centro mundi distantiam. Quamquam

Not. Spectantibus è littore apparere quidem mare quasi attolli. Sed illud oritur tantùm ex fallaciâ visus, qualem explicuimus in Optica; ut quando ad longiorem distantiam videntur coïre tum Terra, tum nubes.

Objic. Nisi maris superficies convexa sit in eâdem altitudine cum superficie Terræ, non possent maris aquæ deferri ad fontium & fluviorum scatufigines, juxta Salomonis dictum *Eccli. 1. 2.* Huic difficultati satisfieri in Physicâ de origine fluviorum & fontium.

CAP. III. Magnitudo Terræ.

Dico I. Etsi Terræ globus absolute loquendo sit moles quædam ingens; respectivè tamen ad cælum Firmamenti, est instar puncti cujusdam. Ita vulgò Mathematici cum Aristotele. Ratio est, quia nobis apparet dimidia pars cœli, perinde ac si essemus in centro mundi. Item, stellæ Firmamenti, quanvis nonnullæ sint centies majores quàm Terræ Globus, non apparent tamen nisi veluti quædam puncta lucida; ergo à fortiori existimandum est illud de Terrâ, comparativè ad Firmamentum. Et verò etiam, si quis ex Firmamento spectaret partem ipsius Firmamenti diametraliter oppositam, nihil ipsi obstaret Terra; quo pacto caput aciculæ longè positum, non impedit quo-

minus candelam, aut objectum aliud simile totum perfectè prospiciatur.

Dico II. Maximus Terræ ambitus, variis habetur modis. Primus est *Maurolyci ad figuram 12. tab. 4.* ubi altitudo *c. a.* puta montis *Ætnæ*, supponitur esse *v. g.* 2 leucarum *Gallicarum*, ex quâ fiat prospectus in mare per lineam *a d.* quæ consequenter erit longitudo horizontis sensibilis, & linea tangens circulum *g. d. h. i.* qui supponitur pro circulo Terræ maximo. Item, supponitur distantia illa seu linea *a. d.* esse deprehensa passuum, aut stadiorum 200: ac proinde quadratum ejus esse 40000. Item, supponitur prætereâ rectangulum ex lineâ *a. b.* secante totum circulum per centrum ipsius, sub latitudine *a. g.* quæ eadem sit cum *c. a.* His autem suppositis, quia, ut inquit, juxta *prop. 36. lib. 3.* Euclidis, rectangulum illud *a. g. h. i.* debet esse æquale cum Quadrato lineæ tangentis *a. d.*, cujus magnitudo supponitur nota; inde facile est statuere de illo rectangulo, & de illius longitudine.

Verùm, ut hanc methodum prætermittam; longè illa commodior est, quæ desumitur ex elevatione poli duorum locorum, putà urbium duarum ab invicem ita distantium sub eodem meridiano, ut polus in uno loco sit magis elevatus, vel uno gradu, vel aliquâ parte gradus unius tibi notâ, *v. g.* quartâ parte, ex quâ possis concludere de toto gradu. Hac autem suppositâ observatione, deprehenderunt periti Geometræ, uni gradui cœlesti respondere in Terrâ omnino 30 leucas Gallicas. Quare, ut totus habeatur circuitus graduum 360, numerus iste multiplicandus est per 30; sicque fient 10800 leucæ Gallicæ pro maximo Terræ ambitu.

Item,

Item, juxta illud quod tradidi in Geometria, de proportionem circumferentiæ circularis ad suam diametrum ; inferes diametrum Globi Terraquei esse leucarum 3436. neglectis fractionibus ; & consequenter superficiem Terræ à mundi centro distare leucis circiter 1718.

Item, ex iisdem principiis statues totam superficiem esse leucarum Quadratarum 37114200. Soliditatem verò esse leucarum cubicarum 21254065200.

Notabis autem , Molem hanc Terræ universam, si sumitur secundum profunditatem , vulgò dividi in varias regiones , *juxta figuram 1. tab. 9.* Quarum prima dicitur ea quæ citima est superficiem. Secunda est infrà , in quâ ut plurimum fiunt generationes lapidum , metallorum , &c. in quâ etiam reperiuntur meatus , & veluti canales per quos è mari devolvuntur aquæ ad generationes fluviorum ac fontium. Item , ad hanc pertinent & ignes subterranei. Postea verò est terra pura, usque ad centrum, in quo esse constitutum carcerem damnatorum credimus.

Dico III. Etsi , juxta Geographos , Aquarum facies ferè dupla sit , ad superficiem Terræ habitabilis ; longè tamen est plus Terrarum quàm Aquæ. Probatur. Quia nec Terra omnis aquâ obtegitur, neque ullibi sunt aquæ , quibus major Terrarum profunditas non subternatur. Certè profunda est Terra leucis plusquam 1700. Mare autem , ubi maximè altum est , vix solet unam leucam excedere ; quemadmodum periti nautæ bolide explorarunt ; neque ad tentandam maris profunditatem demittere solent funem cum bolide, longiorem ducentis ulnis, seu brachiali mensurâ bis centies replicatâ.

Objicies ex Aristotele, inter elementa, quod inferius est, illud superatur à viciniori in proportionem decuplâ; unde nonnulli ex Peripateticis volunt plus decies esse aquarum, quàm Terræ; plus aëris decies, quàm aquæ: & sic de igne comparativè ad aërem. Respondeo; Hoc tantum sensu dictum illud fuisse ab Aristotele, quodd si terra in aquam resolvatur, aut aqua in aërem, plus decies tum aquæ, tum aëris fore. Verùm istam proportionem hæc elementa non servant prout mundum constituunt, cùm de facto plus sit Terrarum quàm Aquæ. Item, positâ Sphæræ elementaris semidiametro semidiametrorum Terræ 52, ut tradidi in *Tractatu de Sphæra cœlesti*, facile intelligetur per methodum triplicatæ proportionis, quemadmodum Sphæra elementaris Sphæram Terræ contineat partibus longè pluribus, quàm patiatur illa proportio decupla; supponimus enim Sphæras esse inter se in triplicata proportionem suarum diametrorum, ut habetur ex Geometria.

C A P. I V. *Magnetismus Terræ.*

Vbi de natura & proprietatibus virtutis magnetica.

Argumentum illud ingressurus, delibo nonnulla ex Gilberto, Cabæo, Kircherò, maxime verò ex P. Iacobo Grandainico *De Immobilitate Terræ.*

Ac primò quidem suppono *Magnetem* esse lapidem, qui vim habeat attrahendi cognata corpora, certasque ad mundi partes dirigendi sese. Dicuntur autem cognata ipsi corpora, quæ habent virtutem Magneticam, vel sibi propriam, ut alii Magnetes; vel mutuata à Magnete, ut ferrum. Sed hæc cæteraque id genus cum solis consent experimentis:

Observandum est, Ferrum, putà annulos ferreos Magneti admotos ad illum statim adhærescere, sese etiã ad invicem per modum catenæ cujusdam conjungendo. Tum hæc virtus longè futura est potentior, si armetur ferro bene recocto, denso, ac terfo; videbiturque Magnes vim ferro majorem communicare, quàm in se habeat; cum tamen non sit futura major intensivè, sed tantùm extensivè, propter ipsius ferri densitatem. Item

Obs. 2. Virtutem Magneticam à ferro quidem contrahi, sed in eo non retinetur separato Magnete, nisi fuerit longioris figuræ, & in modum virgæ, seu bacilli.

Obs. 3. Magnetem certis tantummodo, ac determinatis in punctis vim attrahendi exercere; punctaque illa esse veluti polos duos, & quasi ad extremitates cujusdam axis constitutos, ut d. & b in fig. 1. laterculo 2. tab. 8. Iis porro in Magnetis partibus existere polos judicabis, ubi deprehendes exiguum bacilli ferrei, aut acus sutoriæ frustulum insistere perpendiculariter, adhibita si lubet vitreâ, aut corneâ laminâ, cujus beneficio bacillum hunc ad diversas Magnetis partes admoveas. Item, hac quoque arte polos Magneticos investigabis, ubi scilicet acus ferrea, vel ex acu alia, vel ex filo suspensa, ad eos diverterit. Item, si videris admotam scobem ferream erigi.

Obs. 4. Polos istos esse contrarii respectus, ita ut eorum alter ex se destinetur ad partem Mundi Septentrionalem, ideoque vocatur Septentrionalis: alter verò ad Meridionalem, diciturque Meridionalis. Atque ita Magnetica præter vim attractivam, habent & directivam, unde acus versoria tantopere est usui nautis, ad
certas

certas Mundi partes designandas, ut institutum iter prosequantur. Nec parum quoque utilis est Horographis ad describendam lineam in meridiam. At

Obs. 5. Polos contrarii respectus, nempe *Boreum*, & *Australem*, esse contrariæ virtutis. Id enim quod alter ad se pertrahit, illud ab altero repellitur: quam in ferrum virtutem derivavit alter; perimitur ab altero. Quinetiam idem polus ipse sibi contrarius est; quam enim virtutem uno genere motus, seu partem in unam affricatus ferro indidit, contrario motu detrahit. Quanquam

Obs. 6. Concordiam servare inter se Magnetica diversa, ubi junguntur secundum polos contrarii respectus, quales repræsentantur *fig. 5.* & *6.* Illi enim tantum sunt amici; sed ea tamen lege, ut plures quam duo simul non adsint; alioquin si tertius accesserit, turbatur omnis amicitia, dum solum duo coeant.

At rursus ab invicem ea dissident, exercentque inimicitiam, quæ ad eundem terminum tendunt, & ex eodem fonte virtutem hauriunt; quo pacto vides in *fig. 1.* Tres acus eidem polo *b* affixas, à se invicem discedere. Quare si versorio similem polum admoveas, fugiet semper; contra autem sistetur, ubi dissimilis occurret.

Item si duas acus secundum polos ejusdem nominis & respectus simul ad lineas parallelas disposueris in tabella, mutuo fugabunt sese, ubi tamen illa tabella tersa & polita fuerit, unde nihil obstat eorum motui. Quanquam si liberè in aqua nataverint plures magnetes suberi impositi; vel si acus librata suo in obelo, alteri supponitur, fortior debiliorem sibi conformabit, polos amicos conjungendo.

Item,

Item, eandem antipathiam, aut sympathiam experieris beneficio scrobis ferreæ, duorum Magnetum polis, per modum barbæ cujusdam veluti appensæ. Si enim poli amici admoveantur ad invicem, ramenta illa ferrea simul coibunt. Alioquin contrarias in partes discedent, si poli ejusdem respectus jungantur.

Item, si magnes armatus ferrum ad se traxerit; tum autem illi amicum solum non armatum ad moveris, retinebit ipsum ferrum quasi majori virium facta contentione; quæ tamen vires videbuntur frangi, ferrumque excidet, si polus inimicus accesserit. Iam verò quod spectat propagationem, & extensionem virtutis Magneticæ in suo subjecto:

Obs. 7. Virtutem illam à Magnete intra Sphæram activitatis propriæ diffundi in instanti. Nam ex pluribus versoriis ea quæ distant, agitantur simul cum viciniore, neque illam propagationem impediunt corpora interposita. Quinetiam, quod in *fig. 2. exhibetur*, subjectum suum ita afficit, ut quasi per æquatorein duas in partes contrarias dividatur, & singulæ veluti per radios quosdam ad punctum, quem esse solum diximus, confluant, ideòque vocatur centrum virtutis magneticæ. Quo sensu ajunt Magnetem suæ virtutis centrum habere in circumferentia; tum in eadem circumferentia habere & duo centra virtutis oppositæ.

Virtutem illam in contrarias partes bipartitò divisam explorare etiam potes in bacillo ferreo, admotâ secundùm illius longitudinem acu versatili. Nam unum ex polis toti illius parti dimidiæ, alterum alteri offeret: neutrum, ubi ad Æquatorein delata fuerit. Sic etiam frustulum acus qua investigantur poli Magnetis,

(ut

(ut dixi in observatione 3) uni polo secundum unam partem, alteri autem insisteret perpendiculariter secundum alteram. Mitto quod in omnibus magneticis virtus ita diffusa est, ut videatur instar qualitaturn spiritualium tota indivisibiliter cuilibet parti inexistere cum suis contrarietatibus, & utroque polo, virtualiter saltem; unde si mille in fragmenta comminatur magnetes, singula suos polos reddent, legesque omnes magneticas servabunt.

Obs. 8. In magneticis multiplex reperiri genus verticitalis, seu motionis, aut agitationis. Prima, & maximè insignis verticitalitas ea est, per quam ad Mundi polos dirigitur, axemque suum, cum axe Mundi conformat, quoad fieri potest. Et verò etiam alia ratio non est cur dissimiles poli sint amici; item, cur sese mutuo conservent, nisi quia possunt simul uniri ad constituendum axem, unde firmitus ad illas mundi partes oppositas affigantur; ubi è contra poli similis respectus, antipathiam habent, & se mutuo destruunt, quod simul jungi nequeant secundum axem eundem; nam poli similes ad eandem Mundi partem spectant; partium autem earum quæ in unum coeunt altera debet spectare Septentrionem, altera Meridiem.

Secunda verticitalitas, est declinatio, seu variatio, per quam à suo polo deflectit, vel ad Orientem, vel ad Occidentem: hæc autem diversis Mundi in regionibus diversa est. At illius quantitatem pro dato loco deprehendes, si versorium directè statueris in linea meridiana astronomice descripta; nam angulus quem efficiet cum linea illa meridiana, dabit tibi gradus quæsitæ variationis.

Tertium verticitalis genus est inclinatio.
Nempe

Nempe si acum nondum imbutam disposueris in obelo, aut acum sutoriam, vel suberi in aqua natanti infixeris; vel è filo ita suspenderis ut servet æquilibrium; ubi virtutem magneticam hauserit applicato Magnete, tum certis gradibus inclinabit sese ad Horizontem, & ad polum Terræ; ut in *fig. 3.* Quanquam si steteris sub Æquatore mundi, fiet Horizonti parallela; at inclinabitur semper ad polum Terræ, ea proportionem, qua recesseris ab illo Æquatore, dum tandem erigatur perpendiculariter, ubi ad polum usque perveneris. Quamobrem ex hujus inclinationis magneticæ inspectione, adhibito circulo in suos gradus diviso, poterit judicari de elevatione poli cœlestis, quod laudatus author P. Grandamicus satis declarat; ostenditque etiam, quemadmodum ex declinatione & inclinatione simul conjunctis, possimus conjicere de longitudinibus Geographicis, si ex certis observationibus constiterit de inclinatione & declinatione propria datæ cujuscunque regionis. Quanquam videtur nimis inconstans variatio Magnetis, ut de illâ certò quidquam affirmare possis.

Huc adde quartum verticiratis genus, unde Magnes alteram sui partem disponit ad Orientem; alteram autem ad Occidentem, & in iis quiescit; quomodo per proportionem quiescit juxta polos ad Septentrionem, & Meridiem. Quod observare est in Globo magnetico, ubi liberè agitare sese potest; ut quando argento vivo innatat; vel etiam in aqua fluitat, beneficio alicujus naviculæ ex subere.

Notabis tamen vim eam sistendi sese ad Orientem, aut Occidentem non habere in aliquibus punctis Orientalibus, aut Occidentalibus

bus residentem, cujusmodi habet in suis polis; quin sita est potius in circulo quodam meridiano, qui ex natura sua componat sese ad meridianum Mundi, & in eo consistat, unde consequenter fiat, ut certis sui partibus ad Orientem, & Occidentem affigatur. Quod autem de facto vim eam non habeat positam nisi in aliquo genere Meridiani; probatur, quia servato eodem Meridiano, licet pars ea quæ obvertebatur ad Orientem, fiat Occidentalis, nihilominus perfectè quiescit. Istud quoque observare est in acu verticali natante, *qualem vides in fig. 4.*

Colliges ergo ex dictis 1. Magnetem habere non modò suum Æquatorem unde bifariam dividatur in partem Septentrionalem, & Meridionalem, cum polo Septentrionali & Meridionali; sed in eo reperiri quoque & Meridianum, per quem dividatur in partem Orientalem & Occidentalem.

Colliges 2. Magneti naturalem esse motum circulem & à principio naturæ intrinseco, unde à proprio situ revulsus, ad illum sese restituat, vel Polis Mundi, vel partibus Orientalibus, & Occidentalibus adhærendo; cum tamen motus circularis nulli præterea corpori sit naturalis, & à principio intrinseco; ut probant physici, ubi de motu corporum cœlestium. Certum est autem circulem hunc motum tam esse naturalem Magneti, quàm lapidi motus deorsum, aut igni sursum; non enim aliam ob causam dicitur esse illis naturalis, nisi quia sic sua veluti sponte sese movent ad eum locum, & situm, in quo tandem quierè consistent: quod perinde Magneti convenit.

Colliges 3. Eam esse naturam virtutis magneticæ.

gneticæ ut subjectum quod afficit reddat unde quaque quietum, & immobile circa centrum; siquidem una ex parte per Polos redditur illius axis immobilis; tum per meridianum impeditur motus circa axem. Atque his quidem, observatis, ut de magnetismo terræ paucis rem conficiam.

C A P. V. *Terram esse corpus Magneticum.*

D*icendum* est in Terra de facto existere virtutem magneticam; quod Philosophiæ magneticæ studiosi omnes hac ætate ultrò profitentur. Probantque vario genere experimentorum. Nam primò constat virtutem magneticam à Terra derivari in ferrum, quod observare est in cratibus ferreis, & longioribus ferramentis id genus, quæ rectâ diutius ad Terram steterint. Et verò etiam pars eorum inferior inbuitur semper virtute illius poli qui propior est; seu qui est proprius regionis in qua existunt; qualis apud nos est Borealis. Remque istam versorio ad ferramenta hujusmodi adinoto, quod supra ajebam, potest quilibet oculis subicere.

Secundò, nulla potest alia ratio afferri inclinationis magneticæ, quam modò exposuimus, nisi quodd polus Terræ acutim sic ad se pertrahit. Item, nec alia quoque est ratio declinationis, nisi quæ petitur ex multiplici terrarum dispositione, unde vel plùs, vel minùs illius virtutis affunditur, ipsumque versorium à recto tramite abducit. Sic enim pari modo philosophari possumus ac de lapide magnete, in quo partium inæqualitas idem præstat, ut sæpe usu compertum est.

Item sic possumus quoque afferere polum
Ter.

Terrestrem esse causam illius verticitalis, per quam acus imbuta polos mundi nobis indicat. Vt enim lapis Magneticus polos amicos acus versoriae conformat sibi, ita & Terra quæ est instar majoris cujusdam Magnetis, minora hæc omnia magnetica sibi conformabit, ideoque proprium eorum mutabit situm, ut qui polus ad austrum vergeret, ad Septentrionem vi Poli Terrestris attrahatur. Neque verò quod nonnulli scribunt, verticitalis & directio illa magnetica Cœlo, vel Polo cœlesti adscribi potest. Alioquin si vim illam attrahendi haberet, acus ad terræ polum non intenderet, sed potius ad cœlum erigeretur.

Item, si polus cœli vim haberet effectivam dirigendi ad se acum magneticam; hæc nunquam ab eo declinaret. Nec partes polo cœlesti affines vim eam habent; alioquin cum illæ moveantur circulariter, deberet quoque ad earum agitationem variari acus magnetica; quod pugnat cum experientiâ.

Notandumque est vim eam poli terrestris exerceri tantum in polos magneticos, qui tamen vi majore pertracti, aliud declinare possunt, ut jam explicabam. At si magnes constitutus verticaliter, liberè sese agitare possit; ut quando argento vivo innatat, Meridianum suum componet intra Meridianum Mundi, absque ulla declinatione; quia Meridianus magneticus non movetur ab alio, nec habet antipathiam, aut sympathiam, cum virtute polari. Idem commodius præstatur per acum verticalem in aqua fluitantem, *ut in fig. 4.* Quare hoc pacto ubivis terrarum habere potes Meridianum universalem sine declinatione.

Cum autem ago de virtute magnetica Glo-
bo

bo terræ inexistente, notabis me illud non accipere de qualibet terræ parte, sed tantum de ea quam esse puram terram aiebam supra, cap. 3. Quem verò in finem sit illa virtus Terræ iudicata, sequenti capite exponam.

Objicies. Cum terra sit tantæ molis, sequeretur virtutem illam habere multò majores effectus, quàm quos experimur. Et verò deberet imbuiere omne ferrum in rerum natura existens; deberet omnia ferramenta pertrahere ad sese, nec avelli ab ipsa possent, nobisque esse usui, &c. R. 1. Vim hujus qualitatis in eo præcipuè positam esse, ut subjectum firmet circa centrum, dirigatque ad certas mundi partes: simul autem attractiva est, ut partes sibi uniat in ordine ad constituendum longiorem, & firmiorem axem. Nec eum in finem habet opus ut longius prorumpat, propageturque: unde qui sunt perfectissimi Magnetes, non idcirco habent spheram activitatis majorem. At præterea R. 2. vim terræ magneticam non ita prodire foras, ob vitium partium extimarum à quibus retunditur, non sine speciali Dei providentia, ne humanis usibus obstaret. R. 3. vim illam si quæ ad extra profunditur, sitam esse maximè ad polos. R. 4. per eam non imbui posse nisi ferrum probè excoctum, & purgatum, ut patet experientiâ. Item non potest ferrum imbui, nisi existat sub certâ figurâ, ut jam monui, quanvis Magnetes ipsi sub quacumque figura vim suam retineant.

Inst. Polus terræ ne quidem ad se attrahit acum ex filo pendulam, quod fieri videmus à minimis Magneticis. Ergo non est de facto magneticus. R. vim ipsius ob causam allatam ita retundi, ut hoc non præstet, nisi acus ipsa imbuta sit.

Inst.

Inst. 2. Ignēs subterranei vim illam magneticam prorsus interiimerent. *R.* Paucas solum terræ partes ab ignibus ejusmodi posse infestari, cum ferè non ardeant nisi circa superiorem regionem.

C A P. V I. *Immobilitas Terra, tum ad
centrum, tum circa centrum Mundi.*

Dico I. Terraqueus globus habet per gravitatem sibi naturalem ut in medio mundi positus motui recto tam sursum, quàm in transversum resistat. Is enim est proprius gravitatis effectus. Sed quanvis hoc pacto sit immobilis in centro, seu ad centrum mundi, non idcirco est immobilis circa ipsum centrum. Certum enim est ex Mechanicorum principiis, globum æqualis gravitatis suspensum ad æquilibrium, posse viribus quibuscunque, saltem non maximis, inclinari, & moveri in orbem. Neque verò ulla ex parte posset illi motui resistere Globus Terraqueus, cum nitatur solum suo centro, neque in ipsum premat, siquidem gravia proprio in loco posita non gravitant. Ergo per gravitatem non habet ut sit immobilis circa centrum, possetque nihilominus undequaque agitari in orbem; vel à reciprocante maris æstu, vel ab ipso ventorum impetu: cum tamen certum sit hoc modo non moveri; siquidem eodem in loco Terrarum semper eadem apparet Poli elevatio, quod secus omnino eveniret; item, docet & sacra Scriptura, *Terram in æternum stare, neque inclinari in sæculum sæculi*, ut jam primo capite exposuimus. Et verò etiam tam necesse fuit ad bonum generationum naturalium, & hominum commoditates, Terram esse immobilem circa centrum, quàm in centro, seu ad centrum.

Dico

Dico igitur II. Cum nostro Antesignano P. Grandamico habere hanc immobilitatem circa centrum per virtutem magneticam. Probatur. Tam enim decuit Terram esse immobilem circa centrum per qualitatem aliquam naturalem, quàm in centro: sic enim Deus pro suâ providentiâ solet res omnes naturales iis qualitatibus instruere, quæ ad earum conservationem & statum necessariae sunt. Atqui nulla est qualitas eum in finem magis idonea, quàm virtus magnetica; nec alium in finem à Deo concessa de facto fuit. Ergo. Probatur minor; quia præstat in subjecto ea omnia, quæ necessaria sunt ad ejusmodi immobilitatem, cum ex superiori doctrina Polos de se immobiles, & Meridianum de se immobilem efficiat; nec aliud quidquam requiratur ad illam immobilitatem.

Objic. I. Terra per gravitatem quiescit proprio in loco. Ergo frustra illi assignatur virtus magnetica, unde illam quietem habeat. *Dist.* Quiescit resistendo motui sursum & intransversum C. motui circulari N.

Inst. Etiam motui circulari, nam in motu circulari partes habent motum aliqua ratione transversum, cui gravitas est contraria. R. Vbi perfectè libratae sunt partes, illi motui partium non resistit gravitas, etsi dicatur aliqua ratione transversus; ut patet in balance.

Inst. Ideo rota ægrè vertitur, resistitque. R. Idcirco illud contingit, quia per propriam gravitatem premit contra axem; alioquin sine ulla resistantia posset vel à debili facultate sic agitari circa axem.

Inst. Terræ partes premunt contra centrum, cui scilicet quasi innituntur. Respondi jam ex

Physicâ, Terræ partes non premere, nec contra se invicem, nec contra centrum.

Objicies II. Corpus magneticum non consistit nisi per conformationem ad aliud potentius, à quo sic contineatur; ut patet quotidiana experientia in nostris minoribus magneticis. Ergo à pari supponendum esset aliud corpus magneticum, cui Terra conformaretur; & vi cuius consisteret. R. Illud certè aliud esse non posset quàm cœlum; atqui cœlum non habet virtutem magneticam, alioquin, ut dixi, acus magnetica ad ipsius polum erigeretur, nec inclinaretur ad Terrestrem, &c. R. 2. Corpus magneticum absolute posse consistere sine conformatione ad aliud; alioquin esset admittendus hoc loco processus in infinitum. Neque illa consistentia per conformationem ad aliud contingit, nisi ubi de facto minori magnetico potentius apponitur, quo pacto dicimus Terram esse magneticorum omnium primum: & cui cætera conformantur.

Inst. Nulla est ratio, cur Terræ poli ad cœlestes polos destinentur potius, quàm ad alias partes, si nullam de se cognationem cum iis habent, nec illi sunt magnetici. R. Magneticam Terræ virtutem absolute quidem esse indifferentem, atque indeterminatam ad tales, vel tales mundi partes. At si consideretur quatenus etiam de se ordinata est ad bonum universi, de se consequenter est determinata ad situm hunc præstandum, quem exigit bonum universi; unde consequenter exigit concursum à Deo determinativum sui ad tales potius mundi partes, quàm ad alias, habita ratione boni universalis. Quare in illa rerum dispositione sic debuit determinari à Deo simul concurrente, & illis cœli par-

partibus quasi affigi, ut legitimè cœlestes influxus exciperet.

CAP. VII. *Maria diversis Terrarum regionibus definire.*

IAm nihil superest, nisi ut superficiem ipsius Terræ, cum Geographis contemplemur; quod quidem ut fiat commodè, simul attendendum est tum ad Globum artificialem, tum ad Tabulas Geographicas, dum ista legendo studiosè percurruntur.

Quæ verò Terrarum pars major est, ut Europa, Asia, & Africa, dicitur *Continens*, seu *Terra firma*. Alioquin pars Terræ minor aquis conclusa, vocatur *Insula*; aut si exigua sui parte continenti cohæreat, est *Peninsula*, seu *Chersonesus*. Spatium autem quo Peninsula continenti adhæret, vocatur *Isthmus*. Mons autem, seu pars Terræ amplior in mare procurrens, solet appellari *caput*, seu *promontorium*.

At Mare est generalis aquarum quædam collectio; dividiturque in Oceanum, & Mare Mediterraneum. Oceanus toti Terræ circumquaque affunditur. Mare Mediterraneum mediis ipsis Terris veluti concluditur. *Sinus Maris* est maris ipsius pars aliqua in Terras angusto spatium effusa, diciturque etiam *golphus*. Fretum est spatium quoddam angustius, quo mare coarctatur, tum ultra sese expandit. Atque ista quidem partium Terræ, aut maris nomenclaturâ suppositâ,

Dico I. Oceanus quanvis unus sit & idem per varias Terræ partes continuus, varias tamen ex iis regionibus quas alluit, sortitur appellationes. Ac primò quidem ex 4 mundi præcipuis partibus dicitur Mare Orientale, Occidentale,

Septentrionale & Meridionale. Item & à cognatis gentibus vocatur mare Norvegicum, Germanicum, Anglicum, Gallicum, Hispanicum. Tum ex Africa incipit lustrari ora Maroci, Senecæ *coste de Senega*, aut capitis viridis, *du Cap verd*: deinde ora Guineæ, ora Congensis, Casrorum: ad extremum caput bonæ spei, ora Monomotapæ, quâ vulgò dicitur incipere mare Indicum; atque inde sequitur ora Mozambici, Melindæ, Abyssinorum, ora Arabica, Persica: occurrit Archipelagus Maldivarum, ora Malabarica, ora Malacæ; mare Sinense, Iaponicum. Item quicquid est aquarum ad Americam, vocatur mare pacificum, à fluctuum majori tranquillitate.

Notandumque est in Oceano Septentrionali præcipuos numerari sinus istos. 1. Ad Septentrionales plagas mare Balthicum, seu mare Suevicum, ubi fretum Santicum *le Sund*. Ad Americam est sinus Mexicanus. In Oceano Indico est sinus Arabicus, seu mare rubrum, aut *de Mecca*. Tum sinus Persicus, Gangeticus, sive Bengalensis.

Not. 2. Oceani celebriores has esse insulas. Ac primò ad ipsum Septentrionem est Groenlandia, tum Britannides insulæ, quæ Regna Angliæ, Scotiæ & Hybernici continent; hinc Insulæ Fortunatæ, seu Canariæ, longius paulò distat: sequuntur Afores, quibus meridionales sunt insulæ Capitis viridis. Prætereo insulas S. Thomæ. S. Helenæ, Ascensionis. In Oceano Indico est insignis Insula S. Laurentii, seu Madagascar. Maldivæ insulæ. Tum insulæ Zeilam, Sumatra, Iava, Borneo, Gilolo, Philippinæ, Molucæ, ac tandem Iaponicæ.

Dico II. Ex Oceano per fretum Gaditanum prodit

prodit mediterraneum mare, variis etiam illustre regionibus. Altera enim ex parte habet oram Hispanicam, Gallicam, Italicam, atque inde sequitur Græcia, Natolia, Syria, Palæstina. Tum regrediendo, est ora Ægyptiaca, Lybica, ac denique ora Barbariæ, in qua est Tunetana, Algeriana, &c.

Notabis in eo mari duos maximè insignes esse sinus. Primus est Venetus, seu æstuarium Venetum, aut Adriaticum mare. Alter est Ægæum mare variis sparsum insulis. At illud modò in angustius spatium cogit sese, modò relaxat, tum iterum coarctatur, latiùsque iterum aperit sese. Vbi primùm sese coarctat, vocatur Hellespontus: ubi verò sese extendit, dicitur Propontis, seu *mare marmora*. Vbi iterum cogitur, Bosphorus Thracius appellatur, apud quem sita est Constantinopolis; omnemque istam maris plagam vocant mare album. At ubi iterum effundit sese, est Pontus Euxinus, seu mare nigrum, sic dictum, quia pyratibus, aut etiam gravioribus procellis infestari solet. In illo autem legitur ora Asiæ, ora Trapezuntina, *coste de Trebizante*: ora Mingreliæ, ora Taurica, seu Cassa; ora Russorum, seu Cosacorum, quæ gens est Russiæ nigræ. Ac denique Pontus Euxinus per fretum, quod Bosphorum Cymmerium vocant, Paludi committitur, quæ dicitur Mœotis, Tanaim fluvium *le Don*, à Septentrionibus excipiens.

Not. 2. Has præcipuè numerari maris istius insulas. Ac primò sunt Balearides, seu Majorica, & Minorica. Tum Corsica, *Corse*. Sardinia, *Sardaigne*. Sicilia; Melita, *Malthe*. Corcyra, *Corfu*. Zacynthus, *Zante*. Creta, *Candie*. Deinde Cyclades medium per Archipelagus sparsæ,

quas inter est Paros, Delos, Pathmos, Cos; ac denique est Rhodus. Tum ad supremas ferè partes hujus maris est Cyprus.

Præter hæc maria, est quoque mare Caspium, seu Hircanum, vulgò *mare de Sala & Bachu*, reliquo mari non continuum, sed undequaque potiùs Terris conclusum, in quo est *Astracan*.

CAP. VIII. Regiones Terrarum partiri.

Dico I. Terrarum Orbis dividitur in duo hemisphæria, quorum alterum nobis dicitur superius, nobisque habitatur, & vocatur *antiquus Orbis*. Alterum verò, ubi America, & *novus Orbis*, Lactantio & Augustino priscisque illis temporibus prorsus incognitus. At præterea

Dico II. Vniversam continentem alii solent dividere tres in partes; suntque illæ veluti quædam ingentes insulæ, quas ambit circumquaque Oceanus. Harum prima comprehendit Europam, Asiam, & Africam. 2. est America. 3. denique est Australis adhuc incognita.

Notandumque est per mare mediterraneum à freto Gaditano ad Archipelagus usque profusum; tum ab Archipelago per Hellespontum, Propontidem, Pontum Euxinum, Paludem Mœotidem, ac Tanaim; indeque ductâ lineâ rectâ per Borysthenem usque ad mare Septentrionale, dividi Europam ab Asia, & ab Africa. Nam quod alteri maris mediterranei lateri Terrarum adjacet usque ad Sinum Arabicum, cum Isthmo, quem *Suez* dicunt, Africa est. Ultra quidquid Terrarum est, vocatur Asia. Vt autem habeatur integra & absoluta Geographia; Istæ iterum minores in partes, seu varias in dominationes distribui solent. Quam methodum ut prosequar juxta antiquos
simul

simul & recentiores, positâ ante oculos Terræ Mappâ universali:

Dico III. In Europa recensentur primò, Britannides insulæ, ubi Regna Angliæ, Scotiæ, & Hybernæ.

Tum in continenti occurrit Hispania; quam ultra Pyrenæos montes excipit Gallia, seu Francia; cujus in ditione fuerunt olim regiones omnes ad Rhenum usque, puta Belgium, *Pays bas*: Lotharingia, *Lorraine*: Alsatia. Hæcque vocatur Europa Occidentalis.

Nam inde ad Boream est Germania, *Allemagne*: cum Regnis Daniæ, *Danemarch*; Bohemiæ, *Boheme*: & Magnæ Hungariæ, *Hongrie*: cujus olim partes fuere Transylvania, cum Moldavia, & Walachia ad Pontum Euxinum. Supra Hungariam ad Septentrionem est Polonia, cum Moschoviâ, quam ad Pontum Euxinum sequitur Tartaria minor, seu Precoensis, inter Borysthenem & Tanaim cum Taurica Chersoneso comprehensa, nec ferè latius patet. Trans mare Balthicum est, Norvegia cum Sueciâ. Atque hoc pacto Rhenus, aliunde verò Ister, seu Danubius in partes oppositas profluens, & Ponto Euxino continuus, Europam Septentrionalem terminant, dirimuntque ab Europa Meridionali.

Quare, citra Rhenum & Danubium, Europam Meridionalem occupant à finibus Alsatia, Suevia, *la Suabe*; Helvetia, *les Suisses*; tum inde Rætia, seu Grifones. Ac præterea juxta Danubium Provinciæ olim dictæ Vin-delicia, Noricum & Pannonia; modò Tirolium cum Baviaræ Ducatu, & parte Austriæ; nam, ut quidem probati authores scribunt, Pannonia comprehendit alteram Austriæ par-

tem, cum Carinthiâ, Istriâ, Croatiâ; quibus in eadem Pannonia accedunt Sclavonia cum parte Hungariæ Cis-Danubianæ; Bosſena, *Bosnie*; Servia & Bulgaria.

His adjacet Italia cum Illyrico, in quo Dalmatia, tum Sicilia cum aliis insulis vicinioribus.

Quod ultra reliquum est, dicitur Græcia, complectens Thraciam, seu Romaniam; cum Achaiâ, & Peloponneso, seu Moreâ; cum Thesſaliâ, Macedoniâ, Epiro, Albaniâ, cum Insulâ Cretâ *Candie*, aliisque pluribus in Archipelago conspicuis.

Dico IV. Tota Asia nunc temporum in quinque potissimum dividitur partes. Prima est Imperium Turcicum, sub quo est Natolia, in qua olim Asia minor & propriè dicta; ubi etiam Pontus, & Bythinia: Phrygia major, tum minor, seu Troas; Æolia; Ionia in qua est Ephesus; Doris; Lydia, Lycia; Pamphilia; Cilicia, nunc *Carmania*: Capadocia, Galatia. Deinde sequitur Armenia, tum major, quæ nunc *Turcomannia*, tum minor: Colchis, nunc *Mingrelia*: Iberia, & Albania, nunc *Georgia*: Syria cum Mesopotamiâ *Diarbeck*, Tigri fluvio & Euphrate comprehensa; tum Babylonia, *Caldar*. Hinc Palaestina & Arabia.

Secunda pars est Persarum, seu Sophorum Imperium, sub quo est Assyria, nunc *Cusistan*: Media, *Sarch*: Parthia, *Arac*: Persis, *Farſi*: Armusia, *Ormutz*.

Tertia est India cum Regno *Mogor*; cum aurea Chersoneso, & insulis adjacentibus.

Quarta est Regnum Sinenſe, cum Iaponiæ Insulis.

Quinta denique Septentrionales plagas tota occu-

occupans, est Tartaria, tum deserta Moschoviæ affinis, tum quæ dicitur Vetus & Magni Chami Imperium, imprimis opulenta, multisque regnis illustris, inter quæ est Cataïa, olim Serica, Tebetum, &c.

Dico V. Omissa veteri Africæ descriptione; jam in ea præcipuè considerantur istæ regiones: primò *Ægyptus*. Cui continua est ad fretum usque Gaditanum *Barbaria*, seu ora *Barbariæ*, in qua, præter regionem, quam *Barcanam* appellant; sequitur *Regnum Tunetanum*, tum *Regnum Tremisanum*, *Fessanum*, *Marocanum*, & *Darense*.

A tergo illarum regionum præter desertum *Sarra*, & amplissimam *Nigritarum* regionem est *Æthiopia*, sive interior, quæ *Abyssinorum* propria dicitur; sive exterior, in qua est *Regnum Congo*, *Monomotapæ*, *Regio Casrorum*, &c.

Dico VI. *America*, seu novus Orbis, duas dividitur in ingentes peninsulas, quæ per *Isthmum* non ita longum conjunguntur.

Altera ex illis dicitur *America Septentrionalis* & *Mexicana* à *Mexico*, quæ primaria est illius urbs. Altera est *America Meridionalis*.

In *Septentrionali* præcipuæ partes sunt nova *Francia*, seu regio *Canadensis*; ubi insignis fluvius *Sancti Laurentii*. Nec prætereundæ sunt insulæ *Terra nova* piscatione tam celebres: aut *Caput Britanicum*. Inde sequuntur *Virginia*; *Florida*; nova *Hispania*, & plaga *Mexicana* cum *Isthmo*, in quo positæ sunt famosæ urbes illæ; hinc *Panama*, ad mare *Peruanum*, atque hinc urbs *Nominis Dei* seu *Nombre de Dios*, ad mare antiqui Orbis.

In meridionali *America* primò est ora novæ *Castiliæ*; ubi & *Archipelagus* quoddam multis

distinctum insulis, inter quas est Hispaniola, seu S. Dominici, S. Christophori, Martinica, &c. Indequē usque ad fluvium Amazonum, quem & *Maragnon* vocant; est ora *Gari-bana*. Sequitur ora Brasiliæ, in qua urbes primariæ sunt Portus, seu *Baia* Sanctorum omnium, tum Pernambucus. Item est ora *de la Plata*, finiturque fluvio illius nominis, quem & Argentum nominant. Item usque ad fretum Magellanicum est ora *Chica*. Dein promontorium fortunæ, & ora *Chili* ad mare pacificum. Sequitur ora Peruana, ubi *Lima* Peruvix caput. Tum ora Australis novæ Hispaniæ, ora Californiæ, usque ad caput, seu promontorium Mendocinæ, & fretum *Anian*.

De Terra Australi nihil dico, quia est incognita.

CAP. IX. Primarias Terra civitates recensere.

INitium faciam ab Europæis, quæ reliquis numero, & dignitate non parum antecellunt; sicque illas enumerabo, varias provincias percurrendo, ut Gallicum nomen cum Latino adjiciam, ubi saltem à Latino multum discrepabit: itaque

Dico I. In majori Britannia sunt Londinum, *Londres* in Anglia, *Eboracum* *Yorch*. In Scotia *Edimburgum*. *Dublinum* in Hybernia.

Hispaniarum caput est *Madritum* in Castilia. Tum inde *Toletum*: *Hispalis* *Seville* in Andalusia. *Cæsar-Augusta* *Sarragosse*, in Arragonia: *Barcino* in Catalonia, portus maritimus. In Regno Portugalliæ, seu Lusitaniæ est *Olyssipone*, *Lisbone*, portus mar.

Gallia seu *Francia* caput est *Lutetia*, seu *Parisi*, *Paris*: *Rothomagus* *Rouën*, in Normannia.

Lug-

Lugdunum, *Lion*. Tholosa in Occitania, seu Languedochio. Burdigala, *Bordeaux* in Aquitania, *la Guyenne*. Ambianum, *Amiens* in Picardia.

In Belgio. Antverpia, *Anvers*. Amsterodamum *Amstredam* in Hollandia. Leodium, *Liege*.

Ad Germaniam attinent Treviri, *Treves*. Moguntia, *Mayence*. Colonia, *Cologne*. In Austriâ, est Vienna. Monachium, *Munich* in Bavaria. Herbipolis, *VVirtsbourg* in Franconia. In Saxonia Magdeburgium: Dresda, *Lipsia* in Misnia, Erfordia in Thuringia ditionis etiam Saxonicæ. Brandenburgum, in Marchia Brandenburgensi. In Pomerania, Stetinum. In Daniæ Regno, *Danemarch*, Hafnia, *Copenhagen*; in insula Selandia ad fretum Sunticum, *le Sund*; In Noruegia est Nidrosia, *Drontheim*. In Sueciâ Stockholmium.

In Polonia est Cracovia. Gedanum, seu Dantiscum *Dantzic* in Prussia, seu Pruthenia. Warsavia; Smolenscho in Lithuania.

Moschovitici imperii caput est urbs Moschovia. Tartariæ Precopensis urbes sunt Precops, Caffa; in Taurica Chersoneso.

In Hungaria est Alba Regalis, Presburgum, Buda, Iavarinum *Kabe*; *Iavarin*. In Transylvania Cinium *Hermanstad*. In Servia, Alba Græca *Belgrade*. In Dalmatia Sicum *Sebenico*. Ragusa, olim Epidaurus; ad mare Adriaticum.

In Græcia, Constantinopolis. Thessalonica *Salonique*. In Albania Croia *Croie*. Dyrrachium *Duras*, vel *Durazzo*.

In Italia sunt Roma Sancta: Neapolis nobilis: Venetiæ opulentæ: Genua superba: Mediolanum magnum: Florentia pulchra: Bononia pinguis: Ravenna antiqua: Patavium doctum *Padoue*. In Pedemontio *Piedmont*, Taurinum *Turin*. Sedes Ducis Sabaudi.

In Insulis Italia. Panormum *Palermæ*, in Sicilia; Item & *Messana Messinæ*. *Calaris Cagliari* in Sardinia. *Bastia* verò in Corsica.

Dico I I. *Aliæ* urbes insigniores sunt *Hierusalem* in *Palæstina*. *Babylon Bagdet*. *Hispahamum Aspaan* in *Perside*: *Agra* *Mogoris* Regis sedes, in *India*: *Goa* *Indiarum* maritimarum caput. In *Tartaria* est *Cambalu*. In *Sina* est *Nanquinum*, tum *Pequinum*; omitto quas enumeravimus, oras maritimas perlustrando.

Dico I I I. In *Africa* præter oras maritimas jam à nobis peragratas est *Memphis*, modò *Cairum* in *Ægypto* ad *Nilum*, *Matocum* in *Barbaria*, *Amaram* in *Æthiopia*.

Dico I V. In *America*, est *Mexicus*, quæ regioni nomen dedit. *Panama*; & urbs *Nominis Dei*. *Pernambucus*, in *Brasilia*. *Lima* in *Peruvia*, &c.

C A P. X. *Fluvios Terra totius insigniores enumerare.*

IN *Anglia* est *Tamesis la Tamise*, ubi *Londinum* Regni caput.

In Hispania celebres sunt 1. *Iberus l'Ebre*, qui nomen fecit regioni, *Cæsar Augustam Sarra-gossæ*; & *Tortosam rigans*. 2. *Tagus le Tage*, *Toletum* præterfluens, & mari sese ad *Lisbonam* committens.

In Gallia sunt 1. *Sequana, la Seine*: *Parisiis* maximè, ac *Rothomago* illustris. 2. *Ligeris, la Loire*; *Aureliam, Orleans*; *Turones, Tours*; aliasque non dissimiles præteriens. 3. *Rhodanus, le Rhosne*; *Arari, la Saone* sese immiscens ad *Lugdunum*. 4. *Garumna, la Garonne* ad quem fluvium sita est *Tholosa* in *Languedochio*; tum *Burdegala Bordeaux*, in *Aquitania*. *Somona*
la

la Somme, Corbiam, Ambianum *Amiens*, tum Abbavillam alluens.

Belgium præterfluunt Scaldis *l'Escault*; Mosa *la Meuse*: quem fluvium illustant ex pluribus aliis: fanum S. Michaëlis, *S Miel*: Virdonum: Stenaium, *Stenay*: Mosonium, *Mousson*: Sedanum, *Sedan*: Meserix, *Maisieres*: Carlomontium, *Charlemont*: Dionantum, *Dinan*: Namurcum, *Namur*: Leodium, *Liege*: Tajeetum, *Maestric*: Ruremunda, *Ruremonde*: Venlo, &c.

Ad Mosellam sunt Metæ, *Metz*: Mussipontum, *Pont à-Mousson*: Theonvilla: Treviri, *Treves*, &c.

In *Germania* Rhenum accolunt Moguntia *Mayence*: Colonia, *Cologne*, pluresque aliæ per insignes urbes, & oppida.

Ad Moenum, *le Mœin*, est Francofurtum. Herbipolis *VVirsbourg* in Franconia. Inde *Vifurgis le Vesper*. Amasus *l'Embs*. Albis *l'Elbe*, ex Bohæmia oriundus, trajiciensque Saxoniam, Misniam, & plures ditionis Saxonicae urbes. Nequid dicam de Odera *l'Oder*, aliisque minoris nominis fluviis.

Ad Meridionalem Europam, Germaniæ finibus egressus Danubius, *Austriâ*, & aliis Germaniæ decursis provinciis, præterlabitur Hungariam, ut tandem in mare Euxinum profundatur.

Græcia fluvios poëtis olim decantatos habet complures; puta Hebrum, *Strymona*, Peneum, *Ismenum*, &c.

Italia est Padus *le Po*, olim Eridanus, longam illius regionis partem trajiciens: Tyberis, solâ quam rigat Romana civitate clarus.

Ut quod reliquum est Europæ ad Septentrionem absolvam, Poloniam interfluit *Vistula*

le Veissel, cujus ripas nobilitant Cracovia, Varſavia; quâ in urbe celebrari ſolent regui comitia.

Boryſtenes, vulgò *Nieper* aut *Dnieper* peragrâtâ Lithuaniâ, & Moſchoviâ, multis adauctis aliis fluminibus in Pontum Euxinum devolvitur: dicitur autem fluviorum Europæ maximus poſt Danubium.

Inde eſt *Volga*, dictus etiam *le Rha*, qui poſt multos, eoſque longiſſimos flexus, multis quoque in ſe receptis aliis fluminibus, miſcetur mari Caſpio.

Atque ultra tandem eſt fluvius *Oby* in Aſiatica Tartaria celeberrimus.

Alioquin ex Aſiæ fluviis primas tenent in Oriente tum *Indus*, qui nomen regioni fecit; tum *Ganges*.

Deinde verſus caput Aſiæ ipſius eſt *Tigris*, ad quem olim condita erat *Ninive*, nec inultum ab eo diſtabat ſedes Imperii quondam Aſiatici, ſive apud *Aſſyrios*, aut *Chaldæos*, ſive apud *Medos*, aut *Perſas*.

Tigri jungitur tandem *Euphrates*, duoque iſti *Meſopotamiam* definiunt, cui adjacet *Babylonia* regio, cum urbe *Babylone*.

Nihil dico de *Iordane* fluvio *Palæſtinæ*; quem inter alios dignitate principem effecit Chriſti Domini præſentia.

Africa immenſos continet fluvios, quos inter ab omni antiquitate nobiliſſimus eſt *Nilus*, ſeptem oſtiis in *Mediterraneum* ſeſe exonerans; redditque ſœcundiſſimam *Ægyptum* ſuâ inundatione, quæ 40 diebus creſcit, totidemque decreſcit à die circiter 17. Junii, uſque ad 7. Octobris. Apud hunc fluvium condita eſt *Memphis* *Ægypti* caput, quod nunc dicitur *Cairum*,

Cairum , urbs stupendæ magnitudinis ; cui secunda est in illis regionibus Alexandria , olim splendida atque opulenta , nuncque etiam celeberrimum Emporium.

Si Nilum exceperis , alios magnitudine superat Niger , cujus accolæ & Nigritæ vocitantur. Hunc sequitur fluvius Senaga , tum Gambræ ; & alii.

In Orbe Novo , seu America, perinsignis est fluvius S. Laurentii ad partes Americæ Septentrionales, & ad Novam Franciam.

Aliunde enim ad Americam Meridionalem est fluvius argenteus , seu *de la Plata* , tum alter qui dicitur Amazonum & *Maragnon*.

C A P. X I. *Terræ descriptio respectivè ad cœlum ; & de variis ejus incolis.*

D Vobis modis considerari potest Terra-queus Globus, ipsiusque regiones. Primò, quatenus inter se ordinem habent. Secundò, respectivè ad cœlum ; nam per respectum ad varias cœli partes, Cœlestibus respondentes sollet dividi. Quo pacto ,

Dico I. Terra dividitur quinque in Zonas ; tum varia in climata , quemadmodum jam explicui in *Traſſatu de Sphæra cœlesti*, cap. 2. sub finem.

Notandumque est , nullam esse ex iis Zonis , quæ undequaque incoli non possit. Probat 1. De Torrida ; quia de facto illam habitant in Asia Indi , in Africa Æthiopes , in America Brasilienses, & Peruviani. Scribitque Iosephus à Costa lib. De natura novi Orbis, non esse in mundo regionem temperatiorem Peruviana. Cujus quidem experientiæ rationes affert 1. Quia cùm noctes diebus sint ibi ferè æqua-

æquales, nocturnum frigus diurnum calorem temperat. 2. Illa regio pluviis abundat ex vaporum copia, quæ à mari circumfuso educitur. 3. Temperatur maximè à ventis regionem illam perflantibus. Probatur 2. De Zona frigida ex Historia Olai Magni; Narrantque Hollandi recentiores, qui ad polum arcticum navigarunt, frigus illius regionis variis ex causis particularibus leniri. Neque obstat nox quinque, vel sex mensium, non enim adeo est obscura, quin semper lucis aliquid affulgeat. Imò per 4 ex illis mensibus nocturnis, est perpetuum crepusculum. Item quæ Dei in illos est providentia, copiam habent lignorum, non tantùm quibus arceant frigus, sed etiam quibus aptissimas faces conficiant.

Dico I I. Incolæ Terrarum ratione umbræ quam ex oppositione ad Solem profundunt, triplicis sunt generis. Primò enim sunt Amphiscii, ut qui Zonam Torridam inter utrumque Tropicum habitant: iis enim umbræ Meridianæ diversis anni temporibus modò in Austrum, modò in Septentrionem porriguntur. 2. Sunt heteroscii, qui versùs unum duntaxat polum umbram Meridianam projiciunt: ut in Zona Temperata. 3. Denique sub polis sunt periscii, quibus umbra in orbem circumagitur.

Dico I I I. Ratione situs aliquo modo oppositi, sunt etiam triplicis generis incolæ, quos licet contemplari *in figura 7 tabula 4.*

Primò enim sunt pericæci, qui sub eodem parallelo, & Meridiano, punctis tamen ejusdem paralleli diametraliter oppositis habitant. Vt *e.* & *f.* vel ut *c. d.* aut *g. h.*

2. Antæci, qui sub parallelis utrinque ab Æquatore æqualiter distant, & sub eodem
meri-

meridiano habitant. Vt *e.* & *g.* vel *f.* & *h.*

3. Denique sunt Antipodes, seu Antichthones, qui è diametro Terræ opponuntur; & consequenter sub eodem sunt Meridiano, & parallelis utrinque ab Æquatore aequaliter distantibus, ut *e* & *h.* vel *g* & *f.* Hi contrariis semper temporibus habent diem, & noctem. Tum qui habitant extra Zonam Torridam, habent quoque contrariis temporibus æstatem & hyemem.

CAP. XII. *Præxes Geographica.*

Pures habet utilitates Terrarum facta descriptio in Globo, quàm in planâ superficie. Priund, quia maiorem habet cum ipso Terræ Globo similitudinem. 2. In Globo facilè investigari possunt locorum distantia; quemadmodum ostendam postea. 3. In Globo cognosci potest commodè situs cœlestis cujuscunque loci, nempe sub quo parallelo existat, & quam habeat poli elevationem: quas habeat stellas aut verticales, aliasve conspicuas, aut quæ sint perpetuæ occultationis. Item, quàm longa, aut brevis sit alicui loco dies, pro dato anni tempore; aliâque id genus.

Probl. I. *Designare locum civitatis alicujus in Globo Terrestrî.*

Suppono in illo Globo esse designatos Mundi Meridianos, ad singulos saltem gradus: Tum pariter & descriptos singulos parallelos. Item

Suppono tibi esse notum longitudinis, tum latitudinis gradum civitatis illius. *Exempli causa.* Habeat 20 gr. longitudinis, latitudinis autem

autem 40. Quære in Globo 20 Meridianum , & quadragesimum parallelum ; tum in intersectione duorum ejusmodi circulorum statues esse quæsitum locum.

Probl. I I. Invenire duorum ejusmodi locorum, seu civitatum distantiam.

Praxis. Extende circinum ad utrumque istum locum in Globo designatum : deinde illam extensionem applica ad circulum æquinoctialem descriptum in eodem Globo , ut inde intelligas quot gradibus duæ illæ civitates distent inter sese. Ac tandem gradus inventos multiplica per 30. sic enim assequeris numerum leucarum isti spatio æquivalentem.

Probl. I I I. Diversa climata definire.

Suppono Clima esse spatium circa Mundum intra duos parallelos , in cujus extremo versùs polum ; dies anni maxima , seu dies Solstitialis longior est horâ dimidiâ , quàm in altero extremo ad Æquatorem. Diversitates autem illas dierum Solstitialium per semihoras crescentium pro singulis Orbis Terrestris partibus habebis beneficio Globi Terrestris materialis , supposita praxi de invenienda quantitate diei artificialis , pro quovis anni tempore , quam exposui in *Chronologia cap. ultimo , problemate XIII.* Sic enim agitare debes Globum illum , dum invenias arcum diurnum semihorâ longiorem , quàm qui est jam assignatus ad Æquatorem. Atque illo quidem invento, observa, quænam illi respondeat poli altitudo ; tum statues, istud Clima definiendum esse ad illum parallelum in Mundo, sub quo reperitur talis poli altitudo. *Exempli causa ;* In urbe Agra Regni Mogo-

Mogoris, dies solstitialis reperitur esse horarum
13 cum quadrante sub altitudine poli graduum
24 cum minutis 46.

Hierosolymæ in Palæstina est hor. 13 cum
dimidia, sub altitudine gr. 27 minut. 36.

Alexandriæ in Ægypto est hor. 14 sub alt.
grad. 30 & m. 47.

Olyssipone in Lusitania est hor. 14 cum di-
midiâ, sub altit. gr. 36 m. 30.

Madriti hor. 14 cum 3 quadr. sub alt. g. 39.

Romæ hor. 15 cum quadrante, sub alt. gr. 43.
m. 32. uti & Constantinopoli in Græcia.

Lutetiæ in Gallia est hor. 15 & semis. sub
alt. gr. 45 m. 29.

Viennæ in Austria hor. 15 cum 3 quadr. sub
alt. gr. 47. m. 20.

Coloniæ in Germania est hor. 16. sub alt.
gr. 49.

Pragæ in Bohemia hor. 16 cum quadrante
sub alt. gr. 50. m. 33; uti & Cracoviæ in Po-
lonia.

Londini in Anglia est hor. 16 & semis, sub
alt. gr. 52.

Amsterodami in Belgio est hor. 16 cum 3
quad. sub alt. 53.

Gedani in Prussia est hor. 17 sub alt. gr. 54.
m. 30. uti & Vilnæ in Lithuania.

Smolenski in Polonia hor. 17 cum quad. sub
alt. gr. 55. m. 30.

Moschoviæ in Russia, Imperii Moschovitici
Provincia, est hor. 17 & semis sub alt. gr. 56.
m. 37. perinde ac Edimburgi in Scotia.

Hafniæ in Dania est hor. 17 cum 3 quad. sub
alt. gr. 57. m. 30.

Stocholmiæ in Suecia est h. 18 sub alt. gr. 58
m. 30.

Apud Orcades supra Scotiam est hor. 18 & semis, sub alt. gr. 60.

Vassæ in Finlandia 20 hor. sub alt. gr. 64.

Tornæ in Bornia Sueciæ hor. 22. sub alt. gr. 66.

Volingæ in Moschovia hor. 23 sub alt. gr. 66. m. 20.

Holæ in Islandia ad circulum Arcticum hor. 24. sub alt. gr. 66 m. 30.

Notabis verò denominari solere Climata, non tantum ex numero, *primum, secundum, &c.* Sed potius ex illustrioribus locis, quæ in iis reperiuntur, & per quæ dicuntur traduci. Quemadmodum apud veteres ducebatur *per Meroë, per Alexandriam, per Rhodum, &c.* Atque ita nunc illa etiam designare possumus per loca, quæ nostris temporibus insigniora sunt. *Exempli causa. Per Goam in India: per Nicosiam in insula Cypro sub alt. gr. 33. m. 30. per Panormum in Sicilia sub alt. gr. 39.*


Notandumque est eas urbes quas repereris ejusdem esse altitudinis polaris cum superioribus, revocari debere ad eadem Climata.

Hic apponenda sunt Tabule.

DE MVNDO TAB. I.

Vetus

Systema






TABVLA II.

Systema




Tychonis




<i>Saturnus.</i>	♄	<i>Aries</i>	♈	<i>Libra</i>	♎
<i>Iuppiter</i>	♃	<i>Taurus</i>	♉	<i>Scorp.</i>	♏
<i>Mars</i>	♂	<i>Gemini</i>	♊	<i>Sagit.</i>	♐
<i>Sol</i>	☉	<i>Cancer</i>	♋	<i>Capr.</i>	♑
<i>Venus</i>	♀	<i>Leo</i>	♌	<i>Aqua.</i>	♒
<i>Mercurius</i>	☿	<i>Virgo</i>	♍	<i>Pisces</i>	♓
<i>Luna</i>	☾				



TABVLA III










IN ADJUT



6
4
5
(

TABULA III





TABVLA

III

Meridi.

Meridi.

1



2



3



4



6





7

8



9










1757

1757

1757



TABVLA VII.



THE FIRST

Part

OF THE

History of the

People of the

Islands of the

South Sea

by Captain James Cook

and the



Surgeon James King

in the Years 1769, 1770, 1771

and 1772

Vol. I. Part I.

TABULA VIII.












TABULA IX.






PRO

OPTICA.



155150 603



O P T I C A.

P R Æ F A T I O.

PHYSICI quidem per se est instituti, visus contemplatio. Et verò in Tractatu de Anima sensitiva, disput. 3. ubi de sensu videnti, naturam potentia visiva, tum naturam Luminis, ac Coloris, quæ ipsius objectum constituunt, de more prosecuti sumus. Cum tamen ea, quæ ad Visionem spectant, sæpe rationibus Geometricis explicentur, ideo Mathematicis Disciplinis adjungi solet hæc tractatio, quam à Gracæ voce, Opticam nominant: tresque in partes, pro diverso genere visionis tribuitur.

Prima, servato facultatis totius nomine communi, vocatur Optica, de visione directa, seu quatenus lineis rectis in rem propositam tendit.

2. Est Catoptrica de speculis, seu de visione reflexa, beneficio speculi ad oculum imagines remittentis.

3. Denique est Dioptrica de visione refracta, quando videlicet rerum species per dissimilia in densitate diaphana transmissæ, non rectis, sed quasi infractis radiis ad oculum diriguntur. Huc addunt alii eam, quam speciali nomine appellant Perspectivam, quæ modum tradit rerum delineandarum, juxta rationem & proportionem quâ sunt oculis aspectabiles; spectatque ad Picturam. Quæ autem Philosophia, ac Mathematicæ Tyroni instituendo sufficiant, paucis capitibus aperio.

METHODVS

ET

INSTITVTIO

MATHEMATICÆ.

OPTICA.

CAP. I. Visionis Organum.



HÆ partes numerari imprimis solent, quæ Oculum constituunt. Nempe sex tunicæ, humores tres, nervi duo, qui visorii seu optici appellantur: ac denique muscoli septem: quæ in apposito schemate *fig. 1.* contemplari commodè liceat: ne quid dicam de adipe, & glandulâ, ex quibus etiam bulbus oculi compactus cernitur. Quia verò ex ipsis nervis prodire videntur oculi, ut inde rei hujus tractandæ faciam initium:

Dico I. Nervi optici producuntur ab interiori parte cerebri, indeque aliquantulum progressi conjunguntur, tum rursus ab invicem discedunt, ita ut referant aliqua ratione formam X. ut ostenditur in *2. fig.* Tabula huic Tractatui destinata, & initio appositæ.

Notabis autem utrumque hunc opticum nervum, quasi vestiri tunicâ duplici, quarum altera est particula illius membranae cerebri, quam vocant *piam matrem*; altera verò est *dura matris*; à quibus quidem tunicis, & ab ipsis nervis

opticis

opticis prodeunt tunicae variae, ex quibus oculi constant. Nam

Dico II. Ex ipsa nervi substantia quasi dilatata, & quasi filamentis variis intertexta per modum retis, prodit tunica, quæ idcirco *Reticularis*, seu *Retina* appellatur. Tum 2. ex pia matre oritur ea, quæ à colore acini uvæ nigræ, nominatur *Vvea*: sicque involvit oculum, ut tamen in anteriori parte foramen habeat humori crystallino directè respondens, per quod veluti per fenestram, suscipiantur species ab objectis transmissæ, vocantque *pupillam*: quanquam alii cum Aristotele pupillam etiam sumunt pro ipso Crystallino. 3. Ex dura matre propagatur ea, quæ à duritie simul & diaphaneitate solet appellari *cornea*, omnemque ambit oculum. Quatenus tamen continuatur, vestitque posteriorem oculi partem, ab aliis vocatur *Sclerotica* & *consolidativa*. Huic autem inducitur totum fermè oculum vestiens, quæ vocatur *adnata*: nasciturque à pericranio, cum ipso cranio intra propriam cavitatem totum oculi corpus conjungens, quamobrem nominatur & *conjunctiva*. Quatenus autem ad anteriorem oculi partem ferè omnem extenditur usque ad Iridem, vocatur *album oculi*; habetque aliquas venulas arteriasque exiguas, sicut & *Vvea*, quibus sanguinem alimentitium excipit.

Notabis igitur in ista tunica existere foramen; per quod pupilla, & pars *Vvæ* retegitur in modum circuli, qui circulus ob varios colores nominatur *Iris*; dicimurque oculos habere vel nigros, vel admixta viriditate glaucos, vel cæsius, id est coloris, cœlestis, ubi aliquis ex iis coloribus in Iride veluti prædominatur.

Dico III. In oculo tria sunt humorum genera. Primus ac præcipuus est *glacialis* seu *crystallinus*, cujus quidem, authore Fernelio, forma anterior lentis in morem compressa esse solet; posterior verò magis Sphærica. Hunc cingit tunica instar telæ araneæ tenuissima, ideoque vocata *arachnoides*. Secundus est in posteriori parte, quem à similitudine vitri fusi, vocant *vitreum*; contineturque tunicâ quam *hyaloidem* nominant: Huic autem humori *crystallinus* quasi mediâ sui parte immergitur. Superestque tandem tertius ille humor in anteriori parte sub corneâ tunicâ, & aliis adjacentibus comprehensus, quem *aqueum*, & ob similitudinem cum ovi albumine, *albugineum* nominant; quo utroque humore, tanquam molli strato *crystallinus* utrinque sustinetur, humectaturque, ne ab interiori calore nimio patiatur offensam.

Ipse verò *crystallinus* utrinque per latera quasi appenditur, annectiturque Vvæ, beneficio fibrarum, quas vocant *processus ciliares*. Ac per istas quidem fibras, vel dilatur, vel constringitur, prout exigit objecti distantia; quemadmodum postea explicabimus. Item apparet esse nigri coloris, ob interioris regionis obscuritatem, & propter uveam retro positam.

Notandumque est 1. ex dictis, oculos originem trahere ex cerebro, cum ab eo prodeant tanquam à communi sentiendi principio non modò nervi, & spiritus visorii, sed etiam præcipuæ ex membranis, quibus constituitur.

Not. 2. Ex Laurentio, membranas illas revocari posse ad sex, siquidem cornea & sclerodes, quomodo uvea & choroides confundi possunt, solâque hîc est disputatio de nomine, re salva atque integra.

Dico

Dico I V. Singuli ex oculis habent musculos 7: quorum duo oculum ipsum movent sursum, ac deorsum; duo dextrorsum, ac sinistrorsum; duo circumferunt; atque uno denique sustinetur, ut obtutum figat.

Omitto reliquas quæ dicuntur minùs præcipuæ oculi partes; ita enim singuli habent binos angulos, quorum qui internus vocatur, & canthus, ad nares positus, continet glandulam, quâ humor à cerebro defluens excipitur, unde fluunt lachrymæ. Alioquin consumptis illis glandulis oritur lippitudo perpetua.

Adipem adjecit Natura, ut tanquam lana obvolutus oculus, molliùs intra suam orbitam recumberet, movereturque, quo etiam muscoli infarcirentur. Quid enim dicam de aliis oculi partibus, quæ dicuntur exteriores. Palpebræ positæ sunt contra improvisos luminis, venti, fumi ac pulveris incursus; adde quod necessariae sunt ad justiorem radiorum directionem. Cilia & supercilia instituta sunt ad oculorum præsidia, aliasque utilitates, quas recensere hoc loco foret supervacaneum.

C A P. II. *Quomodo, & qua in parte oculi, fiat visio.*

DIco I. *Contra Platonem, & Galenum*, Visio non fit per extramissionem aut luminis alicujus, aut spirituum visualium ab oculo ad objectum. Prob. Quia explicari non potest, quæ ratione, ubi coelum intuemur, tanta vel luminis, vel spiritus animalis copia ex oculo ad tantam distantiam, & tam immensa spatia, tam in instanti profundatur. Quare

Dico II. *Ex Aristotelis doctrina*, Visio fit per intus-susceptionem specierum ab objecto in ocu-

lum transmissarum, quæ potentiam visivam de se indifferentem determinant; ut habetur in *Phyfica*, *Disput. de Specie intentionali*. Neque verò frustra est illa colorum intentionalium emanatio, quam fieri ab objectis experimur. Item neque aliunde ratio visionis reflexæ, aut refractæ peti potest, &c. Porro

Dico III. Sedes potentiæ visivæ, & visionis non est concursus nervorum opticorum. Nam ed directè ferri ab objecto species nequirent. Item nulla est ratio, cur istud asserant adversarii, ne, inquiunt, explicari non possit, cur objecto viso per duplicem oculum, idcirco non fiat geminata visio. Nam Vesalius scribit se vidisse hominem, qui nervos opticos ab invicem omni ex parte disjunctos habuerat, cum tamen, quandiu vixit, illa difficultate nunquam laborasset.

Item, 2. Potentiæ visivæ & visionis sedes, non est humor crystallinus. Ea enim est in parte, quæ potest ab objectis recipere species ordinatas, easque terminare. Atqui in humore crystallino nec terminari possunt, quandoquidem est corpus perfectè diaphanum; neque ipsum permeant, nisi confusè. Quare cùm illa oculi pars sit organum visionis, in qua species objectorum vicariæ distinctè recipiuntur, jungunturque spiritibus visoriis;

Dico IV. Statuenda est potius in Retina; non modò quia commodius, & majori copia recipit spiritum animale ad visionem necessarium, cum exeat immediatè à nervo optico; sed maximè quia species objectorum in ea tantùm sistuntur; & in ea tantùm distinctionem inter se, atque ordinem servant. Certè res per proportionem hîc se habet, ut in illa celebri experientia,

rientia, quam *figura 8.* designavimus, ubi per foramen lente vitrea instructum species objectorum transmittuntur intra cubiculum clausum, & in appensa charta recipiuntur, terminanturque; cum in ipso foramine ad quod omni ex parte objecta simul concurrunt, confundantur: quod à pari sentiendum est de crystallino, & de Retina: neque etiam alioquin explicari possent multa, quæ passim occurrunt in opticis, ut suis locis videbitur. At

Not. 1. Species illas, etsi ab objectis profundantur undequaque in Sphæram, juxta leges omnium agentium naturalium; non excipi tamen ab oculo, nisi sub forma quadam conica, quam vulgò appellant conum opticum; cujus basis est in oculo, vertex autem in objecto; nihilque videri nisi sub ejusmodi cono optico, cujus quidem axis est illa linea, quæ à vertice ducitur perpendiculariter ad basim; quod maximè observari debet, cum vulgò dicant visionem distinctam non fieri nisi ad illum axem. Item

Not. 2. Objecti partes, aut potius, ut vulgò loquuntur, puncta singula veluti radiare per lineas rectas, unde in oculo ad oppositas Retinæ partes terminentur. Quamobrem ubi omnes illi radii ab objecto undequaque ad pupillam oculi confluunt, in ea sic dicuntur decussari, & divaricari; tum divergere ad propria & directè opposita Retinæ puncta, ut quæ sunt superiora in objecto, terminentur in partibus Retinæ inferioribus; & è contra; uti videre est *in fig. 3.* Quamobrem si laminam chartaceam perforatam oculo propiùs admoveris, per quam duo luminaria distantia, aut quippiam aliud perspexeris; si laminam aliam interponas à dextris,

illa sinistram luminare teget. At quanvis imago objecti hac ratione situ inverso depingatur in oculo, non ideo tamen res videntur situ inverso; quia potentia concurrens ad visionem non apprehendit objectum nisi secundum lineas, quibus partes oppositæ radiant in Retinam, & ad eam terminantur. Quinetiam ut statuatur de omnibus, & singulis objecti punctis, quod explicatur de aliquo uno:

Not. 3. Punctum istiusmodi, quod vulgò appellant *punctum Opticum*, etsi more agentium naturalium in Spharam agat, unde & videri undequaque potest; in oculum tamen non ingredi nisi sub radiatione conica, cujus apex est in puncto illo, basis autem in superficie oculi, uti videre est in *fig. 5.* Sed

Not. 4. Radios ex puncto illo profusos in oculum non pervenire ad Retinam, nisi cum refractione. Nempe franguntur in ingressu oculi, & maximè in crySTALLINO, quia sic incurrunt in medium diversæ densitatis ab aëre: nec consequenter à crySTALLINO transmitti ad perpendicularem refractos, & cum axe conici sui coeuntes in uno retinæ puncto. Quare

Not. 5. Hic duos omnino conos effici; quorum alter est externus & directus, cujus scilicet apex est in puncto optico, basis autem in oculo; alter verò est internus & refractus, qui basim quidem communem habet cum externo, seu directo; sed verticem profert Retinam versùs: Duoque illi coni tum directus, tum refractus, constituunt irradiationem, seu figuram illam totalem, quæ à puncto visibili, seu Optico producitur usque ad punctum Retinæ. Atque istam quidem figuram vocant *opticum penicillum*, per analogiam cum penicillo pictoris,

ris, quia beneficio illius irradiationis, tanquam penicillo quodam objectum sese in oculo depingit. Porro illa doctrina supposita, ut statuam de illo genere modi, quo fit visio:

Dico V. Fieri in Retina per picturam objecti, uti exhibuimus *in fig. 3.* Sicque omnino depingi necesse est, qua proportionem objecta externa depinguntur in charta, juxta experientiam jam laudatam, quam designavi *in fig. S.* ut patet ex dictis.

Notandumque est idcirco ad Retinam confluere maxime spiritus animales per nervum opticum, à quo propagatur ipsa Retina. Sed

Not. 2. Nervi optici orificium ad latus duntaxat, non autem in medio Retinae esse dispositum; ut patet in figura descripta, ne pars imaginis, quæ producitur ab objecto perpendiculariter opposito, incideret in illud orificium; atque hoc modo pictura ipsius imaginis turbaretur. Porro

Notabis 3. Visionem illam esse vel perfectam, vel imperfectam: Perfecta dicitur quæ clara est, & distincta; unde scilicet res ita repræsententur, ut ab alia quacunque facile discerni possit. Contra autem est de imperfecta, & confusa. Insinuaturnque est supra ad Assert. 4. quemadmodum visio non fiat distinctè, nisi ad coni visualis axem oculo perpendicularem; cum reliquæ objecti visi partes ed cernantur magis confuse, quod longius recedunt à puncto axis visualis, seu optici. Eamque etiam ob causam, ut distinctè res aliqua secundum omnes partes cognoscatur, ad eas partes singulas debemus applicare axem visorium; qua ratione legendo librum, lineas syllabatim percurrimus. Item eam quoque ob causam res minu-

ta, quæ in pavementum excidit, difficilius à nobis reperitur, quia non ita facile axis visorius in eam cadere potest. Confusa autem est visio, quando species in organo recipiuntur sine objecti pictura distincta, & clara; vel quando objectum in diversis retinæ partibus depingitur, ut dicam postea.

C A P. III. *Conditiones ad visionem ex parte organi.*

Dico I. Ad visionem perfectam requiritur oculi sanitas: alioqui prava ejus affectio tam præstantem hanc animæ sensitivæ operationem infestat. Vt Glaucoma, quod ajunt esse malum inmedicabile; ubi scilicet humor crystallinus nativum colorem exuit. Item suffusio, nempe humoris concretio quædam à cerebro delapsa, qualis est fluxus flavæ bilis in ictericis; vel sanguinis in ophtalmicis. Item si cornea durior densiorque evaserit, ut in senibus, obsistet radiis visibilibus. Et sic per proportionem de aliis.

Suppono verò ex doctrina capitis superioris; visionem fieri per picturam objecti in Retina, cui subtenditur Choroides & Vvea, ut ipsam Retinam firmet, foveatque; tum ut sistat species, lucisque ingressu nimio interdicat, nigredinis sibi inditæ beneficio. Atque his suppositis;

Dico II. Pupillæ officium est sic admittere intra oculum objecti species ac veluti radios, ut facta eorum decussatione, ad diversas Retinæ partes destinentur, unde consequenter existat objecti pictura legitima. Quare

Not. 1. Eam ob causam pupillam, quam diximus esse foramen Vvæ, vocari fenestram oculi; estque in hominibus formæ rotundæ; in multis aliis animantium generibus, ut in equis,

equis, & felibus formæ oblongioris. Item

Not. 2. Eam habere vim Sphincteris, qua dilatari possit, aut constringi, non quidem pro arbitratu, sed impellente necessitate. Vbi enim lux tenuior fuerit, dilatatur ut magis affluat: contra autem si vehementior offendat oculos, coarctatur, ut minùs subintret. Imò si pupillæ constrictio ejusmodi non sufficit impediendo majori lumini, connivent oculi demissis palpebris, ut ea ratione debilitatum lumen offensam nullam inferat, speciesque intus susceptas non diluat; cui incommodo sunt obnoxii myopes; id est, qui visum obtusum, seu breviorrem habent.

Not. 3. Vim illam dilatandi & coarctandi sese, non esse à musculo annulari, qualis est musculus Sphincteris, sed à virtute ipsius membranæ propria; cujusmodi etiam videtur reperiri in corde pro diastole & systole. Vel certe, ut habet Riolanus, adjectus est illi foramini circulus quidam membranofus, qui de facto scapelli cuspidè orbiculatim abscinditur; quod etiam in oculo ebullito manifestiùs deprehenditur. At probabilius est in ejusmodi circulo positam esse vim illam, unde pupilla contrahitur, dilatatur-ve.

Dico III. Ad pupillam præstò sunt humores, quos inter præcipuum locum obtinet Crystallinus. Horum autem utilitas est, ut collectis objectorum radiis, & in sua puncta ritè destinatis, picturam efficiant saturiorem, vegetioremque; tum, quod alii docent, ut aspectus non modò longiùs, sed etiam latius pateat ductis radiis lateralibus pyramidis opticae, qua de re postea; tum denique hunc usum habet Crystallinus, ut modò adducat, modò longiùs

producat apicem coni refracti, unde formetur distincta visio.

Notandum enim est 1. Tunc solùm fieri visionem distinctam, cum apex coni refracti incidit in Retinam, *ut in fig. 5.* Alioquin si apex ille coni refracti ultra Retinam tendat, *ut in fig. 4.* Tunc Visio est tantùm confusa: sic enim idem objecti visibilis punctum in diversis Retinæ partibus, per diversos radios depingitur. Item fit etiam visio solùm confusa, ubi apex coni refracti est citra Retinam, magisque accedit ad Crystallinum; *ut in fig. 6.* Tunc enim ab illo apice, seu puncto concursus divergunt radii puncti ejusdem visibilis in diversas Retinæ partes, ideoque pictura illa fit latior & dilutior. Certè, ut jam monui, perinde per proportionem hîc contingit, ac in charta clausi cubi- culi, juxta experientiam jam supra citatam. Nam objecti pictura tunc in ea charta est distincta, quando justam servat distantiam à foramine, & lente vitrea: alioquin penitus confusa redditur, si vel propiùs admoveatur, vel remo- veatur longiùs. Quare

Not. 2. Oculum sese componere ad perfectam visionem, tum per motum pupillæ, illam vel contrahendo, vel dilatando: tum etiam maxime per crystallinum, hunc vel dilatando, ac veluti complanando; vel conglobando, ut justam tribuat distantiam vertici coni refracti; is enim est effectus crystallini, perinde ac lentis vitreæ, prout diversas ejusmodi formas accipit. Quam ob causam Natura crystallinum filamentis quibusdam, quos processus ciliares vocant, quasi vinculis adstrinxit, ut eorum beneficio contraheretur dilataretur-ve pro rei exigentia. Vt ergo lens vitrea, quod fuerit globosior,

fior, magis ad se contrahit apicem conï refracti, ita Cryſtallinus globofior, illum quoque retrahit citra Retinam, efficitque penicillum breviorẽ; quod etiã contingit, ſi abundet humor albugineus, unde figuram omphaloptræ veluti aſſequatur. Quamobrem ut curetur iſtud vitium, reſque ad naturalem aſpectum revocentur, opus eſt myoptra. Quod quidem dioptræ, ſeu ſpecilli genus, eſt in medio excavatum, reſque repræſentat minores, quàm libero oculo videantur; cum è contra omphaloptra in medio quàm in ambitu craſſior ſit, reſque repræſentet majores, quàm libero cernantur oculo.

Notabis igitur 3. Cum ſit contrariorum contraria ratio, & contrariis hac ratione curentur contraria; qui planiorem habent cryſtallinum, aut quibus humor albugineus in medio, quàm circa ambitum eſt tenuior, iis porrigitur apex conï refracti ultra Retinam, reſque vident æquo minores, nec ſatis clarè & liquidò, ſi cominus poſitæ fuerint; ideoque habent opus omphaloptra. Secus verò myopes, quod nihil eminus, & liquidò videant, adhibere debent myoptram, ſeu ſpecillum in medio concavum. Quare

Notabis 4. Cryſtallinum eſſe in oculo inſtar ſpecilli cujuſdam naturalis, cujuſ defectus emendari poſſit adhibendo ſpecillum artificiale rationis contrariæ.

Dico I V. Hanc in organo viſionis conditionem reperiri convenit, ut ſit Sphæricum. Sic enim ob convexam ſuperficiem undecunque ſpecies commodiùs excipit, ut latiùs etiã pateat aſpectus. Deinde illa figura eſt maximè omnium capax ad continendos humores; ut in Geometriâ oſtendimus *de figuris Iſoperime-*

tris. Item aptissima est ad motum qui fit in loco, minúsque est læsioni obnoxia, cùm angulum prominentem nullum habeat.

Dico V. Visio ab utroque oculo clarior, distinctior, perfectiorque est, quàm si eliciatur tantùm ab alterutro. Prob. quia utrique oculo propria videndi facultas inest: cùm igitur constet duarum simul causarum efficientiam esse majorem, quàm unius; sequitur perfectiorem esse visionem unius objecti ab utroque oculo, quàm ab unico tantùm. Vnde profluxit commune illud dictum, *Plus vident oculi, quàm oculus.* Confir. experientia. Quia potest quis utroque oculo legere ex certo aliquo intervallo minores characteres; quos tamen alterutro solum adhibito percipere non poterit. Quinetiam oculo uno diutius intuentes, visu deficiunt. Ut patet experientiâ.

Objic. Galenus, & Aristot. *In problem.* Ajunt obducto uno oculo, totum spiritum derivari in alterum; unde necesse sit fieri intuitum perfectiorem, quàm in utroque simul. R. 1. Quod spectat ad Aristotelem, ibi tantùm loqui problematicè, tum ex sua, tum ex aliorum sententiâ; nihilque definire. R. 2. Non est certum clauso altero oculo, totum spiritum defluere in alterum. At quanvis illud suppono, non inde sequeretur visionem ab illo oculo perfectiorem fore, quàm à duobus simul: quia visio non superat perfectionem spiritus, qui in duobus illis futurus esset.

Inst. Qui in scopum collimant, obducunt alterum oculum, ut altero meliùs videre possint. R. Non ut absolutè meliùs, sed ut directiùs: quia duorum simul oculorum radii per diaviliscum *la visiere* ad scopum traduci nequeunt,

queunt. Vnde si uterque oculus tunc in objectum intenderet; scopus, aut diaviliscus geminus appareret, non sine confusione.

Notabis igitur, non tantum ad ornatum animalis duos esse concessos oculos, sed etiam ad maiorem utilitatem, imò & necessitatem; siquidem (ut observat Aguilonius) sæpe distantiam definire, per se unus oculus non potest. Quæ ratione aperto solùm altero oculo, globulum ex filo pendulum certò attingere in transversum summitate alicujus indicis vix potes; aut filum in foramen acus transversum immittere: quod oritur maxime ex ignorantia distantia.

Dico præterea VI. Sic inter se consentiunt oculi ambo, ut uno moto, alterum in eandem partem similiter per se moveri necesse sit. Probatur enim experientia non posse nisi ex morbo in oppositas partes distrahi. Atque iste quidem consensus videtur nasci ex consensu nervorum opticoꝝ, qui simili modo à facultate animali afficiantur, & animale spiritum in duos simul oculos derivent. Prætermitto enim quod alii non ita probabiliter hanc in rem adjiciunt, oriri illud ex consensu aliquo musculorum moventium; quo pacto per proportionem digitus auricularis plicari non potest, quin proximus illi digitus similiter inflectatur.

Dico VII. Etsi in idem objectum duo simul oculi intendant, non ideo tamen bis videtur, seu geminatum, quomodo nec idem verbum bis auditur, etsi duabus simul auribus percipiatur. Ratio de visione hæc est, quia objectum eodem modo, & eadem, seu simili in parte & situ pingitur in utraque Retina; unde consequenter apprehenditur eodem modo, & tanquam idem à sensu interno. Alioquin ut fit ope perspicillii

multarum facierum, cum varias in Retinæ partes ejusdem objecti species transmittitur, tanquam multiplex apparet. Item eandem ob causam, si per laminam chartaceam, in qua sint plura foramina, signum aliquod v. g. lucidum intueris, illud triplex apparebit.

Notandumque est consequenter illud quod explicatur in *Physica De sensu interno*, nempe visionis, auditionis aut externæ sensationis cujuscunque actum perfici in cerebro, quodd sine concursu interno sensus, quem communem appellant, non eliciatur; indèque peti unitatem rei aut visæ, aut auditæ, licet in duplici organo sensatio illius externa fiat.

C A P. IV. *Conditiones ad visionem ex parte objecti.*

Dico I. Visibile nisi lumine illustretur, non apparet. Hoc satis patet experientiâ. Quam ob causam ostendimus in *Physica* colorem non esse objectum visus proprium, nisi secundarium; nec fieri actu spectabilem, nisi luce perfusum. Neque verò etiam color per medium, & ad oculum, sui speciem intentionalem profundit, nisi in eo supponatur aliquod lumen, quantumvis tenue, ut contingit iis, qui ex putei fundo, & mediis in tenebris stellas cœli perspiciunt. Item

Dico II. Objectum visibile debet esse opacum. Quia ut patet experientiâ, visus in eo quod cernitur, terminari debet. Ergo illud debet esse opacum. Nam purè diaphanum, nihilque habens opacitatis, omnino pervium est visui, ipsumque non sistit. Item

Dico III. Objectum visibile debet habere aliquam magnitudinem sensibilem. Probatur experientiâ.

perientiâ. Quia causis materialibus non est alia vis insita, quam ut agant modo corporeo, & juxta quandam materiæ, seu subjecti extensionem. Sic enim, ut observat laudatus author, in majori parte corporis, major virtus, in minore minor duntaxat reperitur, in atoma indivisibilis ac nulla. Ergo objectum visibile idoneam non habens extensionem, speciem sui sufficienter ad oculum profundere non potest. Item nec oculus speciem potest recipere, nisi certo modo extensam; ob allatam rationem. Huc etiam refertur, quod vulgè ajunt, visionem non fieri nisi per pyramidem, cujus basis constituatur in objecto, vertex autem in oculo. Ac proinde

Notabis diligenter, res illas apparere majores, quarum opticae pyramides habent in vertice angulos majores; & è contra. Nam ut illorum angulorum radii laterales divaricantur, ita cæteris paribus necesse est apparere majorem basim angulo majori obtensam. Quare si anguli illi sic decrescant, ut lineæ laterales opticam pyramidem constituentes videantur coire, inde sequetur ab illis nullam comprehendî basim visibilem, saltem apparentem; ac proinde nullum apparebit objectum.

Dico IV. Visus quidem, quantum est de se, infinitè extenditur; quatenus visio non fit emissionem, sed intus-susceptionem specierum, quas proinde oculus in se potest recipere ex longissimo spatio, ac si profunderentur ex propinquo. At quantum est ex parte objecti,

Dico V. Nulla res videtur nisi ex certa distantia. Non enim potest objectum sui speciem emittere ad quodlibet spatium, quandoquidem est finitæ virtutis. Item res semper ap-

paret minor, quò longiùs distat, quia semper videtur sub minori, & minori angulo, ut contemplari licet *in fig. 11.* estque in promptu experientia unde istud constet. Item ut loquitur Arist. sensibile positum supra sensum, non facit sensationem. Quare quæ sunt in oculo, ab ipso oculo non videntur directè saltem; nec lumen, aut species ipsi impressa, sed tantùm hujus beneficio ea, quæ distant. Paretque omnium experienciâ, quemadmodum inter visum & visibile debeat intercedere aliquod medium. Item ut res videatur distinctè, & accuratè, non debet nimis propè ad oculos ad moveri; ut patet de acicula, quæ sic longè crassior & quasi diaphana appareret. Ratio est, quia si propiùs objectum accedit ad oculum, vertex coni refracti projicitur ultra Retinam, *ut videre est in fig. 4.* Quo in casu plures radii ejusdem puncti visibilis in diversas Retinæ partes incidunt; unde necesse est oriri visionem confusam; remque apparere majorem, ob majorem picturam in ipsa Retina. Eamque ob causam solemus adducere oculos per vim quandam non naturalem, unde & dolorem sentimus. At si longiùs distet objectum, percipietur etiam minùs clarè & distinctè, nec sub propria magnitudine, factâ ipsius objecti picturâ intra oculum dilutiore & confusâ; quia tunc apex coni refracti magis accedit ad crystallinum, & ab illo apice divergentes radii varias afficiunt Retinæ partes, *ut patet in fig. 6.* Eaque est causa, cur lucida, ut ignis, quò longiùs distant sub certo intervallo, eò majora appareant in tenebris. Dixi sub certo intervallo; nam alioquin si nimis distent, minùs poterunt movere potentiam; neque etiam tunc majora possent appa-

apparere ex maiori distantia, quia vertex coni refracti magis accedere ad crystallinum non potest, nec consequenter ex eo fieri major radiorum divergentia.

Notabis igitur tunc tantum fieri iustam objecti distantiam, quando apex coni refracti ex illa distantia incidit in Retinam: *ut in fig. 5.* Quod si secus contigerit, varia specillorum genera solent adhiberi, quibus ille apex coni refracti vel adducatur, vel longius profundatur, ut tandem in ipsam Retinam incidat.

Notandumque est solere etiam à nobis adduci oculos & axes opticos ad nasum, ut res quasi propius & distinctius videamus, tunc maxime quando gravi aliqua cogitatione detinemur; istudque solet contingere hominibus cogitandis; nam & videtur illa contractio oculorum conferre ad maiorem attentionem. Quam ob causam Physiognomistæ judicant eos esse prudentes & sagaces, qui magis conjunctos habent oculos. Sic belluæ, quibus major vis inest cogitandi, ut canes, leones, feles, simiæ, &c. parum habent distantiae inter oculos: quod secus est in hebetioribus & stupidioribus.

C A P. V. *Visionis genus multiplex.*

Visio omnis vel dicitur simplex aspectus, vel intuitus, seu obtutus. Aspectus simplex est ille actus, quo res percipitur ut primò in oculum cadit, sicque appellari potest visio primò prima, & fit in instanti, potestque in eo casu etiam contingere, ut quod videmus, à nobis non advertatur. At per obtutum, seu intuitum, singulæ, aut plurimæ objecti partes cognoscuntur distinctè: & consequenter intuitus non fit nisi in tempore: nam distincta visio non fit nisi
secun-

secundum axem opticum, quo partes illæ percurrantur successive.

Obtutus verò vel est simplex, vel ex prænotione, seu anticipata cognitione. Obtutus simplex fit vel sola visione, ut quando versatur duntaxat circa proprium objectum, quale est lumen & color: vel præterea fit cum ratione, & syllogismo, quando scilicet est visio similitudinis, æqualitatis; aut è contra; quæ non cognoscuntur sine comparatione unius cum alio; hæc autem est mentis operatio, & per syllogismum. Intuitus ex prænotione est visio intuitiva rei ante cognitæ, seu cujus forma jam animo præconcepta habebatur. Ac proinde etiam non fit nisi cum reflexione animi, & comparatione quadam ipsius rei cum idea jam animo prius inexisterente; ex quibus colligere est perfectam rei visibilis comprehensionem non fieri nisi cum tempore; sed his præterminissis: memineris ex præfatione hujus tractatus, aliam esse visionem directam, nempe quæ lineis rectis per medium æqualis ubique vel densitatis, vel raritatis ad objectum tendit; estque omnium maximè naturalis. Præterea verò alia est refracta, tum reflexa alia: ac de postremis quidem hisce duabus cum hoc loco sit tantum difficultas:

Dico I. Visio refracta ea est, quæ fit ex radiis ad occursum diaphani diversæ aut raritatis, aut densitatis refractis. Quod quidem ut intelligas;

Not. I. Rarefactionem nullam fieri nisi ubi radius trajicitur per media diaphana diversæ aut raritatis, aut densitatis, cujusmodi sunt aër, aqua, vitrum, &c. Illudque dicitur primum diaphanum, per quod radius directà fertur; alterum enim per quod frangitur idem radius, appellatur secundum diaphanum. At

Not.

Not. 2. Radios eos non refrangi nisi qui feruntur obliquè. Nam radii perpendiculares directà permeant utrumque diaphanum. Quare ad refractionem hæc duo semper necessaria sunt. 1. Diaphanorum in densitate diversitas; 2. Radium obliquitas. Suntque ad explicandum istud negotium nonnulla observanda, putà linea aut radius incidentiæ; tum linea, punctum, & angulus refractionis, &c.

Linea incidentiæ est ea, quæ fluit ab objecto per medium illud primum, in quo est ipsum objectum, inciditque in superficiem secundi diaphani occurrentis, cujusmodi *in fig. 9.* Est radius *e, c*, si supponitur objectum esse in *e*: at *e*, est punctum incidentiæ. *d, f*, est superficies secundi diaphani, quæ dicitur refringens, & in qua est punctum refractionis ad *c*. Recta *b, a*, ducta per *c*, punctum incidentiæ, vocatur simpliciter perpendicularis. Nam alioqui perpendiculares quas fingeremus duci, vel ab oculo, vel ab objecto, vocantur cathetus vel oculi, vel objecti. Radius qui rectà ferretur ab objecto *e*, ad *b*, vocaretur radius directus; verùm cum obliquè incidat in superficiem secundi diaphani, in ea frangitur seu inclinatur, vel ad perpendicularem, id est magis accedendo ad lineam *b, a*, unde & fiat linea refracta *c, g*; tum angulus refractionis, *b, c, g*, vel certè frangitur à perpendiculari, ab ea scilicet potius recedendo, unde fiat linea refracta *c, i*, eritque angulus refractionis *b, c, i*; eadem autem per proportionem observare licet *in fig. 10.*

Notandumque est 3; Hanc semper legem servari in refractionibus; ut quando radius trajicitur à primo medio, seu diaphano rariori per medium densius, inclinetur, seu fiat refractione ad perpendicu-

dicularem : contra verò si à primo densiori, per secundum rarius producitur, fit refractionis à perpendiculari, id est, ab illa fit radiorum recessus. Certumque est radios per medium densius propagatos inde reddi quasi validiores & activiores; siquidem illud commune est omni agenti, & qualitati naturali, ut in subiecto densiori agat vehementius : sicque de facto experimur res eas videri beneficio perspicilliorum, quæ aspectum fugerent; sic etiam fit combustio ope refractionis ejusmodi. At

Not. 4. Instrumenta id genus dioptrica, seu specilla diversæ rationis reperiri, ut jam dixi de Myoptris, & Omphaloptris. Item alia sunt longiora perspicilla, quæ *Hollandica* nuncupantur, tum & *Tubi Galilei*, quod Galilæo fuerint maxime usui in rebus astronomicis. Hæc autem maximopere visum juvant, quia sic fortius & rectius species visuales per longum illum tramitem ad oculum permeant, simul enim plures veluti in unum sunt collectæ, *virtusque unita fortior*. Quam ob causam, inquit *Arist. lib. 5. de Gener. cap. 2.* Qui habent sensoria magis producta, quasi canales quosdam, melius sentiunt: ut qui habent nares porrectas, valent olfactu; qui profundiores oculos, quam qui eminentiores habent, sunt magis perspicaces; ideoque admoveamus oculis manum ad colligendas species. Ita surdastri tubum etiam ad aures adhibent ad excipiendos colligendosque sonos, &c.

Not. 5. Inter effectus refractionis hi præcipue numerari solent. 1. Quod ea ratione res appareant majores aut minores, prout fit refractionis vel à perpendiculari, vel ad perpendicularem. Ita nobis in aëre positos pisces in aqua pellucida

Lucida majores & propinquiore apparent; contrà autem piscibus apparemus minores & remotiores. Sicque etiam 2. Per refractionem mutatur apparenter locus; quo pacto & sydera nobis cernuntur orientia, dum adhuc sunt infra horizontem. Item refractione mutat figuram; ut quando propter nubes interjectas, Sol matutinus, aut serotinus, videtur ellipticus.

Ob. Si quicquid radio fracto cernitur, alio in loco apparet; sequitur fallacem esse omnem aspectum nostrum, ob refractionem specierum quæ per varios humores oculi ad retinam transmittuntur. *R2. Transf.* Ut enim cum Aguilonio loquar, malum illud oculo familiare non impedit accuratam distinctamque visionem, cum objecti partes simul omnes cum uniformi difformitate apparentia loca capebant; nec consequenter ulla in iis est perturbatio, aut confusio; nec idcirco declinant à scopo in quem collimant. Quod idem quoque iis evenit, qui per specilla intuentur.

Numerari etiam debent inter effectus refractionis, quodd per vitreum prisma trigonum transpicienti appareant objecta peregrinis coloribus tincta per modum Iridis cujusdam multiplicis; sursumque mirabilem in modum quasi elevari videantur quæ sunt posita in plano, ubi certâ ratione trigonum ad oculos disponitur.

Dico II. Visio reflexa est ea quæ fit per speciem non rectà ab objecto impressam, sed potius ab objecto in speculum directam, & à speculo in oculum reflexam. Sicque in *fig. 7.* observare est speculum *a, b*, speciem excipiens ab objecto *c*. Linea *c, d*, vocatur radius directus. In *d*, est punctum insidentia. Linea *d, e*, est linea reflexionis, parem angulum reflexionis
e, d, b,

e, d, b, efficiens, cum angulo *c, d, a*, qui dicitur angulus incidentiæ. Sed

Not. 1. Aliud esse speculum perfectum, aliud imperfectum. Perfectum, speciem regulariter ac ordinatè remittit, quamobrem debet esse tersum & politum, æquabile; item & opacum; alioqui speciem & imaginem non remittet. Imperfectum, est illud à quo species non reflectuntur ad oculum, sed potius in ipso corpore reflectente quasi terminantur: ut contingit in chartâ clausi cubiculi, de qua supra. Item

Not. 2. Ex speculis perfectis & regularibus, pro diversitate figuræ, alia esse plana; alia sphærica, vel convexa, vel concava. Item alia conica, vel convexa, vel concava, item & cylindrica, elliptica, parabolica, &c. At

Not. 3. In speculo perfecto, id quod videtur non esse speciem, sed potius objectum per speciem à speculo reflexam. Prob. Quia alioquin idem contingere deberet, ac in speculis imperfectis, puta in chartâ, in quâ per foramen clausi cubiculi reperiuntur species: nempe deberet idolum illud apparens in speculo conspici omni ex parte, perinde ac species in charta receptæ; atqui non videntur nisi in linea reflexionis. Nec ratio afferri posset cur appareat quasi ad aliquam speculi profunditatem, eamque majorem, quò plus recedit objectum à speculo.

Objic. Si ita res est, speculum omne deberet repræsentare objectum sub eadem formâ, & magnitudine. Atqui parvum speculum repræsentat sub minori. R. Speculum planum sive parvum, sive magnum sit, eandem objecto magnitudinem tribuit; hoc unico discriminè, quòd objectum parvum in parvo speculo plano videri totum potest; magnum autem non potest,

test, sed requirit magnum speculum planum; si sit vicinum, ut omni ex parte objecti species concurrere, & reflecti convenienter eum in finem possint.

Inst. Diviso in partes speculo, non deberet multipliciter repræsentari objectum, siquidem non imago in speculo, sed duntaxat per speculum res objecta cernitur. R. Speculi fractio, si partium situm non mutet, non mutabit objecti repræsentationem: nam quando eam mutat, id accidit propter mutatum situm partium ipsius.

Inst. Moto speculo, & immoto objecto, non deberet apparere objectum sub motu, siquidem objectum duntaxat, non autem species in speculo perspicitur. R. objectum immotum tunc videtur moveri, quando in aliâ, & aliâ oculi parte successivè pingitur: hoc autem facit speculi motus, unde & objectum exhibet, quasi sub motu.

Inst. Quomodo igitur nullo præsentè objecto, res variæ in speculis magicis repræsentantur ope Dæmonum. R. 1. Sape à Dæmone caverè admoventur objecta, quæ sic repræsententur. R. 2. Sape in eo casu fieri tantum illusionem in imaginatione.

CAP. VI. Communium objectorum Visio.

EA dicuntur objecta communia quæ non tantum ab uno ex sensibus externis, sed ab aliis quoque possunt percipi, accedente tum sensus interni, quem communem vocant, tum rationis præsidio; quemadmodum explicatur in Physicâ. Sic magnitudo, distantia, locus, situs, figura, motus & quies non tantum cadunt sub oculum, sed & per tactum, & aliâ plerumque

ratione de iis judicamus. Hisque addere est similitudinem aut dissimilitudinem, pulchritudinem aut difformitatem, umbram & tenebras; quæ licet aliorum sensuum non sint, non dicuntur tamen propria visus objecta, eo modo quo lumen & calor, sed veluti medium locum tenent inter commune & proprium.

Dico autem I. Magnitudo objecti videtur tanta, vel tanta, pro ratione angulorum qui fiunt ad verticem pyramidis opticae. Vt jam supra monui. Quare per exile foramen tabulae, res apparet ed major, quod magis ad oculum admoveatur, quia tunc angulus verticis pyramidis opticae deducitur magis; & è contrà.

Notandumque est, non posse à nobis judicari quid magnum aut parvum; crassum aut tenue; longum aut latum fuerit, nisi ad sensum externum accedat internus, & ratio comparativa extremorum, tum discursiva. Quod perinde statuendum est de cognitione figuræ, aliisque id genus. Sicque etiam

Dico II. Distantiam à nobis percipi, quando illius extrema & corpus interjectum comparamus ad invicem. Eamque ob causam cœlum apparet veluti conjunctum cum Terrâ ad horizontem, quia nullum apparet nobis corpus ipsis interjectum. Nec de cœli partibus nobis ad verticem imminetibus, seu de illarum distantia judicamus, nisi ex syllogismo; ut supra aiebam. Item nec locus, aut positionum differentia cognoscitur visu, nisi ex rei distantia, & comparatione ad alias universi partes. Item

Dico III. Motum percipimus, ubi mobile & spatium, cujus partibus successivè applicetur, dignoscimus. Quare

Not. I. Ideo motum velociorem eripere nobis

bis ex oculis rem motam, puta globum à bombardâ emissum, quia sic efficitur insensibilis applicatio locari ad locum. Huc adde quòd figere axem opticum in rem illam determinatè non possumus, nec imaginatio satis citò applicari potest ad illius objecti apprehensionem. Et verò etiam

Not. 2. Per motum velociorem interdum rem nobis repræsentari simul totam in aliquo spatio, ut quando accensus titio in orbem agitur; quia imaginatio non potest tam citò exuere speciem de titione illo talibus, vel talibus locis applicato; adeoque illi repræsentatur quasi omnibus coëxistens. Item

Not. 3. Tardiorem motum non percipi à nobis quando est in fieri, sed tantùm quando est in facto esse: puta motum umbræ in horologio sciotherico; quia tarditas ejusmodi reddit loci, & rei mutationem insensibilem.

CAP. VII. *Visus Fallacia.*

F*allacia* aut error visus dicitur, cùm objectum alio modo quàm in se sit repræsentatur. Probavimus quidem in *Physica* sensum circa objectum proprium debitè applicatum non falli. At

Dico I. Circa objecta communia, aut etiam circa propria, cùm necessaria conditio aliqua deficit, persæpe, & in multis fallitur. Ita ex vitio organi, ut in ictericis; aut ex defectu mediæ, ut si nix per vitrum rubrum cernatur, alio modo apparet quàm in se sit. Tuncque etiam idem objectum apparet geminum, si distrahitur ipsorum oculorum societas. Ita propter refractionem, ut cap. 5. ajebam, res videntur esse figuræ alterius, aut sub aliena magnitudine, & alieno in loco.

Item

Item præterea 1. Est fallacia visus orta ex distantia: nam ob miniam distantiam quæ majora sunt, apparent minora. Item, & apparent esse alterius figuræ, ut quadratæ turres, quæ sic videntur esse rotundæ, quodd rerum earum species non satis moveant potentiam. Item, porticus, & longæ arborum series ex nimia distantia videntur stringi in angustum. Item & in longioribus ambulacris quæ superiora sunt, videntur prolabi, simulque attolli inferiora, & coïre latera; siquidem eâ proportionem quâ magis distant, spectantur sub minoribus angulis, ac proinde sub minoribus intervallis. Quo etiam ex principio si æquales magnitudines secundum eandem seriem rectam opponantur, propinquior apparet major remotiore.

Item, hallucinatur visus circa figuram. Ut quando circulus obliquè disponitur, apparet tanquam ellipsis, quia species ab eo profecta propter situs obliquitatem, alterâ ex parte fit contractior, nec proinde reddit circuli imaginem.

Quid multa? sæpe aberrat circa motum, ut quando navigantibus videntur moveri littora, urbesque recedere. Item, spiritibus concitatis, ea putantur moveri, quæ tamen quiescunt. Cujusmodi etiam errores multi contingunt ex imaginatione læsa, uti legimus De Antipheronte, qui suam sibi umbram occurrere ubique arbitrabatur. Iam verò ex doctrina authoris jam citati;

Dico II. Omnes aspectus fallaciæ nascuntur vel ex depravato intuitu, propter circumstantiarum aliquem defectum; ut quando sol, pedalis tantum magnitudinis apparet; vel ex falsa æstimatione; ut quando quis ignem spectatum eminus, stellam putat: vel ex paralogismo, seu vicioso

tioso syllogismo; ut quando agitatæ nubibus ex eo lunam moveri aliquis putat.

Notandumque est consequenter, ejusmodi errores visus oriri non tantum ex defectu ipsius sensus externi, aut ex defectu alicujus circumstantiæ illi extrinsecæ, sed etiam nonnunquam ex sensu interno, & ratione. At

Not. 2. Aliquando solam hallucinari mentem, vel quia dubiis vacillat, aut contrario movetur affectu, aut per insaniam à propria sede exturbatur, vel quod sibi minus sit præsens atque attenta; ut quando aliquis equum cui insidet, anxie perquirat, rebus aliis intentus. Item 2. Error aliquando est in solo externo sensu. Præterea verò simul est vel cum interni sensus, vel cum rationis errore.

Dico tamen I I I. Errores illos emendari posse, tum mente, tum aliis internis externisque sensibus. Sic tactus planum esse illud judicat, quod eminere in picturis oculo videtur. Sicque intellectus cognitâ erroris causâ, errantem facultatem & seipsum corrigit. Atque ita sensus tum interni, tum externi cum intellectu habent connexionem, ut mutuam sibi opem ferant. Qui plura & minutissima quæque in hoc genere volet assequi, consulat Vitellonem, Aguilonium, cæterosque opticos. Nam hæc ad præsens institutum sufficiunt.

M V S I C A.

P R Æ F A T I O.

QUænam sit natura soni, contemplari; quas habeat proprietates; quomodo producat, & quam ad illum excitandum corpora sint idonea; quodnam ejus medium; & quomodo propagetur; an etiam audiatur in caelesti regione; quas tandem in species dividatur; & quid singulis propriè conveniat, negotium est Physici; quod suo loco præstitimus. At sonus harmonicus seu Musica Mathematicam spectat, quatenus dissimilium vocum, & consonantiarum intervalla, proportionibus, ac diversitates considerat. Hanc igitur partem ut aliis adjungamus, & tyroni viam aperiamus ad alia quæ solent curiosius indagari; Quæram primò, quid sit Musica, & voces musica: deinde, quanam sint earum intervalla, quæ consonantia cum earum proportionibus; tum quomodo in instituendâ symphonîâ & modulatione componantur; quinam sint cantuum modi ac genera; ubi & de arte Musica decantanda. Eo quidem nomine malè audiunt sæpe Musici, quod sua tantum approbent, facile autem carpant aliena: quæ est animi fœda labes. Quare cum hæc ferè universa quibusdam solum posita sint in observationibus, quas potissimum petunt ex divisionibus Monochordi, nihil proferre volui, nisi quod scripsere authores probatissimi, atque imprimis Bœtius, Zarlinus, Salinas, Glareanus, Mersennus & alii. Nec pauca prætermisi, maxime ex iis quæ de variis rerum appellationibus leguntur apud antiquos, quia aut penitus jam obsoleta sunt, nec satis de iis constat, aut quemadmodum lib. 3. c. 12. fatetur Glareanus ipse, de proportionibus Musicis fusi dicturus, quia sunt superflua, & potius ad ostentationem, quàm ad usum Musicæ inventa.

M E T H O D V S
E T
I N S T I T V T I O
M A T H E M A T I C Æ.
M V S I C A.

CAP. I. *Quid sit Musica, & de
vocibus Musicis.*

MUSICA est dissimilium sonorum, gravis scilicet atque acuti convenientia, unde sensus audiendi recreetur. Sic enim vulgò statuunt Musicam non esse unius vocis, aut vocum non dissimilium; nec aliunde petendas esse illius leges, quàm ab aurium iudicio, cùm ad aurium delectationem tota sit comparata. Symphoniam, harmoniam, aut sonum harmonicum alii vocant.

Notandumque est, sonum hunc esse compositum ex multis simplicibus, qui *vores musica* aut *chorda*, vel etiam apud Græcos *phthongi* nominari solent. At

Not. 2. Ex istis alias aliis esse aut acutiores, aut graviores; sicque distare inter se vel unico tantum, vel pluribus quasi gradibus. Item

Not. 3. Vocum istarum seriem ordinatam, seu *Systema*, primùm quidem Græcos olim vulgari in lyrâ quatuor fidibus, seu *chordis* comprehendisse; cujusmodi lyram idcirco vocabant *Tetra-*

chordum, huiusque vox, seu chorda soni gravissimi dicebatur ὑπάτη; acutissima autem νήτη: sed pluribus subinde additis factum est tandem, ut ex variis tetrachordis, seu quindecim ex chordis ritè aptatis constaret, unde genera consonantiarum omnia commodiùs redderentur. Nec imineritò chordis quindecim Systema definiebant; quòd videlicet istud solummodo spatium *naturali* voce à nobis vulgò decurratur. Quamquam & postmodum tum gravioribus, tum acutis adjunctæ sunt aliæ, quas etiam *fictâ* voce quis decantare possit.

Notabis verò 4. Singulis etiam istiusmodi vocibus seu chordis propria fuisse à veteribus Græcis imposita nomina. Nam omnium quidem gravissimæ dicuntur *principales*; quarum infima vocatur ὑπάτη ὑπαίων, id est principalis principalium. Aliæ autem sunt *media*; *disjunctæ* aliæ; aliæ *excellentes*, quarum suprema est νήτη ὑπερβολίων. Porro majoris facilitatis gratiâ, illis nominibus subrogata sunt alia monosyllaba, authore Guydone Aretino, Monacho Benedictino, sicque ascendendo initium ducitur ab *ut*, tum ordine sursum tendendo consequuntur *re*, *mi*, *fa*, *sol*, *la*; cùm è contrâ descendendo cantetur *la*, *sol*, *fa*, *mi*, *re*, *ut*; replicanturque eædem voces cum idoneâ *mutatione*, ut vocant, si ultrâ fuerit aut ascendendum, aut descendendum; quemadmodum exponetur capite ultimo. Sed

Not. 5. Chordas à quibus illæ voces aut eduntur, aut designantur, aliis præterea nominibus, ob alios usus, appellari. Sic enim omnium gravissima vocari solet *G re sol ut*; quia prout varii sese offerunt casus, possunt in illâ decantari vel *ut*, vel *re*, vel *sol*; quod perinde per proportionem observandum est in aliis quæ ordine al-

alphabetico consequuntur : quarum prima dicitur *A mi la re*; tum *B fa l mi*, *C sol ut fa*; *D la re sol*; *E mi la*; *F ut fa* : supra quam, ubi est opus, replicentur tum *G re sol ut*, tum aliæ deinceps in infinitum. Atque istud quidem vocum systema & series appellari solet *Gamma*; quia incipit à chordâ *G re sol ut*, quæ per Γ Græcum designari consuevit.

Not. 6. Septem illas chordas sufficere ad implendam *octavæ* latitudinem, de quâ sequenti capite futurus sermo est. Nam in eâ consonantiâ, quæ *octava* dicitur, prima & ultima vox sunt ejusdem denominationis. Quare si prima replicetur, fiet *octava*. Item, pro septem illis chordis decantandis sufficere quidem possent quatuor illæ voces in infinitum replicandæ, nempe *ut*, *re*, *mi*, *fa* : majoris tamen commoditatis gratiâ additæ sunt *sol*, *la*. Quinetiam ut decurratur tota *octava* latitudo, alia iterum ex istis repetenda est, prout exigunt *mutationis* subinde observandæ leges, de quibus capite ultimo. Hæc autem vox repetita locum habet *septima* : neque idcirco, ut inquiunt ex Boëtio & Ptolemæo, *voces in musicâ aut plures, aut pauciores esse possunt, quàm septem*, ut omnia tonorum & semitoniorum genera exprimantur; totam, ut dixi, octavam decurrendo.

CAP. II. *Musica Intervalla.*

M*usicum intervallum*, aliud nihil est quàm latitudo, seu distantia quæ reperitur inter sonum gravem & acutum. Sunt autem ex ejusmodi intervallis alia majora, ut in consonantiis; minora alia, ut in tonis, vel hemitonis, quando uno gradu, vel dimidio duntaxat, sonus aliquis recedit ab alio.

Ac primò quidem supponitur *unisonum*, quando scilicet vox eadem repetitur; seu quando plures voces sunt ejusdem chordæ. Quâ ratione in celebrando Divino officio omnes *plano cantu* Psalmum eundem decantare solent publicè in Templis Catholicorum.

Tum 2. Est *tonus* propriè dictus, ubi ascenditur, vel descenditur è proximâ quâque notâ in proximam: si tamen *mi fa* exceperis: non enim istæ voces ad invicem tonum reddunt, sed hemitonium duntaxat, etsi cum aliis vocibus sibi adjunctis tonum efficiant; puta si dixeris *fa, sol*; vel *mi, re*. Item, & per *diesim*, ut vocant, minuitur intervallum toni; quæ quidem *diesis* in describendâ musicâ designari solet per duplicem lineolam decussatam.

Notandum autem est, ad vitandam æquivocationem, *Tonum* aliàs dici vocem, seu sonum simplicem. Item, sumitur quoque pro modo qui servatur in cantu: quo pacto plures recensentur Musicæ *toni*, seu *modi*; de quibus postea *cap. 5.* Verùm hîc propriè sumitur pro intervallo jam explicato, ad quod revocavimus semitonium; dividiturque in tonum majorem, & minorem. Item

Not. 2. Eam esse naturam vocis humanæ, ut nemo possit cantando per gradus ascendere, aut descendere, quin de se tonos majores & minores cum semitoniis reddat. At

Not. 3. Vocem illam quæ toni unius intervallo solùm distet, vocari *secundam*. Ita si *re* simul decanteretur cum *ut*, dicitur fieri *secunda*. Iam verò ut pergam ad alia deinceps intervallo-
rum genera,

Dico I. Post secundam sequitur *Tertia*: quæ dividitur in majorem & minorem. Tertia major,

jor, quam Græci *Ditonum* vocant, componitur ex tono majori & minori v. g. *fa*, *la*. Tertia autem minor seu *semiditonum* constat ex tono majori, & semitonio. v. g. *re*, *fa*.

Dico II. *Quarta* est quæ quatuor vocibus percurritur, unde à Græcis appellatur *Diateffaron*, id est, per 4. Dividiturque in eam quæ vulgò appellatur *Diateffaron*, seu quarta mollior & jucunda auribus; tum in *Tritonum*, quæ est quarta durior & injucunda. Quare sic *Diateffaron* constat ex tono majori, & minori, cum hemitonio.

Tritonum sic appellatur, quòd ex tribus tonis constet.

Dico III. *Quinta* est quæ ducitur per quinque chordas, unde à Græcis vocatur *Ἀγὴ πέντε*. Fitque ex duobus tonis majoribus, uno minori, & semitonio. v. g. *ut*, *sol*. Alioquin ea dicitur quinta imperfecta & falsa, quæ constat solùm ex duobus tonis, & duobus semitoniis.

Dico IV. Sequitur *sexta* seu Hexachordum, id est, sex chordarum. At duplex est sexta: primò enim est *major* constans ex duobus tonis majoribus, tum ex 2. minoribus & semitonio. *Minor* autem est ex duobus tonis majoribus, uno minore, & duobus semitoniis.

Dico V. *Septima* est ex 7. chordis, quam sequenti capite proscribemus ex numero consonantiarum, perinde ac *secundam*.

Dico VI. *Octava* est intervallum quod octo vocibus definitur: Græcis vocatur *Ἀγὴ πρὸς αὐτὴν*, id est, per omnes; quia consonantiarum omnium aliarum chordas atque intervalla continet. Quæ perfecta est, ea constat ex 3. tonis majoribus, tum ex duobus minoribus, ac duobus semitoniis: alioquin falsa & imperfecta octava spatium illud totum non implet.

Notandum verò est, horum omnium intervallorum mensuram posse revocari ad *commata*: *comma* autem idem est ac sectio, seu veluti segmentum aliquod minimum, cujusmodi commata duo communem *diessim* constituunt, tum ex *diessim* duplici constituitur *semitonium* minus: ex duplici *semitonio* minori *semitonium* majus: ex duplici *semitonio* majori *tonus* major; qui *tonum* minorem superat uno *commate*. Ut quidem scribit vir doctissimus, & in istis observationibus accuratissimus Mersennus *In Genesis* ad cap. 4. versic. 21. art. 2. probaturque ex divisione *Monochordi*, quam cap. 4. postea sum explicaturus.

C A P. III. Consonantia.

Suppono ex dictis cum Boëtio, consonantiam esse acuti soni, gravisque mixturam, quæ suaviter audiendi sensum afficiat. Quare

Dico I. Unisonum seu Homophonia in quâ omnes idem personant, inter consonantias locum non habet. Prob. Quia licet contineat plures simul sonos non disconvenientes, perinde sunt tamen ac unica vox replicata intra idem veluti genus intervalli: ergo non est consonantia; siquidem consonantia non est nisi vocum dissimilium; vel si lubet, non est nisi acuti soni, & gravis. Conf. 1. Quia unisonum eodem modo se habet ad Musicam, quo unitas ad numerum: atqui unitas non est numerus, sed tantum principium numeri: ergo perinde per proportionem unisonum non est nisi principium consonantia. Conf. 2. Autoritate Aristotelis. Sic enim ait 39. probl. sect. 10. unisonum esse tantum eundem sonum multiplicatum. Item 2. Politic. c. 3. ubi docet rempub. instar musicæ
cu-

cujusdam constitui ex diversis ordinibus; nec debere in eâ esse omnia communia: nam, inquit, perinde foret ac *unisonum*. Quâ ratione loquendi satis indicat unisonum non esse consonantiam; alioquin nihil probaret, satisque etiam mens ejus explicatur ex superiori loco *Politie.* inox citato.

Notabis tamen, hunc quoque sonum ad movendos animos habere vim non mediocrem. Quemadmodum enim cytharæ nervus ad alterius unisoni percussionem, veluti per analogiam quandam, aut sympathiam tripudiat; ita, inquit jam laudatus author, si multi simul vel eodem tono Divinas laudes decantarint, similem in se mutud pietatis affectum concitare solent.

Dico II. Secunda & septima sunt inconcinna intervalla, nec per se ullam auribus afferre voluptatem queunt. Hisque accedunt Tritonium seu falsa quarta, tum falsa quinta, & falsa octava, ut vulgò appellant. At

Dico III. Consonantiis adscribendæ sunt, 1. Diapason seu octava legitima. 2. Diapente, seu quinta. 3. Diatessaron seu quarta. 4. Ditonum seu tertia major. 5. Semiditonum seu tertia minor. 6. Hexachordum majus seu sexta major. 7. Hexachordum minus seu sexta minor.

Atque istæ quidem vocantur simplices consonantiæ; quodd ex iis vel replicatis, vel simul positis, aliæ in infinitum componi possint. Quales sunt 1. Diapason-diton, seu decima major, conflata ex octavâ & tertiâ majori. 2. Diapason semiditon seu decima minor. 3. Diapason-diatessaron sen undecima. 4. Diapason diapente seu duodecima. 5. Decima-tertia tum

major, tum minor. Ac denique Disdiapason seu decima-quinta, quæ est octava duplicata; præbetque latitudinem Systematis majoris, de quo jam cap. 1.

Notabis autem ex illis consonantiis aliquas non fuisse olim probatas antiquis, quæ tamen apud recentiores nunc communi usu receptæ sunt. Et verò *Diateffaron* v. g. etsi aliquam de se habet asperitatem, si tamen jungitur cum diapente, est auditus jucundissimè. Quod in dissonantiam non cadit: hæc enim per se turbat cantum, etsi per accidens admisceri aliis consonantiis interdum possit ex arte. Item,

Not. 2. Etsi consonantiæ omnes suam habeant in proprio genere perfectionem: eo tamen sensu dicuntur aliæ *imperfectæ*, quod suscipiant magis & minùs; quo pacto tertia, aut sexta dividitur in majorem & minorem. At octava, quinta, & quarta dicuntur perfectæ; si enim, v. g. per diesim, earum minuuntur intervalla, fiunt dissonantiæ, seu falsæ aut octavæ, aut quintæ, aut quartæ. Quemadmodum jam monui.

Dico IV. Consonantiæ non sunt æquali inter se perfectione. Prob. Quia cæteris præstat Diapason; estque omnium maximè naturalis. Indèque istud patet, quod inter cantandum, vel ipsi musicæ imperiti octavam reddant; pauci autem vel quintam, vel quartam, aut tertiam efficiant. Item, post octavam, aliæ ex consonantiis principes sunt Diapente, Diton, ejus-ve replicatio seu Diapason-diton.

Dico V. Tum in Diapason, tum in aliis consonantiis reperiuntur plures diversitates specificæ & essentielles. Illa enim diversitas oritur ex variâ dispositione majoris hemitonii *mi*, *fa*.
Quæ

Quæ septies contingit in octavâ; unde septem numerari solent species Diapason. Ita etiam 4. sunt species Diapente. Tres autem habet Diatessaron, & sic per proportionem de aliis.

Notabis tamen ex 7. speciebus Diapason eam rejici quæ incipit à chordâ *B fa b mi* propter semidiapente & Tritonum, quæ in eâ reperiuntur. Quamobrem sex tantum supersunt utiles ac legitimæ species diapason.

CAP. IV. *Musica proportiones.*

Suppono ea quæ jam tradidi in Arithmetica, *parte 3. c. 1.* de naturâ proportionis, variisque illius speciebus. Item præterea

Suppono eam esse proportionem inter sonos, aut extrema consonantiæ alicujus, quæ est inter corpora sonantia, à quibus eduntur illi soni; sic enim causæ omnino respondere debet effectus. Quamobrem ut tutò, & sine erroris discrimine possimus demonstrare quanam in singulis aut tonis, aut consonantiis reperiatur proportio; statui solet instrumentum unius chordæ, seu *Monochordum*, ut cætera sint paria: tum in eo per varias divisiones inquiruntur toni diversi, & diversæ consonantiæ. Quæ quidem consonantiæ, ubi deprehensæ sunt, attenditur ad eas chordæ partes & intervalla; tum judicamus eam existere proportionem in ipsis tonis & consonantiis, quam inter eas chordæ partes observavimus.

Ita si nervum in duas partes æquales divido, ejusque parti mediæ subijciam immobile caballiculum, tunc perstricta pars una cum toto nervo efficiet Diapason. Idemque fiet si nervo eodem tres in partes æquales diviso, ad tertiam partem admoveris eundem caballiculum; tunc

enim segmenta illa duo pulsata reddent diapason. Vnde sic concludo : cùm illa pars major ad alteram habeat proportionem duplam, id est, ut 2. ad 1. necesse est consequenter, ut diapason dicatur habere proportionem duplam.

Atque istâ quidem inethodo compertum est Diapente, seu quintam habere proportionem sesquialteram; Græcis hemiolion; puta 3. ad 2. quæ est proportionum superparticularium nobilissima.

Ita etiam hoc pacto statuimus Diatessaron habere sesquitertiam, nempe 4. ad 3. Ditonum, seu tertia major habet sesquiquartam, id est, 5. ad 4. Semiditonum, seu tertia minor ut 6. ad 5. Atque ita 1. 2. 3. 4. 5. 6. qui sunt primi numeri, continent primas proportionem, primasque consonantias. Vnde & illustratur numerus senarius, quem in Arithmetica, p. 3. c. 2. ostendebamus esse perfectum.

Observatumque est præterea quemadmodum Sexta major sit in proportionem 5. ad 3. Sexta minor 8. ad 5. semitonium majus 16. ad 15. minus autem 25. ad 24. comina, quo tonus minor superatur à majori, ut 81. ad 80.

Et verò, si lubet has proportionem experiri in Monochordo, adde simul datæ consonantiæ utrumque extremum, totque in partes chordam, aut potiùs tabulam illi suppositam divide beneficio circini, tum enim si uni ex illis partibus, ut decet, taballiculum admooveris, habebis intentum, pulso utrinque nervo.

Porrò, quia hoc loco sermo est de proportionem, & de medio proportionali Harmonico, prout differt ab Arithmetico & Geometrico,

Suppono ex Arithmetica, 3. parte cap. 1. proportionem Arithmeticam esse, quando plures
nu-

numeri per eandem differentiam progrediuntur, ut, *v. g.* 1. 2. 3. 4. vel 2. 4. 6. 8. 10. Nam horum quilibet suum antecedentem numerum eodem modo superat.

Geometrica est, quando sic procedunt numeri, ut consequens habeat eandem proportionem ad proximè antecedentem, quam iste ad priorem. *Exempli causâ.* 2. 4. 8. 16. 32. Sic enim quilibet ad suum antecedentem habet proportionem duplam.

Notandumque est, ita comparari inter se proportionem, seu proportionalitates Arithmeticas, & Geometricas; ut in Arithmetice differentie terminorum sint æquales; proportionem verò eorundem terminorum sint inæquales, ut consideranti patet in allatis exemplis. Neque enim eadem est proportio 2. ad 1. quæ est 3. ad 2. cum tamen æqualem inter se habeant differentiam. Nam unitate solâ omnes illi termini differunt. Contrà autem res se habet in Geometricis; nam differentie terminorum sunt inæquales, proportionem verò eorundem terminorum sunt æquales. Vt patet.

Verùm, quod tradit Clavius, *ubi de definitionibus ad Quintum Euclidis*, in Musicâ seu Harmonicâ proportionem, nec differentie terminorum, nec eorum proportionem sunt æquales; sed tantum in eâ tres termini sic ordinantur, puta 3. 4. 6. ut eadem sit proportio maximi ad minimum, *v. g.* 6. ad 3. qualis reperitur inter differentiam maximi & medii, quæ est 2. ac inter differentiam ejusdem medii & minimi, quæ est 1. Vt enim se habet numerus 6. ad 3. ita 2. ad 1. Hæc autem dicitur proportio Harmonica, quia plerumque saltem illius termini habent proportionem eas, in quibus consonantie

musicæ consistunt. Et verò, ut ne ab isto exemplo discedamus: Inter 6. & 3. est proportio dupla quæ *octavam* constituit. Inter 6. & 4. sesquialtera, propria *quinta*. Inter 4. & 3. sesquitercia constituens *quartam*. Atque ista quidem explicatio cum sit Clavii, videaturque omnium commodissima, improbari non potest; etsi alii diversam sequantur. At

Notabis tandem, inter duos numeros medium arithmeticum reperiri, si utroque simul conjuncto, mediam illius partem subtraxeris. Sic enim v. g. inter 12. & 20. medium proportionale erit 16. Quia ut 12. ad 16; ita 16. ad 20.

Medium proportionale geometricum reperitur hoc pacto. Duc unum ex extremis in aliud; ut si dentur 3. & 12. productum ex multiplicatione fiet 36. Tum quæsitæ hujus producti radix quadrata, nempe 6. erit medium proportionale inter 3. & 12. Vt enim 3. ad 6. Ita 6. ad 12. quæ proportio servatur in progressionem duplicatâ.

Tandem verò medium proportionale Harmonicum inventurus v. g. inter 15. & 60. sic age. Eorum differentiam, quæ est 45, ducas in majorem numerum 60. prodibit numerus 2700. Qui numerus ubi dividetur per summam utriusque dati numeri collectam, nempe per 75. fiet *quotiens* 36: qui *quotiens* subtractus ex majore numero 60, relinquet 24. pro medio proportionali quæsito. Ita Clavius loco citato *De Proport. Harmonicâ*.

CAP. V. *Modi Musica.*

VT oratio variis constat ex locutionibus ad constandam aliquem sensum ordinatis, suasque habet periodos, aliasque id genus proprieta-

prietates. Ita per proportionem Musica, seu Symphonia & Cantus diversis constituitur ex consonantiis, tum variis *cadentiis*, ut vocant, quasi terminis quibusdam subinde distinguitur. Triplex autem est cadentiarum genus. Ac primæ quidem & præcipuæ dicuntur *finales*. Sic in primo cantu, *lesu Pastor bone*, ad finem in Tabulâ descripto; nota ultima *sol*, in chordâ *D la re sol* dicitur *finalis*, aut etiam *terminatio*. At *fa*, in *fut fa*, in quo cadit *bone*, vocatur *medians*, seu *mediatio*. His accedit cadentia *dominans*, ut loquuntur, qualis in eo cantu potuisset fieri in *re* chordæ *A mi la re*. Atque his positis.

Dico I. Certum est existere cantus specie diversos, qui diversæ rationis cadentias, seu diversas mediations, & finales habeant; pariantque omnino diversos effectus; uti quidem probat experientia. Nam ex iis alius quidem hilarior est, alius autem aut tristior, aut suavior, &c. Illæ autem cantuum species singulæ, suis olim apud Græcos afficiebantur propriis nominibus, pro diversis aut civitatibus, aut provinciis in quibus præcipuè vigeant; unde alius dicebatur cantus Lydius, alius verò aut Phrygius, aut Ionius, aut Dorius, &c. Ecclesia Romana *Tonos* appellat, vulgò autem alii *Modos* musicos. At

Dico II. Ex communi doctrinâ cum Boëtio lib. 4. c. 16. Hanc *Modorum* essentialem diversitatem aliunde non peti, quàm ex diversis speciebus Diapason, quas, ut aiebamus supra, septem vulgò recensent; ex quibus sex tantùm sint utiles, ac legitimæ. Vnde sequitur sex tantùm utiles Musicæ modos essentialiter inter se diversos debere admitti. Quanquam

Not. I. Modos illos præterea dividi secundum

dum accidentalem duntaxat differentiam in *Authenticos, & Plagales*. Authentici seu Authentæ, Græcis autem *δεσπότες*, sic dicuntur, quasi principes & præcipui, cum longè gratiores sint, & majori virtute polleant. Alii autem, quod illis subserviant tanquam inferiores, vocantur *Plagales* seu *Plagii*, tum *δῆλοι*.

Et in Authenticis quidem servatur, ut inquirunt, harmonica divisio & mediatio, cum à diapente incipiant, superiori loco positâ *Quartâ*, in quâ desinunt. *Exempli causâ*. Quando ab *ut* gravi chordæ *C sol ut fa* ascenditur ad *sol* chordæ *G re sol ut*, indeque pervenitur ad *fa* acutum chordæ *C sol ut fa*, ex quo etiam ultra progredi potes ad *sol* chordæ superioris *G re sol ut*, ut hæreas in *fa* chordæ superioris *C sol ut fa*. Qui modus idem est cum *Dorio* antiquorum.

At illi oppositus *Plagalis*, v.g. *hypodorius* servat divisionem & mediationem arithmeticam, inferiori loco positâ *Diateffaron*, supra ascendente *quintâ*, seu *Diapente*. *Exempli causâ*. Quando ab *ut* chordæ *G re sol ut* ascenditur ad *fa* chordæ *C sol ut fa*, ut terminetur in *sol* acuto chordæ superioris *G re sol ut*.

Notandumque est 2. Hoc pacto etiam dici modos *naturales*, sive *authenticos*, sive *plagios*. Alioquin ex opposito diceretur *transpositus*, si *octava* ista quæ in primo exemplo incipit ab *ut* gravi chordæ *C sol ut fa*, inciperet ab *ut* gravi *f ut fa* decantato per *b* molle.

Notabis enim 3. Hic fieri commune discrimen cantus per naturam aut per *b quadratum*, tum cantus mollis, seu per *b molle*, quotiescunque initio cantus præfigitur *b molle* conjunctum cum clavi, ut descriptum vides ad infimam

mam partem tabulæ sub finem hujus tractatus appositæ. Porro ex dictis

Not. 4. Quo sensu Ecclesia Romana octo numeret *tonos*, seu cantandi modos : Claudinus autem, aliique numerent duodecim. Nempe quoddam isti omnes tum Authenticos, tum plagales complectantur; ex quibus octo solum elegit Romana Ecclesia.

C A P. V I. *Genera Musica.*

T*Ria* Musicæ genera tum ab antiquis, tum à recentioribus numerari solent. Primum, quod nobis familiare est, & magis naturæ consentaneum, vocatur *Diatonicum*, quia per tonum & tonum & semitonium progreditur. Quâ ratione vulgò decantamus *ut, re, mi, fa, sol, la*.

Secundum genus dicitur *Chromaticum*, quod minoribus intervallis procedit, semitonio videlicet, ac semitonio, tum semiditono.

Tertium genus appellant *Enharmonicum*, quod minimis intervallis perficitur, nimirum diesi, & diesi, quibus tamen accedat ditonum. Quanquam in istis alii leviter dissentiunt.

Notabis verò ex Martiano Capella *lib. 9.* Tres esse diefis distantias, uti quidem loquitur. Prima est brevior, quæ tetartemorica nominatur, ex eo quoddam quartam partem toni recipiat : Enharmonica quoque dicitur, propterea quod Enharmonicum modulandi genus per hanc maximè dimetitur. Secunda ab illâ major est : nam tritemoria nominatur, quoniam habet partem tertiam toni : Chromatica quoque appellatur, quia Chromaticum modulandi genus per ipsam funditur. Tertia denique habet tertiam toni partem, ac dimidiam tertię, & vocatur hemiolia, quoniam hemioli modum complet.

Not.

Not. 2. Genus musicæ Chromaticum, id est coloratum, sic appellari, quodd illustrando diatonico serviat, illique ornamentum ac suavitatem specialem afferat. Enharmonicum autem sic dicitur, quasi per excellentiam harmonicum, & auribus jucundum. Quanquam voce humanâ reddi non ita possunt intervalla aut chromatica, aut enharmonica; licet tremulis vocibus, Gallicè *fredons*, tonus in minores & minores partes soleat dividi. Nihil autem repugnat quominus semitonia minora harmonica, & dieses enharmonicæ exprimantur saltem beneficio musici instrumenti, puta Spinetæ nigra & alba plectra habentis.

Notandumque est ultimò, solum Genus Diatonicum esse, ut ajunt, *naturale*; alia verò ex arte inventa ad perficiendum diatonicum, & ab iis semper supponi. Nam, ut aliqui tradunt, hæc se habent perinde per proportionem ac *bonum, melius, & optimum*, ex quibus nec *melius* esse potest sine *bono* quod supponat: nec *optimum* sine *meliori*.

C A P. VII. Ratio Instituenda Musica.

VT instituaturs Symphonia, supponendum est aliquod *thema*, seu, quod vocant, *subjectum*, quod variis consonantiarum generibus ex arte misceatur; ac deinde præscribendæ sunt *partes* illi subjecto aptandæ.

Ex iis autem partibus, quæ omnium est infima, vocatur *Bassus*. Cui proxima solet esse *Tenor*, isque vel unicus, vel duplex. Tum sequitur *Altus*, seu *Contra*, aut *Contra-tenor*: Ac denique est *Superius*; illudque vel unicum, vel multiplex. Si enim pluribus quàm quatuor vocibus ab eodem choro decantari aliquid placuerit,

rit, geminatur duntaxat aut Tenor, aut Superius. Atque his positis,

Dico I. Hic usui ferè tantum esse debent illæ consonantiæ; nempe octava, quinta & tertia, vel simplices, vel replicatæ; hoc est, decima quinta seu disdiapason, duodecima seu diapason diapente, ac decima, quæ est tertia replicata.

Item, quando Basso & Superiori interjiciuntur Tenor & Altus, illis semper adhibere oportet consonantias generis diversi quæ propiores sint; ita ut si Superius efficiat octavam replicatam cum Basso, Tenor cum eodem Basso constituat decimam majorem, tum Altus duodecimam. Vel si lubet, ubi Superius jungitur in octavâ cum Basso, Altus cum eodem Basso reddet quintam, Tenor autem Tertiam. Atque istâ quidem methodo, si quando quatuor partibus canitur, tres illæ consonantiæ, cum eandem replicationibus distribuendæ sunt. Horumque omnium exempla subjicio in schemate appposito ad finem istius Tractatus.

Notandumque est, plures ejusdem generis consonantias, ex iis quas vocant *perfectas*, puta duas octavas, aut duas quintas, non debere fieri immediatas vel ascendendo, vel descendendo; hoc enim foret injucundum, defectu varietatis quam exigit recta symphonia. Quanquam lex illa non obligat, ubi sunt diversi versiculi per lineam distincti, ut in primo exemplo.

Item, ascendendo, aut descendendo, vitanda est connexio plurium sese immediatè consequentium tertiarum majorum. Etsi autem licet aliquando sequantur duæ vel tres tertiæ minores, tunc erit tamen jucundior cantus, ubi major subinde inserta fuerit.

Item, ad diesim in Basso, aliæve in parte, nun-

nunquam adjungitur aut octava, aut quinta, tunc enim potius replicanda est vel tertia, vel sexta. Ita P. Parrantius, vir in rebus musicis exercitatissimus.

Notabis autem 2. Has fermè solùm regulas Tyroni sufficere ad congruam compositionem, quanvis ad elegantem, ut ajunt, vel accuratiùs *observatam*, plures requiruntur, de quibus consulendus est modo citatus author, aliique artis periti; hæc enim ad nostrum institutum non faciunt, solaque praxi commodè addiscuntur. At

Not. 3. Inventas consonantias describi oportere in lineis, vel intervallis musicis: quæ lineæ vulgò sunt tantùm quinque. Item

Not. 4. Compositionem ejusmodi Musicam appellari antiquo nomine *contrapunctum*; quodd' olim loco notarum uterentur punctis sibi invicem oppositis.

Notabis verò 5. Duplex esse Contrapuncti, seu compositionis musicæ genus. Alia enim est Musica quæ dicitur *simplex* seu *syllabica*, in quâ singulæ notæ singulis respondent cum eadem mensurâ & valore. Altera est *figurata*, ubi scilicet variis ornamentorum generibus cantus illustratur. Cujusmodi primò est quidem *Syncope*, quando plures minoris valoris notæ cum aliquâ aliâ veluti colludunt, & ad sese invicem reducuntur. 2. Huc accedunt *fuga*, cùm pars una eodem cantu aliam consequitur, servatis legibus symphoniciæ. 3. Varietas motuum. 4. Artificiose vocis omissiones, quas vocant *pausas*. Ne quid dicam de iis quæ interdum petuntur ex Chromaticâ, aut ex Enharmonicâ.

Nihil etiam hîc dicam de *Neumate*; quando una syllaba plures notas certo iterationis ordine connexas decurrit. *Neuma* enim vix reperitur,

peritur, nisi in *plano cantu*, vel in *falsis bordonis*, ut vocant. Hæc autem ut præstantissima sint,

Dico tamen I I. Symphoniarchas, qui ornamenta hujusmodi nimis curiosè observant & consecretantur, peccare ridiculè contrà finem Musicæ. Prob. Quia vix hærent in ullis consonantiis, viresque illarum sic distrahuntur, ut sufficienter movere sensum non possint. Item, finis musicæ est *literam*, ut vocant, puta Psalmum Davidicum qui decantatur, ad aures cum aliquo voluptatis lenocinio quasi inferre, unde affectus pietatis in Dei laudibus celebrandis excitetur. Atqui in hujusmodi tam insulsis ac frequentibus fugis, tamque multiplici in syncope, vix quidquam illius rei percipitur; cum enim psalmi dictionem unam decantat Superius, aliæ autem partes alia verba intonant, confunduntur omnia; quod certè absurdum est, ne dicam stultitiæ proximum. Quamobrem fieret sapientissimè, si ab Ecclesiæ choro genus istud prorsus exularet, solùmque admitterentur in psalmodiâ falsi bordonis, aut Musica syllabica, paucis ac prudenter adhibitis ejusmodi ornamentis chromaticis, quæ *organis* magis accommodata sunt. Et verò hunc sensum fuisse Patrum Tridentinorum vulgè tradunt; confirmaturque usu Ecclesiarum principum, quæ in psalmis, & hymnis decantandis non probant nisi falsos bordonos, aut musicam syllabicam. Nec dubito, quin plures symphoniarchæ illi musicæ *defigurata* generi sic infœliciter adhæreant, quòd pro suâ imperitiâ, aut tarditate, musicam jucundam, cantusque eximios adinvenire nequeant. Vnde similes efficiuntur illi antiquo pictori, de quo Apelles, qui cum pulchras & elegantes tabellas aptis coloribus ac formis ornare

ornare nesciret, efficiebat totas aureas. Vel si lubet, eodem laborant vitio ac Rhetoricæ tyrones, qui in scribendâ oratione locum figuris vacuum nullum relinquunt.

C A P. V I I I. *Ars Decantanda Musica.*

EXcogitatae sunt notæ quædam, quæ certis in lineis aut intervallis collocatae, certos designent tonos ac voces, ex quibus perficiatur cantus. Ut enim oratio humana, tum animi nostri conceptus; ita & vocis modulationes scripto mandari possunt arte perquam mirabili.


Methineris autem ex dictis, eas esse voces musicas, nempe *ut, re, mi, fa, sol, la*. Quas quidem singulas ut assequaris, ubi certis quibusdam in lineis, aut intervallis disponuntur,

Not. 1. Ad initia linearum apponi certos characteres & figuras, quæ *Claves musicae* appellantur; quodd veluti aperiant nobis notarum ejusmodi cognitionem; unde judicamus quænam ex appositis notis vocetur vel *ut*, vel *re*, vel *mi*, & sic de aliis. Item


Not. 2. Triplex vulgò esse in usu Clavium ejusmodi genus. Prima est Basso propria, quæ vocatur clavis *f ut fa*, cujus figuram vides in depicto schemate. Secunda est clavis *G re sol ut*, propria Superioris partis, figuraturque in modum *G* majusculi vulgaris, quale in inferiori lineâ dictæ tabellæ contemplari licet. Tertia denique est clavis *C sol ut fa*, deservitque non solum Tenori & Alto, quibus appositam vides; sed etiam interdum Superiori, & Basso.

Dico igitur I. Clavis *f ut fa* indicat maxime notas, quæ notâ illâ in lineâ describi possunt, denominari *fa*. Unde consequenter in ascensu dicitur


Superius.




Altus.




Tenor.




Bassus.




Superius.




Altus.




Tenor.



Bassus.



Iesu Pastor bone Miserere nobis.



dicitur *fa. sol. la.* ab eâ autem descenditur cantando *fa. mi. re. ut.*

Dico I I. Per clavim *G re sol ut.* ostenditur eâ torâ in lineâ cui præfigitur, cantari vel *ut*, unde consequenter sic ascendatur *ut. re. mi. fa. sol. la.* Vel si apponatur *b molle* cum clavi in lineâ superiori, dicitur tantum *re* & consequenter *mi. fa. sol. la.*

Notandum enim est, quodd ubique inter cantandum præfigitur *b molle*, sive in lineâ, sive in intervallo, ibi semper dici *fa.*

Dico I I I. Postrema tandem clavis, quæ est *C sol ut fa*, denorat eâ in lineâ decantari posse vel *sol*, vel *ut*, vel *fa*. At nisi *b molle* adjungatur, semper in eâ debet dici *fa*, ut in ascensu fiat iste cantus, nempe *fa. sol. la.* In descensu autem *fa. mi. re. ut.* At si *b molle* adjungitur; in eâ decantatur *sol*; unde consequenter sic descenditur, *sol fa mi re ut.*

Notandum verò est, *b molle* initio cantus non præfigi, nisi ad chordam, vel ad interval- lum *B fa b mi.* Quanquam in serie cantus interdum canitur *fa* aliis in chordis, ut quando *b molli* posito in *B fa b mi* ascenditur ad notam *E mi la*; quo in casu, ab illo *fa* non idcirco ascenditur per voces *sol. la.* aut descenditur per *mi. re. ut.*

Dico autem I V. Cum altiùs, nempe supra *la* ascendendum est, aut infra *ut* descendendum, debere illas voces replicari cum certo genere *mutationis*. Quam quidem observandæ mutationis legem, ut faciliùs in praxi intelligas:

Dico V. Diversis sub clavibus diversa est mutandæ notæ ratio. Nam ubi est v. g. clavis *C sol ut fa* sine adjuncto *b molli*, sic decurruntur

tur notæ omnes in ascensu *fa. sol. la. fa. sol. re. mi. fa. &c.* Ex quo quidem *fa* sublimi reditur in hunc modum *fa. mi. la. sol. fa. la. sol. fa.* Tum ex isto *fa* clavis *C sol ut fa* sic descenditur *fa. mi. la. sol. fa. mi. re. ut.*

Quando verò canitur sub *b molli*; sic decurruntur notæ ascendendo, *sol. re. mi. fa. re. mi. fa. &c.* Tum sic reditur *fa. la. sol. fa. mi. la. sol.* Indeque si fiat descensus, ita canitur, *sol. fa. la. sol. fa. mi. re. ut.*

Eodem per proportionem modo res se habet sub clavi *f ut fa*, quæ si conjuncta est cum *b molli*, ista notarum series servatur in ascensu *fa. sol. la. fa. sol. &c.* Vbi autem redeundum est, ita cani debet *sol. fa. la. sol. fa.* Porro ab ista clavi sic descenditur *fa. mi. la. sol. fa. mi. re. ut.*

Sin abfuerit *b molle*, sic decantantur notæ ascendentes *fa. sol. re. mi. fa. &c.* Tum redeundo canitur *fa. mi. la. sol. fa.* Ac denique descendendo ex ista clavi dicitur, *fa. la. sol. fa. mi. re. ut.*

Ad clavim *G re sol ut*, ubi adest *b molle*; sic ascenditur, *re. mi. fa. sol. re. mi. fa.* descenditur verò in hunc modum, *fa. mi. la. sol. &c.* Sin autem fuerit absque *b molli*, sic dicitur *ut. re. mi. fa. sol. la. fa. sol. la. &c.* Tum in descensu *fa. la. sol. &c.*

Hactenus de naturâ, & qualitate notarum; per quas toni omnes exprimuntur. Superest tantum ut agamus de illarum quantitate, seu mensurâ, & pausis subinde adjunctis.

Dico igitur VI. Notarum quantitatem mensurari elevatione & tactu manus; quæ quidem elevatio manus Græcis dicitur *Ἀέσις*, tactus verò est *Θέσις*, motumque omnem illum, quo

mensuratur valor notarum; *plausum* vocat D. August. Porro illa nota vulgò dicitur esse mensuræ unius integræ, quæ manus elevationi simul & tactui respondet: contrà autem quæ tantum est mediæ mensuræ; vel soli elevationi, vel soli tactui coaptatur. Quod etiam *pausis* convenit, quæ sic dicuntur quoque esse vel unius integræ, vel mediæ mensuræ, &c.

Verùm aliæ sunt plurium, aliæ pauciorum mensurarum notæ, aut pausæ; prout tales, vel tales habent figuras: quod tu facillè comprehendes, attendendo ad schema descriptum in infimâ tabellæ parte, ubi singulis notis pausæ adjunguntur similis mensuræ; nec consequens nota, aut pausa habet nisi dimidium valorem antecedentis.

Notandumque est 1. Quodd si notæ apponitur punctum aliquod, in ea etiam vox sustineri debet, æquivaletque mediæ parti notæ illius cui adjicitur. Quanquam

Not. 2. Hic sermonem esse tantum de eo genere mensuræ, quam vulgò appellant *plenam*; soletque jam designari ad initium cantus per majus C. lineâ rectâ intersectum. Alioqui si fuerit simplex C. absque hujusmodi lineâ intersectante, per solos duntaxat *tactus* mensurabitur valor notarum; unoque tactu definietur mensura integra, cujusmodi erit tribuenda notæ, ut loquuntur *nigra*; alioquin *alba caudata*, continebit duas mensuras, duplicemque tactum sustinebit. Item per literam arithmetica 3. designari jam solet ea quam *triplem* dicunt, quia ternis motibus producit.

Atque ista quidem universa pluribus tradi possunt, & cum majori præceptorum ambage, aut variarum etiam appellationum farragine, quibus

quibus tamen doctior non fies ; neque aliud superest quidquam ad ea ut decet perdiscenda , nisi ut constantem usum adhibeas.

Sed quæ Divinitus orta est Musica , Divinis maximè laudibus decantandis servire debet. Sic enim Psal. 70. *In te*, inquit ille, *cantatio mea semper*. Cui perpetuam ad æternitatem gratiarum actio, salus, honor, & GLORIA.

F I N I S.



I N D E X

T R A C T A T V V M

E T

C A P I T V M.

P R Æ F A T I O

Ad universam Mathematicam.

De Natura & partibus Mathematicæ, Pag. 5

P A R S P R I M A.

De Numeris integris.

CAP. I.	N atura, & partes hujus facultatis.	7
II.	De Additione.	8
III.	De Subtractione.	9
IV.	De Multiplicatione.	12
V.	De Divisione.	15

P A R S S E C V N D A.

De Numeris fractis.

CAP. I.	E orum Natura & diversitas.	19
II.	Reductiones fractionum varlis problematis exponuntur.	20
III.	Additio fractionum.	22
IV.	Subtractio fractionum.	22
V.	Multiplicatio fractionum.	22
VI.	Divisio fractionum.	22

P A R S T E R T I A.

De Proprietatibus numerorum.

CAP. I.	D e ratione, proportionem, & progressionem numerorum.	23
II.	Alia	

I N D E X.

II. *Alia proprietates numerorum, & problemata Arithmetica.* 26

III. *Alia problemata.* 28

ELEMENTALE GEOMETRIÆ.

P R Æ F A T I O.

Natura & Divisio Geometriæ. 33

CAP. I. **D**E Lineis & angulis. 34

II. **D**E figuris planis. 35

III. *De figuris, seu corporibus solidis.* 38

IV. *Proprietates Angularium.* 40

V. *Proprietates figurae Triangularis.* 42

VI. *Proprietates aliarum figurarum.* 46

VII. *Proprietates figurae circularis, & Sphaerica.* 48

VIII. *Descriptiones linearum.* 50

IX. *Alia praxes circa figuras.* 53

GEOMETRIA PRACTICA.

P R Æ F A T I O.

De ejus naturâ, & vario genere mensurarum in communi. 59

CAP. I. **A**ltimetria, seu longimetria, & ejus principia. 61

II. *Altimetria, seu longimetria praxes.* 64

III. *De usu Trigonometri.* 68

IV. *De usu Quadrantis Astronomici, & Sinuum.* 70

V. *Planimetria,* 75

VI. *Stereometria.* 77

Appendix de Circino proportionis. 79

Quo pacto agrum, arcem, vel castra quis dimetiri, & in chartâ delineare ex sola inspectione possit. 81

I N D E X.

S P H Æ R A M V N D I.

P R Æ F A T I O.

De Astronomia, & de principiis cognitionum
coelestium. 83

CAP. I. **P**rotheoria cœli. 87

II. **P**Varia cœli regiones per circulos imagi-
narios distinctæ. 91

III. De Zodiaco, & signis cœlestibus. 95

IV. Officia & usus circularum cœlestium. 96

V. De aliis circulis Sphæra cœlestis, & de ejus
diversa positione. 100

VI. Astrorum numerus & figura. 103

VII. Astrorum Lumen, macula, Eclipses. 107

VIII. Astrorum distantia & magnitudo. 111

IX. Astrorum motus. 116

X. Motuum cœlestium affectiones nonnullæ.
120

XI. Instrumenta Astronomica. 125

XII. Præxes Astronomica. 128

C H R O N O L O G I A.

P R Æ F A T I O.

De Natura hujus Chronologiæ. 138

CAP. I. **D**E Die. 139

II. **D**E horis. 141

III. De hebdomade. 143

IV. De Mense. 144

V. De Anno. 147

VI. Anni Instauratio Gregoriana. 151

VII. Varii Annorum Cycli & periodi. 154

VIII. Præxes Chronologica. 158

I N D E X.

G N O M O N I C A.

P R Æ F A T I O.

De Natura Gnomonicæ.	169
CAP. I. V aria species horologiorum solarium.	170
II. Quænam in genere sint necessaria ad constructionem horologii Sciotherici.	172
III. Horologium horizontale construere.	173
IV. Aliâ methodo describere horizontale.	178
V. Eodem circini intervallo describere horizontale.	179
VI. Horologium verticale construere.	180
VII. Construere Meridianum sive ad Orientem, sive ad Occidentem.	181
VIII. Æquinoctiale construere.	183
IX. Polare construere.	184
X. De horologiis irregularibus & Declinantibus.	185
XI. Communis methodus construendi horologii declinantis.	186
XII. Horam noctu ad radios lunares deprehendere.	189
XIII. Ad horologium lunare periodicos motus maris exponere.	190

S P H Æ R A T E R R E S T R I S.

P R Æ F A T I O.

Quæ præsupponi debent de Gravitate Terrestris.	191
CAP. I. L ocus Terra.	197
II. L igura Terra.	200
III. Magnitudo Terra.	203
IV. Magnetismus Terra. Vbi de naturâ & proprietatibus virtutis magnetica.	206
V. Terram esse corpus Magneticum.	213
VI. Im-	

I N D E X.

VI.	<i>Immobilitas Terræ tum ad centrum, tum circa centrum mundi.</i>	213
VII.	<i>Maria diversis Terrarum regionibus definire.</i>	219
VIII.	<i>Regiones Terrarum partiti.</i>	222
IX.	<i>Præcipuas Terræ civitates recensere.</i>	226
X.	<i>Fluvios totius Terræ insigniores recensere.</i>	228
XI.	<i>Terræ descriptio respectu ad Cælum; & de variis ejus incolis.</i>	231
XII.	<i>Præces Geographicæ.</i>	233

O P T I C A.

P R Æ F A T I O.

	<i>Natura Opticæ.</i>	237
CAP. I.	<i>Visionis Organum.</i>	238
II.	<i>Quomodo, & quâ in parte oculi fiat visio.</i>	241
III.	<i>Conditiones ad visionem ex parte organi.</i>	246
IV.	<i>Conditiones ad visionem ex parte objecti.</i>	252
V.	<i>Visionis genus multiplex.</i>	255
VI.	<i>Communium objectorum visio.</i>	261
VII.	<i>Visus fallacia.</i>	263


M U S I C A.

P R Æ F A T I O.

	<i>Hujus Tractatus materia & divisio.</i>	266
CAP. I.	<i>Quid sit Musica, & de vocibus musicis.</i>	267
II.	<i>Musica Intervalla.</i>	269
III.	<i>Consonantia.</i>	272
IV.	<i>Musica proportionum.</i>	275
V.	<i>Modi musica.</i>	278
VI.	<i>Genera musica.</i>	281
VII.	<i>Ratio instituenda Musica.</i>	282
VIII.	<i>Ars Decantantia musica.</i>	286

F I N I S.





I-2.





